

Panarangan di Kitab Laid

Tafsiran di Buuk
Kinotimpuunan sampai
2. Raja, Nabi Amos,
Yesaya, Hosea, Mikha,
Yoel om Obaya

T.A. Forschner

1994
Gereja Protestant sid Sabah
Kudat

Umpatod

Ioku Sakai Ulion do PCS banalko otomon o ginavo mongontok do PCS monorima kaseh sid Pdt. T. Forschner, tu nakadapat iosido mangagama do buuk panarangan antad sid Kitab Laid bahagi do PCS. It onsi di buuk dino, ino-no

1. Panarangan dit ensanan i Kitab Laid
2. Tafsiran di Buuk Kinotimpuunan, Kolobusan, sampai Ulangan, Yosua, Hakim, Rut,
1.-2. Samuel, 1.-2. Raja
3. Tafsiran di nabi Amos, Yesaya, Hosea, Mikha, Yoel om Obaya.

I Amai Forschner banalko magavi mangagama do buuk dino bahagi do PCS. Sabap agazo o kenginan dau, supaya i PCS ajadi do gorija di Tuhan di kopionong di kenginan do Kinoringan. Sampai amu-no kiroon dau dot opogos iosido om kapamakai do ringgit om kosukupan kondiri, sukul ino buuk dino agama sampai opongo.

Sabap ino ioku banalko agazo o ginavo-ku mongonsug di sokovia i anggota do PCS, supaya mamasa om mongoguna dino buuk. Sampai agazo-po ot harapan-ku, supaya sid tohudi't adau varo sid pialatan dot anggota do PCS sumuntu di Amai Forschner mangagama do buuk bahagi do PCS omi gorija isuhut di tahak do Kinoringan sid dau. Pongovian, insan-po vagu mongontok-oku di PCS monorima kasih sid Amai Forschner om sid ongoobpinai vokon di nakatabang bahagi mangatag do boros. Minta dua tokou, supaya i Kinoringan soumul mamarakat dau, supaya soumul ali-ali iosido om it ongkob dau om i gorija dau sid German.

01. Julai 1994

Pdt. Marunsai b. Dawai
Sakai Ulion do PCS

It diti nitahu-no sid website, supaya minsanko i toun 2010, kakali kadapat mamakai it ongosolumpak vagu do Rungus, minsanko i buuk di nipirin diri, nga navi-no. Julai 2010 T. A. Forschner

PANARANGAN BAHAGI DI KITAB LAID

A. I kinojodian di bahagi keso do Kitab di retanko KITAB LAID ko Perjanjian Lama.

Ino bahagi di KITAB dino, nga 39 ot ongosurat dit amu enizo akapal. Ong sid Kitab Momogun, tu onibak, amu nokosuvang kavi it ongosurat dino. Antava ong i Kitab di sid palad do RC, varo-po vagu nakamung dit a-ko piro ot ongosurat vokon i nokembulai sid bai Kitab di boros do Yunani, ino-no i Kitab i retanko Kitab di turu nopod antawa *Septuaginta*, sabap turu nopod ot ongoulun minanalin di Kitab sid boros do Yunani.

I hal dot amu enizo kogumu it ongosurat sid Kitab Laid dino antad sid vaza manantu om manarang di Kitab Laid. Varo hiza do miniupakat om minanantu it ongoelo dit Ugama doYahudi do pengkaa, Itit ongosurat diti, nga kaamung-no sid Kitab dot Ibrani, ka, om i vokon, nga a-kosuvang sid Kitab diti, ka. I kinopontuan di iadino, 100-ogi toun di kinotoliban di kinosinaan di Yesus (TM 100).

Iad-no ino o kinosinaan di Kitab Laid. Varo-no laid ong it ongobuuk diri di kodung nokosurat-no, nga retanko "buuk-no dot osusi" ino dino om nakamung sid ongobuuk vokon di iadino o harati. I gulu di retanko iadino, ino-no i retan do TAURAT, ino-no i buuk do Kinotimpunaan, Kolobusan, Imamat, Bilangan om Ulangan. I kinapangan di Taurat, hiza dinokouli-no vagu antad sid narakop sid Babil (TGM 587-539) kokiraa Abad koonom guluko i Kristus.

Iri-ogi i bahagi dit Ongonabi di noumpug-no do TGM 200. Sabap ino varo boros di Yesus kananganko i Kitab, Ino-no i Taurat om it Ongonabi. Suvai ontok di TM 100 om nakamung-ogi it a-ko piro it ongosurat vokon iadko i Ayub, Zabur, Nehemia, om it ongobahul om sundait om keloo di Sulaiman. Iad-no ino i kinempakan dit ongobuuk ong biano: Usul, tudukan, nabi.

It ongongaran dit ongobuuk dino.

I buuk *Kinotimpunaan* manarang di kinourugan do pomogunan om it usul dit angaki dot Israel, ino-no i Ibrahim, Ishak om Yakub. I buuk do *kolobusan* manarang di kinolobusan dit ongoulun dot Israel antad sid Masir. I buuk dot *Imamat* manarang di hoturan sumambayang, i buuk do *Bilangan* mongimbulai di kogumuai dit ongorurungan dot Israel om i buuk dot *Ulangan* mongimbulit dit ongohoturan om adat om Taurat. Vokon-no o ngaran di buuk ong manarang dit onsi di buuk, vokon-no ong i ngaran inanu-no antad sid boros di gulu-no nokosurat sid buuk dino.

Suntuan, Kinotimpunaan 1, 1:

I kinotimpunaan i Kinoringan minongurug dit avan om i tana. ka.

It ongongaran dit ongobuuk vokon nga iadinoi: Rut, Hakim, Samuel, Raja. Minsanko varo pongitungan dot a-ko piro ot ulun dot, I Kitab dino boros do Kinoringan di tinaip ko sinurat do riniba, dot ong otopot-no, ogumu ot ulun o nakamung sid gama mongimbulai dit ongobuuk di Kitab dino, ino-no it ongoulun di kipangalaman om nokopurimon do kensamakan sid Kinoringan di minongohondom om minongusul di pangalaman dino.

Vokon-no ot ulun o bai pinosurat di pangalaman di koruhang, ko minongumpug dit ongoboros om tudukan om kentalangan ko nososorou om ongousul di nakatahu-no sid istana do raja. Sid tahudi varot ulun di minongumpug di sokoviaai it ongosurat di nosodia-no laid do iadko it a-ko piro ot ovud di misasavang sid iso-no o bavang. Iso ot ulun di baike setiausaha di Nabi Yeremia, ino-no i Baruk manarang do kuran nokembulai i Buuk di nabi Yeremia. Topot ong i kogumuai dit ongobuuk om surat sid Kitab Laid, amu minanarang dot isai it ulun minonurat. Bai sid ongopongoretan om i vaza momoros ot atalahas do sera nokembulai it tasantanidtanid o surat dino.

B. It ipat-ipat i surat om buuk di Kitab Laid dino.

I. It Ongobuuk dit USUL

a) I Taurat ko i limo o buuk do Taurat

Suvai nokosurat-no it ongotuturan om tangon om pangalaman om panarangan sid surat om najadi-ogi inot limo o buuk dino do retanko Taurat. Gulu-keno, baiko hondomon dit ongoutok dit ongoulun om razat inot ongotuturan dino. Ino Taurat dino manarang di kinourugan do pomogunan, it usul dit angaki dot Israel, ino-no i Ibrahim, Ishak om Yakub, i Kinolobusan dit ongoulun dot Israel antad sid Masir, i kinotorimaan di Pinonuhuan do Kinoringan sid burul Torsina, i kinolombusan sid belantara, sampai sid volit di pomogunan do Kana om i kinapatazan di Musa. I tinomod dit usul dino, manarang sid ulun di mamasa di buuk dino do kuran i kinurugan om it a-ko piro o laang di kinojodian di bansa dot Israel sampai nokosodia-no ioti sumuvang om manansanganu di pomogunan do Kana. It ongogulu-gulu o minongusul dit usul dino sid anganak om sid ongomuaki, sampai hiza do sumambayang, it Imam o mamasa dit usul dino sid piumpugan, supaya i piumpugan mongohondom dit usul dino sampai mangaharati di vaza do Kinoringan mangagazad om monunda di bansa dau.

Sid tanga, ino-no Kolobusan F. 20 sampai Bilangan F 10 varo panarangan do kuran i Kinoringan minanahak di hopod i pinonuhuan sid Torsina om i kinogumuai di hoturan sumambayang om it ongoadat om undang-undang di bansa om ugama dot Israel. Suvai nanu-no om natarang-no ino kavi om nokolombus-ogi ioti sid belantara, ka. Ino-no i tinomod, It ongoimam minanarang sid bansa dot Israel do kuran ot atag o gama om koposizan om kosuhut sid kovosihan di Kinoringan.

Na i Buuk dot Ulangan manarang di boros om tudukan do kovian di Musa di baiko-po hinumuntad iosido mamung sid ongogulu-gulu diri.

b) I buuk di *Yosua* sampai 2. *Raja* retanko *Usul dit Ulangan*.

Iadko i Taurat nga i kinoumpugan di limo o buuk, it Usul dot Ulangan dino kinoumpugan dit a-ko piro o buuk, ino-no Yosua, Rut Hakim, 1. om 2. Samuel, 1. om 2. Raja. Ong i Rut nakamung sid tohudi, tu i tangon di Rut manarang dot odu iosido di raja Daud. It ongobuuk dit Usul dot Ulangan monuturan dit Usul di bansa dot Israel antad di kinarangkatan sid Kana sampai sid kinarakapan sid Babil diri. (TGM 1230 sampai TGM 587). Ino-no it onsi, Iso-no o Kinoringan om iso-no o panambayangan dot osusi bahagi dit iso-no o bansa, ino-no it Israel. Ino bansa dot Israel nopili antad sid pialatan dit kinogumuai it ongobansa vokon do jinadi do bansa, ino-no i hopod om duvo o rurungan di ginazad-no di YAHVE KINORINGAN om tinunda-no dau sampai nokosuvang ioti sid pomogunan do Kana om nokotorima dit iso o tempat di kosomungan do Kinoringan, ino-no i panambayangan dot osusi, i retanko iti-no ot inintononon do Kinoringan (1. Raja 8) Sid panambayangan dino kotoguvang it Ongoisrael sid Kinoringan, tu monorima kaseh om mongoguna om mokitulung do Kinoringan. I mula-mula, ino panambayangan dino bai dundung do kumut ko kulit do dupot o ginama, iri-ogi valai-no banal do vatu ot nipongorinding sid Yerusalim.

I Buuk di Yosua sumuput sid buuk dot Ulangan, ino-no i kinapatazan di Musa. I ginumanti di Musa, ino-no i Yosua, om i Yosua-no dino o minangagazad di bansa dot Israel mitupak sid bavang do Yarden sumuvang sid Kana, (Yosua 1-12). Iri-ogi i Yosua-no o minamahagi di pomogunan do Kana sid hopod om duvo o rurungan. (F. 13-21)

Sid F. 22-24 i Yosua-no o minongonsug di bansa dot Israel patatap sid hoturan om pinonuhuan do Kinoringan, supaya atarang o gama dioti sumuhut om mongoguna di kenginan om hoturan om pinonuhuan do Kinoringan, ino-no, iadko i Kinoringan o manansanganu om mangagazad om monunda di bansa dot Israel o gama di bansa dot Israel monuli di samod om kovosihan om tunda do Kinoringan sid saralom di vaza dau sumamba om sumuhut di kenginan om kovosihan do Kinoringan.

I Buuk dit Ongohakim mongusul dot, Minsanko nokentoron-no sid Kana it ongorurungan dot Israel, nga asarok-no varot ongobansa vokon di mangasau om mongorumpak sampai monusa dit ongorurungan dino di miniiso sid bansa dot Israel, ino-no i bansa dit bai humarap sid hoturan om kotulungan do Kinoringan. I hiza di kinolobusan antad sid Masir, okonko sojal o minongorumpak do palabus dioti diri, om i hiza di sumuvang-ogi sid Kana, nga pengkaa, okonko sapatang o niponori dit ongobansa di pasok sino. Iadko i vaza dioti monolod di kuta do Yeriko. Baiko uni do toburi om guralak dot ulun o minongohuzas di kuta, ong otopot, i gama do Kinoringan mangagazad om monunda dioti. Topot ong it ongobansa vokon kisojal dit elo mongorumpak om mangarampas do pomogunan om ongokuta.

Kodung varo kosusaan do iadino, kondiri do Kinoringan momili om pengkakat dit a-ko piro ot ulun dot osiou do mangagazad om mangahatul di bansa dot Israel sid tanga do kosusaan. Iri-ogi pungananan-no it ongoulun di iadino o tugas dino dot, Hakim, minsanko okonko enizo o tugas dioti dino do mongohukum di razat dot Israel. Na i kinogumuai dit ongokinosusaan diri antad kavi sid gama dit ongoulun dot Israel tumolikud sid hoturan do Kinoringan, ino-no minamung ioti sid ugama dit ongoulun do Kana di kakal mavul-gavul sid pialatan dioti. I duvo i buuk Samuel o manarang di kinembulazan di karajaan dot Israel dot i Samuel o mamangkat om mamarakat di raja Saul om iri-ogi i Daud.

Na it ongoulun di minongumpug om minongonsi di tuturan di buuk di Samuel dino minamakai di tangon laid, ino-no "it usul di kinosukadan di Daud sampai i karajaan dau" (1. Samuel 16-2. Sam. 6) om iri-ogi "It usul di nopili-no om napangkat-no i sumusuhut di raja Daud" 2. Samuel 7 sampai 1. Raja2,11)

I duvo i buuk do Raja minongompus dit usul di karajaan dot Israel. I Sulaiman o ginumanti (sinumuhut) di raja Daud. (1. Raja 1) i karajaan dau dino banalko ahatul (1. Raja 6-8) Iosido-no pinengkakat di panambayanan sid Yerusalim bahagi dit ensanan i bansa dot Israel. Rontob-nopo, kodung minatai-no i Sulaiman, nabahagi-no i karajaan: varo i sambahagi di retanko karajaan do Yahuda sid ponong Selatan do sid Yerusalim ot ibu kuta om intoronon di raja, sampai sid Yerusalim-no o puun di hoturan di gama sumambayang sid panambayanan di Sulaiman. Ong i karajaan ponong sid Utara, sid Sikem ot ibu kuta. Ong i panambayanan sid Betel om sid Dan, nga varo, supaya it ongoulun sid karajaan dino amu-no rumikot sid Yerusalim. Na i minongusul di buuk dit ongoraja dino, amu avantangan di kobuatano om hoturan dit ongoraja di sid karajaan dot Utara om it a-ko piro o raja di sid Selatan, nga araatani iosido di kavazao om hoturan dioti.

Na varo-pot usul di nabi Elia (1. Raja 17-2. Raja 2) om iri-ogi i kinorungazan di karajaan sid Utara di rinumumpak sampai notori-no di bansa dot Asur (TGM 722) om i-po kinompusan di karajaan do Yahuda om i kinohuzasan do Yerusalim ontok di TGM 587. Sid kovian di 2. Raja varo-po harapan do ngaran-no, ino-no i raja Yoyahin di narakop-no sid Babil, nirusod-no di raja do Babil sid istana dau.

I buuk Tawarikh keso om koduvo mongimbulit dit ongousul di Raja keso om koduvo sid saralom di gama monguji dit ongoraja. Iti-no o sabap dot nalazan ino sid Kitab Momogun.

I buuk Ezra om Nehemia mongusul di hiza di Abad kolimo dot varo suhu di raja do Parsia dot ipengkakat-no vagu di hoturan dit ongoulun dot Israel sid Yerusalim, jodizon i Yerusalim do daerah di karajaan do Parsia. Nipoumbasi-no vagu i kuta om panambayanan do Yerusalim. Ioti Nehemia om Ezra ot inanu-no do mangahatul vagu di razat do Yahuda sid Yerusalim om sid daerah do Yahuda, dot ioti-no dino o wakil di raja do Parsia sid Yerusalim.

II. It ongo buuk do Tudukan

Ong otopot amu atalahas tantu i pongoratan do TUDUKAN dit onsi banal dinot a-ko piro i buuk dino. Sabap i sokovia i it ongo buuk di nokosuvang sid bahagi koduvo di Kitab Laid dino o manalahas di

kavazao do riniba om it ongokosusaan om nahajangan sampai pangalaman do riniba, supaya kaharati i riniba di tinomod do kopolisan om i vaza mongohormat om mongoguna do Kinoringan om i kotulungan dau. I kogumuai diti buuk diti mad asambatan om bahul om longoi di banalko arantang o boros dit oruhai banal mangaharati.

a) I Buuk di Ayub. Sid kotimpuunan om kovian varo-not usul di nabambaran di Ayub diri, i kagasan om i kokosogo di Ayub: Ayub F. 1-2 om iri-ogi noulit-no i kolunduo om kohormatan dau (Ayub F. 42, 10-17) Sid pialatan dino duvo o tuturan di kanangan ko i kavazao di Ayub, varo tolu ot anggai-anggai di Ayub do banalko kihukum. Ioti dino kinumiupakat om minonuduk om minonginsasana sampai minamajal di Ayub. Na nokosurat-no i timpa om dahava di Ayub di pajal om i kovosihan dioti dino. It ongoanggai-anggai di Ayub dino minanasil di Ayub. Igorot dioti dot antad sid ongokasalaan di Ayub o nakasabap dinot ongokapagasan di Ayub. Topot ong i Ayub iri-no ko iri, tu manarang om dumahava dot aso sala dau. Suvai sid kovian di buuk dino om iri-ogi kondiri do Kinoringan manalahas dot songkuro i kozoos di kohormatan do Kinoringan sampai aso tanganan do riniba manala. Iri-ogi mokimahap-no i Ayub sid Kinoringan sampai sumamba sid kuasa do Kinoringan. F. 40, 3-5 om 42, 1-6)

b) I Buuk do Zabur. Zabur ino-no o harati, longoi. It ongozabur dino noumpugan it ongolongoi dit ulun Yahudi. Okonko piro-piro o kuaya om ongolongoi do nagama dit ongoulun. Vokon-no ong mad liturgi do manambayang(Z. 95, 118, 24) vokon-no ong longoi do mamarakat, vokon-no ong longoi do mogkorudu di mamalang do kosusaan om kosipan dit ulun dino, vokon-no ong longoi di sumaap om pakaraat sampai mongolupu do sangod. . .

c) Amsal om i Pengkhotbah om i Bahul di Sulaiman. Iti kavi retan dot antad sid keloo di Sulaiman di manarang om polombus sid ongotohudi dit ongopangalaman dit ongogulu-gulu. Nihodtol-no dit **Amsal** dot, I gama rumonok do Kinoringan o puun do keloo. Topot ong it ulun dot obungou pokihi di keloo om it ira dit atag (F. 1, 7)

Ino-no i puun do keloo, suvaiko tumoguvang sid Kinoringan om sumuhut di hoturan do Kinoringan om matagogi o gama om kavazao om kobuatano dot ulun.

Pengkhotbah nga napampanan dot ongoboros do hukum, topot tanid o panangan. Tu noboros sid buuk dino dot nunu-nopo i gama om pongitungan do riniba, porosuma kavi. Ino buuk dino nokembulai dati di hiza di noporinta it ulun do Yahuda dit ulun do Yunani. Mad nakagavul-po sid tudukan dino it a-ko piro o tudukan om keloo dit Ongoyunani.

Bahul nga it ongolongoi di duvo ot ulun di miginavo, di manarang dot ong antad sid Kinoringan, banalko ahatul i kobuatano do miginavo di kusai om it ondu sampai aso karaatan sid gama miginavo.

III. It Ongonabi

It ongobuuk di nabi dino nongokosuratan-no it ongoboros om nongosorou sampai i nipemot do Kinoringan it ongonabi. Pengkaa dino o kinopongumpugan dit ongobuuk dino. Gulu-po, monginggogongou it ongonabi do polombus monuturan sid razat di boros om tudukan antad sid Kinoringan, isuhut di kohorotizan dau sampai tinunda-no iosido di Sundu do Kinoringan. I hiza do monginggogongou dino, vokon -no ong okudik ot ongoulun do nokening, vokon-no ong sid tanga dot umpug ko do pesta. Na ombo o koumpug sino kening di boros di nabi. Najadi-po i noboros it nokentahan-no laid di nabi, om varo koruhang di nabi ko ulun vokon di nokohondom di noboros-no laid di nabi, nisurat-no dau sampai najadi-no do buuk. Vokon-no ong aso tinganan di nabi mumbongut tumoguvang sid ulun di pamarasan dau. Na varo monurat do iadko setiausaha dau do prikot di surat dino sid ongoulun.

Sid tohudi inot ongosurat dino di nokopiaamungi sampai-no rinuzod sid iseso o linundunan, sinusun-no monginumpak. Na ombo o nabi di nokogulu posurat sid linundunan dino, ino-no ot nipomungaranan di buuk.

Suvaiko kosondot-po i noboros-no laid di nabi, iri-ogi atarang-ogi dot otopot i boros om nosorou di nabi, tu nokosunu-no i nununopo i noboros laid di nabi diri.

a) **I nabi Yesaya**

I buuk di nabi Yesaya, varo't 66 fasal. Ino buuk dino ajadi do suntuan. Sid iso o buuk dino, varo nokosuvang dot okonko piro-piro o nosorou om tudukan om boros di tasantanid-tanid o nabi sid iso o lundun antawa sid iso i buuk dino. Ong boros kondiri-no di nabi Yesaya di pentahan di pinamarasan do Kinoringan, baikoi sid fasal 1-12. Ino-no kananganko i kuta do Yerusalim di tinombubu di raja dot Asur di hiza dot abad ko-8 TGM.

It ongo fasal 13-23 baikoi boros om pajal om hukuman ponong sid ongo bansa vokon. Sid ongo fasal diti, baikoi it a-ko piro o bahagi o banal-noko antad sid nabi Yesaya kondiri.

It fasal 24-27 atarang-no dot a-elaan ong isai o minomoros. Inot ulun dino pentahan di kobuatano di hiza sid tohudi om i hiza di kopongohukuman penlaid om kuran o kosinangan ong otongulit-no vagu it Israel.

Sid fasal 28-32 na boros-no vagu di nabi Yesaya di hiza do lumohing-no iosido, om i sid fasal 33-35 na manarang do kuran ong i hiza di sid tohudi-no banal. Topot ong i sid fasal 36-39 o mongusul i Yesaya di sejarah, miabal di sid 2. Raja 18-20, ino-no i sakit di raja Hiskia.

Tanid-no banal ong i sid fasal 40-55. Tanid-no o nabi, tu osodu o pialatan di hiza di nabi dino. Sabap hiza-no do narakop sampai novit-no sid Babil (TGM 560-540 TGM) i rurungan do Yahudi di hiza dino. I nabi dino pentahan sid ulun do Yahudi di sid Babil do varo koulian vagu dit ongoulun do Yahudi sid Yerusalim om otunggol vagu i kuta do Yerusalim. I harati, i nabi dino nakasasino laid iosido di kinotorian om kinopongorongazan di Yerusalim (TGM 587-586). Tanid-no vagu ong i fasal 56-66. Inot ongo fasal dino nokosuputi nga okonko enizo o boros om okonko iseso o nabi do minonuduk. Keso, ulun iosido do nokouli sid Yerusalim. Manarang iosido sid ongoruhang dau di kosopulan om kovosihan do Kinoringan sid bansa dau. I tomodon monginsasamod dioti di banalko humongkob om nopupusan di nokemot om nakasasi di baikoi pogun-po i Yerusalim. Vokon-no ong varo boros di baikoi mongimbulit di noboros-no laid sid fasal ko 40-55.

Na koubasan dit ongoelo do Kitab, ino buuk di nabi Yesaya dino, pinitolu o bahagi, ino-no

Fasal 1-39 i Yesaya banal

Fasal 40-55 i Yesaya koduvo, ka

Fasal 56-66 i Yesaya kotolu dino

I kiro-kiro dit ongoelo: Ino lundunan di buuk di Yesaya dino, abad ka4 om nopongo-ogi. Kagi i toun 1947 TM varo nokemot do songlundun o buuk di Yesaya sid ongoluvang om lata do vatu sid tumbing di Rahat di Niada, dot ino songlundun dino nokosurat it ontok do hiza di Tuhan Yesus. Ong sompiimat-imatan i linundunan di buuk dino om it surat-no laid di Yesaya, mad banalko kovongo-vongo, tu opodok nga aso-no pitonidan. Miabal i duvo i surat om boros dino dot okudik nga aso-no natagak ko nokosimban sid saralom do saribu o toun.

b) **I nabi Yeremia**

Ino buuk di nabi Yeremia dino nga varo't ongo boros om tudukan dau. Varo-pot ulun di mongusul di kavazao om pangalaman di Yeremia. Ino-no ot atalahas, it inantadon di nabi dino sid kampong dot

Anatot sid somok do Yerusalim, it insan-ogi pomoros iosido do monorou, ino-no TGM 627 om i gama dau dino do nabi iosido sampai TGM 585. Iosido kondiri nga sid Yerusalim i di hiza di kinorungazan di kuta do Yerusalim. Topot amu narakop ong iosido mongovit sid Babil, gam i rombongan di minogidu kumaa sid Masir o minongogorot dau sampai pinovoza-no di Yeremia. Sorid Masir o kinapatazan om kinotonusan dit usul di Yeremia.

I fasal 26-29 om 36-45 mongusul dit ongonababambaran om pangalaman di Yeremia.

I fasal 36 manarang do kuran di raja Yoyakim monutud di buuk di boros di Yeremia. Topot i setiausaha di Yeremia diri, ino-no i Baruk minongimbulit-no vagu monurat dit ongoboros di Yeremia. Pengkaa dino i buuk di nabi Yeremia:

Fasal 1,1 - 25,14 Nosorou-no di Yeremia i korungazan di Yerusalim om Yahuda sampai pentahan-no iosido di kosusaan di rumikot.

Fasal 25, 25-38 om f. 46-51 I kinasarahan di kosusaan bahagi dit ongobansa vokon.

Fasal 26-35 it a-ko piro o boros ponong sid ongonabi dit ovudut om it ongolumundu om i janji vagu do Kinoringan bahagi di bansa dau (>31, 31-34)

Fasal 36-45 o manarang i Yeremia di kosondoto di raja Yoyakim om i Zedekia, om i kinosopulan di Yeremia, gima it ongoulun do Babil nga kikovosihan ponong sid nabi. Iri-ogi i kinagaratan di rombongan povoza di nabi mogidu kumaa sid Masir.

Fasal 52 miabal di kovian di Buuk 2. Raja 25.

c) I nabi **Yehezkiel**

Sid buuk di Yehezkiel, varo't a-ko piro o panarangan kananganko i Yehezkiel kondiri. Anak iosido dit >Imam om iosido kondiri, nga imami sid panambayanan do Yerusalim. Iti-no o sabap do kodung notori-no di raja do Babil i Yerusalim ontok di TGM 597, narakop- no iosido sid pomogunan do Babil. It inintonon dau sid kinuripanan dino, sid kampong Tel Abib, osomok sid ibu kuta do Babil. Ino hiza di sid Babil iosido nokodim-no iosido jumadi do nabi. I kinojodian di iadino, 31. 7. 593 TGM, isuhut di panarangan dit usul sid fasal 1, 1-3 om 3, 1-5. Sid Babil dino, kadapat iosido magandaha dit ulun Yahudi vokon di sandad narakop om pentahan sid dioti di korungazan di kuta do Yerusalim di rumikot-ogi TGM 587-586.

Na kovian di boros dau dino, ino-no sid Fasal 29, 17 Iti-no o manarang di hiza diri, ino-no vulan kapat di TGM 571. Iaditi it ongobahagi dino,

F. 1, 1-3, 15 I kinojodizan di di Yehezkiel do nabi.

F. 3, 16-24, 17 I kinoogumuai dit ongoboros do mongohukum di kuta do Yerusalim om i daerah do Yahuda.

Fasal 12 pangalaman di Yehezkiel kondiri om i vokon ot ulun, varo a-ko piro o suntuan om usul di kobua tano laid di bansa do Yahudi om i hiza di rumikot-ogi.

F. 25-32 It ongoboros do pajal ponong sid ongobansa vokon hiza di norungoi-no laid i kuta do Yerusalim.

F. 33-37 it ongoboros di mongintalang di kotungagan vagu di bansa om pomogunan dot Israel.

F. 38-39 Varo-po boros di kasaap di karajaan ponong sid Utara

F. 40-48 Varo-po mimintalang om kososorou do kuran di panamba yangan vagu sid Yerusalim om kuran di hoturan vagu sid Yerusalim om sid pomogunan do Yahuda.

d) I nabi **Daniel**

Banalko tanid i buuk di Daniel, tu amu miabal dit ongonabi vokon

F. 1-6 mongusul di kobuatano om pangalaman di Daniel om it ongokoruhang dau di narakop sid Babil dino.

F. 7-12 manarang do kuran varo kinasarahan di Daniel kananganko i suromo do Kinoringan bahagi dit usul sompomogunan kananganko i karajaan do Yunani.

I Daniel dino ulun di narakop-no laid, nga nokosuvang iosido sid istana di raja do Babil, sampai natahakan do ngaran do bagaral, tu ulun do banalko elin sampai elo om kihukum iosido. Elo-no iosido do mangaharati om manalahas dit ongonsi dit ongoinipi dit ongoulun, om elo iosido manapul dit ongokoruhang sampai i kondiri dau sid tanga do kosusaan om hungot dit ulun vokon di mongivogu di Daniel om it ongokoruhang dau.

F. 7-12 mad miabal di Buuk Kentalangan i sid di Yahya, ino-no mongusul dit ongohoturan di raja Iskandar om i sinumuhut di Iskandar sid Sur om Palistina sampai i raja Antiokus di kapat, i ngaran dau koduvo, ino-no i Epifanas (TGM 175-164). Ino raja dino o pinengkakat do padaha do rogon sid natad di panambayanan sid Yerusalim do nitimpak-no sid meja do Kinoringan, do tomod mamadsamba sid pinokokinoringan ZEUS i retanko, Monuluk di kensasakahan sid gama pakaso do Kinoringan (F. 9, 27+11, 31) Iti hal diti najadi i TGM 167. I harati, i buuk di Daniel dino, sid tohudi-no banal om opongo-ogi. TGM 50 dati, ka dit ongoelo.

e) **I hopod om duvo it ongonabi** vokon i retanko **ongopodok o nabi**.

Ombo i gulu o nabi, nga ogulu nokosurat om nenumpak-no sid Kitab. Ontok di Abad ka-8, varo'to onom o nabi, ino-no i Hosea, Yoel, Amos, Obaya, Yunus om Mikha.

Sid Abad ko-7, ino-no i Nahum om Habakuk om Zefania. Na i Hagai, Zakaria, Maleaki nokohiza di raja do Parsia, hiza dot narakop-no it ongoyahudi sid Babil, ino-no Abad ko-6 om ko-5.

1. I nabi **Hosea**, iso o nabi i minintoron sid karajaan di sid Utara dot Israel. Iosido dino pinentahan sid raja om sid razat di kosusaan di rumikot-ogi, gima ensanan ioti nokedu-no antad sid atag o gama sumambayang sid Kinoringan. Boros dau, mad nosodia-no i sangod do monori om mongorongoi di karajaan do Samaria. ino-no i tinomod monuduk di razat dino, Sabap nokedu-no it ongoulun antad sid hoturan do Kinoringan, suvai miguli vagu ioti mogintutun do Kinoringan om varo-ogi kosopulan (F. 4, 1) Suvai manamod do Kinoringan dot amu-no opiduvo o ginavo dot atatap om abanal ioti sid tinoguvangon do Kinoringan om varo-ogi katagan vagu. Ino gama di bansa dot Israel ponong sid Kinoringan iadko i gama dot ondu dit ogilat, i suhulon mokiagai mantadko i savo dau.

Manala-po iosido di kobuatano di raja om i hoturan sid istana om i kopioduhan di karajaan dot Utara om Selatan, hiza di banalko tigagangon di karajaan dot Asur. Aso gama dioti miizo do ginavo, tu sumaap di sangod, gamko miooduw-nopo ioti Israel songobpinai, minsanko i tororikoto-no di mangasou.

2. I nabi **Yoel**.

I nabi Yoel manarang om pentahan dot i kinosusaan do varo butu do mimbulai om varo rumikot do monorob o pomogunan, tu mongohukum i Kinoringan di bansa dau. Topot minanarang-po iosido di hiza do rumikot-ogi do varo Sundu dot Osusi do tumuntug sid ongoulun. Iri-ogi varo-no sundu dit ulun. Sid F. 4 Pahabal i Yoel di hukum do Kinoringan sid ongobandar om pomogunan vokon, ino-no Turus, Sidon, Palistina, Masir om Edompo. Na varo-po it a-ko piro o boros kananganko i Yerusalim om Yahuda dot otongulit vagu, tu i gima kovosihan do Kinoringan bahagi di Sion dino.

3. I nabi **Amos**.

I Amos guluko i Hosea nabi iosido ponong sid karajaan sid Utara. Topot i kampong dau, ino-no Tekoa, i sid somok do Betlehem, nokosuvang-no sid kawasan di raja sid Selatan. TGM 760 o hiza di monorou i Amos dino sid Samaria. Manala iosido di banalko ogumu o gama dit ongoulun do mangakan dit

ongomosikim om mongorugi sampai mongorodsit dit ongoulun dit aso ngaran. Nipelono dau do varo kosusaan do rumikot, tu mongohukum di razat dit nakaraat-no banal. Iosido dino tinumiim-no mokisian do Kinoringan dot okonko insan induvo-no iosido mokisian, sampai nohorotizanno dau dot aso tinganan dau mongontok dioti mokisian (7, 1-9 om 8, 12) Sid panambayanan do Betel nokopisamung di Amos om it Imam do kipangkat. Nosunsubpo iosido dit Imam sid panambayanan dino, sinala-no di Amos om tinarang-no dau i hukuman sid imam om sid ongakob dau.

Topot ong i kovian di buuk dino, mad minomoros-po i Amos do harapan ngaran, ino-no, okonko kapatazan o panangan dot Israel, inoi nga varo-po vagu kotungagan om kosopulan di bansa dot Israel, sabap ensanan it ongobansa, sid palad kavi do Kinoringan, sampai i Kinoringan amu mogihim di kapatazan dot ulun, inoi nga i koposizan om kopudan om kosinangan ot ihimon dau. (F. 9, 11-15)

4. I nabi **Obaya**. Ino nabi dino manala om mongohukum di bansa dot Edom, sabap ohigak ioti di nokemot om nakasasi di kinorungazan di kuta do Yerusalim (TGM 587/86) Na i ayat 1-10 dino, varo-no vagu ong sid Yeremia 49, 7-22, i harati, mad gulu di kinapangaan di Buuk di nabi Yeremia, opongo-no laid i surat di Obaya.

5. I nabi **Yunus**. I buuk dino mad usul om pangalaman dot iso ot ulun. Ino-no i tinomod di buuk dino, manalahas dot, Aso tenganan do sumaap antawa posimozo di kodim om suhu do Kinoringan. Iri-ogi mamalang-po i buuk dino dot i Kovosihan do Kinoringan okonko baiko sid bansa dau, ino-no Israel om Yahuda, gam i bansa vokon, nga nokosuvang sid tunda do Kinoringan, om iri-ogi, Ong sukul mongining om monuli vagu sid Kinoringan it ongoulun, lobi-po agazo vagu o ginavo do Kinoringan tumorima vagu dioti dino mantadko mongohukum dioti.

Rontob-nopo, ong i Yunus kondiri moguhang di Kinoringan, tu amu nosunuan i hukum di bandar do Ninive.

6. I nabi **Mikha**. Nokihiza iosido di nabi Yesaya, manarang iosido di kohuzasan di kuta Yerusalim. Ong otopot, minsanko nokosuvang it ensanan i daerah do Yahuda sid kuasa di bansa do Asur diri (TGM 701) nga ong i kuta Yerusalim, amu-po, tu amupo notori. Tanid mantadko i habal di hukum diri, varo-po boros di Mikha do kiharapan-po, tu varo rumikot i hoturan vagu bahagi di Yahuda, om varo-not ulion do pomogunan dit ahatul banal o hoturan, ino-no, Antad sid kampong Betlehem it ulun di rumikot dino, ka dau. I boroson dino, ino-no i Yesus-no.

7. I nabi **Nahum** o pentahan di korotuan di karajaan dot Asur om i korungazan dit Ibu Kuta dot Asur, ino-no i Ninive (TGM 612)

8. I buuk di nabi **Habakuk**, bai tolu-no fasal, manarang iosido di kosondoto dit ongoulun dot elo om it ulun di pakaso do Kinoringan. Iri-ogi manarang iosido do kuran di Kinoringan sumaap dit ongosangod om kuran kembulai i kabanaran do Kinoringan di nokezon sid panambayanan dot osusi (F. 2, 20)

9. I nabi **Zefania** nga nokohiza di raja Yusia (TGM 639-609) Iosido pentalang dit "Adau di Tuhan", mad adau di kopongohukuman penlaid (F. 1, 2-18) Inot adau dino mad adau di kohungatan om rodus do Kinoringan (F. 1, 7+14-18), sabap manala i Kinoringan dit araat i buatano di bansa dau.

10. **Hagai**, nga nokohiza di raja Darius I (TGM 522-486), mongonsug iosido dit ongoulun do Yahudi potunggol vagu di panambayanan dot osusi sid Yerusalim.

11. I nabi **Zakaria**, nga minihiza di Hagai iosido dino sid Yerusalim (TGM 520-518). Iosido nga o mongonsug potunggol vagu di panambayanan om i kuta do Yerusalim, mad nepi om nosorou-no laid dau i kotunggaran vagu dit istana om panambayanan dino.

12. I buuk di nabi **Maleaki**. I ngaran dino o harati, I susuhon-ku, ka, manarang iosido dit onkokosusaan dit ongoulun di hiza dot i Nehemia om Ezra ot ulion sid Yahudi, ontok di nakatalib-no i kinarakapan diri. Nokouli-no i kogumuai dioti antad sid Babil, nga amu-po ahatul vagu i hoturan di pomogunan dino. Ino-no it agazo o gama dau monorou, Varo-no vagu rumikot dot nabi, ino-no i Elia. I Elia dino monodia-no di vazaan om panahon di Tuhan. (I Yesus ot oboros)

Iti-no i kinompuso di KITAB LAID dino.

TAFSIRAN DI KITAB LAID: I Kinotimpunaan

Umpatod:

Iti bahagi diti moniim monuduk di vaza mangaharati om manarang di Kitab Laid sid vaza mongoduat. It ulun di mamakai di buuk diti, mamasa dit ituduk om sumuhut mamasa dit onkofasal om ayat sid Kitab di kotuduk. Iri-ogi it ulun monurat sid nalad di buuk diti ombo i jawab om i dau dot horotizan.

Ong hiza do tumoguvang-ko di buuk diti, sumodia-ko-no do KITAB MOMOGUN om mongontupat, supaya amu outatangan do vokon, anak, ko simbol, antawa ong varo koruhang-nu sid kampong di mozo mokituduk di buuk diti, avantang ong miamung-kou do mihiza-kou om miupakat-kou sid gama miboboro-boros dit ongotudukan dino. Kaluto ong lobipo oruhai humarati, ong kopiangu-kou mivozo di buuk diti.

Laang Keso:

1. Basao-no sid KITAB MOMOGUN (KM) it umpatod sid nalad III-VI.

2. Tiimai monodiri ombo it amu-nu ohorotizan: hal dot osodu, antawa pongoretan dit amu-po opirongou-nu ko i kovongo-vongo o hal.

3. Imatai-no sid sibak it a-ko piro o panarangan dit ongothal om pongoretan dit osusa talahason:

Taurat > i limo i buuk sid kotimpunaan do Kitab = Hukum ko pinonuhuan, sabap sid tanga di limo buuk diti o kinembulazan di pinonuhuan om hoturan do Kinoringan sid Torsina.

TM > toun di Minananggung (i toun nikiro antad di kinosinaan di Tuhan Yesus)

TGM > toun gulu di Minananggung (i hiza guluko i kinosinaan di Tuhan Yesus).

KM > Kitab Momogun

= > i harati di pongoretan ko ngaran

& > hal vagu

>> > tugas do tumimpa

> hal dit atag mongohondom

KL > Kitab Laid

KV > Kitab Vagu

4. sid nalad VII di KM narait sid Ongosusuzan i sokoviai i Buuk di sid KM. Na sid *Panarangan bahagi di Kitab Laid* (nalad ko 5-8) kadapat-ko mamasa do kuran i kinosinaan di Kitab Laid om nunu it onsi dit ongo buuk sid saralom di KL dino. Minsanko amu-po ohorotizan-nu kavi i nokosurat sid *Panarangan* dino, basao-no banal sampai avi-no i nalad ko 23.

Laang koduvo: **I BUUK DO KINOTIMPUUNAN**

Ong mongusul i Kitab di kinatangan di bansa dot Israel, manarang-no laid i Kitab do kuran i kinatangan dino nokopiluzung sid buatano di sompomogunan om nakagavul-po sid gama do Kinoringan mongurug om mongopud di songriniba antad di tinimpuuni.

I Kitab mamakai dit ongotangon dit ongoulun kodori sid gama manarang om monuduk di pangalaman om kopongo-horotizan dit ongoulun diri, kananganko i gama do Kinoringan mongurug om mangagazad sampai monunda di riniba. I nokosurat sid Buuk do Kinotimpunaan, laporan ko sejarah okonko iadko i sejarah biano di natantu it ongo adau om vulan om toun ko it ongotampat siti ko sino iadko i nokosurat sid Habal ko sid Usuran dot toriso-iso o pomogunan. Sabap kodung nakatandon sid surat, amu-no

sumimban. Topot ong baiko kabang om utok dot ulun polombus di keloo om kohorotizo, bai i keloo dot ulun o vaza polombus di pangalaman om koponghorotizan dit ulun.

Suntuan: sid tangon do Momogun, retanko varo hiza dot amu-po osusa gumama, antawa amu osusa sumagou, dot i dangol kondiri o mibo om tumagad om i tangga kondiri o mongoi om sumagou, ka. Aso boros sino do nokorikot sid dapur i paip, ko graviti minangatod do vaig sid ropuhan dot ulun. I hiza di tangon diri, aso-po't elaan di Momogun do varo paip ko graviti di pongorikot do vaig sid valai dot ulun. Iri dara ong nelaan-ogi laid, tantu i tangon mamakai di pangalaman do paip ko graviti sid gama manangon di kosinango kodori. Antawa i tangon di LINUSUVON hiza di 50-puluhan, varo manangon dot it orang puteh minongolopot di guup dau sid lopot dit amu odorunan. Kodung varo palasitik sid Kudat (1960), tigogi, i tangon mongusul dot, *nolopot-no i buuk sid palasitik*, ka di tangon di vagui katangon.

Basao-no i >> TAFSIRAN DI BUUK DO KINOTIMPUUNAN

I hiza di tumoguvang-ko di Buuk do Kinotimpuunan, atag do basao-no laid it Umpatod sid KITAB MOMOGUN nalad III - VI, om iri-ogi it Umpatod sid nalad 1, ino-no i nokosurat dot haba i surat. (kavi-avi it ongoumpatod sid KITAB MOMOGUN, nga haba o surat, supaya oruhai osodiri ombo i boros di KITAB om ombo i bai umpatod om panarangan. Na i tajuk dit umpatod dino, IT USURAN GULU BANAL F. 1-11. Topot ong i tajuk dit ensanan i Buuk do **Kinotimpuunan**, ino-no, Antad di Kinotimpuunan sampai i kembulazan di bansa dot Israel.

Na i buuk dino okonko sejarah di kinojodian om kinosinaan do pomogunan om avan, ko bumi dan langit, om okonko surat di dumahava do varo Kinoringan, kaluto ong varo't ulun dit a-kasip do varo Kinoringan. Gam i kososizan di buuk dino ensanan mongohormat om mongindazou di gama do Kinoringan mongurug di sokoviai om i-po riniba, sampai manarang do kuran i riniba tinumolikud sid Kinoringan (F.1-11)

Iri-ogi i Kinoringan momili dot iso ot ulun om varis, tu pongopud-no vagu di riniba sid tinoguvangon dau, supaya i riniba jumadi do sasi om susuhuon do Kinoringan sid tanga di vinangun (F.12-50). Iadko i Zabur 8 manarang dot i sokoviai i varo, nga antad kavi sid Kinoringan om minsanko banalko agazo i vinangun, kakali i Kinoringan mongohondom di riniba om mongoguna di bai iso ot ulun, ka. I Buuk do Kinotimpuunan monuduk di tokou dot, Kinoringan-no o minongurug om monoruntud di sokoviai, mangahatul, mizazo, manansanganu om monunda di riniba do tanggung jawab di sokoviai.

I. I kososizan dit IMAM kananganko i kinourugan do vinangun.

1,1: I hiza do kinotimpuunan: Aso natarang do sera om kuran i gama mongurug ko kuran i vazaan mangagama om nunu it inantadon do vinangun ko ombo varo laid, inoi nga sumasi dot, Guluko i hiza di nunu-nopo varo Kinoringan. Topot aso-po mato dot adau om i vokon. Tigogi, mumbongut i Kinoringan do pajadi di sokoviai.

I kogo zoo di vinangun ko i kosoduo do vulan om korimbutuon, nga amu moniim i tuturan dino monukad ko momingig, tu elaan dau laid do masa dila nga amu-po arait i sokoviai om amu koduzan di sokoviai. Tu minsanko iti toun diti kaharati it ongosaintist do varo-po korimbutuon dit a-po insan kemot om aso-po ngaran dau. Inot ongohal kavi diti, nga tagal om kasasi, tu antad sid suhu om boros om kabang do Kinoringan nourug-no kavi, ka.

Ino kososizan F.1,1 alaid it ongoulun sinumasi om minonuturan om minongolombus sid ongotohudi. Sirid-po Abad konom gulu di Minananggung (TGM), kiro-kiro TGM 550, nokosurat-no sid kulit do sapi, ino-no i linundunan di retanko KINOTIMPUUNAN. Ino kososizan dino minonokop dit ongotuturan dit ongobansa vokon di minoniim mongusul bahagi di dau om dau do bansa om ugama di kuran di kinosinaan do pomogunan. Sabap minsanko asot elaan do riniba dot isai om kuran ong i Kinoringan, nga kakali varo pongitungan dit ulun do varo kuasa do minongimbulai di sokoviai. Bai hovoron om kolu-koluvon dit ulun sampai tasantanid-tanid o vaza mangarait di kuasa di kiniro dioti diri mad Minamangun, ka, om i kiniro dioti dino, i MINAMANGUN, nga tukang di kinourugan iadko

tukang kayu ko i Minamangun minaganak do pomogunan, ka. Ino kiniro dino, retanko i mato dot adau om i vulan mad ondu om kusai o minamangun minaganak di riniba om i pomogunan, ka.

Na i sasi di KINOTIMPUUNAN 1.1 manarang dot, I suhu om boros di Minamangun o pinembulai di sokoviaai, ka, dot i Minamangun dino, Kinoringan o ngaran dau, ka.

Insan-po dino dot amu-no tagal om ousul do sera banal ino, tu aso tomodon dau dumahava do varo-ka Kinoringan ko asoi.

Ong biano, ogumu o gama dit ongosaiantist mongilo-ilo di kinembulazan do pomogunan om i vulan om i korimbutuon om i nunu-nopo; sera o kinotimpuunan di riniba mangagama do basi (TGM 1500) ko tumbaga om saring (TGM 2500) ko mamakai do watu iadko tarom, pisau ko kapak om vasoi (TGM 15000 - 4000) ko oubas i riniba do monombil do kulit do dupot, tu mangagama do sulung om elo-no mobpiri (apui). Iti kavi amu kembulai sid pongitungan di sasi di Buuk do Kinotimpuunan.

Bai iti-no o tinomod dau: Sabap sid tanga di riniba varo korosizan dot amu engkod, tu amu ohorotizan i kobuatano do pomogunan, i lumizud ko mongoruzou, it ongopanakit, kosogito, it arob i vulan, retanko inakan do rogon, vokon-no ong retanko mogontong it anak do Kinoringan, nga amu kosukup do buru, na mokidapu do riniba, ino-no, tu rindingan do sigal i vulan (it arob), om ogumu-po. Topot ong i sasi do KINOTIMPUUNAN mangarazou di Kinoringan, ino kuasa di minongurug om mangahatul di sokoviaai om kuran i gama do Kinoringan mamangkat do riniba do sasi om wakil dau. Ino-no i nohorotizan dit ongoulun dot Israel om i pangalaman di gama do Kinoringan mongingut di Ibrahim om rinanzat i Ibrahim sampai najadi do bansa dot Israel. Sabap ino, amu-no osusa do rumosi-po i riniba, tu nunu-nopo it inurug di Kinoringan, nga ponong sid kosinangan do riniba o panangan.

Ong sid usul do Momogun, antad kinourugan ogumu ot a-kavasa om a-koho sampai korosizan. Aso kiniro ong Momogun diri dot i Minamangun agazo o ginavo posinang om mongopud dit ongoulun. Pengkaa dino it ongobansa dit ahatul o kobudayaan i hiza di kodori diri, ogumu o kiniro dioti dot i Monguasa nga monusa di riniba, antava nakatahak i kuasa sid ulion do pomogunan, iadko i Faraun sid Masir i retanko anak do Kinoringan. Sid Babil, Kina, Korea om Jipun, nga iadino o kiniro dit ongoulun sampai okodou i hoturan sid ongopomogunan di iadino do tomod momorinta om momogos dit ongoulun do razat. Anaru-no kagi it ongotangon dit ongobansa di manarang di panangan di kinourugan isuhut di dau om dau do kiroon om jangkaon.

Na sid pialatan di pomogunan do Masir om Babil, tigogi, it ongoulun dot Israel, ino bansa di banalko opodok om okugui, nga sinumasi dot i Kinoringan dit Aki Ibrahim o minongurug di sokoviaai i vinangun, okonko bai it iso pomogunan, i Masir ko Babil ko Kina om Jipun, di dau om dau do vatas. Manjadi iti-no o puun di kososizan dot Israel:

I Kinoringan, sino-no laid. It aso-po nunu, iosido-no varo-no laid, guluko i varo-no hiza om varo-no konoruvo om kosongoho om korolomo ko kasavato di nunu-nopo. Ong aso-pot adau ko vulan, aso tanganan do mongizap di hiza..... Na i sokoviaai i varo-no ong biano, antad kavi sid Kinoringan, do baiko i boros dau o minongimbulai.

Ino boros: i hiza di kinotimpuunan-no banal, bai vaza manarang di gulu-no banal. Ong saientist manarang biano dot it umul di vinangun, nga valu-no ribu juta toun (8 000 000 000) om iadino i kosoduo sid vulan om adau om kolobintang. I roket ong itimpak sid kolobintang, sontoun mintanga tumulud om korikot-ogi. I kalangkaso dot uni, 333 Meter sonsekond (emot tokou ong varot ulun managad do kazu sid kosoduo, amu kopihiza kosondot i kapak om oining it uni di kapak di kosondot). Topot ong i kalangkaso do sumirot ko i titiu, nga 300 ribu Kilometer sonsekond, ino-no i kosoduo di vulan antad sid pomogunan. Sonsekond om korikot-ogi i binahang di vulan sid di tokou diti. Topot i binahang di mato dot adau, labaan do limo minit om korikot-ogi sid tana.

Na ino hal dino kavi, i hiza di nakasasi om nokosurat i KINOTIMPUUNAN dino, amu-po elaan om okon-noko ino ot initung dit ulun i hal dino, tu iti-no i kinososizan: Antad kavi sid Kinoringan om iosido-no o monguasa di sokoviaai. Iosido dino lobi-po agazo o pangkat om elo mantadko i ginama dau. Ong it ongosaiantist kakali monorou om mangalu-kalu do kuran ajadi ino kavi: antad sid okudik o pantai kavi di kumambang om mongumpug do pantai, vokon dot antad sid nasip om huntung kavi ino dino,

retanko aso Kinoringan, ka, dot alaid-po monorou do iadino, varo-no boros dioti dot, Mad varo dati kuasa di minangahatul dino kavi. Okonko bai jinumadi it ongovinangun do bai kabambaran, ka.

inurug di Kinoringan it avan om i tana: ong i boros Ibrani urug manarang do baiko boros om suhu o pinajadi. Okonko iadko i tukang, tu varo-no laid babaal, kazu ko basi ko watu ko tana, nga ino barang dino silihon di tukang om agamaon dau do meja ko valai ko dangol ko simen om nunu-nopo. It aso-po laid, tigogi varoi-no, tu sinuhu do Kinoringan: Navau-no, ka na niu mavau-no.

1,2: i pomogunan di hiza diri ozongou sampai otuvong (ko: aso, rontob rondon varo). Na i kinososizan diti nokembulai sid Babil, hiza do narakop-no it ongoulun dot Israel. Sino dino, toun-toun kahajang ioti di lizud di vulan tiga, hiza do mudou it ais sid ongoburul sid sarazo di bavang Efrat om Tigris. Na banalko osusa i konopuan sino. Tana om kazu di napampad do lizud do mikumparan-no. Otoliban-po i lizud, amu-no engat i gulu, miromizas-no kavi, watu, kazu, pantai, pogun do valai, ombo i norulun di lizud... Ino-no retanko: ozongou, i harati > amu-po osodiri om amu-po ahatul i sokoviai.

Iri-ogi i boros do Kinoringan o monodiri kavi dino. Topot sino varo-no laid: I Sundu do Kinoringan mulud-tulud sid soribau do vaig..

Ong it ongoulun do Babil minomoros dot: Ino hal dino di toun-toun do iadino, vaza di Mato dot Adau (i retanko Marduk, i pinokokinoringan sid Babil) sumaap sampai kamanang di naga Tiamat (i kotuvong) dot i MARDUK monibas om momudung di liou di naga TIAMAT, ka.

Ong sitid Kitab, kodung momoros i Kinoringan, osodiri it adau om it otuvong om opungaranan-no di Kinoringan i hal dino. Kagi, i vaza do monodiri i Kinoringan, ahatul o gama dau do toriso-iso o hal ajadi sid toriso-iso hiza. Na it ongo hiza dino arait dot, Adau > nosodop om nosuvab-no diri. Ong sid ulun dot Israel, it adau okiro antad pukul enam do sodop (tumonob it adau) sampai sumodop-no vagu.

Na varo boros sid Zabur 90 dot ong sid Kinoringan, saribu toun iadko sangadau, ka. Ino-no o sabap dot amu osusa tokou mongitung dot inot adau keso dino nga 24 jaham iadko biano. Iti-no rontob, I gama do Kinoringan nga hatuli do kuran-kuran, varo hoturan dau. Pengkaa dino i hoturan dino,

Monodia di suhu om	minomoros-no i Kinoringan...
iri-ogi i suhu	Navau-no!
i najadi	Tinavau-no.

Iri-ogi monombiri-no i Kinoringan, vokon-no ong pungaranan-no om avantangan-no iosido om iri-ogi manarang-po di hiza: Nosodop-po om nosuvab-no diri...

Manjadi ong mongitung tokou do kuran kopisusuhut i gama om kinourugan di nunu-nopo, atalahas-no dot i Kinoringan minonodia di kosukup di riniba sid suvang do pomogunan, gulu it intaranan do riniba

	3-10
iri-ogi i vinangun dit okonko mizau	11-19
iri-ogi i mizau i vinangun, dupot, sada, ombolog	20-25
iri-ogi i riniba	26-31

Gulu-no i kosodirizan di hiza, sodop, adau, vulan, toun, tu it adau om vulan om it ongokorimbutuon o mangahatul di hiza. (Kuran kelaan ong Momogun do sera kotimpunaan di musim mananom ong okonko antad sid pangasakan: i korimbutuon di mimbulai hiza do kosilau i vulan).

Toriso-iso o hal amu milo-milo varo, supaya masi i riniba. Osodia-po laid om iri-ogi i rinibai.

Keso: Anavau om otuvong, adau om sodop. Kuran-ka ong asot adau?.

Koduvo: Avan om tana. I hiza diri amu-po ohorotizan dit ulun dot i pomogunan iadko bola dot agazo. I kiniro dioti, mad pinggan om iadko varo rahat di mintutuk sid isan di pomogunan dino, om varo-po vaig sid savat, ino-no it inantadon do darun om pangi. Supaya ino vaig sid savat amu ensanan om mihiza tumuhun, varo't olot di mad kulub (mad mangkok ko kava dit nikulub) do manahan di vaig di sid savat, ka.

Kotolu: it ongototonomon, boginisan, kouvaan, kazu (11-12)

Kapat: I mato dot adau, vulan, korimbutuon. Ino-no i mangahatul dit ongo hiza dot adau, vulan, toun. Ong it ongoulun do Babil, retanko i mato dot adau om i vulan mad pinokokinoringan di minaganak di vinangun, ka, om it ongokorimbutuon nga sinundu om rogon. Topot sinumasi it ongoulun dot Israel dot ino kavi dino bai mad politaan om lampu dit antad sid boros do Kinoringan. It iso lampu dot agazo om i-po lampu dit opodok, ino-no i mato dot adau om i vulan. Banalko kiguna ioti dino, tu mangahatul dit

ongohiza. Topot bai ino o kogunaan, ka. (14-19) (Ong sid ayat 17: atag dot omungon-po i hurup "k" Nitonduk kavi.. sid Kitab Momogun).

Kolimo: sada om ombolog (20-23), ongodupot do mizon talun, i momondoi-po. Na ino tuturan dino, ensanan o vaza do mongindazou di kinourugan do Kinoringan, gima ahatul o gama dau. Ong sid usul do Momogun ko tangon di kinourugan, isuhut di keloo do Momogun, nga kakali rinumonok di Minamangun sampai a-kavasa do mangarait di ngaran dau. (24-25)

Konom: Mad tanid o hal, mad tumoguvang i Kinoringan do hal dit tanid mantadko i vokon, ino-no: Manjadi minomoros-no vagu i Kinoringan dot...Mongurug tokou-po do riniba.. ka. Ong oboros dot, Tokou: mad okonko iseso i Kinoringan. Na noboros-no laid ong i Sundu do Kinoringan mulud-tulud.... o harati, i Kinoringan mad okonko bai iso-no o vaza om buatan. Ong sid Injil di Yahya 1,1 varo nokosurat dot: i hiza di kinotimpunan, varo-no laid BOROS, ka. Na sino-no laid i kinososizan do Tritunggal ong Kinoringan, ino-no i BOROS dau om i SUNDU dau om i MINAMANGUN. Ino-no atalahas, baiko ngaran-no avalang i suromo do Kinoringan sid ayat dino di momoros dot, Tokou, ka. i ayat 27 amu monodiri ko manarang di vaza mongurug di riniba.

I Saientist Darwin minoniim do manarang sid kobuatano do sada di kitoruntud om dupot do komojuan do riniba antad sid mizau laid diri do bai sada dot opodok om kuran i kosuruto do sada om tumindal-ogi i sada do jumadi do dupot sid tindal om iri-ogi kara om kogi sampai riniba-no di baiko duvo-no o hakod dot ipanau om mamanau dot otulid ot toruntud. Minsanko iadino dati i kinembulazan do riniba, kakali amu sumaap ino di boros om kososizan dot antad sid hoturan do Kinoringan ajadi i iadino. Ino-no i buatan do riniba koluu di buatan do Kinoringan, ka, sampai i Kinoringan o suntuan di riniba, ka, do kusai om ondu.

Antad sid boros dino, varo gama do riniba mangalu-kalu dot i Kinoringan koluu do riniba om ogumu-po o gama momoros dot, It ulu, ko i longon, ko i kabang do Kinoringan om mongitung-po dot songkuro i kogo zoo do Kinoringan. Topot i harati dino, ino-no: iadko i Kinoringan varo piniizaan, ino-no i Sundu om Boros dino, i riniba, nga okonko bai iso ot ulun, inoi nga suvai arangkap om varo piniizaan, ino-no ondu om kusai, ka. Aso boros kagi iadko sid Fasal 2 do bai iso ot ulun, i Adam, gam turus, riniba o boroson om amu moniim do manarang di suromo di kojodian do riniba. Tu iti hal diti a-koduzan ong riniba, ka.

Na sid barakat di nokovozi di kinourugan do riniba kaharati tokou-no dot i kogunaan do riniba: Ranzat-kou-no gumu-kou-no, songonuvo-no dikou iti putanaon, ka. Ino-no, i riniba iluu do Kinoringan, inanu-no do wakil do Kinoringan ko sakub om timbalan dau sid vinangun. Topot ong monuhu i Kinoringan do manansanganu di putanaon, ino-no i tomodon, Toudo-no dikou i vinangun.

I riniba bai tanggung jawab di vinangun, okonko i riniba o manansanganu dot aso-no nunu-nunu, inoi nga varo-po tugas dau, ino-no: Manaud, monunda, mangagazad, mangahatul, okonko momorinta om momogos om momunso ko mongorongoi. I Zabur 8 banalko monguji di gama do Kinoringan mamangkat di riniba sid tugas dino. Sabap i riniba mad koruhang do Kinoringan do poboros ko kopining di Kinoringan. I riniba kadapat mongining om sumuhut di kenginan do Kinoringan. Okonko bai i Kaisar ko Faraun it osomok sid Kinoringan om iri-ogi momogos-no di razat, inoi nga ipat-ipat it ulun nga masi sid tinoguvangon do Kinoringan. Ensanan i riniba dot osomok sid Kinoringan.

31: Noboros-po laid dot inlimo: Na avantangan-no i Kinoringan, ... ka, na varo-po dot, Banalko avantangan-no iosido di sokovia i pininggamaan dau. (I Zabur 148 o monguji di ginama di iadino.)

2,1.4a **It adau koturu:** Sid kososizan dit IMAM kembulai dot ino gama di kinourugan antad sid kabang do Kinoringan, nga varo hoturan om ino hoturan dino kolombus sid gama om kopolosizan do riniba. Ino hoturan dino, ino-no varo hiza do mangagama/gumama om varo hiza do kalatangan ko korehat. I kopolosizan do vinangun, lobi-po ong i riniba okonko atandas mangagama om mongusaha, inoi nga varo-po hiza vokon, ino-no i hiza di nakatanid bahagi di Kinoringan. Kondiri di Kinoringan minanahak do suntuan sid kinourugan diri, ka.

Ong sid Momogun diri di kakalpo sid labus, varo-no laid it a-ko piro ot adau dit amu mangagama it ongoulun. Rontob-nopo, it amu minangagama diri, sabap a-kavasa mangagama ko kumavid do dangol: vokon-no ong a-kavasa mindahu sid tana. Notiag-no it ulun do mongusaha di nunu-nopo ko mibo om mutanom-po. Varo-no ong retanko gizukon ko nunu-nopo. Topot ong it adau pongintaranan dino, adau

do kosinangan, tu it ulun dot aparung mangagama sid saralom dot onom adau, varo-po kotibangan mongus-ongus, rumihat, pakansang vagu di guvas om tumoguvang di Kinoringan do mongohondom di gama do Kinoringan pongopud di riniba o tomodon, gam kotibang-po i riniba monorima kaseh sid Kinoringan. I harati, it adau dino, pesta do kalatangan.

Na varo pomogunan dot i porinta dau minongiro do porosuma banal ong toturu-turu ot adau lumatang, gam minonuhu dot it ulun bai tohopod-hopod ot adau om lumatang-ogi. Na tigogi, nokiro-no dot a-kerad i tohopod-hopod ot adau om lumatang-ogi dit toronom-onom it adau om lumatang-no. Tu atalahas-no dot ogumu it otimbaru dit toronom-onom't adau mantadko i tohopod-hopod 't adau. Sabap it ongoulun dit amu kalatang sid saralom dot hopod adau, amu-no kogoos sampai amu aparung sid gama dino. Iri-ogi i hasil di gama, ong alambat lumatang mad okurang mantadko toronom-onom o lumatang-no. Sid pangalaman di porinta di iadino kaharati tokou dot i hoturan do Kinoringan banalko mionong dit agasan do riniba om i vinangun. Sabap it ulun okonko enjin di sodop adau, suvab-suvab nga mamanan minturug om papanau do gama.

Na sid iso kampong do daerah Kudat varo mangagarit do kolopioi: varo duvo ot ulun do sompi 250 pinuunan o kolopioi do doritan. It iso banalko mokimamaha. Kodung kotimpuun mangagarit, suvab-suvab goritan, minsanko Adau Minggu, amu-no lumatang. Tumimpuni, sangadau 30 -35 Kilo kavagat it adapat dau. Osingkop-po do duvo vulan, varo-no ong onom-po kilo sangadau, i harati, sid saralom do somminggu, nga 40 kilo.

Na i koduvo, songminggu, baiko tolu ot adau mangagarit, ino-no intolu songminggu do miolot it adau sampai banalko pampangan i kolopioi i hiza di lumatang mangagarit. Na somvulan, duvo vulan, sontoun, amu sumimban it adapat dau do 30 - 36 Kilo sangadau mangagarit. I harati, sid saralom do somminggu, intolu 35 Kilo = 105 Kilo varoi. Minsanko it ongokazu, nga varo kalatangan, tu vinangun gima.

Kananganko i kososizan dit IMAM di hal di kinourugan, varo-po iso o hal di banalko tanid mantadko i sokoviai it ongotangon dit ongobansa di minoniim do mongintutun di kembulazan do vinangun. Sabap i kogumuai minongitung di kinourugan antad sid palad di retanko MINAMANGUN iadko i hal do musim mutanom om i musim manangadau ko spring om autumn, hiza di muni-suni sumurut om hiza do lumoun om matai, ko momodruzou, ino-no i hal di miguli-guli jumadi dot aso kengkadan. Inot ongotangon dino amu engat dot i hiza do vinangun mad ralan ko panahon dot i Kinoringan o minongimbulai di ralan dino om minangahatul dit ongosimpangan om rikoton, sampai sid gama dau monulung, minonodia iosido do kosuruto. Sid ongotangon dino, mad aso rikoton om asot inantadon, iri-no ko iri miguli-guli sumuni om mongimbulit jumadi. Topot ong sid Kinoringan, tantu varo tomodon om varo panangan om rikoton, sampai ipat-ipat it ulun nga varo kogunaan dau sid tinoguvangon do Kinoringan. Sabap i riniba okonko aso kosungguvo.

>> Onsizo-no do nokokuro, tu sid kovian di koonom 't adau om varo-ogi riniba? Suratai-no i duvo ko tolu o saba

II. I kososizan di YAHIVIST kananganko i kinourugan do riniba om i pangarantaban di riniba. Fasal 2,4b- 25.

Basao-no laid sid KM dot induvo ko intolu-ko mamasa dit ongoayat dino (2,4b-25) sampai apaham-nu. Posurato-no sid karatas-nu it toriso-iso o laang di kinourugan koduvo dino. Opongo-po, basao-no i tafsiran diti

Sid ongobansa di gulu varo tangon di kinosinaan do riniba om iri-ogi i kinourugan di pomogunan. Tu i gulu o duaton om insasakan do riniba: Sionngo antad it ulun? Rinumosi-nopo it ongoulun kodori do kopudan om nasip dau. Iti-po o sabap do mangalu-kalu-nopo om minonorou i riniba kodori dit inantadon om kumuro iosido ong alaid. Ogumu o tasantanid-tanid o gama do riniba mongitung kananganko i kinavaraan do riniba. Rumbul satu ong i dau do bansa ko suku bansa.

I nokosurat sid F. 2,4a-25 dino, ino-no i kososizan om pangalaman dit isot ulun dot Israel di minonginggamut di dau do pongohorotizan om pangalaman di bansa dot Israel hiza di soribu toun gulu di Kristus. I gama monuturan dino, minamakai iosido do duvo o tangon sid gama dau sumasi om manarang di kinourugan do riniba, **keso i tuturan** dot,

Minukabun-no i Kinoringan om pinentoron-no dot ulun sid kabun dino. tu pongontupaton di kabun dino om varo-po sompuun o kazu do nitiag dot akanon it uva, mad tanda di rontob do riniba.

I **koduvo o tuturan** mongusul do kuran i Kinoringan minongurug di riniba do tana dot osilou ot inurug om tinohugi-no di pinuhobo dau it odung di riniba diri, supaya kipinuhobo i riniba, om i gama do Kinoringan manahak di riniba do koruhang. Ino duvo tuturan dino, pengkaa i kopiaamung dino:

2,4b- 8 +	2,9	
2,10-15	+	2,16-17
2,18-24	+	2,25 + 3,1-24

I panangan di tuturan dino, Kinoringan minongurug di riniba dot okonko bai iso-no ot ulun om okonko bai iso-no o bansa. Suvai kitalos it ulun om avantang-ogi, tu kikoruhang sampai varo piniizaan dot ulun. Ong bai it iso-ogi it ulun, amu-po notuluk i kenginan do Kinoringan. Tu it ulun keso-ogi dino, rontob i pinalad do Kinoringan minongurug. Na varo-po't ulun vokon o kenginan do Kinoringan. Ino-no i tinomod di kinourugan do riniba. Apasi i riniba sid tinoguvangon do Kinoringan, nga suvai sid kesaan do riniba, i minisavo ko i songkoruhang. Na i riniba keso banal, i Adam, ino-no i retan do naramang i palad do Kinoringan mongurug. (Varo kapamarasan sid Momogun dot,

Boros dot ulun sid nokosingkapu (kusai) dot: Kadaí bobogo banal ialo dino, tu okon-ma ko ikau o naramang o palad mongimpusod dino, ka.

2,4b I mongusul dino tumimpun sid kokurangan: aso-po sakot om aso-po govuton, tu amu-po nakapangahatul i Tuhan do darun, ka. Ong sid F.1 varo boros do kokurangan, ino-no: ozongou om otuvong i pomogunan, ka.

Suvai natarang-no laid dot aso-po, iri-ogi kadapat manarang di vaza do Kinoringan mongurug om mongumbasih. Na inot ayat 2,4b mad tajuk di tuturan di mozo om nokosurat sino:

> I HIZA DI KINOURUGAN DIT AVAN OM I TANA OM I

Agazo o ginavo di Yahivist manarang di kinojodian do riniba. Bai i riniba o tomodon sid gama dau manarang di kinourugan. I kososizan di iadino nokembulai sid pialatan dit ulun di nokentoron sid isan do belantara om buwatan. Kodung managadau om kibarat-po antad sid belantara, oruzou-no kavi sampai masak i vaig sid ongopaluw. Suvaiko manampangi om mulit-ogi vagu i belantara dit a-ko piro vulan do banalko orombung o suni do sakot om vusak. Do tigogi, mimbulai-no vagu i barat, momodruzou-no vagu i sokoviai sampai mad minatai-no i pomogunan.

Antad dit elaan-no om pangalaman di iadino, initung-no dit ongoulun do banal-banalko i kinourugan minimbulai antad sid tana dot oripupuw dit aso-no sumuni, gima amu-po nakadarun-darun. Suvaiko nahatul di Kinoringan i musim do pangi om varo-ogi kopudan.

2,7 Iri-ogi minanganu-no i Kinoringan do tana dot osilou om urug-ogi dau do riniba, inomungan-po di pinuhobo do kapasi antad sid kabang do Kinoringan om ajadi-ogi i riniba. Suvai kiginavo i riniba ong antad sid pinuhobo do Kinoringan. Topot ong it inantadon, ino-no i tana dot osilou. Iadino-no nelaan di riniba: ong matai it ulun sampai aso ginavo, nga masa iosido om jumadi-no vagu do tana.

2,8 Iri-ogi mukabun i Kinoringan dot ahatul o kabun om pinentoron-no i riniba sid kabun dino, i tomodon (15b) i riniba mananom om mongontupat sampai manaud di kabun dino.

Sino dino nakamung-no i tangon di Kabun dot Eden, ino kabun dino mad osundu, okonko bai bahagi di koposizon do riniba (16). Banalko avantang it ongokouvaan boginisan om varo-po duvo o kazu, i koposizan om i pongilaan do kabanaran om karaatan. Ino kabun dino okonko bai pongonovan do balanja om kopudan do riniba, inoi nga ino kabun dino mad podtungongisan di banalko kotomon o kematan om hatul-po o vaig sino antad sid apat bavang di mongozopos di kabun dino. (mad ahatul o ranahon sino). Sid panarangan di duvo i kazu dino, kosuput-no i tuturan sid F. 3,1, ino-no i vaza di vulanut di mamalid di Hawa, (3,1-7) om i monginsosok i Kinoringan (3,8-13) om i mongohukum i Kinoringan (3,14-19) om

i kinoponunsuban antad sid kabun dino (3,20-24) Topot i tuturan keso momongo vagu di gama do Kinoringan do pentoron di riniba sid kabun om lumombus sid ayat 18-24: nourug-po i riniba, inot ulun dit inanu antad sid tana.

Ong tana sid boros Ibrani = ADAMA, nga i ADAM nga i harati, ulun ko riniba it antad sid tana. Nourug-po, mad atalahas-no dot amu-po opongo om amu-po otuluk i gama om kenginan do Kinoringan. Varo-po kokurangan. Minsanko tinumiim i Kinoringan do mongurug dit ongodupot do pokoruhang di riniba. Nourug-po, mad atalahas-no dot amu-po opongo om amu-po otuluk i gama om kenginan do Kinoringan. Varo-po kokurangan. Minsanko tinumiim i Kinoringan do mongurug dit ongodupot do pokoruhang di riniba, nga mad amu-po kopionong, ka. Suvaiko it ondu om kopionong-ogi di gama mongurug di kosukupan. Ino dino kembulai sid kohigakan di kusai di minongodim, Adok-adok, na varo-no koruhang-ku do iadko ioku, ka om turus mamalang i Yahivisit di hoturan do riniba, ino-no, I kusai ong osukod, tumongkizad sid molohing om mobpuput-no di savo dau, tu suvai kopiobpuput i kusai om it ondu, om nokopisavo-ogi banal i riniba. ka.

Na i panarangan dot i riniba miluzung banal di kusai om it ondu, mad koompusan di tuturan keso. Topot varo-po boros sid ayat 25 di mad nokotombil vagu sid tuturan sid F. 3,1-24, ino-no, Aso sulung dioti miduvo, nga amu miikum ioti diri. Ino boros dino mangambat dit ongotangon dit ongoulun kodori di minongimbulai di kogolivongo do riniba do kananganko i kosulungan dot ulun. Na ino boros dot, Aso sulung-sulung ioti diri, mad monodia di kohorotizan antad sid pinalid-no ioti di vulanut.

I tinomod di Yahivist potombil di duvo i tuturan dino, ino-no, iso-no i hal dot i Kinoringan pinentoron di riniba sid kabun dau, nga sinunsub-no vagu, tu mad aso pongitungan di riniba do varo rontob di miuma do gamaon. Tu minsanko nanu i riniba do wakil do Kinoringan sid kabun dino, kakali dot okonko manansanganu i riniba di kabun do iadko aso-no kuasa vokon, inoi nga baiko tanggung jawab i riniba ponong sid Kinoringan sampai a-milo-milo nga mongoguna i riniba di rontob dau.

Kananganko i kinourugan do riniba, varo-po a-ko piro o hal dot atag mongohondom, ino-no: Varo tinomod sid gama do Kinoringan mongurug di riniba, ino-no:

- a) Kinoringan monodia di kosukupan do kakanan bahagi di riniba (8)
- b) manahak i Kinoringan do tugas, ino-no gumama i riniba sid kabun dino mananom om mangajaga di kabun (15)
- c) okonko iseso it ulun; varo koruhang di kopionong sid dau do kobuatano (18-24)
- d) i riniba elo-no do momoros om mongitung sampai momu-ngaran dit ongodupot
- e) i riniba apasi sid tinoguvangon do Kinoringan do mad koruhang om kumoduvo do Kinoringan di kadapat do mitimpa-timpa om miboro-boros.

Tasantanid-tanid it ongotugas om gamaon do riniba antad sid ginama iosido do Kinoringan. Topot ong bianco, hiza tokou diti, i riniba nabahagi-no sid tasantanid-tanid o gama. Vokon-no ong baiko monuhu om momorinta, vokon-no ong mad kuli om uripon di vokon, vokon-no ong amu miuma ko asot akanon, vokon-no ong sumakit, tu oholian kogumu do kakanan. Vokon-no ong olingan-no do varo Kinoringan, vokon-no ong pakaso do Kinoringan om vokon-no ong amu migandang do Kinoringan, mad misingkinoringan. Varo-no mongitung ong miuma-no do bai ponong sid Kinoringan ot avantang o gama dau. Sukup mangasip, miuma, ombo-no ong it ulun vokon. Ino kavi dino buatan di iadino o sumaap om mongorongoi di tinomod do Kinoringan kananganko i kinourugan di riniba. Sabap i Kinoringan hiza di minangahatul iosido di kinourugan, minangahatul iosido di ekonomi om i saiens om i koporuo om i sejarah om it ongohoturan, sampai i masyarakat om i vaza do komunikasi di riniba (i boros). Iso segi sid kopsizan do riniba nga aso dit okonko ohoturan di Kinoringan antadi kinotimpuunan.

Kananganko i Kabun dot Eden om i tugas mangagama i riniba.

Vokon-no ong sid ongotangon dit ongobansa, varo boros dot i Kabun do Minamangun mad Tana sosogulian. Iadko i tangon do Momogun, dot sid tana dino varo kazu KOLIZAN do songginit-ginit sid kazu dino i dapu iadko sandangau, tavag, kulintangan om nunu-nopo i barang di kihorogo. Amu osusa do mananom om magazau, tu nansak-no laid it ongokakanan. Okonko iadino ino Kabun dot Eden. It initung banal di Yahivist di hiza diri, Amu-po nokopitongkizad di Kinoringan om i riniba. Kagi sid

kabun dino, varo kosukupuian do vaig om orombung-po i totonomon, tu tana do mizau. Manjadi i riniba mopud sid gama dau mongusaha di tana om it ongokosukupuian dot i palad om it utok o mangahatul om momiara di kosukupuian dino, om it ensanan i notorima antad sid palad do Kinoringan. Asot engat di Yahivist do bai malan it ulun do bai modop om makan o gamaon dau. Sabap i suhu di Kinoringan mananom om mangajaga i riniba di kabun, varo tugas di kiguna banal, tu kipanangan i riniba sid kondiri om ponong sid Kinoringan.

I hiza di kinembulazan di tuturan dino, bai i gama dit ulun mukabun ot engat di mongusul. Sid duvo i tugas do mananom om mangajaga ko mangahatul, nga nokosuvang i sokovia i it ongotugas di riniba sid saralom dit ongogagamaon, ong mamakai i riniba di kakansangan dau do palad om keloo dit utok dau, ko sumuhut-no iosido di kenginan om tinomod do Kinoringan.

It ongodupot: Ong sid ongotangon dit ongobansa kananganko i kinourugan om it inantadon di riniba, varo tangon di manarang dot i vaza do Kinoringan ko i Minamangun do mongurug di riniba, okonko bai insan-po, gam asarok poniim dot vokon-no ong kadapat koduruk, vokon-no ong amu mopud, vokon-no okonko impiro-piro moniim om ajadi-ogi. Ino kolu-koluvon dit ongotuturan dit ongobansa mamakai i **Yahivist** do manarang dot varo kosurutan sid Kinourugan antad sid bai dupot om iri-ogi i riniba banal.

Ong i **Imam** bai onibak o gama dau manarang dot, Ondu om kusai ot inurug do Kinoringan, ka. Topot ong i **Yahivist**, minsanko iseso o kososizan dau di Imam, nga kakali manarang iosido do hal do varot ondu om kusai iadko hal do kavangaan, tu, ka dau, Kondiri di Kinoringan amu avantangan ong bai kusai o varo. Amu ozi i Kinoringan dot iseso it ulun. Suvai atag ong varo kesaan dot ulun. Sid pongitungan di iadino, kembulai dot amu atag ong monongkudau it ulun, ong mongitung di bai dau do hal, inoi nga it ulun suvai mopud sid piniizaan dit ulun om ponong sid ulun vokon.

Ong it Imam manarang di kinojodian dit ongodupot do tomod-no manarang dot ombo it antad sid palad do Kinoringan sid suvang do vinangun, ong i Yahivist mongitung dit ongodupot mad hal di mizau dit osomok sid riniba. Ong sid IMAM i tinomod manarang, I kinourugan di vinangun om iri-ogi i riniba, topot ong i Yahivist, i kinourugan di riniba o tinomod dau manangon sampai it ongodupot bai osomok sid riniba om riniba kondiri kadapat momili di kogunaan dit ongodupot do koruhang ko nunu ingkanaonko ino. I harati, okonko Kinoringan o monuhu di riniba dot ombo i koruhang dau, Kondiri di riniba kadapat momili dot isai it apatut do koruhang dau.

Varo ongosaiantist biano di manarang dot i riniba antad sid ongokara om orang utan (kogi), sampai osomok sid ongodupot i riniba. Na manarang i Yahivist sid tuturan dino dot i kondiri di riniba amu mongitung dino kensasamakan dino. It ulun elo momungaran dit ongongaran dit ongodupot sampai kikuasa iosido ponong sid ongodupot dino.

Ong it IMAM baiko minonuturan dot i Kinoringan pinosuvang dit ongodupot sid kuasa di riniba. Ong i YAHIVIST minongusul do kuran it ulun minonguasa dit ongodupot sid gama dau momungaran dioti.

It ongodupot kondiri asot elaan momungaran, suvai antad sid gama momungaran mangahatul om monodiri i riniba di vinangun. Kagi sid gama momungaran nokosuvang-no i vaza di riniba mongintutun dit ongokobuatano dit ongodupot, sampai it ulun monodiri sid gama momungaran di kogumuan dit ongodupot om it ongohal vokon. Kokiraai, bai iso o ngaran bahagi di bansa do karabau, varot uzog, sumandak, karud, ko ong kusai, banggala om mandangau.

Ong momungaran i riniba dit ongodupot, mongimbulai-no ioti di pangalaman om keloo ponong sid dupot dino. Ong amu-po kopisamung do dupot, aso-pot eloo do pongoretan do dupot. Ino gama mongintutun di kobuatano do vinangun o tanda dot, ulun banal i riniba, iadko i boros om i vaza do mongimbulai di keloo om pangalaman sid saralom dit ongopongoretan om bahul om sundait om suriban. (Minsanko it ongotangon do Momogun, kananganko i kosilato om akal dit ongodupot siti ponong, iadko i palanuk ko i pavus om i kogi, buazo ko i nunu-nopo, kembulai i keloo do riniba sid gama mongintutun om monodiri. Pangalaman siti ponong momungaran do dupot: Varo-no ong isuhut dit uni: ong ongakukul, mad narait it ongakukul, ko i Pit-pit-pit i dolou di pirit. Gam Momogun ong mangarait di ngaran dau kondiri, retanko misingombolog.

& I piniizaan do kusai om ondu: Amu miuna ong bai dupot o koruhang do riniba. Iti-no o sabap dot minongurug i Kinoringan dot ondu, supaya kikoruhang o kotimbang dau. Varo panarangan dot antad sid

tikagang di kusai it ondu. I YAHIVIST baiko minamakai do tangon laid di manarang do nokokuro, tu ogumu it ongotulang dit ondu mantadko i kogumuo dit ongotulang di kusai. Iadko i tangon dot antad sid tana dot osilou i riniba (7-8) mamakai i tuturan dino di tangon laid dot ondu om kusai kopirurut, mad iso-no o guvas, mad kesaan-no laid. Sid gama monuturan do iadino, pavalang banal i YAHIVIST di piniizaan dioti duvo dino. Iri-ogi iadko i gama do Kinoringan potoronong sid riniba dit ongodupot o gama potoronong dit ondu sid kusai sampai i kusai nga ounsopot-no di nokopitoguvang-no dit ondu sampai minanansalamat-no dit ondu. Kodung koruhang, harati, > mitatabang om mitulung om mirurut om miopud. Aso panangan do varo mangaladtak om mongorodsit om varo-po aladtakon om rorodsiton. Ino boros di kusai mad bahul, ino-no ong isuhut di boros dot Ibrani, Ialo-no ong alaidi, nga onsi dit onsi-ku om tikagang di tikagang-ku, ka, ko > Bianco-ogi nga onsi dit onsi-ku om tikagang di tikagang-ku, ka. Na varo-po lombus dino bahul dit aso tenganan pavalang sid Momogun. Tu ong sid boros dot Ibrani:

ISH = ulun ko kusai, topot ong

ISHA = ondu. (it isha antad sid ish)

Ong Inggeris: i woman antad sid man (it ondu antad sid ulun/kusai)

Sid boros di kusai kopurimon tokou dot it ulun dit ohigak, banalko avantang om kihukum. Oulud banal i boros dit ulun di kotoguvang patahak di hadiah antad sid Kinoringan. Om iti-no kagi i kanangan di tuturan diti.

24: Ino-po panarangan dino nempihatan-po di gama manarang di vaza dot ulun di tumongkizad sid molohing, tu osukod sampai molunung-no di timbang dau, ino-no i kusai om it ondu. Sabap i gama dioti miginavo. Ino boros dino mad sumaap di gama di kogumuai i koubasan dit ongobansa do popionong di kusai om ondu isuhut di kenginan do molohing ko razat sid saralom di pongitungan sid kolunduo, livotung, tirizan, varis om bansa.

Okonko i molohing ko i razat ot atag do mangahatas di piniizaan do kusai om ondu om popisavo dioti dino, inoi nga i kuasa di samod o popizo dit ulun, tu ahakang ino kuasa dino mantadko i kuasa di samod antad om ponong sid molohing. I kusai atarik sid gama guminavo dit ondu om it ondu atarik di gama guminavo di kusai sampai sompigumii-no ioti miduvo dino antad sid ongkob laid dioti dino, tu mongingkakat-no dot ongkob vagu. Ino kuasa dino, ino-no i samod om gama miginavo, antad-no kavi sid kinourugan do riniba. Kagi ino piniizaan dino aso koingakadan sid gama mivovo-vozo, mitabang, mirurut, miopud om mianggu ko mioput iadko kolibambang. Om ino dino pempatai, okonko bai songombo o kenginan dit iso-no, sampai mivovoli do susukod, ka di pongoretan.

>> Abasa-po, jawabai-no it a-ko piro soalan, ino-no:

a) nunu-ka i pitonidan di tuturan keso om koduvo kananganko i kinourugan?

b) nunu-ka o sabap do varo pitonidan di iadino?

c) sid siombo-ka o nokotuturan om nokosurat i duvo i tuturan di kinourugan? Mad okonko enizo o pongohorotizan dioti di tomodon di kinourugan?

d) nunu-ka i tugas di riniba diri, hiza di kinourugan sid duvo i tuturan diti?

&III. I NOKOTONGKIHAI I RINIBA (3,1-24)

Basao-no laid i F. 3,1-24 om iri-ogi i tafsiran diti:

I tuturan diti banalko avagat i harati sid ongoulun Kristian sampai atag do mongontupat tokou, supaya kaharati tokou do nunu o panangan di tuturan dino. Keso-no banal, Ong sid Kitab, okonko iadino i harati dino. Minsanko insan nga amu ahandaman vagu i tuturan dino sid ensanan i KITAB LAID. Antava varo boros di mamakai di pangalaman dino bahagi di kosipan om pinonuhuan do Kinoringan. Asot elaan di KITAB LAID dot antad di kahajangan di riniba diri nakaraag i riniba sampai nokokorapsi i riniba dino.

a) I pinoniagan: Noboros-no laid di Kinoringan dot, Akano-no dikou, ka (2,16). Iri-ogi moniag iosido dot, Ong it uva di kazu di pongilaan do kabanaran om karaatan, kadan-kou-no mangakan, ka. I harati, pobeas i Kinoringan di riniba kananganko it akanon dioti. Aso kokurangan di nunu-nopo ong i riniba: >sokoviai it ongouva dit sokoviai it ongokazu<. Manjadi nunu-ka i tinomod di poniagan? Amu oboros

ong ino. Bai iti-no o panarangan: Ong amu mangakan, amu kapatai, ka (17). Atalahas ong i tugas di riniba sid kabun dino. Ino poniagan nga amu tokou kaharati. Aso tinganan tanid mantadko mongining di poniagan dino om sumuhut-po. Suvai humarap dot i tinomod di poniagan dino ponong sid kosinango do riniba monumbozo om sumuhut it ulun di boros dino. I harati, sid poniagan dino kembulai i gama humarap sid Kinoringan, i minoniag di iadino. Antava kembulai i kopidukaan do ginavo di mangalukalu ong varo't akal do Kinoringan.

>iadko i poniagan dit idi sid opodok-po it anak do, Kadan-no kumavid sid lanjang dit alasu. Ong okovidan, tantu olingkosuan, ka. Na i pangalaman, miim-tiim it anak tumudu di lanjang sampai olingkosuan-no sampai mogihad, tu kioruol...<

I poniagan om i pinonuhuan o manahak do kobebasan sid riniba, dot sid kobebasan dino kembulai o harapan sid minonuhu om minoniag, antava i gama do riniba tumorima di janji do Kinoringan om mamakai di janji dino.

Ong i IMAM minongusul dot i riniba nokoluu di buatan do Kinoringan. Na i YAHIVIST manarang sid poniagan dino do kuran i riniba kadapat tumimpa di Kinoringan sid gama tumorima di rontob dino. Ong aso pangarantaban, aso kobebasan do riniba. Ong dupot amu engat do rontob. Ong dupot bai engat dot it akasang mangakan dit okugui, it agazo mangakan dit opodok. Ino pinonuhuan do varo rontob dino, soumul-umul sid riniba, tu ong aso rontob, aso kobebasan. Ong obebas kavi dot aso rontob, banalko aso kopudan do piniizaan. Ong i minisavo obebas sid nunu-nopo, kuran-po mirurut ioti? Pengkaa dino i hal do sikul, hoturan di nunu-nopo sid razat, gorija, kilang, kadai om siombo-nopo. Ong riniba amu anangan di hoturan di himbaan om it ongodupot dot it ahakang mangakan om mangaladtak dit okugui om it orukung. Ong i Kinoringan minonuhu om minoniag do iadino, atarang-no dot i Minamangun ko i Minongurug, nga kikuasa-po do manarang di rontob. Iosido o minongimbulai di koposizan om iosido ot elo mangahatul di kopudan di riniba. Sid nunu-nopo songhoturan varo hal dit amu ohorotizan i sokoviai. It anak amu-po kaharati do nokokuro, tu i molohing moniag do kumavid di lanjang dit alasu. Ong humarap it anak dot avantang i cadangan dit ama, mangasip iosido. Ong amu, olingkosuan it unturu dau.

Ong varo pangalaman om keloo om kohorotizan di lobipo mantadko it ulun di nosuhu-no, atag ong varo ponuhuan ko poniagan di mongumbasih dit ulun dit atag do sumuhut iosido. Sabap sid saralom di gama dau sumuhut, kumavid iosido di pangalaman, vokon-no ong i kinopunavatan di minonuhu ko minoniag.

Varo tolu o vaza di monuhu om moniag. Keso i hal dot adat. Koduvo i koponuhuan om i koponiagan, om iri-ogi i hukum.

- It Adat notud antad sid onogogulu-gulu do mangahatul dit ongohal dit okonko bai riniba o panangan.
- I ponuhuan om poniagan apakai ponong sid toriso-iso it ulun dot i monuhu ko moniag nga sino-no o kopitoguvangan dit ulun dit osuhu om otiagi.
- I Pinonuhuan om Hukum mangahatul di razat om masyarakat sampai nakatanda ino hukum dino (antava nokosurat-no). I tomodon: manala dit ulun di rumanggal.

Ino poniagan sid tuturan dino engin tumabang di riniba do humarap om tumimpa di janji om kovosihan do Kinoringan, supaya i riniba nga agazo o ginavo sid Kinoringan, i minanahak di koposizan om kopudan dau.

b) I kinopomolidan sid karaatan

I tuturan dino manarang dot oruhai it ulun apalid om nagazad sid karaatan, ong varo mamalid. I pangalaman di bansa dot Israel, hiza di nokosuvang sid pomogunan do Kana, banalko oruhai apalid dit ugama dit ulun pasok sino. Minsanko nokotiim i kuasa om kovosihan do Kinoringan, tigogi, hinumarap ioti sid ongopinokokinoringan di bansa do Kana. Pengkaa dino, it ipat-ipat it ulun, varo kopolidan iadko i hiza biano: I TV, ko i barang sid kadai om i-po sid koruhang mamalid do dumagang ko engin, minsanko aso siin, antava i hal do Dada, kodung itiag, banalko ikogorot. Banalko kagaratan dit ongoulun i poniagan. Sabap oruhai malid om mokipalid om mamalid. Atalahas-no dot sino dino varo rontob di riniba di siombo-nopo. Iti-no i kobuatano do riniba, minsanko adat ko ugama ko politik, nga amu monimban di kobuatano di iadino.

Kasalaan-ka nopo, sid gama manarang dot i vulanut nga i Saitan ko i vozoon do rogon (Iblis) banal, om iosido minamalid dit ondu dino, mad otoliban o harati, tu ong otopot, boros di YAHIVIST, I vulanut, nga inurugi do Kinoringan dot osilat om elo-ko it ongovinangun vokon. Kondiri di Kinoringan o minongurug di vulanut do iadino o koelo om kosilat.

Na i vaza di vulanut mongoduat om monginsosok o nakapalid, tu mad minongogolivong di ginavo dit ondu. Aso panarangan do nokokuro, tu iadino o gama di vulanut mongoduat om mongogolivong dit ondu. I harati, amu elaan do sionngo antad ong i karaatan. Amu nelaan di YAHIVIST manarang it inantadon do karaatan. I vulanut kumiboros dit ondu iadko it ongodupot dit elo momoros sid ongotangan do Momogun, i palanuk om i buazo, i kogiu om i pavus. Kagi iti tuturan dino manarang di hiza di gulu banal. Amu-po nokopitanid it ongobansa. Manjadi i vulanut mad varo-po koluu di keloo om kavazao di riniba, tu elo-no iosido monodiri di karaatan om kabanaran. Banal-no, i riniba varo kovongunan dau di mangaharati om mongintutun di sokoviai i tanid mantadko i Kinoringan. Topot iti-no i mad mongunang di vaza do tumoguvang i riniba sid Kinoringan. Sabap i kopolisan dit ulun, nga varo sukud om timbagos dit aso tinganan iduon, nga kakali ozi i riniba do mokiinsomok om rumompok sampai tumalib dara do Kinoringan. Iti-no o kopomolidan. Ino-no i kopolidan: it ulun ozi do misingkinoringan. Manjadi sid gama di vulanut mongo-duat om monginsosok do bai songkobinarasan di mad monuhu, mad moniag, iri-no o nokogolivong dit ondu sampai napalid it ondu sid gama dau tumimpa do iadino, tu sompi mangalai ioti di boros >sokoviai it uva om kazu, om mongohodtol it ondu dot, rontob sampai mangamung-po sid poniagan dot, mongutu om mangavid, nga a-kavasa, ka. Sino-no o kotimpunaan di kopolidan. Iri-ogi i vulanut tumimpa om manarang di kogunaan di kazu dino >koerad-kou di kasavato do Kinoringan, ka. Iri-ogi kembulai-no i vazaan malid:

- > I mato sumirot om kemot-no dot avantang
- > It ivou nga oroloi-no, tu kendoroloi it uva
- > I ginavo nga atarik, tu i kopintaro o manarik

I kuasa om keloo di monodiri dit avantang om it araat, ko kabanaran om karaatan o mongimbulai di kenginan do tumalib sid Kinoringan. Kodung iadino, norungoi-no i harapan ponong sid Kinoringan. Tigogi i poniagan di Kinoringan okon-noko ponong-po sid kopolisan dit ulun ot ohotorizan, inoi nga mad vaza di Kinoringan moniag di kenginan do riniba. Iti-no o sabap dot it ondu mangaranggal-no di poniagan do Kinoringan. Ong i kusai, aso minamalid, baiko rinumundun iosido dit ondu.

Ino dino manarang dot varot okonko bai kalandu, inoi nga varo it ulun ong baiko sumusui di gama dit ulun vokon dot amu-no monodiri dot avantang ko amu i gamaon dino, enizo-no rumanggal di rontob dau. Ogumu-kagi it ongoulun di minud sampai it ulun vokon mangagama dit amu apatut, iri-ogi sumusui ioti, retanko ialo-no o minangagama, iri-ogi baiko sinumuhut-po di gama dau. Ong iosido kadapat om kavasa ong iosido, nokokuro, tu ioku-po ot amu? ka. I harati, i piniizaan dot ulun, varo duvo o kanangan, it iso ponong sid kosinangan, i koduvo ponong sid kopolidan. Na it ulun di baiko sumusui dit ulun vokon dit amu mongitung, mad orukung it toruntut dau. Ong it ulun di manarik sid kopolidan, osilat om elo monodiri om i mato dau nga atarang mongintutun sampai mogihim iosido di kosuruto di kopolisan dau ponong sid pangkat om garal om hormat-po. Ong i sumusui, nga mad obul, minsanko i koubasan laid nga amu kumavid iosido, sukul varo mangagazad dot amu osodiri dot nunu i rikoton. Lobipo amu mongitung iosido di kosungguvo, ong ensanan it ongoulun sumusui dit iso it ulun di mamalid. Tu ong ensanan it ongoulun bai sumusui, banalko apagon do potorongot di masyarakat om bansa ko politik om hoturan.

3,7 I kosungguvo di kinopolidan: Nakakan-po, amu minatai it ulun, gam mad ogiang-no i mato dau do memot iosido dit amu noubasan laid, ino-no maba-labas iosido. Manjadi ino-no i tinomod di YAHIVIST do monuturan di hal dino, minsanko karanggal it ulun sampai i kosungguvo i kapatazan, nga kaharati iosido do hal dit amu nokengat laid. Om ino dino o manarang di kuasa di kasalaan.

c) I kembulazan dot ekum i riniba.

2,25: Kakali momoros dot, Aso sulung, amu miikum ioti. _Dot tigogi, nga ekum-no, tu maba-labas-no. Nakaharati-no ioti di iadiko i boros di vulanut. Kelo-no ioti, monokop di komoluan. Topot i miikum ioti rumbul satu, nakaharati ioti do hinumambil ioti di poniagan do Kinoringan. Gulu-keno, osinang-no ioti

sid tinoguvangon do Kinoringan, dot tigogi, ekum-no ioti do sumamung vagu di Kinoringan. Nelaan-no dioti do varo hal dit amu nokonong, iti-no o sabap do moniim-tumiim-no sumusut. I keloo dioti dino kopiganti-no di kosinango dioti sid tinoguvangon do Kinoringan.

d) O Adam, siombo-ko-kai?

It ombo i natagak banal, suvai atalahas ino ong kasamung tokou-no do Kinoringan. Baiko sid tinoguvangon-no do Kinoringan om avalang-ogi banal i karanggalan om kasalaan.

Na i YAHIVIST mongusul sid di tokou do hal dit amu jumadi ong biano, ino-no i riniba kotoguvang sid Kinoringan do kopivurosi. Ino iadino bai i hiza di kinotimpunan. Bai sid F.3-4 varo gama mongohukum do iadino, dot Kinoringan o mongoduat om monginsosok sampai mongohukum om manala di riniba. Keso, i gama rumanggal mongimbulai di korungazan di kosinangan, iadko it ulun di mangakan do kavanit, nga mitinganu.

Pengkaa dino i kinosomungan dioti di Kinoringan: kondiri di Kinoringan o mogihim dioti Adam om i savo dau. Topot ioti miduvo sinumusuti. Nelaan tokou-no ong kodung varo kotimbaru do sala, sumusut om mongolim it ulun di nagama dau. Suvai kotoguvang sid hakim om duaton-ogi om insasakan-ogi sampai rotuan-no do hukum. Ong sid pihukuman, varo gama monginsosok om palanta do kuran i vaza do kabambol sid karanggalan dino. Mivoli-voli mongoduat om mongimbulai do kuran di kusai om it ondu tanggung jawab di dau om dau do nagama. Nunu-nopo i nagama dot ulun, osusa iosido mangakun sampai monimpa tumanggung. Topot i vulanut, amu-no oduatani.

Kondiri di Kinoringan mogihim dit ulun di sinumusut, sabap kakali agazo o ginavo do Kinoringan mongumbasih dit ulun dino. Kinoringan amu pemozo dit ulun om i ginama dau. Iti-no o vaza do Kinoringan momongo di gama mangahatul om monunda di riniba dit antad sid palad dau. Kakali ozi i Kinoringan do tumimpa it ulun di duaton dau.

Na it ulun dino kadapat dumahava di gama om i kondiri dau. Boros di Adam, It ondu di nitahak-nu... (12) Manarang i Adam do nunu-nopo i najadi, mad okonko iosido o minangagama, gam varo songlinsou mad manala-po do Kinoringan, tu antad sid Kinoringan it ondu, ka. Ong sid karanggalan, tigogi mad piniizaan, iri-ogi tumolikud di koruhang, ino-no i gama dot ulun.

Ong it ondu, nga manala di vulanut om pompik di sala sid dupot. Na amu insasakan-no ong i vulanut. Na aso boros sino di monodiri dit inantadon di karaatan. Banal-no, aso tinganan do sionngo o pezanan di karaatan om it inantadon om kembulazan di karaatan. Iti-no it a-milo-milo tumoguvang i riniba, ong varo karaatan. Topot i riniba osusa do mopud om engat do varo karaatan, sampai mongontupat, supaya amu monimbaru do karaatan om humambil om tumongkihal sid karaatan.

e) I riniba om i pangarantaban dau.

Sid tangon laid diri, sinunsub-no i riniba antad sid kabun.(20-24) Sabap iti-no it atag o gama mongohukum di karanggalan dioti dino. Iri-ogi varo-no nakaratu do hukuman ponong sid vulanut om it ondu om i kusai (14-19) di manarang dot nunu banal i panangan, ong osunsub-no it ulun antad sid tinoguvangon do Kinoringan. Ino dino manarang do kuran i riniba, ong nokedu-no sid tinoguvangon do Kinoringan.

I riniba a-milo-milo varo kosusaan om korukungo. Asot engat di riniba dot i kopolisan atandas ali-ali om osinang om ahakang it ulun sampai maju iosido. Kuran-kuran, nga osian it ulun di varo kosusaan, sampai matai-no it ulun. Sid kobuatano dino nokopikaput-no i riniba om it ongodupot om vinangun dot enizo osusa, iadko i boros di Paulus sid Rom 8,22: i sokovia i vinangun mogodoi, om kopurimon dot orualan di mad hingoton sampai biano.

Ino boros dino do mongohukum, mad-no lulupu. Na nolupu-no i vulanut, topot i riniba amu. Ong i vulanut: ikau-no ot lulupuon. Baiko momondoiko-po... It ulun kodori songvongo do nokokuro, tu i vulanut mamantau do baiko momondoiko, okonko iadko it ongodupot vokon, om nokokuro, tu varo mad pisanaan om pioduhan sid pialatan do riniba om i vulanut. Iti-no o sabap, ka di YAHIVIST, tu duvo o lupu o nokonong sid vulanut.

Ogumu o panarangan kodori kananganko it ongodupot om i vaza dioti tumanggai ko monoro om monusa di riniba. Ino tuturan dino manarang do kuran nokosimban i vaza di natarang-no laid. Sid F.

2,19-20 tumoronong it ongodupot sid riniba om i riniba momungaran dit ongodupot. Iri-ogi nokopisana-no dot, kodung nokopisamung di riniba om i vulanut, varo-no ong moninduk, varo-no ong mongohotok dot aso-no kengkadan di gama misana.

Varo pandita (Martin Luther) di minanarang di linupu dino dot, Mad noboros-no om nokentalang-no laid sino dot i Kristus om i Mariam ot noboros, kodung noboros dot, It anganak dit ondu o mongohotok dit ulu di vulanut, ka, om i vulanut moninduk dit anganak dit ondu, nga Kristus-no o noboros, tu nanangan-no iosido di tinduk di vozoon do rogon (i hiza di nohukuman sid kazu do sangkap), ka. Mad oholian o gama dau mangaharati om posondot di harati di boros do lulupu dino.

Manjadi i nohukuman-no it ondu om i kusai sid dau om dau do nagama dino, ino dino nga manarang-no di kogunaan om i rontob dioti dino. It ongokapagasan om kosusaan dit ondu hiza dot ogontizan om musu om momiara dot anak o tinarang-no sid hukuman dino om kuran it ongoondu okuasaan dit ongokusai om kakali monongkusai ioti. Na aso boros siti dot a-milo-milo, nga i kusai monguasa om mangaladtak dot ondu. Bai i hiza diri amu gunaon banal do kusai it ondu. Topot ong i boros kananganko it ondu manarang do kuran-kuran, i hal do maganak, mogontizan om i hingoton, baiko it ondu mogos sampai momurimon di kosusaan om korualan dit amu insan kopurimon ong it ongokusai.

Ong i hukuman ponong sid kusai, kananganko i kapagasan di gumama, miabal-no di gagamaon dit ongoondu ong mutanom om mongumo. Ino-no i tinomod, manarang i boros dino do kodung mangagama it ulun, nga okonko atandas oruhai i gama dau. Suvai magavi gumama sampai umasan-po, ohuzan-po om varo-ogi't ula. Kagi it ongorugi om rungkopi, sakot nga nakamung-po di kosusaan dot amu oruhai mopud, ombo i natanom ko i nakasok-no. Suvai oumasan om varo-ogi't ula om uva, ka.

Manjadi aso bida i hiza diri do bai mutanom sid kabun o gama dit ulun ko i biano gumama sid kilang ko sid upis ko sid alun-alun ong sukul atag o gama, suvai magavi posurut di gamaon om atag-ogi, do sid gama dino, okonko atandas avantang om ohigak it ulun gumama, inoi nga varo mad rugi om kosusaan om kapagasan om asaap-po dit engin mananus om momunso dit avantang o gama. Topot, ka di YAHIVIST, kakali mad abarakatan-no i gama gumama, tu varo't oula do koposizon antad sid Kinoringan, i minongurug di riniba om vinangun.

3,19: muli-ko vagu sid tana, ka, Asoi boros sino dot ohukuman it ulun dot onongon iosido do matai. Noboros-no laid do varo rontob di koposizan om umul di riniba, tu antad tana iosido (2,7). I harati, i kapatazan dit ulun okonko hukum, tu i gima nakaranggal i riniba di pinonuhuan do Kinoringan, inoi nga i rontob laid do masi it ulun. I kapagasan di koposizan om gama, nga varo pangarantaban. Okonko opogos it ulun dot aso kengkadan.

f) I kinosunsuban antad sid kabun dot Eden.

Na i panangan di tuturan diti, ino-no, i kinoponunsuban di riniba antad sid Kabun dot Eden, tu iti-no i vaza di Kinoringan mongohukum dit ulun di nakaranggal-no di poniagan dau. I kavazao di kusai om it ondu o nokonong.

I mula-mula, i tuturan mongusul do kuran i riniba pinentoron do Kinoringan sid kabun. Na i kinompuso, nosunsub-no dau antad sid kabun dino. I riniba di nokensomok-no sid Kinoringan sampai nokotiim di barakat om tunda do Kinoringan diri, tigogi, nokedu-no sampai kopurimon di kosoduo antad sid Kinoringan sampai i kuasa do huntung.

Minsan iadino, kakali varo harapan, ino-no, i kusai momungaran di savo dau do Hawa, ino-no i harati di ngaran, idi di riniba, ka om mad kakali abarakatan-no i riniba ponong sid koposizan. Iti-no kagi i garal dit ondu om katamanan dot idi iosido. Sabap sid F.4,1 ening tokou ino katamanan dino, ong momoros i Hawa dot, Tinahakan-oku di Tuhan dot anak do kusai, ka dau i hiza di kinousuvan dau di Kain. It ondu mongimbulai di koposizan vagu om masi ponong sid koposizan do riniba. Okonko kotonusan om kapatazan o rikoton di riniba, inoi nga i koposizan om karanzatan do riniba.

It amu-po osunsub i riniba, pinakazan-no ioti di Kinoringan do sulung dit kulit do pangazam o ginama. Ino gama do Kinoringan dino, nga vaza dau do kakali monulung om monolutui dioti. I hiza dit amu-po nakaranggal (2,25) varo boros dot, Amu miikum ioti, ka. Suvai nakaranggal-no om miikum-ogi ioti dit aso sulung-sulung dioti dino. Minsanko nokopongodorut-no ioti dot ongoroun do kazuu, kakali mekum ioti diri tumoguvang vagu di Kinoringan.. Suvai kondiri di Kinoringan momiara dioti do sulung antad

sid palad dau om amu-ogi ekum i riniba. Kenginan do Kinoringan, it ulun amu ekum sid tinoguvangon di koruhang dau om sid tinoguvangon-po do Kinoringan. Amu ozi i Kinoringan do songekum-ekum-nopo i riniba di mongohondom om momurimon di kinaranggalan dau, om ulun iosido di kisala. Gam obebas-no vagu i riniba do lumombus ioti sid pomogunan vokon dit osodu-sodu antad sid tinaud do Kinoringan. Ong kakali sid kabun, i riniba koruhang om sakub dara do Kinoringan sid gama mongurug om mangahatul di vinangun. Topot kodung nokedu-no antad sid tinoguvangon do Kinoringan, aso-no't elaan vagu di riniba do kumoruhang-po do Kinoringan sid gama mongurug om mongumbasih di vinangun. Nengkod-no i vaza rumompok om mongontok di Kinoringan sid kinourugan dau.

Ong moniim i riniba do mongurug do valai di kitiningusan di sumunggu sid avan sampai sid surga (tu i kiniro diri, ponong sid savat i surga), nga aso tinganan, antava ong varo raja di retanko iosido nga anak do Kinoringan di mongontok di Kinoringan sid dau do pomogunan (iadko i Faraun sid Masir, ko i raja sid Babil, i Tenno sid Jipun hiza di mononjipun, ko i Kaisar do Rom, Kina ko Korea diri), ko ong biano, varo saientist om montiri di retanko elo mangahatul om manansanganu dit ongokorimbutuon om i vulan, ko mongimbulai om mongurug di vangun vokon ko bansa dot ulun di banalko ahakang om obinsuhut do hoturan, ko sapi di banalko ogumu o susu ko vogok dit aso lunok, nga ogumu om obisa ot onsi, tigogi, varo rontob di gama di iadino. Tigogi, varo mimbulai ponong sid karaatan.

Antava i USSR, ino pomogunan di minongimbulai di hoturan do Komunism: ong nokotiim do pakaso do Kinoringan om momunso dit ongogorija om ongougama sid saralom do turu nopod toun, tigogi, humuzas-no i hoturan di iadino om obebas-no vagu it ongoulun do sumuhut di kenginan kondiri sampai lumombus-no sid ugama di kakali amu-po nopunso.

Iti-no ot atalahas sid tuturan diti, I riniba nokedu-no sid piniizaan do Kinoringan sampai asot elaan do tumalib ko mongontok antava milawan do Kinoringan, songkuro-nopo misingkinoringan-nopo iosido dino.

g) I kazu di koposizan om kapatazan

Ino tuturan di kazu, bai sid kovian di tuturan dino o kembulai ko nakamung-no (3,22+24) Ong sid kotimpunaan di tuturan (2,9) varo boros do varo kazu di koposizan om kazu di pongilaan do kabanaran om karaatan, ka. Sid konoruvo di tuturan, a-no insan koboros vagu i hal di duvo i kazu dino.

Ong it ongoulun kodori diri, engat-no laid do varo tuturan do iadino. Ko it Ongodaya sid Kalimantan, nga varo-no tangon di kazu di koposizan gam ong mamatuw ioti dot ikam om juli, monurip ioti sid ikam do surip di kazu do koposizan dino. Ino kazu dioti dino mad usul di bansa do Daya. Pengkaa dino ogumu ot ongopomogunan om ongobansa do varo tangon di iadino. Ong iti siti, sid kovian di tuturan diti, varo duvo o tinomod nakarait kananganko i kinosunsuban: Keso: (23) supaya mongumo om mutanom i riniba sid putanaon, tu tana ot inurug dau, ka. Koduvo: (22+24) supaya a-kensomok i riniba sid kazu dino, gam varo-po jaga di mongontupat om magavang, supaya amu kotoronong vagu i riniba sid kabun. Iti-no i pananganan di panarangan dino. Baiko i Kinoringan o nokelo-no kavi dino om apasi penlaid. Ong i riniba mokielo om mokipapasi dara. I riniba ozi do jumadi mokierad do Kinoringan, iadko i binoros-no di vulanut. Topot iti-no i pitonidan do Kinoringan om i riniba, atarang-no banal sino. Minsanko kaharati dara ngaran i riniba di keloo di kabanaran om karaatan, nga ino keloo dino okonko bai ponong sid kosuruto di riniba, inoi nga varo-po ponong sid korumaato dau, kakali varo rontob di sukud do riniba, ino-no varo kovian di timbagos dau, isuhut di kenginan do Kinoringan. Sid rontob dino, nga aso't humambil om rumanggal.

Sabap ogumu it ongobansa kodori minamangon do varo kazu di kiuva di manahak do koposizan penlaid, iti tuturan diti manarang di rontob di koposizan do riniba, gima varo kasalaan. Ino-no i rontob, i riniba di nokensodu-no antad sid tinoguvangon do Kinoringan, a-milo-milo varo kosungguvo do matai. Salaid dot apasi i riniba, nga otunda om ahatul iosido, gima uva om hasil inurug di palad do Kinoringan. Sid saralom dit apasi-po it ulun, varo-no tugas dau, ino-no, mutanom om mongopud dit ombo-nopo i keloo om kosilato dau di kadapat mongusaha, ponong sid kosinango dau om i dang koruhang sampai ponong sid kohormatan do Kinoringan.

h) I kinembulazan do sala ko i kinorotuan sid kasalaan

Sid kogumuai it ongokosipan dit ongoulun Kristian, varo pongoretan dot, Iti tuturan diti o ino-no i tuturan di rinumatu-no i riniba sid kasalaan, ka. Kodung iadino, moniim i tajuk dino do manarang om mamalang dit onsi di tuturan dino. Vokon-no ong varo panarangan dot, Sino dino o kinembulazan di sala, dot i sala dino tinungkusan di songriniba, ka. Varo-no laid iadino ong sid ongoulun do Yahudi. Hiza di Ezra, varo boros dot,

O Adam, nunu-ka o ginama-nu?

I minonimbaru-ko do sala, okonko baiko ikau o naratu-no, gam iokoi songmongkupu, nga naratu-no sid kasalaan, ka.

Kodung iaditi i vaza humarati di tuturan diti, mongiro tokou dot i Adam okonko bai riniba dit inurug di palad do Kinoringan, inoi nga mamakai tokou di kososizan dino iadko usuran om sejarah di hiza tokou biano, dot i Adam ulun di iadko i tokou. Dot ong otopot, i Adam dino guluko i nunu-nopo songusuran om sejarah tokou. Okonko ulun iosido iadko i tokou. Ong sumusui tokou dit ongoulun do Yahudi humarati om manarang di tuturan diti, kalandu tokou, tu manganu tokou di tuturan diti do puun di tudukan do varo **korotuan sid sala** om varo **sala di notungkusan sid ongotohudi**. Na i tuturan diti, tantu amu mongusul om mongitung di iadino, bai i vaza do nokensodu antad sid Kinoringan i riniba o tinarang sino.

Kagi i Paulus manarang do miabal dit Ongoyahudi diri, nga kakalpo sinumuhut iosido di vaza dit Ongoyahudi manarang, okonko i tudukan di Yesus o suhuton dau sid gama mongusul di Adam om i kinourugan. Sabap sid di Yesus, songlinsou o boros kananganko i sala di Adam, nga aso't abasa tokou, sampai i gama di Yesus atandas mogihim dit ongoulun dit orukung om osusa om kisala, i tomodon, pouli dioti vagu sid Kinoringan om mangatag dit ombi it nanangan do karaatan di vokon.

Na sid sejarah do gorija varo vagu uskup, in-no i Augustin, di mad posondot banal di tudukan do varo **sala di notungkusan di sokoviai i riniba sid tohudi**, sampai minanahak-no do suntuan do karaatan dit ipat-ipat it ulun, ino-no i boros dau, Ong apid it anganak om sumusu sid susu dit idi dau, ragang-po, nga misolod-no di susu dit idi om kumioduw dit obpinai di sumusu sid susu koduvo dit idi, ka. Iti, ka di Augustin, nga tanda di sala tinungkusan.

Na it ongorija di minamakai om soumul-umul mamakai di panarangan di Augustin, keso, i Roman Katolik om iri-po't ongorija Protestant, tumiim humarati di Buuk do Kinotimpunan F.1-11 iadko usuran di hiza tokou diti, dot ong otopot, aso tinomod dit ongo fasal do iadino. Sokoviai it tinuturan sid F.1-11 dino, usul guluko it usul tokou riniba di kiharati iadko usuran ko sejarah biano. Gam ino't ongo fasal manarang di kembulazan di riniba om i kobuatano diri, ino-no,

Nokokuro, ong i riniba it inurugi do Kinoringan, tu varo rontob do matai om varo kosusaan om korualan, varo kapagasan om varo-po sala om karanggalan dit ulun.

Topot amu mongingosok i tuturan diti dit inantadon di kapata-zan ko kasalaan.

Ong kopiakan/kopiikat i karanggalan dit ulun om i kapagasan om kapatazan, kakali aso boros sino dot i kapatazan o suul di kasalaan (Rom 6,23). Sabap minsanko nokentahan-no laid dot, Ong mangakan-kou dit uva, kapatai, ka, kakali amu minatai i rinibai i hiza diri. Minsanko nakaranggal-no it ulun, nga apasii iosido di pengavi di sukud dau. I lulupu do Kinoringan amu nokonong sid riniba, inoi nga bai sid vangun vokon, i dupot om i putanaon. Minsanko nosunsub-no i riniba sid tinoguvangon do Kinoringan, kakali i riniba sid hoturan om kuasa do Kinoringan. Banal-no, i sala om i kapatazan mad buatan do riniba. Topot ino riniba di iadino, kakali antad sid palad do Kinoringan o kosinaan dau. Manjadi iti-no i tinomod di tuturan dino, Okonko tudukan di sala di pitungkus-tungkusan di riniba.

Sid tuturan diti humarati tokou dot i riniba diti, nga aso tinganan do mogidu antad sid kuasa di Minamangun ko mogihim-po do vaza sumodiri om masi sid hoturan di vinangun dit okonko antad sid palad do Kinoringan. Pempatai, penlaid, nga i riniba sid tunda do Kinoringan, ponong sid kavantangan om ponong sid karaatan. Aso vazo do masi om mamasi vokon tanidko i koposizan di nahatul-no laid di Kinoringan.

i) I Adam om i Kristus

Om pisomungon tokou i tuturan di kinourugan di riniba om i tuturan di Yesus Kristus sid Kitab Vagu, emot tokou do mad enizo o kosungguvo do manarang dit ensanan i riniba di sid tinoguvangon do Kinoringan, tu i gama Kinoringan o i minongurug. Sompi mongusul i Buuk do Kinotimpunaan om it Injil di Yesus di kobuatano do riniba, varo rontob dau, gima it amu milo i riniba do mamakai di kobebasan dau, i ponong sid ulun vokon om i ponong sid Kinoringan. Siombo-nopo i riniba humambil om rumanggal di rontob dino, manahak i Yesus do suntuan do sumuhut om monuluk di koposizan di kopionong sid hoturan di kinourugan di palad do Kinoringan.

Ong i tuturan dit IMAM (1,1-2,4a) minongusul dot i riniba koluu do Kinoringan, supaya mikokoruhang di Kinoringan om i riniba, ong i Kitab Vagu mongusul dot i Kinoringan banalko manamod di riniba (Yahya 3,16) om iti-no i vaza di samod do Kinoringan, kondiri di Yesus mongimbulai om suntuan di samod do Kinoringan sid isai-nopo, sampai i Yesus mikokoruhang di riniba, minsanko it orukung om it asaadan, ko i kisala om i nohukuman iadko it ulun di korompok sid kazu do sangkap.

Ong i YAHIVIST MANARANG; I Kinoringan minongobebas di riniba sid kabun dot Eden, supaya masi om mopud i riniba sino dino di mongusaha di tugas dau do mananom om manaud om mangajaga di kabun. Topot i riniba sinumolon di bantug do Kinoringan om minongivogu dit obpinai dau (F.4).Nga i Kitab Vagu manarang di gama di Yesus, i tudukan dau om i kapagasan om kinapatazan dau, nga vaza do Kinoringan mangatag vagu dit amu atag. I Yesus minogihim dit ongoulun dit opogos om asaadan (Mat. 11,28-30 om Luk. 4, 18-20) om minomurimon iosido dit ongokosusaan dit ongoulun, i lumikop, sumakit, di kikihizon om pangangada, siombo-nopo tumiim i Yesus mangatag dit ongokokurangan om korumaato om nongoraag. I sompi tinomod di Kinotimpunaan om Kitab Vagu, I Kinoringan amu abasan mongumbasih dit ulun om i riniba dot ensanan om posuntu sid di tokou di vaza do kopudan do riniba ponong sid kosinangan di sokovia i om ponong sid tinomod-no laid i riniba, ino-no ipongohormat di Minongurug dit avan om i tana.

>> Abasa-po, jawabai-no it ongosoalan diti, ino-no,

a) nokokuro, tu amu minatai i riniba di nakakan-no dit uva di kazu diri?

b) isai-ka ot nanangan di lulupu do Kinoringan?

c) nunu-ka i pitonidan do koposizon do riniba i kakal-po sid kabun dot Eden om i nosunsub-no sid kabun dino?

d) nunu-ka i tanda dot i Kinoringan kakali agazo o ginavo mongopud di riniba di minsanko nakarangal-no i riniba di pangarantaban om poniagan do Kinoringan?

Fasal 4: I KAIN OM I HABIL

a) I kinosinaan dit anganak, tinumomon i Hawa, tu mongimbulai-no vagu iosido do koposizan om ranzat vagu. I Hawa, iti do koposizan o ngaran manaahak di koposizan sid anganak dau.

b) Kodung gumumu i riniba, osodiri-no it ongotugas om gamaon do riniba. Varo ong manaud do pangazam, varo-no ong mukabun. Na it ulun di minitanid o tugas, nga milawan-no sid gama mongohormat do Kinoringan. Amu kopionong i gama dioti, tu it iso rumosi do karanggal i koduvo, ko it kotiso mongivogu, tu tanid it ula om kosungguvo di vokon. Aso panarangan do kuran o kohorotizan di Kain dot amu nikozi di Tuhan i parsambaan dau. Hal di lisun, ka ko nunu? ko bai indoson dau ong varo gama do Kinoringan monodiri dot ozi ko mangamu?

I tuturan baiko manarang dot i Kain humungot sampai olungui iosido, gima mad tanid i gama om tugas dit obpinai dau sumamba sid Kinoringan. Iri-ogi mongingut-no iosido di Habil sid dau do vatas, sid kabun dau om pinatai-no it obpinai dau. Kaluto ong amu dati engin mamatai, nga mad nakalandu iosido, tu amu-po nengat do nunu o kosungguvo do hungot om sana. I karaatan di bai mongivogu minaganak-no om minongimbulai-no do karaatan vagu, kasanaan om iri-ogi mamatai-no dit ulun dit osomok sid dau, ino-no it obpinai dau. (Ingat tokou i tudukan di Yesus sid Matius 5: ino-no, i gama mamatai, sid kohungatan o kotimpuuni).

Norungoi-po i piniizaan do Kinoringan om i riniba, amu-no nengat i rontob. Na tigogi, i piniizaan do riniba, nga norungoi-no, tu amu kopiharati om amu miharap mikoruhang ko miobpinai om iri-ogi

momudut-no, retanko amu nelaan do siombo it obpinai dau. Tu iadino i timpa i hiza di ininsasakan-no i Kain dot, Siombo-no it obpinai-nu? ka. I timpa dau manarang di tugas dit ipat-ipat it ulun ponong sid ulun vokon, ino-no: **Ioku-naku o m'ongontupat dit obpinai-ku? ka. Banal-neno i tokou-no diri o m'ongontupat soumul-umul dit ulun vokon di songriniba** sabap ensanan i riniba nga mad obpinai tokou. I tokou diti tanggung jawab di koposizan om kosinangan dit ulun vokon, isuhut di boros di Yesus: **Manamod-kou-no dit ulun vokon iadko i kondiri dikou**, ka, om i boros di Yesus sid Mat. 25,31-46: I nunu-nopo i gama sid isai-nopo it osusa, mad sid dohon kagama...

Ong varo hal dit amu kopionong sid pialatan dit ongoulun (di tokou), Kinoringan kondiri ot anangan om osusaan. Boros di Kinoringan diri, I raha dit obpinai-nu, i nenum di tana o minongogizak om minongodim dohon. I pomogunan na osusa, ong varo hal di iadino, iadko i sid Momogun diri, retanko alasu i pomogunan, ong varo kosusaan sid pialatan dit ongoulun sampai osusa-no monogit di pomogunan sid gama pasamba sid rogon do boli ko nunu-nopo songparsambaan.

Ong sid Kinoringan, ipat-ipat it ulun nga ulun di kiguna om kingaran om garal, tu ginama do Kinoringan. Ong amu mongoguna i riniba di koposizan dot ulun, sid rumpak, sid rumpak salib diri, it ongorumpak dit ongozegi do Kristian di minioduw dot alaid, (Roman Katolik om Protestant, minsanko biano ong sid Ireland, ko i lumikop it ongoulun, tu amu avantang pamahagi di hasil do tana, ko sid suvang do sompomogunan ong didino, 15 juta ot ulun lumikop ipat-ipat it toun, sampai 500 juta ot ulun, banalko okurang i balanja om koposizon. Topot varo-po laba do 1000 juta it ongoulun di momodrusuk sampai varo-po sakit dioti dit oholian kolomu. Kuran-no diti? Iti-no o tinomod di tuturan diti, Banalko ipat-ipat it ulun varo tanggung jawab bahagi dit ulun vokon, tu kodung riniba, mad mioobpinai tokou sampai amu atag do mivogu ko sumolon ko humungot om sumana-po do sampai momudut om mamatai.

Na i hiza diri varo't ovongo it ulun dot Israel do varo't iso o bansa di Keniti di kitanda sid vuoros, dot ino bansa dino miringkozou-nopo om arampus o buatan dioti dino. Tasantanid-tanid o keloo dioti dara, nga kakali amu ahatul o gama dioti. Sid tangon dit ulun dino nokembulai dot nokotiim ioti mongkuta do pomogunan, om elo-po ioti modzupu do saring om basi om varo-po vaza dioti do mangaramai sid gama monuling om monundatang om mioondi-on-di, nga kakali varo-po hoturan dot araat, ino-no ong kodung varo kosusaan do varo napatai do bai punovot, okonko tinomod, monuli mamatai di bansa vokon ko i dau do varis. I vaza dioti monuli, porundun dit ulun di nakagama do kapatazan dot iosido om i sakub dau. Topot i kovosihan do Kinoringan bahagi di Kain, ino-no, Kinoringan minangapad di Kain, keso sid tanda di mad hojimat om poniagan dot a-kavasa do monusa dit ulun, om koduvo, minamalang-po i Kinoringan dot iosido o monuli di karaatan ombo i nokonong sid di Kain om i rurungan dau, dot inturu o gama monuli, ka. Tigogi, i mongkupu di Kain kondiri kumavid di hoturan dot inturuon posuli i karaatan dot ulun.

Na ong i Kinoringan mongorinding di Kain dot inturu o kosuliai i sala di minonusa i Kain, kakali okonko harati, i riniba kadapat kumavid om mongohukum do monuli do karaatan. I gama monuli, Kinoringan o milo, okonko tugas do riniba (Rom 12,19-21) Kadan-kou-no mononsuli, inoi nga inudaino dikou i hungot do Kinoringan. Sabap nokosurat-no dot, Ioku-no o sanganu di gama mononsuli, ioku-no o monuli, ka di Tuhan, om iri-ogi, Kadan-ko-no mokitori do karaatan, inoi nga torio-no do kavosihan i karaatan, ka di Paulus.

25) Sid kovian varo-po boros do kianak-no vagu i Hawa om i Adam sampai i hiza diri nokotimpun-no i riniba mongohormat om mongoguna do Kinoringan.

Fasal 5 mongimbulit do bai onibak i kinourugan isuhut sid F. 1,26-31. Narait it ongongaran di Adam om it anganak, muaki om mongkupu dau. Sid ongoumul dit ongoulun di narait sino, atalahas dot okonko okiro iadko i tokou om aso tanganan do mongitung do songkuro kalaid ong i Adam om songkuro koloun. Sabap i hiza diri okonko varo't ulun di minonurat di sokovia i it ongoumul om varo-po surat do beranak: Ino tuturan dino iadko i tuturan antad sid Aki Bantang do Momogun. Minsanko bai duvo natus toun kodori, ong Momogun amu tantu andaman ko elo mongusul om manantu dit umul om kobuatano dit ongoulun kodori.

Ong siti, hopod generasi om iri-ogi linusuvon-no, ka. Sid saralom di hopod generasi diri nokopigagavul-no i sokovia i it ongotuturan om rurungan om bansa dit and-andaman dit ongoulun i hiza diri. Bai i sid

Asia Tanga ot nokelo it ongoulun diri do varo riniba. Ong i sid sodu antad sino, mad a-kabambol ko kopisamung di riniba vokon.

Pengkaa dino amu monguro-kuro i mongusul do sionngo antad it ongoondu, ino-no it ongosavo dit ongo kusai di narait sino dino. Iti kavi nga okonko tinomod di mongusul manarang om monuturan sid di tokou. Sabap ino, aso tinganan do mokitarang dit amu tinarang sino dino ko mamakai di tuturan dino do sejarah om usuran di kinapangaranzatan do riniba.

&Fasal 6-8 I linusuvon

I Kitab Momogun bai mongonsi dit ongotuturan sid tolu fasal dino di mad miguli-guli monuturan, sabap i tolu fasal vaza monuturan i IMAM om iYAHIVIST om i ELOHIST, mad mitatalad-talad nokopongusul-no.

Bai sid F. 6,1-7 narait-no it a-ko piro o sabap dot varo pongitungan do Kinoringan do porikot di linusuvon, ino-no, It umul dit ulun om i vaza dioti rumaat. Iri-ogi varo't ongosundu di gumavul sid riniba om manansavo sid riniba om varo-po pandangan dot ioti atandas sumAAP om pakaso do Kinoringan. Nokensodu-no banal i riniba sid tinoguvangon do Kinoringan om i tinomod di kinourugan.

Minitotongkizad i riniba sid kogumuai it ongobansa di nokedu kavi antad sid tinoguvangon do Kinoringan. Baiko iso o turunan do mad tinumatap sid tinoguvangon do Kinoringan, ino-no i Noa, om iosido-no it aki di Ibrahim (imatai F. 12).

I Buuk do Kinotimpunan mamakai dit ongotangan di linusuvon, it ahandaman dit ongoulun sid vaza manarang do kuran i Kinoringan, opus dara do minongurug iosido do riniba, na mad minananus-no di kogumuai om potimpunan-no vagu do ranzat, ino-no i Noa om i sanganak om it ongodupot. Minangajanji-no vagu i Kinoringan sid riniba do koledo om kotontuan di vinangun dit a-no tonuson vagu.

Na sid Momogun, nga varo tangon kananganko i linusuvon sampai varo tanda di linusuvon dino, it Anak Vagu di nosiliu do vatu om it asu dau (sid himbaan sid Parapat varo vatu di mad koluu dit >Anak Vagu dino).

6,8-10 manarang di katatapo di Noa. Avantang i gama dau sid ongoulun om sid tinoguvangon do Kinoringan. Topot ong i po-mogunan (11) nopusok do karaatan om guvail sid Kinoringan, ka.

Ong onsizon tokou i sokoviai i tuturan di linusuvon, iti-no it ongolaang di tuturan dino:

1. I kobuatano dit amu-po nulusuvon,

- a) i kogumuai i riniba posurut do karaatan (5)
- b) it ongosundu sumolon dit ongoondu do riniba (amu elaan tokou do manarang om manalahas di iadino. Aso boros sid Kitab di siombo-nopo di manarang di hal dino.
- c) I Kinoringan amu ozi dot oloun banal i riniba, pinonibak-no it umul
- d) It ongopandangan om it ongosundu pakaraat di pomogunan
- e) oupus-no i Kinoringan do minongurug iosido di riniba

2. I kolumbatasan di ginavo do Kinoringan: Tonuson-no i riniba. Topot inobi-no ong i Noa.

3. I suhu bahagi di Noa: Pangagama-no dot alud om posuvang di sirang om it ongodupot di kopisavo-kopisavo di boginisan om mongumpai-po do kosukupan.

4. I linusuvon: sumodia mudan sid alud

i kotimpunan di linusuvon i koledo do linusuvon
kuran i Noa humarati do notoliban-no i linusuvon

5. I janji do Kinoringan sid di Noa: I Noa pasamba sid Kinoringan.

Iri-ogi i Kinoringan mamarakat: monuhu do manangkana di dupot om mamarakat-po di gama mangaranzat

I janji: Aso-no lizud om linusuvon-no vagu sampai penlaid om varo-po vagu pogintutuan di janji dino, ino-no i **buluntung**

6. Iri-ogi i Noa ulun do mutanom om mukabun, mananom dot anggul. It anganak dau, i Sem, Ham om Yafet, it ongorurungan dioti dino.

FASAL 11: I VALAI DO KINOBURUGAHAN SID BABIL

Ong i fasal 10 manarang di kinaranzatan sid **sompomogunan**, dot otopot it ulun sid Asia Tanga amu-no engat ong varo-po't ulun ponong sid Kina ko Amerika om Afrika, tanid mantadko i sid Masir. Ino-no i vaza manarang, i mongkupu di Yafet, nga ponong sid Utara do sompomogunan,. I di Ham ponong sid Selatan om i di Sem, na sid pialatan ko tanga, ino-no it osomok sid Palistina. Na kodung nakaranzat do iadino, moniim i riniba do monginggazo do kuasa om kansang dau om poumpug di kuasa dino do koronuw, iadko i gama dit ongoraja di monuhu dot arait i ngaran dioti sid sokovia i razat dau. I riniba ozi do mingkakat kondiri. Iti-no i vaza do kinosurutan di gama di iadino: Antad sid gama do BATA

mangagama do BANDAR
poturug do VALAI DOT ASAVAT
tomod KOSUNGGU SID AVAN
mogihim do NGARAN

Rontob-nopo, ino kosungguvo dioti amu kosunu, gam nehas-no i riniba om noburugou-no i boros dot amu-no kopiharati-po i riniba.

Ong i tuturan di sid Kitab Vagu di potuntuvad di tuturan diti, ino-no i Tuturan do Pentakosta, Usuran Rasul 2,1-47.

Avantang ong kadapat-ko do mongolukis dit ongoturunan di Adam sampai i Ibrahim dit induvo do hopod generasi om i-po di Kain om i di Ham om Yafet.

I turunan di Adam sampai sid di Ibrahim bansa vokon

Set Enok Kenan Mahalel Yared Kain
Enok Mitusala Lamek Noa om anganak dau
4.17-22
Sem Ham Yafet
Arpakad Sela ogumu o ogumu o bansa
Eber Peleg bansa
Peleg Rehu 10,1-32
Seru Nahor
Tera Abram/Ibrahim sompi hopod generasi

Iri-ogi tumompik tokou sid tuturan di Ibrahim om i kinosinaan di bansa dot Israel.

Ong insan-po onsizon tokou i Usuran di songriniba antad kinotimpuunan, pengkaa dino i panangan: I riniba dit inurug do Kinoringan, nga minogidu antad sid tinoguvangon do Kinoringan, minogihim di kuasa dau kondiri sampai nakazad-no sid sompomogunan om tasantanid-tanid-no boros dioti dino dot amu-no kopihaharati-po vagu.

Sino dino, varo-no vagu gama do Kinoringan do mongimbulai do hiza vagu, ino-no i hiza dit anganak dot Israel. Okonko i kiroon do riniba, inoi nga i kolumbatasan do Kinoringan dot, *Kinoringan momili di Ibrahim antad sid rurungan di Sem*. Mongodim i Kinoringan di Ibrahim di nakagavul sid tanga dit ongobansa vokon om mangajanji sid di Ibrahim do varo bansa dau om varo pomogunan dau om iosido ajadi do puun do barakat bahagi di sokovia i riniba (12,3).

Iadino o kinotimpuunan di Usuran do Kosopulan. Kinoringan momili dot toriso-iso ot ulun, iadko i Noa diri hiza di linusuvon, dot inot ulun dino o polombus di barakat do Kinoringan sid ulun vokon.

Ong monglukis tokou di gama do Kinoringan, pengkaa dino:

Kinoringan mongurug di riniba

Adam om Hava

Kabun dot Eden >> nosunsub-no sino

Kain om Habil -- mamatai dit obpinai

it ongosundu om it ongopandangan/humali i karaatan

>> i linusuvon

Kinoringan momili di Noa
mad riniba vagu
mogidu vagu sid Kinoringan
i valai sid Babil >> koburugahan do boros
i riniba kazazad sid sompomogunan

Kinoringan momili vagu di Abram/ Ibrahim om it anganak dau Ishak om Yakub
i hopod om duvo rurungan dot Israel
>> Masir >> Babil

Kinoringan monuhu dit anak dau Yesus Kristus
>> kazu do sangkap
I habal do Kovosihan
bahagi di sokoviai i riniba
>> i gorija sompomogunan

Rumikot vagu i Yesus Kristus sid tanga do riniba
mongimbulai di karajaan om hoturan vagu do Kinoringan

Fil.2,10-11 sid ngaran di Yesus sumingkudou i sokoviai i sid surga om sid pomogunan: ipat-ipat i dila nga mangakun-no dot, *i Yesus o Tuhan*, tu mamantug di Kinoringan it Ama.

&Fasal 12-25 I TUTURAN DI IBRAHIM

Basao-no laid i Fasal 11,11-31 om 12,1-20 om iri-ogi suratai-no it a-ko piro o timpa sid nalad diti, dot ino timpa dino oimbulai sid saralom di kabasa-no:

Kananganko i Ibrahim:

I ngaran dau laid:

I kampong di kinosinaan dau

i ngaran dit ama dau ngaran dit obpinai

i ngaran di savo dau

i ngaran di kamanakon

pomogunan di kinapatazan dit ama dau mod di Ibrahim rumangkat

.....

i tempat di rikoton di Abram sid Kana

.....

it ongoboros do janji do barakatan di Kinoringan i Abram:

.....

1.

2.

3.

.....

Nokorikot-po i Ibrahim sid Kana di sinumuhut di suhu om kodim do Kinoringan, minangagama-no iosido do padaha (pinokomeja), tu pinasamba iosido do dupot di tunuvan, isuhut di dau dot oubasan sumamba. Ino-no i vaza monorima kaseh sid Kinoringan om mongoguna di ngaran dau. Iri-ogi nohorotizan-no di Abram dot, ino pomogunan dino najanji-no do Kinoringan pangaranzatan dau om pongimbulazan dau do bansa om rurungan dot agazo, nga a-koposumad di bai Abram. Mad ogolivong i Abram, tu keso, ino savo dau tamanang, koduvo, i pomogunan di norikot dau nga nonong do vitil dot agazo, tu noruzahan do koposizon.

Na minogihim-no i Abram do katagan, ino-no, linumombus-no iosido sid Masir. Topot nokorikot sid Masir, nga opogosi do rosi, tu i savo di Abram banalko avasi, na solodon dot ulun sino sampai patazon iosido di monolod ong amu iposolodi. Na minomudut-no i Abram sampai retanko obpinai dau i Sarai.

Natanapan-no i Abram mongitung, aso-no netung do kurozon dot ulun i savo dau, sovoon nga nipasavoi, sukul om apasi-po iosido.

Topot inapadan-no do Kinoringan ioti sampai hinatul-no i kolobusan antad sid Masir, supaya a-onong do kosusaan it idi di ranzat vagu.

&Fasal 13: I ABRAM OM I LOT

Sid Negeb, i belantara ponong sid tanggui do Torsina, sino-no minogkuposizon ioti Abram om i kamanakon dau, i Lot. Sompi kibahanan ioti do pangazam. Ong ogumu o bahanan do pangazam, suvaiko agazo o butul do paakanan om miuma-ogi. Na it ongopangazam dino, okonko ioti kondiri o manaud, inoi nga baiko it ongouripon. Na miniooduw-no it ongomanaud do pangazam dioti, tu minisolod do paakanan om poinuman.

Na minitongkizad-no di Abram i Lot, supaya amu kopioduw ioti. Na sinuhu-no di Abram i Lot momili dit avantang o vatas, ong iosido ponong sid sionngo-nopo, ombo ot a-kenginan di Lot, sino-no iosido. Na i vatas ponong sid Sodom om Gomora, i konopuan do Yarden, osukup banal o vaig i hiza diri om banalko orombung o sakot om oruhai manaud om momiara do domba o minomili i Lot sampai rinumangkat sinoi. (i ayat 13,13 monodia-no laid i tuturan F. 18,16-19,29)

Fasal 13,14-18 manarang-po di janji om momihot om mongimbulit di janji do Kinoringan, ino-no, *Kinoringan manahak do pomogunan, ranzat di iadko lisovu o kogumuo*. Na pinengkakat-no vagu i Abram do pinadaha, tu sumamba-no iosido (13,18).

&Fasal 14: I tuturan di mirumpak i sizam it ongoraja kodori, om kuran i Abram tumabang manapul di Lot.

I Abram om it ongouripon dau (piro.....) manapul di Lot, i narampasan om narakop.

Varo iso raja dot imam-po do nakahagut sid tuturan diti, retanko raja Salem = Kopioondusan. Ino raja dino minamarakat di Abram om i Abram nga manahak-no sid raja dino do persepuluhon. Ino raja Melkisedek retanko *Imam do Kinoringan*. Na i surat Ibrani sid Kitab Vagu mongohondom di Melkisedek dino sid Fasal 7. >> Basao-no i Ibrani 7.

&Fasal 15: MITARU DI KINORINGAN I ABRAM: mitaru > mijanji sid gama mangaraha.

Minsanko ininggulit-no vagu di Kinoringan pentahan i janji dino, kakali mipiduvo i ginavo di Abram. Boros dau, Baikो it uripon-ku-po o monungkus dino, ka. Iri-ogi notorima-no di Abram i tanda dino do kosunu-no i bahanda nenag laid om i barakat: *iadko i kogumuo dot ongokorimbutuon.....*ka. Iri-ogi om minangasip-no i Abram. Om ino gama dau mangasip dino o kiniro di Kinoringan do kabanaran di Abram (6).

I vaza mitaru: hinatul di Kinoringan i Abram pasamba dot a-ko piro o pangazam do pinilapak. Iri-ogi mituduk-no di Kinoringan i kogofoo di pomogunan dit asanganu di mongkupu di Abram.

& Fasal 16: I HAGAR OM I ISMAEL.

I Sarai nga mogihim-no do vaza monuluk di janji di nenag do Kinoringan. Sid uripon dau o pinonulukan dara di ranzat di Abram, tu koubasan kodori, ong tamanang i savo, it uripon dot ondu musu sid poo di savo dit ulun, iadko anak-no banal di savo it anak dino.

Rontob-nopo, mad amu najadi ino, isuhut di kiroon di Sarai, tu kodung kitizan-no it uripon, kinumihi-no iosido di sanganu, ino-no i Sarai. Iri-ogi i Sarai nga alazu-no o ginavo. Hinumungot-no iosido om rinaat-no it uripon dau, i Hagar. Ong i Abram, nga omboko i kenginan di savo, tazonko otuluk i janji do Kinoringan.

>> Vokon-no iadino o kobuatano tokou: Varo harapan do varo kotolongan antad sid Kinoringan, nga kakali engin tokou do kondiri posunu di kotolongan dino sampai misingkinorinangan tokou, ko mongogorot, tu amu-no kogoos minud di janji om kotolongan do Kinoringan.

Na sinuhu-no do Kinoringan i malaikat monulung dit ondu mogihim do katagan. I Hagar nga tinumorima-no do janji kananganko it anak dau, i Ismael. Antad diri 14 toun om varo-ogi it anak di Abram antad sid savo dau.

&Fasal 17: I SUNAT O POGINTUTUNAN DI RANZAT OM BANSA DI ABRAM/ IBRAHIM.

Ong onsizon i fasal diti, a-ko piro o hal ajadi, ino-no:

- a) nosimbanan-no i ngaran di Abram dot Ibrahim, i harati, Ama dit ongobansa.
- b) i ranzat dau banalko ogumu om varo-po raja, ka di janji om
- c) minsanko bai rinumungkap sino, nga asanganu-no di Ibrahim om i mongkupu dau i pomogunan sino
- d) i tanda di janji: i sunat sid anak do kusai, valu't adau ot umul om sunatan-no.
- e) ong i Ismael, it anak dit uripon, ajadi do bansa vokon, ino-no it Arab, nga kisunati ioti.

&Fasal 18: I TOLU OT OMBUVOI MAGANDAHA SID DI IBRAHIM

Ino tuturan dino manarang do kuran it ongoulun di mizon sid Negeb, sid tanggui do Torsina do sampai bianco, nga iri-no ko iri o kobuatano: mizon ioti sid kema / dundung do kulit o ginama, kiikam sid rinuvang. Banalko avantang o gama sid ulun di maza sid dau do tampat. Mongingut om monorundakai ioti dit ombuvoi. Na okonko okudik ot osodiaon di Ibrahim: mogobi-obi o pongoretan dot ong otopot, pinoginakanan it ombuvoi, uzog do sapi dit olomu o ginaras, tapung do tolu bandu kogumu ot bahagi i roti om tinopis.

Iri-ogi pinentahan-no di kosinaan dit anak. Ong i Sara di nokening di iadino, kerak, tu amu-no kasip. Iosido dino lumohing-no, tamanang-po laid om nopoporizan-no (notoliban-no). Kuran-po maganak? ka. 18,16-33 I IBRAHIM MONGONTOK MINDAMO om gumuvail do mokisian sid Kinoringan do mokikurang di hukuman sid Sodom, gima it ongoulun sino dit elin om abanal. Suvai sid ayat 32 om ening tokou do tumurut dara ong Kinoringan, minsanko hopod-no ot ulun dot abanal di nakagavul siri. Topot aso boros do varo, gam F. 19 mongusul di kinorungazan di bandar Sodom om Gomora dot it a-ko piro it ongoulun sino, i Lot om i savo om duvo it anak dau o nosopulan sino. Ong i nokotokin, amu-no minozo om amu-no nosopulan.

Na ensanan i tuturan dino manarang do nokokuro varo rahat di nakada sino, sino-no konopuan do Yarden, dot i rahat dino, banalko oosin. 25% di vaig, nga asin banal sampai okudik nga asot apasi sid vaig dino. Sampai aso tampat vokon sid ensanan i sompomogunan do kerad karalom iadko i rahat dino....

&Fasal 19: SODOM OM GOMORA

Ong sid Sodom, tanid o vaza sid ongoombuvoi, baiko momoi ioti bahagi dit ongoulun dit oholian nakaraat-no. Isai-nopo it amu oubas sino, ododol om otoro-no dot ulun. Na i Lot, tu tanid o bahazan om kavazao, moniim do mangajaga om mongoringing dit ombuvoi di nokorikot sid dau do valai.

Na i karaatan dioti sid Sodom, okonko bai kolugagazan. Suvai sid nabi Yehezkiel kembulai banal do nunu-nopo i karaatan di razat do Sodom, ino-no: *mangaladtak om mangakan ioti dit ulun mosikim, osumbung ioti om amu mongontupat di mosikim om oguvail-po ioti*, ka di nabi sid Yehezkiel 16, 48-49). Kagi i tuturan dino mangambat di duat dot ulun do siongo antad ino RAHAT DI NAKADA om nunu ong ino vatu di mad ulun o kobuatano dot vatu dot asin: Ino-no i savo di Lot, di nokosiliu do vatu, ka.

&Fasal 20 mongimbulit di tuturan do Fasal 12,10-20, sid raja Abimelek vinudutan di Ibrahim, tu i Sara retanko obpinai dau, ka. Ino tuturan diti a-nokosiat sid Kitab Momogun.

Fasal 21: I KINOSINAAN DI ISHAK i nentahan-no laid sid F. 18,10, dot it umul di Ibrahim 100 toun om i di Sara, nga 90 toun. Na i gama tumorima di Ibrahim di janji do varo't anak dau, nikiro-no di Kinoringan do kosipan om harapan om kabanaran di Ibrahim. (Imatai sid IBRANI om ROM 4). Na kodung kianak-po i Sara, sinunsub-no dau i Hagar om it anak dau. Topot jinonjizan-no di Kinoringan i Hagar dot jodizon dau do ranzat di rurungan do Moab.

&Fasal 22: KINORINGAN MOMUBUK DI KOSIPAN DI IBRAHIM

I hiza di kodori diri, varo't undang-undang ko koubasan dot a-ko piro ot ongougama dit ongobansa do pasamba do kotuaan sid kuasa do pomogunan, i retanko Minamangun, tu mongopud dot ongekob dau. Tu i kiniro diri, antad sid gama di iadino varo kosurupuvan om varo kopolisan vagu. Minsanko i raja Manase (2. Raja 21,6) nga minangagaras-no di dau dot anak.

Na iti-no i kososizan di tuturan dino, minsanko varo kobatano dot i Kinoringan mongogorot di Ibrahim mangagaras om pasamba dit **anak dau, it iso-no, i sinamadan, i harapan dau dot it anak dino o mangaranzat di bansa vagu**, isuhut di janji do Kinoringan. Ong otopot, baiko vaza do Kinoringan momubuk om moniim dot otopotko amu do mangasip om humarap i Ibrahim sid Kinoringan. Banalko avantang i vaza monuturan di tuturan diti:

1. Ino vaza dot i Kinoringan mongodim om monuhu om i kuran i gama di Ibrahim tumimpa om sumuhut...

2. I vaza mongumpai om mamananau do kotoluvan kumaa sid burul do Sion -Yerusalim do povozo dit duvo it uripon do maan-saan di kosukupan.

3. Iri-ogi i vaza tumakad it ama om it anak, dot it anak o sumaan di podsudu. Noboros-no kavi it inovit i podsudu, it apui isuvang sid kuron, i-po karis.

4. Iri-ogi i dialog, mongoduat it anak dot, Iti om iti varo-no. Topot ong isamba aso-po, ka. Dot i Ibrahim, banalko osusa i ginavo di hiza do mongoduat it anak do iadino. Elaan-no dau i suhu, topot amu-no binoros. Bai, *i Kinoringan o kelo manahak dot isamba-to*, ka dau om otos-no vagu ioti lumombus.

I Ibrahim, nga lumohing-no, amu oruhai tumakad ong bai i guvas o kiroon. Lobipo ong i ginavo di banalko amu osinang. Rontob-nopo, aso't elaan dau vokon tanid mantadko sumuhut di suhu do Kinoringan. Iti-no sabap dot, *otos-no vagu ioti sampai linumombus-no tumakad*, ka. Amu-no nakatama vagu it anak mongoduat, amu osinang om kogoos i Ibrahim manarang sid anak dino di kenginan do Kinoringan.

5. Iri-ogi i gama monodia, popipitimpak dit ongovatu do mangagama do podsuduvanan (padaha), potimpak-no di podsudu, nga kakali aso-po isamba?? om iri-ogi binoludan-no it anak, nitimpak-no sid ponunuvan, kinovidan-no i karis. Nakanta-no mangagaras,.. na tigogi, manavahan-no i malaikat.

6. Ino dino, obohinud o gama monuturan dot enumpak o gama, iadko filim dot otoo mamanaanau. Ong i tolu it adau sid tanga do ralan, iadko iso o minit. Topot ong i gama tisamba, mad asadapani.

Iri-ogi kembulai i tomodon. *Nelaan-ku-no biano do banal-noko mangasip-ko dohon*, ka di Kinoringan. Tigogi, varo domba di miit-siiti sangau sid vakau. Om oimbulit-no vagu i bahanda om janji do Kinoringan sid di Ibrahim (15+ 18).

>> Na it Ongosilam engat antad sid surat di QUORAN do varo-po gama do Kinoringan do monuba di Ibrahim dot ipagaras i Ismael, it anak dit uripon Hagar, do sid Makka o tempat di gama di Ibrahim, dot iri-no ko iri, varo kambing di minongontok di Ismael sid Makka. Iti-no o sabap, hiza di Haj, varo gama mangagaras do kambing sid Makka, sumusui di Ibrahim om monorima kaseh sid Kinoringan, tu i Kinoringan amu ozi do riniba ot isambai.

Tiimai do manantu dot ombo i fasal di monuturan dit a-ko piro o tuturan di Ibrahim:

F..... tolu ot ombuvoi tumambi di Ibrahim om pentahan di kosinaan di Ishak

F..... kosino-no it anak di najajanji laid do Kinoringan

F..... Nobubukan-no i kosipan di Ibrahim

F..... I Ibrahim mongolim dot i Sara(i) o savo dau, retanko bai obpinai dau

F..... I Ibrahim monobus do tana bahagi di lobong di savo dau

F..... i tuturan di kamanakon di Ibrahim, i Lot

F..... I Ibrahim, elo-no mongorumpak, iosido om it ongouripon dau

F..... lumohing-no i Ibrahim, nga manansavo-no vagu iosido di

Fasal 24-26 I ISHAK OM I RIBKA

Bai okudik o notuturan kananganko i Ishak. Banalko anaru ong i tuturan do kuran it uripon di Ibrahim mogihim do sovoon dit Ishak sid varis laid di Ibrahim. Sid tuturan dino nakaharati tokou-no do kuran ong sid dioti diri i vaza mirait-rai om momuru sampai mihukum musavo...

Tiimai monimpa it a-ko piro o duaton kananganko i Ishak om i savo dau, do basao-po laid i duvo i fasal dino 24-25. (Ong i F. 26 a-nokosuvang sid KITAB MOMOGUN; tu bai imbulit i F. 12 om 20, dot i Ishak o retan di mongolim.)

1. Isai-ka minongolumbatos dot it anak di Ibrahim, Ishak o ngaran?
2. Nunu-ka o najadi di valu-ogi't adau it umul di Ishak?
3. Siombo-ka nokosurat dot i banggala do domba minongontok di Ishak?
4. Isai-ka minomoros dot, Kada-oku-no hovudai dikou, tu noumbosihan-no di Tuhan i panahon-ku?
5. Nunu-no o ginama di kodung nohorotizan di Ishak do tamanang i savo dau?
6. Nunu-ka i pitonidan di duvo it anganak dioti?
7. Nokokuro, tu sid sodu pogihiman di Ibrahim i sovoon dit anak dau?
8. Nunu-ka i tanda do nohorotizan dit uripon dot isai i sovoon dit Ishak?

Fasal 27-36: I TUTURAN DI YAKUB

Basao-po laid it a-ko piro i fasal dino. It ongotuturan di Yakub om i di Esau dino miaakan-akan banal, tu iso-no o tomodon dit ongotuturan dino, manarang do kuran i barakat antad sid di Ibrahim dino kolombus sid mongkupu dau om i panangan di barakat dino. Ong sid di Ishak, aso kogolivongo sid hal di barakat dino, tu iso-no iosido, sampai iso nga aso kadapat monolod di barakat dino. Tu ong i Ismael okonko anak di savo di Ibrahim. Topot ong ioti Esau om Yakub, gamko apid. Iti-no o sabap dot varo gagut. Ong sumuhut di hoturan, minsan ko apid, kakali ombo it anak di nokogulu kalandai, ino-no o kotuaan, om i tohudi kalandai, ino-no komulakan. Topot atalahas-no laid antad sid bahanda sid di Ribka diri (25,23) dot varo pialatan dioti do misolod di garal om barakat antad sid ama. Kagi ong i Ishak, i Esau o sinamadan. Topot ong i Ribka, nga i Yakub o sinamadan dau. Om ioti miobpinai, banalko atanid o kavazao om kobuatano.

I Esau arampus om amu mikentoron, mirimpanau sid govuton. Topot ong i Yakub, soumul sid valai om sinamadan banal dit idi dau. Ong sumuhut do hoturan, i Esau monungkus di barakat dit ama, it antad sid di Ibrahim. Topot it idi dioti mogihim do vazaan do manakau di barakat di Yakub do monipu o gama di lumohing banal i Ishak.

Nabarakatan-po i Yakub, osusa iosido mogidu sid sodu, tu patazon dit obpinai dau. I harati, i manansanganu dara di barakat do manansanganu dara di pomogunan sino. Na osusa-no iosido sumusut sid sodu, dot a-no kemot di pomogunan dino do labaan do 20 toun.

Na sid varis dau, ino-no sid kamaman om ivanon dau, i Laban, kembulai-no i barakat sampai linumundu iosido. Ginumumu o pangazam dau om it ongkob dau sampai 12 ot anganak dau. Na mad nosulian-no iosido monipu. Tu i kenginan dau manansavo, i komulakan. Topot i kotuaan o nipasavo dit ivanon i bolou kalat. Nosusa vagu iosido manamong om nasavo-ogi i komulakan, ino-no kenginan-no banal. Panaud do pangazam nga tinipui dit ivanon, ino-no i Laban. I minuli-no, nga siri ong rumpakon dit ivanon, tu amu dara koho dot oviton i kolunduo muli sid Kanaan. Rumikot sid pomogunan dau, kakali rumosi-ko patazon dit obpinai dau, tu kakali humungot.

>> Manjadi i tuturan di Yakub, mad tolu laang sid ongotuturan dino:

1. i Yakub om i Esau: i gagamaon di Esau
- i gagamaon di Yakub
- i kuasa di kotuaan?
- i hal di bubul dot aragang?
- it onsi di barakat di Ishak?
- I kineduan, nunu-ka i tukad di kosunggu sid avan?

2. I Yakub om i Laban: i gamaon om hasil sino:
-
- I momuru manansavo:
- Nokokuro, tu mogidu i Yakub sino?
-
- It upakat sid di Laban:
-
3. Kouli i Yakub, sumodia sumamung dit Esau
-
- it onsi di barakat sid Betel?
-
- Sionngo i kinapatazan di Rahel?
-
- Sionngo i kinosinaan di Benyamin?
-

#Intolu kasamung i Yakub do Kinoringan do tanid banal o vaza sumamung:

a) sid Betel (F.28) sid tampat laid di Ibrahim sinumamba sid Kinoringan (12,8 om 13,3) Monginipi i Yakub do varo tukad di kosunggu sid avan dot sid savat, nokotoguvang-no iosido sid Tuhan. Minangajanji-no i Kinoringan do vozo-vozon dau i Yakub di minogidu sampai nabarakatan-no iosido sid tanga do ralan om sid rikoton dau salaid di sid pomogunan vokon iosido.

b) 32,30: nohorotizan-no di Yakub dot isai ino pinitabpo dau diri sampai abarakatan-no vagu iosido: Kondiri di Kinoringan. Iri-ogi nopungaranan-no vagu iosido do ngaran vagu, ino-no Israel. Om ino ngaran dino jumadi do ngaran di bansa dau. I vaza do momungaran di Yakub do ngaran vagu, inimbulit sid F. 35,9..

c) F. 35: Sid Betel nosomungan-no di Yakub i Kinoringan om binarakatan-no vagu i Yakub sino. Ombo i hal di kakali nakagavul sid onkob di Yakub, i harapan vokon, iadko i rogon om nunu-nopo songtiningulun do pinokokinoringan, it inanu di Rahel antad sid ama dau, niada-no kavi sino sampai nilobong-no di Yakub sino.

It anganak di Yakub:

>> Ruben, Simon, Levi, Yahuda, Isakar, Sebulon

It idi, i

Gad, Aser It idi, i

Dan, Naftali It idi, i

Yusup, Benyamin . It idi, i

>> Suratai-no it ongongaran dit idi dit anganak di Yakub dino. It anak di Yakub dot ondu, ino-no i Dina. Isai-ka it idi di Dina?

Imatai-no sid palan do pomogunan (nalad 160 di KITAB MOMOGUN) do siombo-nopo it ongorurungan di mamakai di ngaran dit anganak di Yakub nokentoron sid pomogunan do Kana. Goritai-no it ongongaran dino. Na aso ngaran ong i di Yusup, bai i Efraim om i Manase, it anganak di Yusup, nga varo daerah dioti dino.

& Fasal 37-50 I TUTURAN DI YUSUP

Basao-no laid inot ongofasal dino om tiimai do mongonsi dit ongofasal dino, isuhut dit ongotajuk sid ongofasal. Na i tuturan sid F. 38, nga nakagavul-no sino, na tanid o tomodon om okonko kopiakan di tuturan di Yusup.

Ino Fasal 38 ino-no o tomodon dau, Ondu dit asot anak om bituanon iosido, kakali kingaran sid turunan dau. Gam iosido-no ot inanu do kinaranzatan di turunan sampai kingaran sid turunan di Yesus (imatai sid Matius 1). Kagi i Kitab amu mongolim di gama dit amu atag, ong it ongoulun di minanganu sampai

minongolombus di barakat do Kinoringan sid ongotohudi. Ong i Yahuda, sid tinoguvangon dot ulun dit atapat, gam iosido-no mangaratu do hukum do mamatai di nokotokin sid dau, tu kitizan, dot ong otopot, iosido o nokotizan dit ondu dino. Tu indoson ong baiko sundal it ondu dino. Topot i Tamar, i nokotokin sid di Yahuda, om bituanon-no iosido, mad asot elaan dau do vazaan vokon tanid mantadko monipu dit ivanon, tu notipu-no laid iosido dit ivanon om i varis dau.

Na i tuturan di Yusup polombus dit ongotuturan dit angaki dot Israel: I Ibrahim, i Ishak ko i Yakub om i tuturan di bansa dot Israel i sid Masir.

Ong sid Kanaan, i baiko songongkob-no ioti, ino-no i Yakub om it anganak dau. Topot ong i sid Masir-no (Kolobusan 1,1) bansa-no ioti do banalko agazo.

Ino tuturan dino amu asarok mangarait ko mongohondom do Kinoringan, topot sid tuturan dino atalahas-no dot i Kinoringan minangagazad om minonunda om minamarakat di Yusup, hiza dit osusa iosido om hiza dot osinang iosido sampai najadi i Yusup do pakakas do Kinoringan sid gama dau pongopud di janji sid di Ibrahim. Banal-no nonong i boros di Yusup sid F. 50,20: *mulongko minongindaraat-kou dohon. Topot gamko ino-no o pinavazaan di Kinoringan do mongumbasih iadko i najadi-no biano, ka dau.*

Sabap i Yusup minangahatul di koposizon dit ongoulun sid Masir, amu linumikop ioti Yakub songongkob sid Kanaan. Gamko rinumangkat-no ioti tantu sid Masir, tu anaru-no o ponombitan diti, ka di Yusup.

>> Tiimai monodiri om popisuput it a-ko piro i tajuk di mad pogintutunan dit ongolaang di Yusup, isuhut di tuturan diti:

GUDANG DI FARAUN, ISTANA DI FARAUN, SID TORUNGKU, SID TALAGA, SID AMA DAU I YAKUB, NOKOTOBUS-NO SID MASIR, MOGIHIM IT ONGOBPINAI, SID VALAI DI POTIFAR, MONGINIPI I FARAUN.

>> Ongodupot sid Buuk do Kinotimpuunan: Pilio-no om reto-no do nunu sontuturan o varo dupot: i banggala di nagaras-no mongontok dot ulun

.
i burung asang di misasaab do roun

i vulanut di nolupu-no
i banggala, i raha dau nohigilan sid banat

.
it ongokambang dit ongobangkol, tanda do barakat

it ongoombolog di minoninduk do roti
it agahui it ongosapi

.
Ong lokunon tokou dara dit a-ko piro i tuturan di Buuk Kinotimpuunan dino, varo dati momoros sid di tokou do boros dot ... Tiimai do sera om siombo mumbongut do iaditi:

Hagaai-no dikou, antava engin-kou do korundun diti.?
.

Kadan-ko-no bai kerak, osuhul-no mangasip dit ombuvoi Mad oholian-no lovong ialo, mongodompilot mamananau dot asot elaan dau i rikoton dau

Nokokuro,ka, dot osuvaban-no mongizap dit ongorimbutuon. Osuhul-no modop-ko!
songkuro-ka o haragaon dikou? 20 ringgit, mad oholian. Suhulon dati dikou do tomod manganu-okoi diti dot aso horogo!

Imatai-no dikou i kopitan dit alud sid tindal. Siombo-ka i rahat dau di rumikoti?

.
Sodirizon-no it ongondou sid Buuk do Kinotimpuunan, ombo it ondu nga savo dit isai?

I Ribka, savo dit Asenat, savo dit

I Hawa, savo dit Rahel, savo dit

I Tamar, savo dit Hagar, savo dit
I Lea, savo dit Sara, savo dit

KOLOBUSAN SAMPAI ULANGAN

Itit apat buuk di Taurat, ino-no i *Kolobusan, Imamat, Bilangan om Ulangan* mongimbulai om manarang di puun di kinososizan di KITAB LAID, ino-no:

it usuran di kinopongolobusan di Kinoringan di bansa dot Israel antad sid kinouripanan om i kosopulan sid rahat do kitundusan.

I hopod pinonuhuan i nitahak di Kinoringan sid burul do Torsina.

I kinapanahan di bansa dot Israel sid tanga do belantara sampai sinumodia sumuvang sid KANAAN. F. 1 di *Kolobusan* mongusul di mongkupu dit anganak di Yakub, okon-noko rontob turunan dau, ino nga najadi-no ioti do rurungan ko bansa banal. (Kol. 1,7+9): retanko BANSA DOT ISRAEL. I bansa dino nakagazo-no sampai nendorosi ioti ulun do Masir, i pasok sino, rumosi-ko amu songkuro om it ongoulun di baiko nakasako sid Masir, ogumu mantadko i pasok sid Masir om ioti-no o manansanganu om monguasa di pomogunan do Masir. Iti-no sabap tomodon di raja Faraun do Masir do momogos dioti sid gama monguripon. Avagat o gama dioti monodia dit ongobata bahagi muvalai om mongorinding do kuta. I kiniro di Faraun, ong opogos ioti gumama, kumudik ot anganak dioti sampai kumugui-no ioti. Sabap ino, minonuhu-no i Faraun momogos dit ongokusai sid karaja om mamatai dit anganak do kusai di kosisino. I harati, i kinembulazan di bansa dot Israel najadi sid kinapagasan om kinouripanan om modtorimot do varo kolobusan. Amu osinang ioti sid pomogunan do Masir di bai sinumako do pomogunan.

Na i buuk *Bilangan* mongusul di kinompuso di kinapanahan tumupak sid belantara sid ralan kumaa sid pomogunan do Kanaan, i rontob nokorikot sid bavang do Yarden sid volit di pomogunan do Kanaan ponong sid Timor. Ino pomogunan do Kanaan dino najanji-no laid di Kinoringan sid di Ibrahim om i Ishak om i Yakub dot ino dino, pomogunan dit ipanganu dit anganak om mongkupu di Ibrahim.

Manjadi inot apat buuk dino monuturan di kobuatano om gama di Musa, it ulun di minangagazad dioti lumabus om sid ralan rumikot kumaa sid Kanaan. I kinosinaan di Musa nousul-no sid Kolobusan F. 2 om i kinapatazan dau, nga nalapor-no sid Ulangan F. 34. Sabap ino, i tuturan di Musa mad vaza manarang dit usul di bansa dot Israel i hiza-no diri, do iadko duvo karaving di manaan di tuturan di bansa dot Israel.

Kol. Kinosinaan di Musa > Kolobusan 1-19: I Kinolobusan sid Masir

Pinonuhuan om janji do Kinoringan: Kol.20-40 > Imamat om Bilangan 1-9

Ulangan 34: Kinapatazan di Musa Bilangan 10-36 Kinapanahan sid belantara

Na i buuk dot *Ulangan* mad tudukan di Musa dit amu-po minatai om pongimuhunan dau di humuntad mamung sid onogogulu-gulu.

>> Sid graf diti oruhai-ko rumamit di tinomod om vaza di buuk do Kolobusan sampai Bilangan. Ombo-nopo i hal di pinonuhuan, nokosurat-no ponong sid vanan. Ombo i varo titik dot etom #, nga a-milo-milo basaon banal. Iri-ogi omungai-no sid garit dino it a-ko piro o panarangan dot ikau kondiri o monginggamut om mongonsi, supaya oruhai-ko mongohondom dit tajuk om tomod dit onogofasal dino.

>> Ong engin-ko, kadapat-po do mangawarna di graf dino dot,

i panahon = hijau i tuturan di sid ralan =opurak

i pinonuhuan = obiru ong atag o gama dioti =osilou

ong araat o gama dioti =aragang

KOLOBUSAN

1 Bansa dot Israel sid kinuripanan

2 Kinosinaan di Musa

5-11 miupakat/miguvail di Faraun

i hopod kinapamagasan

12-15 Kolobusan #12.

14-15.....

16-19 panahon sid # 16.....

belantara #
 20-23 I hopod pinonuhuan om panarangan
 24 i janji di gulu banal
 25-31 i hoturan do panambayanan
 32-34 It uzog dot amas -pinokokinoringan dioti
 i koimbulitan di janji
 35-40 kinengkakatan di panambayanan

IMAMAT

Ongohoturan kananganko i
 1-7 i gama pasamba do dupot
 8-10 i pangkat om tugas dit imam
 11-16 posusi di sokoviai # 16.
 17-26 hoturan di kosusian # 19

BILANGAN 1-4 i gama mongizap dit ongorurungan 5-10 A-ko piro hoturan vokon # 6,22-27
 10-12 lumombus sid belantara
 13 mogkoliduk om mamadrata di pomogunan do Kanaan
 14 rumosi ioti lumombus
 20 i sala di Musa om i Harun/kinapatazan dau
 21 i vulanut do saring
 22-24 i tangon di Bileam
 Ong kiroon tokou it ensanan i Taurat, pengkaa dino ot oruhai mongohondom: >> imatai sid graf nalad 87

Sabap intanga it ongo fasal sid saralom di Buuk Kolobusan sampai Bilangan, nga panarangan di pinonuhuan do Kinoringan om i hoturan sumamba om sumambayang sampai it ongo poniagan, iti-no i ngaran dit ongobuuk: >TAURAT = hukum ko pinonuhuan. Ong i Yesus minomoros sid Matius 5,17: I Taurat om it ongonabi, ka, ino-no taurat dino o binoros dau i retanko ino limo buuk di Musa. Ong it ongonabi, ino-no, i Yosua, i Samuel, it Ongoraja om i nabi Yesaya sampai Maleaki o binoros di Yesus diri.

Na i tolu i buuk Kolobusan, Imamat om Bilangan, mad iso-no o tajuk. Topot i buuk Ulangan mad tudukan om imuhun di Musa di mogulu di mamung iosido sid onogogulu-gulu do mongimbulit di pinonuhuan o tomodon dau om it ongohoturan dit antad sid Kinoringan.

Tafsiran di KOLOBUSAN 1-19

>> Basao-no laid i fasal 1-19 diti sid Kitab Momogun. Hondomo-no inot ongotajuk dino, ino-no:
 1 i kinapagasan sid Masir, i Faraun ()
 2 Kinosinaan di Musa, bakul sid Nil, i kineduan om minusavo i Musa ()
 2-4 i sinikit i morotindik, mitoguvang do Kinoringan i Musa () 5-6 I Musa om i Harun sid tinoguvangon di Faraun ()
 7-11 It ongo kapamagasan: sumiliu do raha i vaig
 pangkot () onogata ()
 darun do watu pikot ()
 butu togonok rondon panakit do pangazam ()
 mabpatai i kotuaan dit ipat-ipat it onkob do Masir ()
 12-13 Paska: i poginakanan huntad lumabus om i kineduan sid Masir
 14-15 I kinosopulan sid rahat do kitundusan: longoi di kinosopulan di Musa om Miryam
 16-19 I kinapanahan sid belantara ()
 16 Mana om porogom o balanja sid belantara ()

17 i vaig antad sid pampang om monori-po di bansa dot Amalek ()
19 sid burul dot Torsina ()

>> Suratai-no sid > ongorinding () i rumbul dit a-ko piro o tajuk dit onkofasal dino:

1. i domba di nagaras-no 2. i kinosopulan dit anak 3. i kakanan dot osundu 4. i notugas-no it ulun

5. i kolobusan antad sid kinuripanan 6. it apui di mad tanda di kondiri di Kinoringan o mangagazad 7. i kazu dit amu sumorob 8. i tungkat di sumiliu do vulanut

& I BANSA DOT ISRAEL SID MASIR

I buuk Kinotimpunan manarang sid F. 37-50 do kuran ioti anganak di Yakub nakarangkat sid Masir. Sid usuran do Masir varo tuturan dot asarok tumalun sid konopuan sid timbang do Nil, manaud do pangazam it ongobansa di mintoron sid belantara di kodung anangan i pitounan do mongoruzou, supaya amu opunso matai i pangazam dioti.

>> Imatai-po sid *Usuran di Bansa dot Israel, i gambal ko-6 do kuran it usuran di Masir mangalapor di kobuatano di iadino.....*

Na it ongotuturan dit anganak di Yakub sid daerah Goshen o kinentaranan dioti, (Kinotimpunan 47,1-6) ino-no i konopuan di Nil ponong sid Timor. Antad sino, oruhai i Musa mogidu sid Midian, sid belantara o vazaan dau mogidu. I boros dot: *varo raja vagu* (kol. 1,1-8) ino-no i Faraun Ramses II (TGM 1290-1224) ot oboros-no. Iosido-no o pengkakat dit ongobandar Pitom om Ramses, dot it ongoulun di pinanggih om sinuhu dau, okonko nogojian, gam inuripanan banal. Ombo it amu magavi gumama, loposon om bambangon. Sabap, tu okurang o vatu sid konopuan do Nil, osusa do mangagama do bata, it antad sid tana dot osilou. Ino bata dino idadang-no sid apui, bahagi ipongorinding dit ongovalai om kuta.

Na it usuran di bansa dot Israel, sid kinapagasan o kinotimpunanani. Rumosi ioti ko opunso i bansa, gima i kapagasan om i suhu di Faraun do mamatai di sokoviai it anganak do kusai di kalandai. Topot kakali amu engkod ong i barakat do Kinoringan (F. 1,12+ 20.)

>> I kinouripanan sid Masir, amu olingan dioti Ongoisrael. Sid ogumu it onkofasal vokon arait om ohondom ino pangalaman dino. Imatai-no sid a-ko piro i fasal do kuran ioti Ongoisrael mongohondom dino pangalaman di kinapagasan sid Masir:

Imamat 19,33-34
Ulangan 6,20:
Ulangan 24,17-22
Kolobusan 16.2-3

om basao-po sid Yesaya 40,2 om sid umpatod sino do kuran i boros dino, hiza do varo vagu kolobusan di bansa dot Israel (Sid Kitab Momogun nalad 339).

& I MUSA

I Musa ino-no it ulun di binarakatan do Kinoringan sampai inanu iosido do mangagazad di bansa dot Israel lumabus sid Masir om lumombus sid belantara pakaa ponong sid pomogunan do Kanaan, sampai nokensomok ioti sid pomogunan do Kanaan. Ensanani i Kitab monguji dino gama di Musa di iadino.

I Musa mad bantaran sid pialatan do Kinoringan om it ongoulun: Kinoringan kumiboros di Musa om i Musa mongontok di bansa dau do tumimpa sid Kinoringan. I janji sid Burul do Torsina, I Musa tinumakad sid burul, tinumorima di duvo i bata di pinosuratan di hopod i pinonuhuan.

Iri-ogi minongontok iosido di bansa dau di nakaranggal sid gama mongohormat dot uzog do sapi di retan dioti ko pinokokinoringan di minangagazad dioti antad sid Masir, ka. Minindamo iosido di kaadaan di sala dioti dino. Sabap ino, ino-no i tugas di Musa diri:

{ mangahatul do mad hakim iosido }
{ mangagazad do mad raja iosido }
{ mongontok do mad imam iosido }

{ mamahanda om monorou iadko nabi }

Pengkaa dino i tugas di Yesus Kristus.

Antad sid tugas di Musa diri, mad notungkusan-po it ongohakim mongolombus di gama mangagazad om mangahatul di bansa dot Israel (i YOSUA, it ONGOHAKIM, i SAMUEL)

Varo-po tugas dau do mad raja iosido (1. Samuel 9 sampai 2. Raja 25). I gama di Musa vokon do lumintanga sid Kinoringan om it ongoulun, ino-no i tugas di mad imam om nabi iosido.

Ong kiroon tokou i gama om tugas di Yesus, iosido mad minamabo dinot apat o tugas di Musa dino. Iti-no kagi o harapan dit ulun Yahudi diri om sampai biano: Varo-no vagu rumikot ino-no i Musa koduvo. Iosido-no o mangagazad om mangahatul om lumintanga sampai mongontok om mamahanda sid pialatan do Kinoringan om i riniba, ka dioti. Imatai sid Ibrani 3,1 om 7,22 om 8,6 sampai 1. Timotius 2,5.

& OKODIM I MUSA

Kodung nakapamatai i Musa dit ulun do Masir di minomogos dot ulun dot Israel, osusa-no i Musa mogidu om sumusut sid pomogunan do Midian. Ino hiza diri, 40 toun kalaid, mongubas iosido sid belantara do Torsina. Minanansavo-no iosido di Zipora, it anak di bobolizan Rehuil (2,18).

>> minsanko nokosukod-no i Musa sid istana di Faraun (suratai-no i sabap do sid istana o kinosukadan dau)

.....
amu olingan dau i bansa om it inantadon dau. Gam ozi iosido mangapad om manapul dioti. Rontob-nopo mad amu nonong i gama di iadino.....

Kolobusan 3-6 manarang di gama do Kinoringan potugas di Musa, supaya i Musa mangagazad di bansa dau lumabus sid Masir. Sid ongo fasal dino, kondiri di Kinoringan manarang dot isai-no iosido. Kuran-ka i vaza do Kinoringan manarang sino dino?

.....
Kuran-ka kembulai i Kinoringan sino?

.....
Kuran-ka pentutun i Kinoringan di kondiri dau?

Imbulit-no monurat dino gama do Kinoringan pentutun sino dino:

3,2-8:

3,13-15:

4,1-9:

33,19-20:

>> Suratai-po it a-ko piro i sangkut di Musa sid gama dau mangamu iosido di tugas dau:

a) b)

c)d)

e)

>> Tandaai-no sid Kitab-nu inot ongosangkut di Musa dot aragang o garit. Ong sid Kitab Laid, varo pongitungan dit ongoulun dot i Kinoringan mad apui, gonit dit ahakang .

Kol 3. Sid saralom dot apui minimbulai-no i Kinoringan, tu banalko osusi iosido, dot aso tenganan do tumoronong sid dau.

Kinoringan minamalang dot Kinoringan iosido dit angaaki, ino-no i Ibrahim om i Ishak om i Yakub. (3,6+15). Kinoringan dit angaki, na sid Masir minongining iosido dit ogulou ioti anganak om turunan di Ibrahim do sid tanga do kosusaan om kapagasan. Kinoringan okonko bai Kinoringan sid iso tempat ko bahagi iso bansa ko pomogunan. Gam-ogi ong sid tanga dot ulun vokon i bansa dau, sino-no mongimbulai i Kinoringan di kakansangan dau. Mongohondom i Kinoringan di janji dau sid di Ibrahim (2,24) om mongolumbatos do palabus di bansa dau antad sid kinouripan (3,17). Na minangasip-no i bansa dau, ka. (4,31).

Kinoringan pentutun di ngaran dau (3,14): *Ioku-no diti i kapapasi*, ka. Ino-no i harati, Kinoringan-no laid iosido om kakali sampai salaid-laid, iri-no ko iri iosido. Sid ngaran dino kembulai dot i Kinoringan i manapul dioti.

Ong mindamo tokou dot, Posusio-no i ngaran-nu, ka, sid pomintaan dua di Yesus, mangakun sampai sumasi tokou di kesaan do Kinoringan om i gama dau. Sid boros om surat di Ibrani, bai i hurup dit asot uni o nokosurat (consonant) ino-no: YHWH. #Topot alaid-nopo, a-no kavasa it ulun do Yahudi mangarait di ngaran do Kinoringan, tu retanko kovusung ong mangarait. Iti-no o sabap do kodung nokosurat-no dot YHWH, minamasa-no ioti dot >ADONAI =Tuhan. Antad di Abad 9 TM minangamung-no it ongoulun dot Ibrani dit ongohurup di kiuni (vowel) do bai ongotitik o gama monurat, nga sid YHWH minamung-no ioti dit ongotitik (hurup do kiuni) di dang ADONAI: Antad dinot ongopudik dino, varo't ongoulun Kristian dit amu kaharati di boros dot Ibrani di mangarait do YEHOVA (Y e H o W a H). Topot amu onong ong ino. Tu ong iadino, iadko sid koubasan do Momogun do mamakai dit ongosangai o boros, ong nakasangai dot ivanon it ongopongoretan dino. Tu kodung nakasangai dot ivanon i > *parai*, > sampug o pamarasan, okonko sampaig, ko ong *vagas* > hinodok, okonko hatak.

& I PASKA

F. 12,1-13,16: manarang dit inantadon di poginakanan do Paska. Ino pesta Paska, monikid toun somminggu mangakan di roti dit aso pangambang om it onsi di domba di sontoun ot umul (sumandak do domba). I tomodon mongohondom di kinolobusan antad sid Masir. Kodung sid Yerusalim i panambayanan, sino-no it ongoulun dot Israel mongohormat di Paska monikid toun. Minsanko i Yesus om i kinoruhangan dau minamanau-no monikid toun kumaa sid Yerusalim (dot intolu, ong sid tuturan dit Injil di Yahya.)

>> Nokokuro, tu i Yesus minongimbulai di poginakanan (di Yesus) humiza di Paska?

.....

>> Nunu i kogunaan di raha di domba diri? Om kuran-no ong i kinapatazan di Yesus?... ..

.....

& I KINOLOBUSAN ANTAD SID MASIR Fasal 13-15

Antad di kinolobusan nokembulai-no i kososizan dit ulun dot Israel, ino-no: *I Kinoringan o minangalabus di tokou. Iosido-no ot akansang ko i nunu-nopo songkuasa*. ka.

Amu elaan tokou do siombo banal i kinotupakan dioti sid rahat do kitundusan diri. Osomok dati sid lubok Suez. Imatai-no sid palan No. 2 sid nalad ko 60 di Kitab Momogun do kuran i vazaan dioti lumabus om lumombus sid belantara.

Sid F. 15 i longoi di monguji di kinosopulan sid rahat dino. Inot ayat keso om ko-21, ino-no i longoi di Maryam, dot ino longoi dino mad longoi di gulu-no banal di mongohondom di ginama do Kinoringan om nitahu-no ino sid Kitab. Ino-no:

Indozoho-no i Tuhan, tu banalko kikuasa iosido.

I kuda om i sinumako, nitabul-no kavi dau sid rahat. ka.

& SID BELANTARA I BANSAN DOT ISRAEL

Nakalabus-po om nosopulan-no sid rahat, minomurimon-no i bansa dot Israel di kotulungan do Kinoringan, minsanko varo kopiduwaan do ginama om gulou di sumaap di Musa om i Kinoringan.

15,22-27 Kinoringan-no o manahak dot inumon

16 Kinoringan-no pakan dioti domana om porogom

17,1-7Kinoringan penum dioti (imatai sid Bilangan 20,1-13)

17,8-16 Kinoringan o mongorinding dioti sid rumpak

Opongo-po mamasa sampai F. 17,16, atag do lizabo-no i nalad di kigaraf dot nunu i nokosurat sid Buuk do Kolobusan (nalad 40) om tiimai-no mongohondom it ongotuturan om it ongofasal dino.

& SID BURUL DO TORSINA

Duvo vulan sid tanga do ralan ioti om nokorikot-ogi sid harason di burul do Torsina. Keso di vulan kotolu om nokorikot-ogi ioti sid burul dino, na tolu o hal di nahajangan om pangalaman dioti sino, ino-no:

i kinembulazan do Kinoringan

i mijanji i Kinoringan di bansa dau

#i korotuan om kosondoto di hopod i pinonuhuan

F. 19 manarang di kinembulazan do Kinoringan. I janji om i tomodon di janji dino nokosurat-no sid F. 19,4-6. I gama mijanji, natarang-no sid Fasal 24. Ong i pinonuhuan, nga natarang-no sid Fasal 20 sampai Bilangan F. 10.

>> Imatai-no vagu sid graf sid nalad 39-40: mad entanga it ongo fasal di Buuk do Kolobusan manarang di pinonuhuan om ongohoturan kananganko i kopudan di razat om i riniba di sid tinoguvangon do Kinoringan. Ino garit sid gibang pemot do kuran i Kolobusan F. 19 om Bilangan F. 10 o kopisuput om kopiakan, ino-no i kinorikatan sid burul do Torsina om i kolobusan antad sid burul do Torsina.

Graf bahagi Kolobusan 20-40

20 i hopod i pinonuhuan

21-23 I buuk di janji do Kinoringan, i hoturan om panarangan do kopudan do razat

24 i janji do Kinoringan sid bansa dau

25-31 hoturan di valai (basalag do panambayanan: Parsembaan, pati di pinonuhuan di vatu di pinosuratan di pinonuhuan do Kinoringan. i roti dit imam, i politaan sid valai do panambayanan, i basalag, i padaha, i natad do panambayanan,

i pakazan dit Imam, i vaza mamangkat dit imam. i gama mongohormat dit adau do pongintaranan.

32-34 i kinotongkizadan dioti sid tinoguvangon do Kinoringan, it uzog dot amas. I Musa mongontok mindamo. I hukum do Kinoringan. it ongo bota vagu (pinosuratan di pinonuhuan) om i kembulitan di janji.

35-40 i gama pengkakat di basalag di panambayanan

>> Tiimai-no do monginggamut sampai posondot bahagi di tokou biano ino fasal 23,1-9: Ombo i nokosurat sino, kiguna banal, ong sid razat do Sabah ot okovidan i iadino: Ombo-ka it ongohal di nitarang sino dit atag do toudon banal?

& I BUUK DOT IMAMAT

>> Basao-no laid it umpatod sid Kitab Momogun (nalad 91). Iri-ogi basao-no it a-ko piro i fasal sid KM dino sid Buuk Imamat, ino-no:

F. 9: I vaza pasamba do dupot om i tugas dit imam do kipangkat (I Harun, obpinai di Musa diri).

F. 16: it adau do kopiondusan. Sid ulun do Yahudi, itit adau dino pesta dit ahatul baanal, i ngaran biano: YOM KIPPUR.

F. 19 I panarangan di pinonuhuan > Antad sid kosusian do Kinoringan, i tokou nga osusi-no, tu nosusian-no di Kinoringan. Iti-no o sabap, Susio tokou-nobo!

Sabap i kogumuai it ongo fasal di Buuk Imamat bai hoturan do pasamba do dupot sid a-ko piro o vaza pasamba, inot ongo fasal dino nalazan-no manalin sid Kitab Momogun.

& I HOPOD PINONUHUAN

Ino-no i kosondoto di kenginan do Kinoringan kananganko i kopudan do riniba sid tinoguvangon do Kinoringan om sid pialatan dit ongoulun. It ongogorija mamakai di hopod pinonuhuan sid gama manarang di kenginan do Kinoringan. Sid rukun negara diantara bansa, ino pinonuhuan dino o puun di hoturan sid pialatan dit ongobansa om ponong sid vaza mangapad om monunda dit ipat-ipat it ulun di songriniba dot amu monodiri dot ugama, ko bansa, ko boros ko kobuatano ko kavazao. I harati-no di panangan di hopod i pinonuhuan:

1. Kinoringan iso-no, aso vokon.

2. A-kavasa gambaron i Kinoringan
3. A-kavasa mongusiba di ngaran do Kinoringan
4. I hoturan dit adau do pongintaranan: i riniba varo kotibangan ponong sid Kinoringan
5. It atag o gama ponong sid molohing
6. I gama ponong sid kopolisan dit ulun vokon
7. I kopudan dit ongekob dit ulun vokon
8. I barang di dang ulun vokon
9. I hormat om garal dit ulun vokon
10. A-kavasa humambil sid ulun vokon

Ino hopod pinonuhuan di nokosurat sid duvo o nalad bata diri, mad duvo o panangan, ino-no,
 a) i pinonuhuan keso sampai kolimo ponong sid Kinoringan, varo't anaru o panarangan sid Kolobusan 20,1-12. Ino dino mad lugu di pinonuhuan, tu antad sid Kinoringan orindangan-po i kavazao om ngaran om adau do Kinoringan. I kolimo, kananganko i molohing, mad bantaran ponong sid riniba.
 b) iri-ogi i ponong sid ulun vokon, ino-no i kopolisan dau, it ongekob dau, i barang, i hormat om i kuasa dit ulun vokon dino.

Sinod F. 19 dit Imamat humarati-ko di duvo o panangan di hopod i pinonuhuan dino.
 # i pinonuhuan 1-5 mangahatul di gama do riniba ponong sid Kinoringan (i retanko rohani), do kuran it atag o gama mongoguna om mongohormat sampai sumamba sid Kinoringan. Minsanko i pinonuhuan ponong sid molohing, nga ponong sid Kinoringan, tu ioti molohing mad kumoduvo do Kinoringan bahagi dit ipat-ipat it ulun.

i pinonuhuan 6-10 manarang di kobuatano om kavazao dot ongoulun ponong sid ulun vokon. (jasmani), supaya ahatul i kopioopudan do riniba.

>> Ong i Yesus minongimbulit sampai pinosondot-po dit a-ko piro i pinonuhuan sid Matius 5,21-42. Porisao-no do kuran i gama di Yesus manarang dinot a-ko piro pinonuhuan dino!!

1.
2.
3. Ong popitalad-ko i Kolobusan 21,22-25 sid Matius 5,38-42, nunu-ka i pitonidan sid panarangan sid Kolobusan om i sid di Yesus?

& I BUKU DI JANJI DO KINORINGAN Kolobusan 21,1-23,19

1. I Kinoringan monunda dit ulun vokon: It uripon nga okonko pempatai dot uripon, varo kolobusan. (Kuran ong kiutang soumul sid Kina, do iadko monguripon i Kina dot ulun, tu elo i Kina posurut dit utang dit amu milod kopuson?)

2. Kinoringan mangajaga om pakansang di kabanaran (23,1-9)

3. Kinoringan mangapad dit okugui (22,21-27)

Ino-no i tinomod do Kinoringan: ensanan i kopolisan dit ipat-ipat it ulun songriniba, nga nohoturanan-no do kenginan do Kinoringan, ino-no, i sid kampung, ko bandar, sid pialatan dit ongomukabun om it ulun di midagang, it ulun do lumundu om i mosikim, mibansa om mitanid do bansa.

& I PINONUHUAN DI KOSUSIAN Imamat 19

Ino pinonuhuan di kosusian pensomok di bansa dot Israel sid Kinoringan, it osusi banal. Sabap ino, it ulun di dang Kinoringan, nga osusi sampai mogihim om posurut di kosusian. I Paulus minonurat sid 1. Tesalonika 4,1-11: *posuruto-no dikou i kosusian dikou om posuhut dit ipat-ipat i koburuo dikou sid kenginan do Kinoringan.*

F. 19,18 mongonsi di pinonuhuan dino, iadko i Yesus sid Matius 22,39 om Lukas 10,25, ko i Paulus sid Rom 13,9.

& I PINONUHAN DI JANJI

Guluko i Kinoringan minanahak di hopod i pinonuhuan, noboros-no dau laid dot, *Ong mangasip-kou-ogi om kovidan banal dikou i janji-ku, Ioku-no o sanganu dikou. Ikou-no o karajaan-ku dot iseso o ginavo om obinsuhut dohon om bansa di sid palad-ku*, ka di Kinoringan (Kolobusan 19,5).

Ong janji sid Kitab, okonko iadko upakat di duvo ot ulun di sompi kikuasa mangajanji om mongolumbatos. Inoi nga i Kinoringan, it akansang o sumumpa sid kondiri dot iosido o monuluk di tomodon di janji dino. I harati, it akansang manaud dit okugui do sompi opud miduvo-duvo o panangan.

Kinoringan o mangajanji, okonko i bansa dot Israel. Tu Kinoringan o minomili dioti dino. Iadko it ulun dit obebas om aso't utang ko nunu o hal, nga mangajanji iosido do mamalanja dit usan-usan, ko it ulun sid Jermani di nakapangajanji sid KNH do mamalanja dit a-ko piro it anganak sid Asrama PCS, do vulan-vulan ioti mongirim do balanja bahagi dit anganak siti, do minsanko elaan dot isai ot abalanjaan, nga amu, ong ioti sori dino. Sid saralom do tolu nopod om limo toun do iadino o gama dioti mongopud di janji sid asrama do PCS diri. Ong it anganak sid Asrama, mad aso kuasa sid janji dino tanid mantadko mopud om tumorima di kotulungan dino.

Ong i bansa dot Israel, mihiza dot i Musa tinumorima di tanda di janji diri, minongurug do sinapi-sapi dot amas (Kolobusan 32), retanko iti-no o harapan dioti sid tanga do belantara. Nga kakali minongopud i Kinoringan di janji dau sampai nopud i samod om katatapo do Kinoringan.

>> Imatai-no sid Kitab Vagu do kuran o kohorotizan sino i pinonuhuan om suratai-no it onsi di pongohorotizan di Kitab Vagu:

- Matius 5,17... ..
-
- Rom 7,12
- Rom 3,19 om 10,4
- Rom 13,8-10
-

& IT ADAU DI KOPIONDUSAN

>> Basao-no laid i Imamat F. 16

Sid toun Yahudi, ontok di kohopod adau di vulan koturu (kiro-kiro intanga i vulan sembilan sampai entanga di vulan sepuluh, isuhut di kogofoo do vulan) ino-no it adau di kopiondusan. Antad di hiza sid Babil, sitid adau diti ohoturan-no it pesta dot randavi dit ulun Yahudi, adau do momuasa. A-kavasa songkogamao di nunu-nopo ontok dit adau dino, tu sumuva it imam do kipangkat sid onkob do panambayanan i retanko i banalko osusi, it sontoun nga insan-no do kavasa do suvaon. >I tomodon sumuvang, patod do parsembaan dot banggala do domba. I tomodon, monogit ko mokiada di kasalaan sombansa.

Mihiza banal dit imam sid onkob dot osusi varo-po songinan o banggala do domba dot isamba dit okonko garason, inoi nga ikozou sid belantara, retan do mamabo dit ongokasalaan di bansa dot Israel. Hoturan dit Imam do kipangkat dot tumampal kavi it ongoulun. I tomodon, pababo di sala dit sokoviai it ongoulun sid domba. Ababo di banggala do domba it ongokasalaan dioti ikozou-no sid belantara (F. 16).

Na Kinoringan kondiri o mangahatul di parsembaan do kopiondusan dino. Kondiri di Kinoringan mogkorban di dupot dino sampai matai i dupot sid belantara do mongontok di riniba dit apatut dara matai, gima i kasalaan om karaatan dau.

Na i kososizan di Kitab Vagu: sid di Yesus Kristus kondiri, minatai i Kinoringan do mongontok di riniba o tomodon. Ino dino, baiko insan-no, okonko monikid toun varo't isamba. Na hiza di kinapatazan di Yesus, nokinis-no i rinding do kumut di sid pialatan dit onkob dot osusi om it onkob di banalko osusi sid panambayanan sid Yerusalim, dot i harati (Matius 27,51), obebas-no i ralan om ogiang-no i vazaan kumaa om tumoguvang sid Kinoringan. Kotoronongon-no sid Kinoringan, gima i minatai i Yesus.

& I PINONUHUAN (TAURAT) OM I JANJI VAGU SID HABAL DO KOVOSIHAN

Okonko enizo i kososizan di Kitab Vagu kananganko i Taurat. Varo-no ong,
 # I Yesus minonuluk di pinonuhuan (Matius 5,17) do somputik nga aso't alazan.
 # Varo-no ong, I Yesus dumahava ko mananus di Taurat (Mat. 5,38-42)
 # ko i Paulus momoros (Rom 10,4) I Kristus-no o kinompusan di pinonuhuan.
 Na varo it a-ko piro i tomodon di pinonuhuan ko Taurat, ino-no:
 # I Taurat ko pinonuhuan manarang di rontob do karaatan om kasalaan (Rom 5,20 om 7,11)
 # Sid Taurat humarati i riniba dot amu kopionong i kobuatano dau laid sid kenginan do Kinoringan
 sampai oporintaan iosido do kasalaan om karaatan.
 # Ong mangasip it ulun sid Yesus Kristus, kalabus iosido antad sid kuasa do kotuvangan (Rom 3,21) om
 sid lulupu di Taurat (Galatia 3,13). Gam i kosipan dot ulun o vazaan di kosopulan, okonko i vaza
 sumuhut om monuluk di Taurat.
 # Ong nakamung-no sid di Kristus, otimboruan-no i ginavo om guvas om gama dot ulun, isuhut di
 kotulungan di Sundu do Kinoringan. (2. Kor. 5,17 om Galatia 2,20)
 # Iri-ogi i kogumuai dit ongohoturan kananganko i gama pasamba do dupot, nga aso-no guna om harati-
 po vagu sid di tokou ulun Kristian (Matius 9,13: *Ozi-oku di kosianan ko i parsambaan.*)

&I BUK DO BILANGAN

F.1-4 Pongizapan di bansa om kopongizapan dit ongokusai di kovoza sid rumpak

2. i hoturan mubasalag sid belantara
 3-4 it ongoimam o monoruntud di gamaon sid
 panambayanan (om it ongoponulung)
 F. 5-10 a-ko piro pinonuhuan om hoturan
 5-6 it asakau, i miada-mangada mokiada, i kaagazan, i barakat sid razat
 7-8 i rukut dit ongotirizan
 9 i hoturan di Pesta Paska
 10 it uni di toburi di monguni om posodia di kolombusan
 10-36 I kinolombusan sid belantara sampai korikot sid Yarden:
 10 Humuntad mamanau sid burul do Torsina
 11 Kinoringan pakan vagu dioti
 om mangahatul di turu nopod ot osukod
 12 I Miryam om i Harun sumaap di Musa
 13-14 i mamadrata di pomogunan do Kanaan sampai oronok ioti om tiuli vagu sid Masir. Ohukuman
 do sampai avi matai it ongosukod sid belantara, iri-ogi lumombus i nobi sumuvang sid Kanaan.
 20 i sala di Musa om i Harun sid Meriba, tu mamambang di pampang i kinapatazan di Harun
 21 I monori ioti di bansa do Kanaan om Amori
 22 I tangon di Bileam

>> Basao-no it ongofasal di Bilangan sid Kitab Momogun. Banalko avantang ong i tangon di Bileam om
 i vaza dau humarati dot aso tenganan do sumaap do Kinoringan om i bansa dau. Oruhai kaharati ong bai
 kaladai, i dupot i retanko dot obul om obungou, mantadko i riniba dit osumbung banal. Sid
 kinolombusan sid belantara varo-no vagu kosusaan iadko sid Buuk Kolobusan 16-19: TULIOU, VITIL,
 OPIDUVO O GINAVO, MOGUHANG DO KINORINGAN, MOGUHANG DI MUSA, bansa vokon di
 monoro om monobon di vazaan di bansa dot Israel, om i-po gama do Kinoringan paratu di hukum dau.
 Ino-no ot atalahas sino dino, Kinoringan monuluk di janji dau songkuro-nopo i kobungoho om
 kosompito dot ulun. Kananganko i tangon di Bileam, mad osilad i kaladai mantadko i bobolizan ko
 monindaat, ino-no i Bileam.

I BUK DOT ULANGAN

Tanid ong i buuk dot Ulangan dino: Amu mongusul i buuk dino dit usul di bansa dot Israel di
 kinapanahan sid belantara kumaa sid pomogunan do Kanaan, inoi nga ensanan i buuk dino, mad iso-no

o tudukan di Musa di humuntad matai iosido. Nokensomok-no ioti sid pivolitan di pomogunan do Kanaan, ino-no sid bavang do Yarden. Ponong sid Timor ioti dino. Na i F. 34 mongusul-po di kinapatazan di Musa. Sid tudukan di Musa dino, mongohodom i Musa dit usuran di bansa dot Israel om mongimbulit di pinonuhuan (iti-no o sabap i ngaran Ulangan, tu i harati: kopongimbulitan, ko ong sid boros do Yunani: Deuteronomium = >>I pinonuhuan koduvo.)

Na i Musa pogili sid bansa dot Israel i duvo i rokoton:
i barakat om i lulupu, supaya momili ioti di
kopudan om koposizan okonko i kapatazan om kobinasaan.

>> Basao-no laid it umpatod sid Kitab Momogun nalad 108 om iri-ogi i F. 6, 1-25. Suratani-no it ongotajuk dit onkofasal di Buuk dot Ulangan, isuhut sid Kitab Momogun do monodiri dot ombo baiko tuturan om usuran, ombo o hoturan ko undang-undang ko panarangan di hopod pinonuhuan. I gama-nu monodiri, ponong sid gibang ombo i bai usuran, sid tanga panarangan om hoturan bahagi dit ulun om i sid pialatan dot ongoulun. ponong sid vanan, hoturan om hal ponong sid Kinoringan.

%usuran/tuturan%hoturan bahagi dit ulun %ponong sid Kinoringan

↓ ↓ ↓

.....
.....
.....

>> Basao-po i F. 15,1-18 om itungo-no do kuran ong opud dara ino pinonuhuan dino sid tanga tokou songriniba dit oholian kiutang om pongutang sid pialatan dot ulun om it ongobansa om it araat i gama mongohorogo di dau om dau do barang.

F. 17,14-20 kananganko i hoturan ponong sid raja!

F. 18,8-22 retanko ong Silam dot i Muhamad ot oboroso<: *varo nabi di rumikot-ogi...* topot ong i Yahya, i rasul minongitung dot i Yesus ino-no i rumikot om iri-ogi i Yesus o minonuduk dot i Sundu do Kinoringan, ino-no i rumikot do mangahatul dino kavi. (Yahya 16,5-8).

F. 24,1-4 I kopiadaan di minisavo

F., 25.5-10 i gama manaud di bituanon dit obpinai, movoli dot odopon >Rut 4)

F. 26,1-11 It oulu di gulu, ensu-no vagu

F. 27,12-26 om 30,11-20 i hopod om duvo o lulupu sid burul Garizim om Ebal mititimpa-timpa mangarait dit ongoulupu om manangamin it ensanan i razat di hopod om duvo o rurungan.

F.31,1-8 i Yosua gumanti di Musa

F. 34, 1-12 i kinapatazan di Musa.

it onsi banal di buuk dot Ulangan, ino-no: *I TUHAN DINO, ISO-NO! ININGO-NO DIKOU, OT ONGOULUN DOT ISRAEL, I TUHAN DINO, KINORINGAN TOKOU, DOT I TUHAN DINO ISO-NO!*

Itit ayat dino o kososizan dit ongoulun Yahudi sampai biano. Markus 12,28

mongusul sid dialog di Yesus om it ulun dit elo do Kitab: Sino dino mongimbulit i Yesus dino kososizan dino.

>> Nunu-ka i soalan do iadino i timpa di Yesus sid Markus 12?

>> Nunu-ka i kiniro dit ulun dit elo do Kitab kananganko i timpa di Yesus?

Kananganko i kinembulazan di Buuk dot Ulangan, nabasa-no laid sid umpatod di Kitab Momogun. Amu elaan tokou dot isai-ka i minonurat di Buuk Ulangan dino. Baikoo sid 2. Raja 22 varo habal dot i hiza di minonusi om minangatag ioti di panambayanan dot osusi sid Yerusalim, varo nahajangan dioti dot iso o buuk. >Na nipatod-no dioti i buuk sid raja Yosia. Iri-ogi i raja banalko osusa i ginavo sampai

tinumiim iosido sumuhut di boros di buuk dino sampai minangatag iosido di gama sumambayang sid Yerusalim.

>> Basao-no i 2. Raja 23,1-7 om 24.

Varo kiroon dot i buuk di nahajangan diri, ino-no i buuk dot Ulangan. Sabap i gama di raja Yosia sinumuhut dit ongohoturan di nokosurat sid buuk dot Ulangan dino. Topot asot elaan tokou do sera om isai o minionurat om kuran, tu natahu-no i buuk dino sid panambayangan dot osusi sid Yerusalim .

TAFSIRAN DI YOSUA, HAKIM, RUT, 1.-2. SAMUEL, 1.-2. RAJA

A: I BANSA DOT ISRAEL SID KANAAN om I KARAJAAN DOT ISRAEL /

A.) Umpatod: Iti pentutun sid dikau di Buuk do Yosua, Hakim, Rut om Keso Samuel 1-8.

>> Basao-po laid i >Usuran di Bansa dot Israel F. 2 (nalad 4) sampai F. 3 (nalad 6) < om iri-ogi it umpatod di buuk do Yosua sid Kitab Momogun nalad 120. Imatai-no vagu sid palan do kuran it Ongoisrael nakakaa sid volit tupak di bavang do Yarden i ponong sid Timur.

I Musa-no o minangagazad di bansa dot Israel pakaa ponong sid pomogunan do Kanaan. Iosido dino rontob nokotimpan ponong sid Barat, di nokensomok-ogi iosido sid pomogunan do Kanaan minatai-no iosido. Na i Yosua o pinolombus di tugas di Musa sampai minangagazad-no dioti sumuvang sid Kanaan. I hiza di kinosuvangan dioti sid Kanaan 1230 TGM. Antad diri nokentoron-no ioti sid pomogunan dino om minongingkakat-no do karajaan dot Israel. Topot ino karajaan dino rinumungoi-no sampai narakop-no it Ongoisrael om inovit-no sid pomogunan vokon. I kinovian di karajaan dino, ino-no TGM 587. >>Ong lukison ino, pengkaa dino i hiza om usuran di bansa om karajaan dot Israel om Yah~~u~~**u**: **1** Amu osusa do mongohondom kavi inot ongotoun dit usuran dino. Inono rontob, atag ong engat-nu di kinosurutan di bansa om karajaan dot Israel sid pomogunan do Kanaan.

>> Supaya oruhai rumamit di kosurutan dit usuran di bansa dot Israel, i nokosurat sid buuk do Yosua, Hakim om I. Samuel, varo graf sid nalad ko-2. Ong solinon-nu ino graf sid kartas jawaban-nu dino, ino gama-nu manalin kotulung dikau mongohondom om humarati dit usuran dino. **Y1. 2**

Ino-no kadapat tokou humarati: Kondiri di Kinoringan pinosuvang om pinentoron di bansa dot Israel sid pomogunan do Kanaan, isuhut di noboros-no om nokentahan-no laid sid Buuk Kinotimpuunan 13, 15:

I sokoviai i pomogunan dit emot-nu diti, itahak-ku sid dikau om sid mongkupu-nu sampai penlaid, ka di Kinoringan sid Ibrahim. Na i kovian di Buuk 2. Raja manarang dot narakop-no i kinogumuai di bansa dot Israel sid Babil. I harati, ong i Yosua minangagazad sumuvang sid Kanaan, topot ong 2. Raja 25 manarang di kinorungazan di karajaan dot Israel om i kinarakapan. Mad navi-no i bansa sid pomogunan siri. Ovongo tokou dot,

>> Nokokuro, ka do iadino i kobuatano di bansa di nopili-no do Kinoringan? om, Nunu-ka o sabap dot nopunso-no i kogumuai it Ongoisrael do bai okudik-no o nobi ot naranzat? Tiimai-no mangajawab i duaton diti! **Y1. 3**

Manjadi ino gama monongkokuro dit usuran di Bansa dot Israel mozovozo di tokou sid gama mamasa di tuturan di Yosua sampai 2. Raja.

Yosua 1-12 Sumuvang-ogi sid Kanaan 13-23 Mamahagi dit ongodaerah 24 Sinoda sid Sikhem

Usuran dot Ulangan: IT ONGOHAKIM

1-3 Tumolikud di Tuhan

4-5 I hakim Debora om Barak

6-8 I Gideon o hakim
9 I Abimelek
13-16 I Simson

Rut Tuturan dit odu di raja Daud

1-8 i Samuel
9-31 i raja Saul
16 inumahani Daud do raja
17 i Daud om i Goliat
31 kinapatazan di Saul

Samuel keso

2 raja Daud sid Yahuda
5 raja Daud do songisrael
7 kentalangan di nabi Natan
13-18 i tuturan di Absalom

Samuel koduvo

1 i Sulaiman o raja
1-11 i karajaan di Sulaiman
12-14 i kopitongkizadan di karajaan
dot Israel Utara om Selatan
17-22 I nabi Elia om i raja Ahab

Raja keso

1-8 i tuturan di Elisa
om usul di duvo karajaan
17 i kinorungazan dit Israel Utara
24 i kinorungazan di karajaan Yahuda

Raja koduvo

& I KINORUNGKAPAN SID POMOGUNAN DO KANAAN

>> Basao-no i buuk do Yosua F. 1-24, ombo i nokosurat sid Kitab Momogun om lukisai-no it a-ko piro o tuturan om tajuk di Yosua: **Y1. 4**

& 1-12 Sumoruvang sid pomogunan do Kanaan

- 1 Kinoringan monuhu om potugas di Yosua
- 2 Mogkoliduk di kuta do Yeriko
- 3 Tumupak sid Yarden
- 6 Kinorotuan di kuta do Yeriko
- 10 Gibeon otori-no

& 13-23 Mamahagi di pomogunan do Kanaan sid 12 rurungan

- 21 i kinapangan momodsuvang sid Kanaan
- 24 I sinoda sid Sikhem om i kovosihan di Yosua sid bansa dot Israel.

I hiza di kinapatazan di Musa nokorikot-no i bansa dot Israel sid ponong Timur di bavang do Yarden. Sid tupak otimpani i konopuan do Yarden om iri-ogi i kobuburulan sampai i kuta do Yeriko: > (Bil. 13) I minamarata diri minangahabal-no laid di kobuatano di pomogunan sino, it ongokuta dit apapag banal, it ongoulun dit mad pandangan, it ongokabun dit kikouvaan dot ahatul. Manjadi kakali ompulalangoi itungon ioti do kuran kadapat sumuvang om manansanganu di pomogunan di iadino. Ong i Musa, it ulion dioti sid saralom dit 40 tinounan, minataino. Isai-ka o mangagazad om mangahatul di tokou diti, ka di ginavo dit ongoulun dot Israel. Banal-no, Kinoringan o minangalabus om minanapul di tokou antad

sid kinuripanan sid Masir om sid rahat do kitundusan. Kuran-ka, kakali ino Kinoringan dino o monori di sangod om pezon di tokou sid pomogunan do Kanaan?

Na i Buuk di Yosua manarang dino laang kumaa om sumuvang sid pomogunan do Kanaan. Mongusul i Yosua di kinotupakan om kinosoruvangan sid Yeriko om it ongopomogunan vokon, sampai kuran it ongorurungan nokezon-no sid ongo daerah dau (Map ko-2a om 3)

Ino-no it atag ohondom:

I boros di Kinoringan sid di Yosua 1, 9: *Hondomo-no dot sinuhu ku ikau kumansang om mihot. Ioku-no i Tuhan Kinoringan-nu, i mozo-vozo dikau di siombo-nopo o panahon-nu, ka.*

om i boros dot: *ontupato-no, supaya i buuk do Pinonuhuan dino abasa-nopo hiza do sumambayang-kou. Osipo-no dikou sokoviai i nokosurat sid buuk diti.*

I rurungan do Levi a-nobohogizan do tana om daerah, topot i duvo i rurungan dit anganak di Yusup, ino-no Epraim om Manase, sompi kidaerah.

I Buuk di Yosua amu mongusul do pengavi dit usuran di bansa dot Israel sumuvang. I kuta Yeriko, Ai om Gibeon, nensanan sid daerah di dang Benjamin. Kagi, i hiza di Daud kaharati tokou do minsanko 230 toun kinosuvangan dot Israel sino, varo kakali ot ongo bansa vokon sid tanga om sid pialatan dioti dino.

I Kinoringan okonko bai pinalabus dioti antad sid Masir, gam kondiri di Kinoringan minangahatul, supaya it Ongoisrael ka dapat do tana om pomogunan om kuta om daerah. Okonko i palad om sapedang dit Ongoisrael o minonori di sangod, inoi nga i Kinoringan, i minozo dioti sid pati di pongizanan dit ongovatu di pinonuratan di hopod pinonuhuan. Iosido-no o minonulung sampai minongunang di sangod diri.

Kondiri di Kinoringan minangagazad di bansa dau posuvang sid Kanaan.

Sabap 40 toun ioti sid belantara do baiko mirimpanau om miringkozou. Topot kodung nokosuvang-no, kivalaino om kitana ioti, varo't a-ko piro o pensubaan. Tu amu oubas ioti Ongoisrael sid gama mutanom om mukabun ko mizon sid apapag o valai. Sabap sid dundung-nopo ioti diri.

Obebas dara ioti do manansanganu do tana, om mangagama sid tana, mangaradu, mananom, mongomot ko mongutu di kouvaan. Rontob-nopo, mad amu-po elaan dioti it onogama di iadino. Kagi, kakali ogumu-po ot ulun di pasok sinod tanga dioti. Inot ulun pasok dino sinumamba sid ongokuasa di retanko kuasa do pomogunan ko kuasa dot indai ko pampang om tana. Ino-no it ongopinokokinoringan dioti diri. Na pongitungan-nopo it Ongoisrael, Ong inot ongokuasa dino ot harapon dit ulun pasok sino sampai inot ongokuasa dino kikuasa di retanko elo do mongimbulai dit hasil do pomogunan om papaganak di riniba om dupot, ka, osuhul dot i tokou Ongoisrael nga sumusui di gama dioti sumamba sid ongokuasa do pomogunan do Kanaan. ka. (Imatai i gambal 5 om 6 sid palajaran ko-2. 16)

Manjadi osusa-no it Ongoisrael do mokitarang dot, Banal-naku i Kinoringan dit angaki, i minangalabus dahai antad sid Masir, bai Kinoringan om kuasa sid Masir om sid belantara ko minsanko sid pomogunan do Kanaan, nga kakali i Kinoringan diri monunda om mangahatul om mangapad sampai monguasa di sokoviai. . .

Ogumu o gama dit Ongoisrael rumatu sid pensubaan. Topot sid kovian, i Yosua o posumpa di bansa dau, supaya atatap ioti dot a-ke du ioti sid hoturan do Kinoringan om aso gama tanid mantadko sumuhut di kenginan do Kinoringan.

I kososizan di Yosua sid Ongoisrael sid Sikhem: *Ioku diti om it ongekob-ku, sumamba-okoi sid Tuhan Kinoringan*

>> Siombo-ka nokosurat ino boros di Yosua dino? Yosua. . . . **Y1. 5**

& I BUUK DIT HAKIM (ONGOHAKIM)

>> Basao-po laid i umpatod om imbulit basao-no i F. 3 dit >Usuran di Bansa dot Israel (nalad 3-6)

Iadko i hiza di Yosua diri, i hiza dit Ongohakim iadino. Aso hoturan di nokogom sid istana ko upis porinta dot Israel. Sabap, ka dioti, I Tuhan Kinoringan o raja tokou (>Zabur 95, 93, 96 om 98 ko Zabur

2) Tiimai-no mamasa it a-ko piro it ongozabur dino. Sabap ino, i pati di pinosuvangan di vatu di pinonuratan di pinonuhuan, nga banalko agazo o harati om hormat sid tanga dioti dino. Mad Kinoringan kondiri nokentoron om mozo-vozo, mogkovosihan om mangahatul, mongohukum om monunda di bansa dau. Rontob-nopo, sabap asot ulion tantu om aso hoturan dit otunda do mata-mata ko isai-nopo, banalko asazou i razat dot Israel om oruhai ioti atarik sid ongokuasa om rogon om ongopinokokinoringan dit ongoulun di pasok sid pomogunan do Kanaan dino.

Pengkaa dino i babaal di Buuk do Hakim:

■ 1, 1-3, 6 Umpatod di tuturan di Hakim

■ 3, 7-F. 16 It ongohakim

■ 4-5 I Deborah om Barak, sumaap do Sur om Sisera

■ 6-9 I Gideon om i anak Abimelek

■ 10-12 I Jefta

■ 13-16 I Simson, kinosinaan om kinorungazan dau

17-21 alazan sid Kitab Momogun, tu ogumu o tuturan di bai popigolivong

>> Imatai-po i palan do kuran do pamahagi di pomogunan do Kanaan dit ongo daerah dit ongorurungan.

>> Tiimai mangawarna i palan dino, obiru i rahat om bavang, cocolat ong i burul, otomou ong i konopuan. Om popitalado-no i palan sid Kitab do Momogun nalad 160 om omungai-no it ongo kuta do Yeriko, Hebron, Bersyeba, Ai, Silo om Sikhem. **HI. 1**

>> Basao-no it ensanan it ongo fasal di Buuk do Hakim, iadko noko surat sid Kitab Momogun.

I pongoretan Hakim amu tantu kopionong di tugas dioti ongoulun sid Israel. Sabap okonko ulion ioti ko raja ko montiri ko pagawai, inoi nga suvai varo kosusaan, iri-ogi kondiri di Kinoringan mongodim om mamangkat dot isot ulun di pengkod di kosusaan ko kouripanan ko hoturan di sangod om ugama di momorinta di bansa dot Israel ko bai songsuku dit Ongoisreal dino. Bai i Kinoringan ot kelo mangahatul di iadino. Kinoringan monuhu, mangagazad, pembulai dit akal ko i kansang dit ulun dit onuvon dau do m'ananggung di bansa dot Israel.

I vaza dit ongoulun Israel mongorumpak, retanko "Rumpak dot osusi", ino-no o harati: Okonko i sojal dot Israel mangapad di pomogunan om ongoulun sid gama dau mongunsub ko monori ko momunso di sangod, inoi nga it ongo kopitan om it ongo sojal dot Israel dino bai sasi dit agazo o gama do Kinoringan monori di sangod, i minongunang di bansa dot Israel.

Ino-no rontob, sabap asot ulion dioti dino om ipat-ipat it ulun nga osusa kopitoguvang di gama sumuhut di hoturan om monuluk di kenginan do Kinoringan, banalko oruhai tumongkihal ko malid it ongoulun sid pensubaan om harapan dit ongoulun om bansa vokon. Mongimpa ioti do kuran it Ongopasok mananom do gandum ko manaud do pangazam, ino gama dit amu-po oubas ioti kondiri, om sumasi-po dot inot ulun pasok dino, sid sokoviai i gama, kasamba-po laid sid pinokokinoringan dioti, ino-no i Baal om Asera, om monizas do gandum ko hiza do mongutu, varo gama dioti do mamaga-po dit anggur om penum-po laid i bobolizan di Baal, ko ong hiza di mogotong, potorong-po laid it ondu sid bobolizan, supaya orompit-po om ogiangan iosido di bobolizan di Baal di mad dinudun di Baal. Kasasi-po di iadino, varo-no't Ongoisrael do sinumusui di gama di iadino, retanko i Baal o mamasi om mangaranzat om mongopud di pomogunan do Kanaan om it ulun di nokezon sino.

Minsanko nokopiupakat om nokoponumpa-no ioti sid di Yosua, kodung minatai-no i Yosua, sinumusui-no ioti dit ongo pasok om it ongo bansa om ugama vokon. Manjadi sid tuturan dit a-ko piro i Hakim (mananggung), iri-no ko iri ot ajadi:

a) sabap varo kosusaan, Kinoringan momili do hakim

b) ousul-no di kuran do kosusaan om kosompitan di bansa ko bai it iso o rurungan dot Israel

c) Iri-ogi Kinoringan manapul di bansa ko rurungan dino sid saralom di gama di hakim

d) dot amu songkuro osinang-no i bansa ko rurungan di nokotiim -no vagu di kotulungan do Kinoringan, nga tumolikud vagu sid tinoguvangan do Kinoringan om mongimbulit-no di gama sumamba di kuasa om pinokokinoringan vokon.

>> Usuro-no i kuran i Gideon ajadi do Mananggung dit Ongoisrael! Valango-no it apat laang di tuturan dino: a), b), c), d) **HI. 2** om suratai-no dot siombo o nokosurat do iadino.

■ Sid usuran di Abimelek (i harati di ngaran dau, I raja ot ama-ku, ka), it anak di Gideon kembulai dot tigogi, varo pongitungan dot i tugas dit ulion do bansa, iso-no o turunan do monungkus ombo i jumadi do raja di iadko it ongoraja dit ongobansa vokon, a-milo-milo, nga ino raja dino okonko mongitung-po laid di kosinangan di razat dau, gam mongogorot momomogos om momorinta iosido di razat dau, isuhut di dau do kenginan om kosinangan sampai kohormatan. Minsanko avantang i hoturan di Gideon dit banalko mangamu dot onuvon iosido do raja, it anak dau oruhai kalandu sid karaatan. Gam moniim i Abimelek do momunso dit varis dau, supaya amu osolod i pangkat dau.

Iri-ogi i Yotam pinavalang di karaatan dau sid saralom di gama dau monuriban sid ongokazu.

>> Tiimai mongitung om mongohondom sampai monurat, - ong varo hal sid tanga tokou iadko i hiza dit Ongoisrael, do varo kosusaan, varo pensubaan, varo kotulungan do Kinoringan sampai varo katatapo dot ulun mihiza di kosusaan, om iri-ogi, kodung osinang vagu, tigogi rumanggal vagu ko lumuvau i kosipan om harapan dot ulun Kristian. Tutturano-no it hal sid tanga do PCS, ong varo!

& I BUUK RUT

■ 1 I Naimi om it onkob dau sid Moab, i kinapatazan dit ongosavo dioti

■ I Rut, i nokotokin mozo dit ivanon muli sid Baitlahim

■ 2 I Rut mongindarau di ravo sid tagad di Boas

■ 3 I Rut om i Boas sid sulap

■ 4 I Boas mongopud dit onkob di Rut

>> Basao-no i apat fasal di Rut. Tiimai do manangon i tuturan dino sid ulun vokon, sid savo, anak, obpinai, songkoruhang.

Ino buuk dino mongusul di Rut, it ondu di bansa Moab, ulun dit amu nakaharap om nakasip sid Kinoringan. Sabap i Naomi om i savo nokorungkap sid bansa vokon, gima noruzahani sid dau do kampong, it anganak dioti minanansavo sid bansa vokon. Do minatai-po it savo om it anganak di Naomi, i Rut nakaharati sampai nakasip sid Kinoringan sampai amu-no tumatak di Naomi. Minozo-no iosido dit ivanon dau muli sid Israel do sompi bituanon ioti miduvo dino. Ong i Naomi moniag dara di Rut mozo, retanko aso tenganan dot mokisavo dit anak di Naimi dit aso-po. . . kembulai dot i gama di Rut mozo, engin momiara om monorundakai dit ivanon dau dit iseso banal. Iri-ogi kouli-po sid kampong laid di >Naomi, i varis di Naimi, ino-no i Boas mongopud dit onkob di Naomi. Sabap, ong aso obpinai di savo di minatai, i pinsan di savo laid osusa do povolizon dot inodopon om monongdapu di varis di minatai dino. (Imatai sid Ulangan 25, 5-10)

Na sid tuturan dino kembulai do kuran i Kinoringan mangahatul om monunda dit ulun, minsanko bansa vokon, ong atatap it ulun dino. Gam i Rut dino jumadi dot odu di raja Daud, iadko i sundal Rahab sid Yeriko jinumadi do varis om turunan di Tuhan Yesus. (Imatai Matius 1)

>> Suratno i turunan di Yesus sid kertas Jawaban do goritai-no it ngaran dit ongondou di narait sino dot aragang o garit. Piro-ka it ongoondu di narait sino dino? **R1. 1**

>> Tutturano-no do kuran i hoturan do Momogun kodori, ong varo minatai i savo do kusai. Kagi, kuran ot atag o gama biano ong iti nokokristian tokou-no?

& I BUUK KESO om KODUVO DI SAMUEL (1.-2. Samuel)

Sid graf sid nalad 2 diti palajaran atalahas dot ino duvo buuk di Samuel mad iso pitoluvon di sokovia i buuk di retanko Usuran dit Ulangan, ino-no Yosua, Hakim, 1.-2. Samuel om 1. +2. Raja. Topot i hiza di nousul-no sid ongobuuk di Samuel dino, bai a-ko piro o toun, inono i hiza di Samuel om i hiza di

Daud. Topot ong i Yosua sampai i Hakim minongusul dot duvo natus toun koledo, om i 1. +2. Raja, nga mongusul-po dot 300 toun.

Ong sid duvo buuk di Samuel, bai tolu-not ulun ot inusul, inono i Samuel, i Saul om i Daud.

>> Lukiso-no laid it onsi di 1. +2. Samuel, isuhut dit ongotajuk dit ongofasal om ongobahagi do fasal di nokosurat sid Kitab Momogun. Apat bahagi sid saralom dino duvo buuk dino, ino-no

1. Samuel 1-15 I Samuel om i Saul

1. Samuel 16-31 I Saul om i Daud

2. Samuel 1-4 I Daud sid Hebron (raja do Yahuda)

2. Samuel 5-24 I Daud sid Yerusalim, raja dit ensanan i Israel.

>> Opongo-po do mamasa om mongolukis dit ongotajuk dit ongofasal di duvo o buuk di Samuel, basao-no i Samuel keso. Sid tasambahagi dino, jawabo-no it ombo it oduat diti: **Sam1. 1**

Surat beranakan di **Samuel:**

anak di kampung
it idi sikul
i kumuro di kinosinaan dau guru.
.....
i kagamaan
siombo

&F. 1, 1-2, 1-11 I Hana, idi di Samuel, pendongou sid Kinoringan di kosusaan om kosinangan dau (mindamo do kotulungan, monorima kaseh bahagi di kinotulungan. . .) Ino dino mad suntuan dit atag o gama minta dua.

Ong Zabur 50, 15 manarang di gama di iadino: Kodimooku-no dikou di hiza di banalko opogos-kou. Tu ioku-no o manapul om monulung dikou om pongindazoukou-no dohon.

F. 2, 12-26 Iso-po o karaatan do nousul siti, ino-no it anganak dit imam Eli mokiopud om mokilulundu sid persembaan dit ongoulun. It ama dioti nelaan-no i kobatano dit anganak dau, nga pemozooni. Amu kogoos ko amu monoruntud di gama momiara di dau dot ongekob, dot iosido diri, ulion om hakim om imam di songbansa dot Israel. Oruhai sid ongekob dit ulun di kitugas dot ahatul, dot it anganak amu sumuhut dit avantang o gama dit molohing, gam tumohiang ioti sampai mamakai di kuasa om pangkat om hormat dit ama sid korumato dau.

Sid tuturan diti kaharati tokou do banalko otopot i boros di rasul Paulus di mongonsug dit ulion om kotua do piumpugan ko isai i kitugas sid gorija, supaya ahatul-no laid it ongekob dau kondiri, supaya it ongekob dau mad suntuan sid vokon om iosido elo mangahatul om mangagazad om monunda di piumpugan ko gorija. Pengkaa dino atalahas dot amu ozi i Kinoringan dot it ulun di kikuasa sid persembaan do piumpugan, nga humambil om onuvon sid poginakanan i siin ko barang di dang Kinoringan.

Sabap ino, ong varo karaatan sid tanga di bansa do Kinoringan, kondiri di Kinoringan monimban di hoturan om momili om monodia dot ulun vokon, ino-no i Samuel, supaya i Samuel potorongotog-no vagu di hoturan sid bansa dot Israel.

Minsanko i F. 1-3 mongusul do kuran di molohing di Samuel om kuran iosido jinumadi do migaralo sid panambayanan sid Silo, amu anaru banal i tuturan di manarang di tugas om gama di Samuel konoruvo-nopo di sukud om tugas dau. Ong onsizon i tugas dau, iadino:

hakim iosido dit a-ko piro hopod toun, minintutuk iosido sid po mogunan dot Israel do mangahatul om mongohukum dit ongokiis (imatai F. 7, 15-17)

imam iosido sid panambayanan, antad di sumpa dit idi dau dot itit anak diti a-milo-milo nga iuripon-ku sid tinoguvangon do Kinoringan sid panambayanan (1, 11 om 8, 21).

mananggung iosido, tu minangahatul di gama monunsub di sangod di nokosoruvang sid pomogunan dot Israel (7, 2)

nabi iosido ko "ponuhu di Tuhan"(9, 9-11) di pentalang sid imam Eli di hukum do Kinoringan(3, 11-18) om mongumau di Saul do raja. Oubas it ulun do tumoronong sid di Samuel do mindamo di kovosihan antad sid Kinoringan (F. 9): I Saul rinumikot sid di Samuel, tu mokituduk do siombo i kaladai di natagak.

I harati, i Samuel mad bantaran antad di hiza do varo hakim sampai i hiza do varo nabi di poromot sid bansa dot Israel di kenginan do Kinoringan (mad tutup hakim om buka nabi) I hiza di Samuel sinumiliu i bansa dot Israel om jinumadi do karajaan dot Israel. I Samuel minamangkat di raja di gulu banal dot Israel, ino-no i Saul om i gumanti dau, ino-no i Daud.

Sid Kitab humarati tokou dot, kodung varo hiza vagu di tanid mantad di hiza di gulu diri, varo-no kosunduvo. Iadino i kinosunduvo di kinosinaan di Samuel (f. 1)

>> Surato-no it ongokosunduvo hiza di kinosinaan dit a-ko piro ot ulun di kingaran sid Kitab: **Sam1. 2**

Ishak:

Musa :

Samuel:

Yahya i minomodu:

Yesus:

>> Imbulito-no mamasa i 1. Samuel 8 om 10, 17-19 om jawabo-no it ongotomodon om itiang do varo raja dot Israel **Sam 1. 3**

Nunu-ka i guna ong varo raja | Nunu-ka i susa ong varo raja dot Israel?

.....
.....
.....

& I raja Saul

>> Basao-po laid sid >Usuran di Bansa Israel< Fasal 4a (nalad 7-8) I raja dot Israel di gulu banal antad sid rurungan Benyamin. I kinarajaan dau dino TGM 1012-1004, nga amu atandas avantang i hoturan dau. Iti-no it a-ko piro i laang dit usul di Saul

F. 9, 1-10, 16 i Saul rumikot sid di Samuel, tu natagak i kaladai dit ama dau. I Saul anaru ko ulun di banalko avantang om kibahazan. Noumahan-po i Saul, nosuvangan-no iosido di Sundu do Kinoringan

F. 10, 17-27 I tudukan di Samuel: Ot ongoisrael, ikou dino minangamu do Kinoringan dit engin-kou do raja. . .

F. 11 I Saul monori di bansa dot Amun om ajadi do raja sid Gilgal. Iri-ogi mengkod i Samuel dot hakim iosido.

Amu sumuhut i Saul di suhu do Kinoringan do punsoon di bansa dot Amalik. >I gama di Saul rumanggal di kenginan do Kinoringan: tinombizan-no dau i pangazam om barang dit Amalik tu orubatan iosido di barang dino. Sabap i ginavo di Saul ozi di barang dot Amalik, minalid i ginavo sid barang om sinumuvang sid harapan dit Ongoamalik.

Duvo o hal mimbulai sid tuturan di Saul:

I Samuel minangamu di kenginan dit Ongoisrael di mindamo do raja, tu, ka di Samuel, I Kinoringan o raja tokou, ka.

nga kondiri di Kinoringan tumurut sid kenginan di bansa dot Israel om minomili-no di Saul do raja sampai minonuhu-no di Samuel do mongumau di Saul do raja. I gama mongumau mad gama mamakal dot ulun bahagi di tugas dau.

Antad diri opiduvo-no i vaza om kavazao dit ongoraja dot Israel: ponong sid katagan: i Saul popiiso dit Ongoisrael sampai notori-no it ongobansa di minongunang om minangasau di bansa dot Israel (i Pilisti) ponong sid pensubaan: Kondiri di Saul rinumanggal di kenginan do Kinoringan sampai antad diri, titongkihal nopo sid ongohal vokon, tu amu engat dot i tugas om hormat dau antad sid palad do Kinoringan. Alaid-po i Saul dinumuat-no sid kososorou om bobolizan do rogon (28)

Nolingan-no di raja dot minsanko iosido nga nokosuvang sid pinonuhuan do Kinoringan om ohoturan di kenginan do Kinoringan, indoson dau ong iosido-no o manahak do hukum om hoturan, isuhut di dau do ginavo om kenginan.

>> Tarango-no i gama di Saul mongivogu di Daud om kuran i Daud monuli di karaatan di Saul **Sam1. 4**

(varo ongoapat limo o hal dit atag reton siti

& I raja Daud

I Daud mad raja randavi sid pialatan di sokoviai it ongoraja dot Israel. I hiza di karajaan di Daud nga hiza dot banalko ahatul o kosinangan. Kananganko i vangun di Daud, avazau iosido om osiou om kisurupu. ong sid tinoguvangon dot ulun mongitung. Topot ong sid tinoguvangon do Kinoringan, nakaranggal iosido di kenginan do Kinoringan sampai osusa iosido mokiada di sala dau. Ong sid politik, bai iosido ot elo do popiandus dit ongopomogunan di sid mintutuk om pagazo di karajaan dot Israel sampai tumahan dit ongosangod.

Ong sid ugama om kosipan jinumadi i raja Daud do suntuan di raja penlaid om suntuan di Almaseh, i popiandus di sompomogunan om pengkakat di karajaan do Kinoringan.

Ong kiroon tokou it usul di raja Daud, varo tolu ot ontok do pengkaa dino

1. Sam. 16-2. Sam. 5 I kengkakatan di raja Daud antad di kinopomilihan sampai i hiza di pogom iosido di istana dau sid Yerusalim.

2. Sam. 6-12 Momorinta i raja Daud

2. Sam 13- 1. Raja 2 I vaza dit anganak di Daud misosolod di karajaan om pangkat om hormat dit ama Daud.

>>Surato suvangai-no i kusung sid surat beranakan di Daud

Sam1. 5

I **DAUD**, anak di. elo-ka do musik. piro songobpinai.
i koronuhan dau.
i kavazao.
it anggai dau.
it onogama dau antad dit opodok-po.
vokon-no:

Kodung nakalandu i raja Saul, nopili-no om inumahanno i Daud dot bakal do raja iosido gumanti di Saul. I kakal-po omulok, om komulakan kagi sid ongkob dau, bai manaud do pangazam o tugas dau sid valai dit ama dau.

Kodung nokotoguvang sid raja laid Saul om i bakaraja dino, varo-no kivoguvan di Saul. Nokokuro-ka, tu mongivogu i Saul?

SAM 1. 6

>> I tuturan di Samuel mongusul do duvo o tangon di monuturan di kuran di kopitambi di raja Saul om i Daud. Surato-no ino duvo tangon dino dot onibak o gama monurat. **Sam1. 7**

a).

b).

1. Tarango-no i guna di Daud do nokotiim laid iosido manaud do pangazam!

Sam1. 8

2. Nunu-ka i kogunaan dot elo i Daud do musik?

3. om kuran di gama tokou misingilo sid di Daud mamakai do longoi om it ongounizon?.....

4. Nokokuro-ka, tu amu mamakai i Daud di lomina om pakakas do rumpak i sumaap iosido di iadko i pandangan Goliat?.....

5. om nunu-ka songsuntuan ino bahagi di tokou?.....

.....
6. Nunu-ka i vaza di Yonatan om i Daud do momihot di kopianggazan dioti dino?.....

.....
Sid ensanan i Kitab aso tuturan vokon di manarang di vaza monodia dot ulun bahagi di tugas dau do raja iosido di bansa dot Israel. Kuran-ka i Kinoringan monodia di hoturan di raja Daud?

I Daud misingilo do humarap sid kotulungan do Kinoringan (sid Goliat)

I Daud sinumuhut di kenginan do Kinoringan, amu mononuli iosido di karaatan di Saul, minsanko oruhai dara iosido mamatai di raja di manahaja dau.

I hiza dit osusa i Daud kinumozou-no iosido sid pomogunan do Pilisti om minisingilo-no sino di gama mongorumpak, momorinta, mangahatul dit ongotentara om i vaza dit Ongopilisti manangod

>> Basao-no sid >Usuran di Bansa dot Israel F. 4B (nalad 8-9)

& I karajaan di Daud om i vaza dau momorinta

Minatai-po i raja Saul, osusa-no i Daud do popiiso dit ongorurungan dot Israel. Tu varo't anak di Saul do jinumadi do raja ponong sid Utara, sabap it ongosojal di Saul minamangkat dit anak dino do raja. Amu minangakun ioti dot it ulun dit nosunsub di Saul o gumanti di Saul. Sabap ino, sid saralom do turu toun i Daud do bai ko raja sid rurungan do Yahuda ponong sid Selatan. Alaid-po diri, tiniiman-no di Daud do popiiso ioti, dot ino-no i gama dau, rinumpak dau i kuta do Yerusalim, it inintoronon di bansa do Yebusi do kodung nosoruvang om nakasanganu dau i kuta dino, ino-no kuta dino ot inanu di Daud do tampat jinadi dot istana om ibu kota.

>> Itungo-no dot nunu o tinomod di Daud mamakai di kuta om bandar vagu dot ibu kota. Surato-no i sabap dino. . . .

Sam2. 1

Nokopiandus-po i hopod om duvo rurungan dot Israel, iri-ogi mininsurung-no i Daud dit ongosangod di mintutuk sampai minonori-no di bansa do Pilisti, Moab, Amun, Edom om niamung-no it ongopomogunan om razat dioti dino sid karajaan dau.

It ongokuasa dot agazo, Masir om i ponong sid Babil, mad okurang o pongitungan dioti di hiza di Daud diri ponong sid pomogunan dot Israel sampai aso gama dioti sumolon di pomogunan di Daud ko mongunang di hoturan dau.

Manjadi, bai tolu o fasal mongusul di pomorintaan di Daud, dot sid ongo fasal dino varo duvo o hal dit atag do hondomon, ino-no

I Bahanda di Natan:

i nabi Natan pentahan di koledo di karajaan di Daud (2. Sam 7, 12) Ino bahanda dino monuluk di barakat antad sid di Ibrahim. Sampai penlaid varo karajaan antad hoturan di Daud.

Okonko i Daud o poturug di valai do Kinoringan, gam Kinoringan momihot dit ongekob om turunan di Daud

I Natan pentahan di kapapago di karajaan di Daud (7. 11) i karajaan di sampai penlaid (7, 12-13)

>> Imatai-no sid Lukas 1, 32-33 do kuran kembulai i bahanda di nabi Natan sid Kitab Vagu. Surato-no ino boros di malaikat Jibrail sid di Maria.

Sam 2. 2

.....
I kasalaan di Daud: >> Basao-no i F. 11-12 om Zabur 51

Kenginan dara di Daud do potunggol di valai do Kinoringan, dot ong otopot, kondiri di Daud mongohuzas om mongorongoi dit ongekob om valai dot ulun (i Uria) om mongimbulai di kasana an om kivo guvan sid ongekob dau.

I Kitab mongusul di kavazao di Daud dot amu mongimvantang ko gumuvail ko mongolim di karaatan dau. Minsanko i raja Daud suvai opud ong sid saralom di kovosihan do Kinoringan om i kaadaan do kasalaan sid saralom di karanggalan dau.

>> imatai-po sid map ka-4 i kogo zoo di karajaan di Daud diri

& It anak Absalom (F. 15-18)

>> Basao-no ino fasal 15-18

Ontok di kinosinaan di Sulaiman, anak di Daud sid Batseba, sumolon i kotuaan it anak di Daud, ino-no i Absalom di pangkat om kuasa dit ama dau. Pinatai-no laid di Absalom it obpinai dit okonko iseso ot idi, ino-no i Adonia diri.

Iadko i kinasalaan di Daud minongimbulai do kasalaan vokon, (antad sid kaagazan dau momudut om monipu sampai monuhu do posuru di Uria sid kapatazan, ino-no i savo di Batseba. Posusut dara iosido di kasalaan om karanggalan dau). Topot anangan-no iosido do karaatan om kosusaan antad sid dau dot anak om savo. Minongindaraat i Absalom di hoturan dit ama dau om mongonsug dit razat humarap sid dau do kovosihan. Iri-ogi momudut i Absalom sid ama dau, retanko bai sumambayang iosido sid Hebron dot ong otopot, minokijadi om minokipangkat iosido do raja gumanti dit ama dau. Gam i Daud mogidu di kodung nohorotizan dau dot ogumu-no ot ulun nokosuhut di Absalom. Amu ozi i Daud do kumirumpak dit anak dau.

Na i Absalom anangan do kapatazan i hiza di minogiduno iosido hiza do notori-no i tentara dau. I kopitan di raja Daud minonuhak di Absalom do bujak di nokosiit sid kazu it obuk dau. (Inot obuk dau mad tanda dot osiou iosido.)

& 1. - 2. Raja: I raja Sulaiman (Solomo)

>> Basao-no it umpatod om i F. 1-11 di 1. Raja (nalad 194-207).

Iri-ogi solino-no sid kartas jawaban iti graf di 11 fasal dino.

1. Raja 1-11 I raja Sulaiman

1-2 I misosolod it anganak di Daud di karajaan dau

1, 1-4 lumohing-no i Daud

1, 5-53 i Adonia mokiraraja

2, 1-12 It imuhun di Daud sid di Sulaiman

3, 1- I pomintaan dua di Sulaiman om i vaza dau mongohukum dot abanal di duvo it ondu sid tinoguvangon di Sulaiman

5 I Sulaiman mongompon di babaal di panambayangan dot osusi sid Yerusalim

6-7 poturug-no di panambayangan

8 mangarasmi i Sulaiman di panambayangan

10 i magandaha it Inuvung do Seba sid di Sulaiman

11 i gama di Sulaiman tumolikud sid Kinoringan om i kina patazan dau.

I sumuvang-ogi i Sulaiman sid tugas om hoturan di karajaan dit ama dau, apapag-no i karajaan dot Israel. Aso sangod sid mintutuk om aso kosusaan sid tanga di karajaan. Obebas om andus i razat dot Israel, tu atarang om alus i hoturan di Daud diri.

Na i Sulaiman pilolombus dara di hoturan di kopioondusan om pinosurut-no di kobudayaan om keloo sampai miniupakat dit ongobansa vokon. Rontob-nopo, sid pialatan di kohormatan om koronuhan dau dino minimbulai-no i pensubaan dit alaid-no. Tinumongkihal-no i Sulaiman sid pensubaan, ino-no, iosido kondiri pinaamung di sasambaan sid ongorogon dit ongobansa sid panambayangan dot osusi sid Yerusalim.

Amu anaru it usul di Sulaiman (1. Raja 11, 41) di nakaraliu sid Kitab Laid diti. Kiroon dit ongoelo, inot ongofasal 3-11, nga inanu-no sid "kinotuturanan di Sulaiman"

Iadino i tolu bahagi i tuturan di Sulaiman:

3, 1-15 I Sulaiman manarang di kenginan dau|

5-8 I panambayangan dot osusi, i pomintaan dua di Sulaiman

10 Tumanggih i Sulaiman dit bansa, vokon-no om tumohiang sid ralan dot abanal

>>Tiimai-no tumimpa i duaton diti: **1. Ra. 1**

1. Nunu-ka it indomoon di Sulaiman sid Kinoringan?

.

2. Isai-ka i ngaran dit idi di Sulaiman?

3. Kuran-ka, tu nokoronuw i Sulaiman sid ongobansa vokon?

.

- 4. Nunu-ka i hinukum di kinoronuhan di Sulaiman?
- 5. Nunu-ka i pinonuhuan di rinanggal-no di Sulaiman?
- 6. Nunu-ka i keso o bongunan di tinunggol di Sulaiman?
- 7. Nunu-ka it indomoon di Sulaiman i hiza di minangarasmi iosido di panambayangan dot osusi?
- 8. Isai-ka i raja di minagandaha sid di Sulaiman?
om nunu i tinomod magandaha?

Na i keloo om kovosihan di Sulaiman nokembulai-no sid Buuk Amsal om Pengkhotbah sampai sid Buuk Kidung Agung. I Sulaiman minongimbulai di kogumuai do keloo om kopongohorotizan di kobuatano dit ongodupot om riniba sampai it ensanan vinangun.

Rontob-nopo, minsanko varo kopioondusan i hiza di Sulaiman diri, kondiri di Sulaiman minonodia di kosusaan sid gama dau pagavul dit ongopinokokinoringan dit ongobansa sid hoturan do sambayang di bansa dot Israel. Natarik iosido dit ongosavo dau dit okonko bansa dot Israel. Banal-no, ong kakal-po i Sulaiman o raja, amu-po kembulai i karaatan om kosusaan diri.

>> Basao-no sid Usuran di Bansa dot Israel i Fasal 4 B om C ino-no nalad 8-12 om imbulito-no mamasa di 1. Raja 1-11

>> Onsizo-no ino tuturan di Sulaiman sid Kartas Jawaban ombo i dikau dot horotizon om itungo-no i kiguna do hondomon **1. Ra. 2**

■ I kinopitongkizadan di karajaan dot Israel 1. Raja 12-16

>> Basao-no laid it umpatod (nalad 207) om iri-ogi it a-ko piro i fasal 12-16 om imatai-no sid map ko-5 do kuran do nabahagi-no i karajaan di Sulaiman om Daud.

>> Nunu-ka i sabap do mitongkizad-no i 12 i rurungan?

1. Ra. 3

>> Nunu-ka i sabap do minihis i karajaan, ong sid kosipan o kiroon? **1. Ra. 4**

>> Nunu-kai kobungahan di Rehabeam bin Sulaiman? **1. Ra. 5**

>> Kuran-ka momihot i Yerobeam di karajaan dot Utara? **1. Ra. 6**

>> Nunu-ka i kinopolidan di Yerobeam dino? **1. Ra. 7**

I hiza di nakaraja i Daud sid Selatan, kadapat iosido do popiiso di hopod om duvo i rurungan sid iseso o hoturan om karaja an. Na bai duvo generasi o iadino om minihis-no vagu i karajaan om kesaan di hopod om duvo i rurungan. Kodung minatai-no i Sulaiman, tinumongkizad-no i hopod o rurungan di sid Utara sid hoturan om karajaan do Yerusalem. Sabap i Sulaiman nakapangagavul di gama sumamba sid Kinoringan om sid ongopinokokinoringan dit ongobansa vokon, kondiri di Kinoringan minonuhu di Yerobeam do mogidu om pengkakat di hoturan ponong sid Utara. (1. Ra. 11, 30f.)

Antad 1. Raja 12 sampai 2. Raja 25 mongusul i Kitab di duvo i karajaan om hoturan dit ongoraja dino. >> Basao-no sid Usuran di Bansa dot Israel nalad 13-14 (1. -2.) om imatai-po sid Kitab Momogun nalad 378 ponong sid kovian di Kitab Momogun i Sejarah dot Israel.

Na sid karajaan do Selatan, 18 toun i Rehabeam o raja om iri ogi it anak, muaki dau soumul raja pengavi di karajaan do Yahuda (ko Selatan) 587 TGM. I ibu kota, iri-no ko iri Yerusalim

I karajaan dot Israel Utara, tasantanid-tanid o raja om turunan dau sid saralom dit a-ko piro natus toun sampai TGM 722. Varo-no ong mongoduraka, varo-no ong patazon i raja laid. I panambayanan di mad ibu sambayang, vokon-no ong sid Betel om Dan, vokon-no ong sid Sikkhem om Samaria. Pengkaa dino it Ibu Kota, nga varo-no ong sid Sikkhem, iri-ogi sid Pnuel sampai sid Samaria.

Vokon-no ong banalko minisangod i duvo i karajaan om it ongoraja vokon-no ong minikunsi om miniupakat ioti sampai miniandus vokon-no ong pinolangan dioti i karajaan vokon om sumuhut di hoturan di tanid o porinta om karajaan di sid somok dioti dino.

■ I nabi Elia om i raja Ahab (1. Raja 17-22)

18 Sid burul Karmel kembulai dot isai i Kinoringan

19 I nabi Elia sid burul Torsina

21 i kabun dot anggul di Nabot

22 I kinapatazan di Ahab

>> Basao-no it ongo fasal dino om it Usuran di Bansa dot Israel F. 5 bahagi ko-3 sid nalad 14.

Ontok dit Abad ka-8 GM mimbulai do hiza di tanid mantadko i hiza laid diri, ino-no i hiza do varo nabi dot i bahanda dit ongonabi dino nitahu-no sid surat sampai sid Kitab. Varo-no laid nabi iadko i Natan sid istana di Daud. Topot antad hiza dino, banalko ahatul i gama dit ongonabi. Vokon-no ong i nabi tumoguvang di raja ko i razat do pentalang di sala, mamahanda, moniag, monginsasamod, mamalang di kosusaan di rumikot-ogi om i kosinangan om kosopulan, ong varo. Ino gama di iadino okonko antad sid dau do ginavo ko kenginan, inoi nga sinuhu iosido do Kinoringan. Tu i nabi dino ponuhu do Kinoringan, mad bantaran di boros do Kinoringan porikot sid raja om bansa dau. I kuasa om hak di nabi, ino-no, i boros do Kinoringan it iromut dau sid ongoulun ko i raja.

Na i Elia nabi do iadino, tu antad sid surat sid 1. Raja kaharati tokou di ginama dau. Iosido tumoguvang di raja Ahab om i savo dau Isebel. Manarang iosido sid dioti di gama dioti sumamba sid rogon om pinokokinoringan sampai mamalang dit napalid ioti antad sid kenginan om hoturan do Kinoringan sampai anangan ioti di hukum do Kinoringan.

>> Tiimai do manantu dot siombo o kinosuratan di hal diti:

1. Ra 8

1. Atantu i Kinoringan dot Israel, ino-no i Kinoringan, okon ko i Baal!
2. Boros di Elia sid di Ahab: Ikau o minangarampas.
3. It ombolog pinakan di nabi.
4. i hukum: Dumpahon do vatu.
5. i savo di raja monipu sid gama monurat do surat.
6. 40 tinadahan sid balantara it ulun.
7. Darun: Kinoringan porikot do darun.
8. raja kumoruhang do raja.
9. Asu monila di raha dot ulun.
10. Isai-po-ka i nabi vokon di mamahanda sid di raja Ahab?.

& Ahab

F. 16 i vaza di Ahab sumamba sid Baal

17 I Elia minsamung di Ahab

17 i Elia sid bavang om sid bituanon

18 Kinoringan mihukum sid Karmel

19 mogidu i Elia sid burul Torsina

20 i rumpak di Ahab

21 Ahab om Isebel manakau di kabun di Nabot

21. 20 i Elia sid Ahab

21, 17-19 Boros do Kinoringan sid Elia

22 rumpak di Ahab sampai minatai

Sid tuturan di Elia atalahas-no dot,

i pensubaan rumbul satu di bansa dot Israel, ino-no, sumamba sid pinokokinoringan, rumanggal di Pinonuhuan keso. Topot a-kakun i Kinoringan dot i bansa di pinili dau mogidu antad sid tinoguvangon dau om sumamba sid kuasa vokon. Kinoringan mad mongivogu, gima i bansa dau.

I Kinoringan dot Israel kikuasa padarun om poruzou do pomogunan. Iosido posuni di sokovia i sampai kikuasa iosido di katalib di kuasa di Baal om Asera, i retanko i Mamasi do pomogunan. (imatai sid gambar 5 -6)

Kinoringan potugas di nabi dau di tugas dit banalko apagon om osusa. Topot i Kinoringan mongorinding di nabi om pakan hiza dot vitilon om pakansang di ginavo hiza dit atalou iosido.

Ino-no i tomodon di duvo i buuk do Raja:

Sid buuk Yosua om Hakim sampai Samuel om Raja notuturan-no dot, I Kinoringan minanahak di pomogunan do Kanaan sid bansa dau om minangapad dioti ontok di kikosusaan, momili dit ulion om hakim, supaya agazad ioti sampai varo-no raja. Topot i hiza di Hakim nokotimpuun-no laid i vaza dit ongoulun dot Israel om it ulion ko raja dau, ino-no mogidu antad sid tinoguvangon do Kinoringan om tumoguvang sid pinokokinoringan dit ongobansa vokon do tomod mokitulung dioti, minsanko aso kotulungan sid dioti dino. Sumamba ioti sid ongorogon sampai mengkod humarap om mangasip sid Kinoringan. Rumanggal ioti di pinonuhuan keso.

Sabap ino, ino duvo buuk do Raja manarang do bai iso-no o hal di banalko osusa, mad ponukungan di gama di sokovia i it ongoraja: ino-no, sumuhut i raja di pinonuhuan om kenginan do Kinoringan ko sumamba iosido om humarap di pinokokinoringan vokon.

Kondiri di Kinoringan pinentoron om minamasi di bansa dau sid pomogunan sino om minanahak sid dioti dit avantang o hoturan om it ongoulion dit atag o pongilaan. Na kakali i bansa dot Israel amu minamakai di kovosihan dino, gam tinumohiang ponong sid korungazan om karaatan. Iti-no i habal di Buuk di Raja diti.

Na i 1. om 2. Tawarikh amu nokosurat sid Kitab Momogun om amu nousul-no sid kursus diti, sabap ino duvo i buuk dino mad miabap dit Usuran dot Israel iadko nousul-no sid 1. om 2. Samuel om 1. om 2. Raja dino. It rumbul satu ohodtol sid Tawarikh dino, ino-no i gama sumambayang sid panambayangan dot Osusi sid Yerusalim.

1. Tawarikh 1-9 i turunan di Daud antad sid di Adam

10-29 i raja Daud

2. Tawarikh 1-9 I Sulaiman om i vaza potunggol di panambayangan

10-36 it ongoraja do Yahuda sampai norungoi i Yerusalim.

>> Sid kovian di palajaran kotolu diti, varo it a-ko piro o duaton, dit avantang tarangon sid onibak o tuturan, ino-no

>> Tuturano-no i tinomod di Yosua do mongumpug di 12 o rurungan dot Israel sid Sikhem, hiza di lumohing-no i Yosua om nopongono i gama manansanganu di pomogunan do Kanaan!

>> Usuro-no i kinotorian dit ongoulun do Midian hiza di Gideon diri

>> Tuturano-no i kobuatano di Rut, i nokotokin sid di Naimi diri!

>> Tiimai mogihim it inantadon dit a-ko piro it ayat antad sid a-ko piro o tudukan dot ulun sid piumpugan: Surato-no i Buuk om fasal om ayat!

1. Vokon-no ong banalko apapag om asavat o kuta. Topot ong sid Kinoringan, tigogi, humaba i rinding om kuta dino!.

2. Ong Kinoringan mongorumpak, atagal ong ogumu-no o sojal!
3. Impiro pongodim i Kinoringan sampai pangambat it ulun dot, Pomoros-no, sabap it uripon-nu mongining. ka.
4. Kuran-ka kadapat it ulun masi sid belantara? Ong Kinoringan mangahatul, minsanko bai ombolog kadapati monumad?.
5. Minsanko kaladai ajadi do susuhoon do Kinoringan!.
6. Amu miuna do rontob elo banal. Ong amu obinsuhut, tantu aso guna i keloo dino!.
7. Isai minomigis di pompod di gaun di raja
8. intolu ponuntug dot apat boloji o vaig sid pinadaha?
9. i anggai manahak dot onom bandu o gandum sid ivanon dau?.
10. nunu-ka i guna do hokos dot aragang sid gondila?.

It ongonabi dot Israel om Yahuda

Manjadi, iti panarangan diti minanarang di ralan di bansa dot Israel antad kinotimpunaan sampai i hiza dit ongoraja. Iti palajaran kapat momongo manarang dit usul di duvo i karajaan dot Israel Utara om i Yahuda i ponong sid Selatan. Atag do basaon-po laid om imbulito-no it USURAN DI BANSAN DOT ISRAEL Fasal ko-5: I duvo i karajaan do Yahuda om Israel Utara.

Sid 2. Raja ousul-no i tuturan dit ongoraja sid duvo i karajaan dino, vokon-no banalko onibak i laporan do bai mamalang do kuran it toriso-iso i raja sinumuhut di hoturan om kenginan do Kinoringan ko amu. I sokoviai i hiza antad sid raja Yerobeam II (787-747 TGM) sampai sid kinarakapan sid Babil (TGM 587) bai hopod om apad fasal mongusul om monuturan.

Na ino hiza dino (787-587 TGM) okonko bai usul dinot ongoraja, inoi nga i Kitab Laid manarang dot it ongonabi o minoniim mangahatul di bansa dot Israel om Yahuda do potorongot o tomodon. Inot ongonabi dino nisuhu-no do Kinoringan mangatag ombo it amu atag sid pialatan di bansa dot Israel om Yahuda. Manjadi iti diti manarang om monuduk di tugas om habal dit a-ko piro it ongonabi dino.

Varo-no laid nabi guluko it abad kovalu GM. I Samuel, nabi-no laid ko sid istana di raja Daud, i nabi Natan o minongoromut di boros do Kinoringan sid raja Daud. I hiza di raja Ahab, i Elia o nabi. Topot ontok di Abad kavalu mad tanid-no o kobuatano dit ongonabi. Ino hiza dino kagi kotimpunaan dot ulun mamakai do kulit do sapi do posuraton sampai minonurat sid kulit dino ombo-nopo it engin mongohondom om popuhondom bahagi dit ulun di sid tohudi. Na it ongonabi dit antad sid Abad kavalu dino minanandon sid surat dit ongobahanda om tudukan om kasarahan, antawa varo't ongokoruhang dit ongonabi di minonurat, supaya sid tohudi it adau, it ongoulun kakali milo mamasa om mongohondom di boros dit on gonabi om momorisa do kosunu it ombo-nopo i nentahan om nentalang-no laid diri. Inot ongonabi dino, nikodim-no do Kinoringan, tu pentahan sid razat om sid raja om ongoimam di kenginan do Kinoringan bahagi dioti om i kobuatano dioti. Vokon-no ong notiagan-no ioti di raja mangahabal. Topot i tudukan dino nitahu-no sid ongolinundun. Imatai-no sid Yeremia 30,8 om 36,2 do kuran ousul-no i vaza patahu sid surat om mamakai di surat di nabi dino sid gama poromut sid ulun di habal om kenginan do Kinoringan. Ong otopot, koubasan dit kogumuai it ongonabi, bai i kabang o minumbongut. Vokon it ulun o minonurat om vokon-no suvaiko nokoponurat di boros di nabi hiza do nokosunu-no kavi i boros om bahanda di nabi dino.

Kavi-avi it ongonabi di kibuuk sid Kitab Laid, nga hopod om onom, do varo koubasan monodiri dit ongonabi, ino-no it apat **nabi dit agazo**, tu anaru o tudukan om ogumu o fasal. Iri-ogi i hopod om duvo i nabi i retanko, **it ongopodok o nabi**.

Na it ongobuuk di nabi dino kopisusuhut sid Kitab Laid isuhut di kogumuai dit onkofasal. Ino-no, mogulu i Yesaya, tu 66 o fasal om iri-ogi i Yeremia om Yehezkiel om Daniel, om iri-ogi i Hosea om i vokon.

Na sid kursus diti amu sumusui tokou di kopisusuhutan di Kitab Laid, inoi nga mogulu tokou mamasa om manarang ombi i nabi gulu om isai-nopo i sinumusuhut di nabi gulu dino. Sabap ong iadino, humarati tokou do kuran it usul dit ongokarajaan dino sinumurut om jinumadi. Iti-no it ongonabi antad di hiza di Yerobeam II sampai sid kinorungazan do Yerusalim (TGM 587) dit a-milo itungon, ino-no, AMOS, HOSEA, sid Israel Utara ioti, om sid Selatan i Yesaya, Mikha, Nahum, Zefania, Yeremia, Habakuk.

TAFSIRAN DI NABI YESAYA

Poguluvan-po mamasa i 2.Raja 18 om it umpatod sid fasal dino sampai sid 20,20.

Iri-ogi it umpatod kananganko it Ongonabi, Kitab Momogun nalad 324 om bahagi di nabi Yesaya umpatod nalad 325.

ISAI-ka I YESAYA? Atalahas-no dot okonko i Yesaya o minonurat di Buuk di Yesaya diti. Sid F. 6 manarang i Yesaya dot isai iosido. Topot okonko i Yesaya manarang sid di tokou di kobuatano om pangalaman di Yesaya, inoi nga ulun di baiko koruhang di Yesaya.

Na i 1,1 mad tajuk di Buuk di Yesaya. Ong i Yesaya minonuturan baiko iso-no o kinsasarahan dau. Topot it ayat 1,1 manalahas dot i sokovia i Buuk diti, ino-no i nongosorou di Yesaya, ka. Ong boros dot Ibrani, amu tantu monodiri di hal do nosorou ko namato ko i baiko bahanda.

I harati di ngaran di Yesaya, ino-no, I Kiningan o kosopulan-ku,ka. Mad mionong di ngaran dau om i tugas dau. Baiko i ngaran dit ama di narait sino. Aso't elaan tokou do sionggo antad.

Ong mongitung tokou dot i Yesaya nokotoguvang sid raja om it imam do kipangkat sid Yerusalim (f.7,3 om 8,2) mad ulun iosido do kingaran sid Yerusalim. Topot ong mongitung-po di kosulungan dau di bai kulit do karong om solipa-po, ino-no i kosulungan dot okonko susulungon do mamakai sid poginakanan om pesta, nga mad koluu ong ulun dit obebas iosido mukabun sid kampung dau i sid somok do Yerusalim.

Sabap baiko okudik o panarangan kananganko i kobuatano om kavazao di Yesaya, atalahas dot it ulun di minonurat di surat diti, bai iso-no o tomodon, pavalang om polombus di tinomod sampai poromot di tugas di Yesaya. Sabap ino amu anaru o tuturan dau kananganko i koumbalo di nabi Yesaya.

I KOBUATANO DOT ISRAEL HIZA DI NABI YESAYA OM AMOS:

Rinukung-no i karajaan dot Israel om Yahuda di hiza dit Abad 9 GM. Topot kinumansang om kinumambang-no vagu di hiza di raja Yerobeam II sid Samaria om i raja sid Yahuda (Yerusalim). Nokotiim-no ioti do papapag di sokovia it ongokamong do pajadi do kuta. Rontob- nopo, kodung i Tiglat Pileser III (745-727) o raja sid Assur, rinumpak-no sampai inanu it a-ko piro o pomogunan di sid somok do Assur. Na TGM 740 nokosuvang-no i karajaan dot Israel om Sur sampai i bandar do Turus om Biblos sid kuasa di Tiglat Pileser sampai osusa-no ioti manahak do sukoi sid raja dino. TGM 734 tinumiim it a-ko piro o daerah do sumaap di hoturan dot Assur, i harapan dioti, otulungan om osukung ioti di raja sid Masir. Topot turus tinori di Tiglat Pileser ioti sampai nokorikot i tentera sid bavang do Nil. Ino hiza diri pinengkakat-no i Tiglat Pileser dot iso o daerah dot Israel di nokosuvang sid dau do karajaan, ino-no i konopuan do Duru.

Minsanko notori-no, kakali tinumiim vagu ioti sumaap om minongingut-po di raja Ahas pamung sid upakat dioti (TGM 733). Topot amu minozo i Ahas sid upakat dioti dino, gamko minokitulung di raja dot Assur. Manjadi i hiza di minongorumpak-no vagu i Tiglat Pileser dioti dino sid rumpak di retanko Rumpak Sur-Efraim (733) nokosuvang-no i daerah dot Israel ponong sid Utara sid kuasa dot Assur sampai nakatana-no i kuta do Damshek (732). Na i raja do Yahuda sinumamba-no sid hoturan dot Assur (7,2) sampai minangakun-no pamung dit ongotatong dot Assur sid panambayangan sid Yerusalim.

Na tinumiim-no vagu sumaap dit insan-po dino, ino-no i raja Hosea, i muaki di Yerobeam di karajaan dot Assur. Topot a-nokotingan, gamko rinatu iosido di raja (724) om natanus-no i karajaan dot Israel Utara (722).

Na i raja Hiskia (725-697TGM) i gumanti di Ahas amu minamung sid upakat di raja Hosea sid Israel do sumaap di pomogunan dot Assur (724) ko kumodou di toun 720, hiza dot i Sur om i Pilisti sinumaap dot Assur.

Na hiza di kinapatazan di Sargon II (705TGM), miniupakat-no i kogumuai dit ongodaerah sid Asia Barat sampai minsanko i raja sid Babylon om i Faraun sid Masir, ino-no i Shabaka, nga minamung-no sid upakat dioti dino do mongorumpak om mangahaba ioti di karajaan dot Assur. I hiza diri inidu-no di Hiskia it ongo-patong do Assur antad sid rinuvang di panambayangan sid Yerusalim (2.raja 16,10 om 18,4) tu monusi om mangatag iosido di gama sumambayang sid Kinoringan. Tanid mantadko ino, miniupakat-no di Hiskia om i raja do Babil om Masir. (Yes. 28, 7-13; 29,13-14; 28,14-22) Na i nabi Yesaya minoniag di raja Hiskia do iadino o gama miupakat, topot amu mongining i raja. Sabap ino, kodung varo nogontian i raja Sargon III, ino-no i raja Sanherib, pinihot-no laid dau i hoturan sid pomogunan dot Assur, tu sinod ongodaerah dot Assur, nga varoi linumodou. Nopongo-po om nozom-no vagu i pomogunan dot Assur, minungkazut-no iosido om minonurung-no dit ongodaerah om sangod di sinumaap di karajaan do Assur. Niogulu-no laid mongidu i raja do Babil, ino-no i Marduk-Baladan. Iri-ogi rinumpak-no di Sanherib i pomogunan om bandar do Sur, Foniki, Baiko i Sidon, Askalon, Ekron om Yahuda o tinumiim sumaap di Sanherib. I tentera do Masir, nga notori-no sid Elteka, 50 km antad sid Yerusalim ponong sid selatan, . Om i kogumuai dit ongokampong om kuta di sid mintutuk do Yerusalim, nga notori-no kavi, minsanko i kuta Lakis, it banalko apapag o kuta, nga nokosuvang-no sid kuasa dot Assur diri. Baiko i Yerusalim-po o kakal tinumahan. Iri-ogi sinumamba-no i Hiskia sid karajaan dot Assur sampai minangakun-no do mamarai/monobus di kobebasan do Yahuda di banalko agazo o barazon. Topot it ongodaerah do Yahuda nokosuvang-no sid kuasa di raja dot Asdod, Ekron om Gaza. Alaid-po diri, niuli-no vagu inot ongodaerah dino sid kuasa di karajaan do Yahuda.

Varo manarang dot i sala di karajaan do Yahuda, ino-no humarap ioti sid pinokokinoringan dit antad sid Assur om vokon-po. Topot, ong i Yesaya, pengkaa dino o boros dau, Ong aso kosipan dikou, aso koposizan dikou, ka do Kinoringan. Ino boros dino, kiguna sampai biano, om ino boros om bahanda di nabi Yesaya, okonko bai mongimpuras di kobuatano dit ongoulun diri, inoi nga monuduk di tokou dit atag o gama mongimbulai di kenginan do Kinoringan sid tanga do razat.

1,2-9 Boros bahagi it ulun dit a-nokorundun.

I boros dit a-ko piro ot ayat dino, suvaiko nopongo-no i lapuran di Yesaya om nakamung-ogi inot ongoayat dino. Inot ongoayat di boros di Yesaya muonsi sid sokoviai i gama mamahanda om mongintalang sampai mogkovosihan di bansa dot Israel om Yahuda. Ino-no it onsi:

Baiko antad sid kovosihan do Kinoringan amu-no navi-no ko natanus-no i bansa dot Yahuda om Israel sid saralom dit ongohukum do Kinoringan, hiza di nabi Yesaya. Na it ulun di minangalapor di boros di Yesaya minonurat do popuhondom sid ulun di dau do hiza, supaya kaharati ioti do kuran i piumpugan di dang Kinoringan di sid palad om kovosihan do Kinoringan, ponong sid kavantango om ponong sid korumaato. A-milo-milo, nga kotoguvang ioti sid hukum do Kinoringan, ong amu tumurut ioti di kenginan do Kinoringan. Aso tenganan manangkis ko mangalai di hukum dino.

Na duvo bahagi i boros dino, Ayat 2-3: i vaza do Kinoringan manala di bansa dot Israel, sid gama mongingutdo sasi, ino-no it avan om i tana. Iri-ogi manarang iosido di karaatan om kasalaan do Israel. Ino vaza mongodim do sasi, it avan om i pomogunan o kasasi, sinod panambayangan do Yerusalim o pinangahabaran di Yesaya diri. I nabi mongoruput sino dot sodian-po laid it ongosasi di ruputan dau dino.

Antad sid ayat 7-9 atalahas-no dot nakatalib-no i hiza di Sanherib di minonurung di kuta do Yerusalim sampai i karajaan do Yahuda baiko ino-po kuta Yerusalim, tu it ongodaerah ponong sid Selatan, nokosuvang-no kavi sid kuasa di Sanherib. (2.Raja 18,13-16) Na i panangan di bahanda di Yesaya, Noupug-no i piumpugan do Yerusalim sid panambayangan niintahan do Kinoringan i kosusaan dioti do iadko sumambayang ioti do mongolobong ko mongohondom di kinorungazan di karajaan sampai mokisian ioti do Kinoringan. Na i harapan dioti, ong sukul mokisian ioti do Kinoringan, tanut varo kotulungan om kosopulan antad sid kuasa om korugizan dot Assur. Topot boros di nabi Yesaya, Ino kosusaan dikou, ikou kondiri o minongimbulai sampai minokipunovot. Ong ioti moguhang dara di

Kinoringan, gima amu tinuluk dau i janji do monunda om mangapad iosido di bansa dau. Topot boros di Yesaya, kondiri do Kinoringan o minomoros om mongoruput sampai manala di bansa dau.

1,2-3: **Kinoringan manala di bansa dau**

I Yesaya iadko Peguam do tumanga sid umpug dioti sid panambayangan mongodim do sasi sid pihukuman do Kinoringan ponong sid bansa dau. Okonko insan-no sid Kitab do varo kodimon dit avan om i pomogunan do sasi, gima i kobuatano do riniba di tumolikud sid hoturan do Kinoringan imatai sid Ulangan 4,26; 30,19; 31,28; 32,1 om Zabur 50. Inot ongosasi manantu dot i Kinoringan minonuluk di janji sid ongoulun dot Israel om Yahuda. IADKO AMA I Kinoringan di mongogompi om mogkononia do kosukupu dit anak dau do pensukod, sampai apatut dot it anak nga sumuhut di hoturan om kovosihan dit Ama, sampai agazo o ginavo dit anak monorima kaseh sid molohing,

(I hiza diri, a-milo-milo it anak masti sumuhut di molohing, tu it ama kikuasa bahagi kapasi om kapatai dot anak Kol. 20,12 om 21,15+17) Minsanko it ongobansa vokon, nga asarok manangama om mongoguna di pinokokinoringan dau. Ong sid Israel, alambat ioti manangama do Kinoringan, supaya osodiri i kuasa do Kinoringan di tumalib di kuasa di baiko maganak. (Kolobusan 4,22; Ulangan 4,1; Zabur 89,27; Yeremia 3,4 om 31,9) Topot antad di hiza di nabi Hosea, varo-no panarangan dot i Kinoringan iadko Ama di bansa dau sampai nakaharati-no it Ongoisrael dot i Kinoringan o mononganak dioti dot ensanan i kovosihan om samod dau. Gamko Kinoringan kondiri o minomili dioti do bansa om anak dau (Hosea 11,1)

Ino-no i vaza do Kinoringan monuluk di janji: iosido o minangagazad di bansa dau do iadko Ama nopensukod dit anak sid gama manaud om mongogompi sampai monuduk om mangagazad ponong sid bahazan om katagan. Sabap ino, ginumazo-no i bansa dot Israel om kingaran-no sid pialatan dit ongobansa vokon. Topot i Israel om Yahuda tinumolikud-no sid Kinoringan sampai linumabus antad sid janji, ino-no sumamba ioti sid ongorogon dit ongobansa vokon om mangaranggal ioti di hoturan dit atag di monunda di razat dot Israel.

I Yesaya manarang di karaatan dot Israel. Nisuntu i karanggalan dino sid kobuatano dot dupot om pangazam. Ong pangazam, a-milo-milo sumuhut di hoturan di sanganu. Minsanko bai sapi, ko kaladai, kaharati dot ombo ot atag om amu. Topot ong i bansa dot Israel, amui. Ong pangazam kotutun di dolou di sanganu sampai sumuhut di dolou dino om tumurut di hoturan om boros dau. Topot ong Israel, amu. Ino-no i pongoretan dot "kotutun", ino dino manarang dot banalko kopionong di dupot om i sanganu. Asarok apakai i pongoretan dino sid gama di kusai om it ondu di minisavo do mizo dot aso kesaan di merad dino kesaan dino. Vokon-no ong i harati dino, midudun ko miolunung om jumadi dot kopizaan. (imatai-no sid Kinotimpuunan 4,1: ong sid Kitab Momogun kotutun = minaganak.) Ong boros Ibrani sino, I Adam kotutun-no di Hava. Ong kotutun do Kinoringan, ino-no o harati, Elaan i nunu-nopo i kenginan do Kinoringan om i gama sumuhut di kenginan dino.

Topot, ka di Yesaya, ong Israel, okonko iadino. Kinoringan minanganu dioti do wakil om tanggung jawab sampai puun do barakat bahagi di sokoviai it ongobansa, supaya ioti sumasi di kogofoo om kohormatan do Kinoringan, i Minongurug om Mamasi di bansa om riniba, supaya it ongobansa vokon rumamit di karabat do Kinoringan. Topot it Israel minogidu-no sid tinoguvangon do Kinoringan sampai nanangan di rodus om hungot do Kinoringan. Minsanko mavi matai ioti, nga kakali apatut dara. Topot kakali dot amu opunso ioti. Om it ongoulun di notoguvangon di Yesaya, nga mad amu kaharati di kosungguvo di iadino. Iti-no o sabap dot i Yesaya amu kadapat mamaahanda do kuran o katagan.

1,4-9 **Baiko i kobinsianan-po do Kinoringan o minanapul dioti sampai amu navi ioti sid rumpak di nakatalib-no.**

Apatong o boros di nabi pogili sid umpug dioti di sid panambayangan do Yerusalim dot ombo i sala dioti, i harapan di Yesaya, kadapat iosido mongogiang dit ongoginavo dioti di mad watu.

Ong sid F. 6,3 It ongomalaiikat monguji di kohormatan om kosusian do Kinoringan sampai mamalang dot i pomogunan nga nopusok-no do kosusian do Kinoringan. Topot ong i bansa dot Israel, banalko tanid, tu opusok do karaatan om karampasan om aso bahazan sampai aso hoturan sid pialatan di razat do Israel. Iti-no o sabap dot amu pinemozo do Kinoringan i bansa dau. Ino-no o rontob, ino kosusian di Tuhan humandap do monorob om posikit dit ongokaraatan, ka, ko varo-po boros do lalapos di mangalapos di bansa dot Israel sampai nasaadan om nadamatan.

Ensanan i guvas notopuan do damat om nuko dot okudik nga asot amu nonong di lalapos. Kakali kiraha it ongodamat (Luk. 10,34) Ong sid ayat 5-7 kakali bai suriban do manarang, suvaiko sid ayat 7 om kembulai-ogi it ongokosusaan, Ozongou i tana, gima i tentera di Sanherib. It ongokuta nga nakatana-no. 46 o kuta hinaba di Sanherib (imatai sid Sejarah di Bansa dot Israel). Minsanko i kuta Lakis, di banalko apapag, nga nanu-no di Sanherib. I sokovia i it ongoulun rinakob-no di Sanherib, 200 150 kinozuan ot ulun om rinibuvan-po o pangazam dioti. Avagat i sukoi dit inanu sid raja Hiskia. Na it ongokabun sid daerah, nga inanu-no kavi dit Ongopilisti. Baiko i kuta do Yerusalim-po o nobi di karajaan di Daud. Iso-po o suntuan pinakai di Yesaya. Ka dau, i karajaan do Yahuda baiko sulap-po ko dundung, ko tinakang sid tagad, i harati, okonnoko valai-po dot apapag om otiru.

Ong i hiza dot nokodim-no i Yesaya do nabi, varo-no laid boros dau do manalahas do kuran i hiza di sid tohudi, ino-no o rumpakon om asaadan-no ioti do baiko i nobi-po ot amu avi. (6,11) Ong okonko i Kinoringan monian, navi-kou-no laid dino, ka di Yesaya. Gam minonumpa i Kinoringan om minagapad di nobi dot Israel om Yahuda. Tu ong okonko iadino, ioti-no ko i Sodom om Gomora, ka.

Na i tokou, gorija di Kristus, tumorima di boros di Yesaya dino do iadko bahanda bahagi sid di tokou. Tu i tokou nga masi sid saralom di kovosihan do Kinoringan sampai i toku oruhai tumolikud sid Kinoringan om sumuhut di kenginan kondiri.

1,10-20 It atag o gama sumabayang om sumamba

Kakali minomoros i nabi sid ayat 1,2-9, varo-no mungkazut ssampai mumbongut dumahava di boros di Yesus. Mad sid pihukuman i Israel. Koubasan diri sid poginakanan do kokotuai do varo panarangan do kuran i Kinoringan mogkovosihan di bansa dau om manala di nunu-nopo i karaatan sid tanga di bansa dau.(Zabur)

ayat 11: manarang dot i hiza di boros di Yesaya diri, nga hiza di Festa Kokotuai. Ogumu it ongopangazam nagaras-no, vokon-no ong tinunuvan, vokon-no ong bai i raha om i lunok ot isamba, I onsi akanon dit ulun di noumpug-no. Boros dioti, Iokoi diti sokovia i inot ongodupot nisamba-za sid Kinoringan, tu sumamba om monuluk di janji ponong sid Kinoringan, isuhut di hoturan di Musa. Nokokuro-ka, tu manala dahai i nabi, ka di gama dioti dumahava. Na i Yesaya, antad sid kabang do Kinoringan tumimpa mangagarak dot ino-no o panangan: Ong sukul mongining-kou om sumuhut-kou, kadapat-kou di hasil di tana dikou. Ong amu-kou mongining, atanus-kou-no, ka di Kinoringan. Amu dumahava i Yesaya do songonuvon i boros dino baiko ino-no i timpa, polombus iosido di boros do Kinoringan sid ongoulun di noumpug sino.

Sid ayat ko-9 minangarait i Yesaya di duvo o pomogunan di natanus-no do Kinoringan, ino-no i Sodom om Gomora. Niluu di Yesaya ioti di duvo i bandar dino, tu ikou sinumana om sinumaap sampai minanabpo di ponuhu do Kinoringan iadko ioti sid Sodom diri,ka. Iti-no o sabap do giniral di Yesaya it ongoulion dot Israel om Yahuda dot, "Ongotuan do Sodom" om "bansa dot Gomora". Popuhondom iosido sid dioti di Taurat do Kinoringan.

Ong ioti kondiri di noumpug sino, kipongitungan dot miuma-no i kelino dioti, tu, ka dioti, ong sukul osukup i gama pasamba sid Kinoringan dit ongopangazam, ino-no mangagaras do dupot dot kotihi-no i lunok om i songihing i poo nga dang Imam om i kinogumuai nga dang razat-no, om varo-po dupot dot osorob, dot ensanan hompuvon, retanko i Kinoringan mangakun di lizun. Varo-po vuntun om i kogumuai do totodukon di sorobon di hiza do Kokotuai. Banal-no, ahatul o gama dioti mongohormat dit ongopesta: Adau do pongintaranan, Piromutan, Pesta Puasa om vokon-po. Ino-no rontob, ino gama dioti mongohormat dino baiko tomod-no mongohormat om momongo dit kavazao dit aso tantu-tantu. Iti-no o sabap, Boros do Kinoringan: Ino pesta om gama dikou sumamba oholian karaat dit retanko "osusi" om "elin" om "okosog" ioti. Abangat i Kinoringan dino sokovia i dino. Iti kavi, okonko kenginan do Kinoringan (Imamat 17,10-14; 3,2;4,6) I gama sumabayang sid panambayangan baiko vaza dikou monginsasakau di panambayangan. Minsanko i gama minta dua dot nisinggol i longon, a-korikot sid tolingo do Kinoringan.

Varo duvo panarangan kananganko i boros di Yesaya dino. Ino-no,

a) ensanan nga a-koho i Kinoringan do varo persembaan do pangazam. Iadino laid i nabi Amos (5,21-25) antava b) baiko it araat o vaza dioti, tu popigavul di gama sumamba om i gama miguguvail om

mangaramai ot amu tumorima i Kinoringan. Topot kakali avantangan i Kinoringan ong varo gama pasamba sid dau, ka.

Na hiza di pasamba do pangazam, pentahan it Imam sid piumpugan di kaadaan di kasalaan om karaatan, dot tigogi, amu-po nokobongut it Imam, marak-garak-no i nabi Yesaya do pakaso di sokoviai i gama dioti sumambayang om pasamba sampai minta dua. Ino gama dikou dino, gam mongusiba-kou om mangamalu-kou do Kinoringan, ka di Yesaya. Okonko i pangazam o kiguna, inoi nga it atag o gama dot ulun suvab-suvab. Suvai kiguna i persembaan, om i pomintaan dua om i gama sumamba sid Kinoringan, ong otopotko tumoguvang it ulun sid Kinoringan di banalko osusi (Kol. 19-24) Ong kakali it ulun posurut di dau do kenginan om gamaon do mihiza-no do sumambayang om i gama mangaraat sid Kinoringan sampai i persembaan dino bai vaza do mokibanal di karaatan ko i pomintaan dino nga baiko mongugangau, tu aso harati.

Ino-no i persembaan dit ikozi do Kinoringan, i ginavo dit obinsuhut, okonko i ginaras it ongopangazam (Mikha 6,8 om Matius 8,13)

ayat 16: I Yesaya mamakai di hoturan om liturgi di koponusian do piumpugan: Vougai-no, susio-no, ka. Iadino o koubasan dit Imam monuhu (Zabur 51) Topot, ka di Yesaya, Ong bai vaig, amu mongidu do karaatan, ko i gama vagu dit iri-no ko iri dit amu atantu, amu kaganta ko koponobus dit araat o gama diri. I Kinoringan suvaiko posuri di hukum ponong sid bansa dau, ong nokosuhut vagu ioti di janji sid Kinoringan sid saralom dot amu monimbaru vagu do karaatan om kasalaan. Iti-no dara it atag o gama, isuhut di hoturan di janji do Kinoringan, ino-no: i kabanaran o mangapad dit okugui om it orukung, i bituanon om it usan-usan, (imatai sid F. 12,2 om Yakub 1,27 ko Rom 12,1)

1,18-20: Na kakali i Kinoringan pogili sid dioti di kobinsianan dau.

Kinoringan-no o mongonsug mihukum. Pogili iosido di dau do kovosihan dino. Boros di nabi, kakali varo vazaan dikou muli sid Kinoringan. Mad aso rontob di kaadaan do sala om karaatan. Minsanko anangan do kasalaan dot aso tanganan timbangon ko iada, nga kakali pada i Kinoringan di karaatan (2. Kor. 5,17-21) Ioti diri, nga norugi-no sampai i tana om kabun dioti, nga navi-no. Ong sukul tumatap vagu ioti sumuhut di kenginan do Kinoringan, kemot vagu ioti di kobinsianan do Kinoringan. Iadino o gama di Yesaya pogili sid dioti di kopolosizan om i kapatazan, supaya momili ioti do kopolosizan. Sid gama posiliu dit aragang dot opurak om i kumut opurak di notuntugan do raha, manarang i Yesaya di kogosoo di kovosihan om kobinsianan do Kinoringan, ong sukul tumolikud i bansa dau.

F. 2,1: Mad tajuk koduvo di surat di nabi Yesaya, ino-no: I boros i nosorou dau kananganko i Yahuda om Yerusalim. ka.

Sid F. 2 insan-po do narait-no vagu i ngaran di nabi om it ama dau, sampai i rikoton di habal dau dino, ino-no i bansa do Yahuda om i bandar om kuta do Yerusalim. Natalahas-no siti dot inot ongoboros di Yesaya dino okonko turus noumpug om najadi do buuk ko lundun. Alaid om varo-ogi lundun di nosuratan i F. 1 om varo-po vokon di F. 2 om it a-ko piro o tuturan om fasal vokon. Tanid ot ulun om tanid o lundun minongolombus di boros di Yesuaya sid ongoulun di sid tohudi di mad tinungkusan bahagi dit ongotohudi. Suvai sid tohudi-no banal, kokiraai hiza do kouli it ongoulun antad sid Babil (TGM 540) om noumpug-ogi sampai pinopiaamung-no it ongosurat ombo i retanko boros om bahanda sampai nosorou di nabi Yesaya.

Manjadi it a-ko piro ot ulun dit elo mongintutun dit ongosurat kodori diri, nga mongitung do varo-no laid a-ko piro ot ongobuuk antad sid nabi Yesaya, tanid ong i F. 1 om 6,1-9,6, tanid-no ong 2,1 sampai 4,6 om i F. 10-po om ko-13-32. Ino-no rontob, ong i di tokou do nohorotizan, amu-no osusa monodiri om mongimpuras dit ongoboros di Yesaya dino, ino-no o keloo tokou, ino surat di Yesaya dino okonko usul di tumimpun sid F. 1 om oompus sid F. 39, inoi nga inot ongoboros dino kavi noumpug dot amu-no sinodiri do songira kembulai, inoi nga i tomodon om rikoton om hiza om ongoboros om bahanda om kinasarahan, nga amu enizo om amu nohiniza.

F. 2,2-5: I kotulukan dit usul do sompomogunan.

ko i hiza di sid tohudi banal. Itid ongoayat diti, nga nembulit-no vagu sid nabi Mikha 4,1-4 dot amu elaan, do siongo antad ko isai o mogulu koboros di iadino. Ino-no rontob, suvaiko kouli-no it ongoulun Yahudi antad sid Babil om nakamung-ogi itit ongoayat dino sid buuk di Yesaya. Itit ongoayat diti nga bahanda om pongintalangan kananganko i rikoton di riniba sid tohudi't adau. Apat bahagi i bahanda dino:

- a) tinarang-po laid i kasavato dit ompulongon do Sion sid Yerusalim (2a)
- b) iri-ogi tinarang-no i kogunaan di Sion bahagi dit ongobansa (2b-3b)
- c) i hoturan do Sion mananus di sokoviai i gama mirumpak, gam pengkakat di kopioondusan (4)
- d) mongingut di piumpugan sumuhut sid hoturan vagu (ayat 5).

Sera ong iadino dino? Ino-no, i hiza di tohudi-no banal,ka. Ino pongoretan "tohudi" apakai dit ongoulun Yahudi kananganko i hiza di rumikot-ogi. I jangkaan dioti diri, i hiza di nakatalib, mad hiza do nokotoguvang-no, om i hiza di sid tohudi, bai i likud di hiza dot otimpanon. Topot kavi-avi i hiza, nga sid palad do Kino-ringan. Kinoringan mangahatul di sokoviai i hiza, i nakatalib om i rumikot-ogi. Kinoringan pentahan di riniba di kovosihan om hukum dau. Kinoringan mad hakim om i Yerusalim mad pihukuman dau.

Na minsanko amu asavat it ompulongon do Yerusalim om i Sion (ong otopot, i Yerusalim nokogom sid ompulongon do tolu o konopuan sid mintutuk, i Sion, asavat mantadko i lumongon do Yerusalim). Na i nabi mongintalang dot ino lumongon do Yerusalim om Sion dino, gumazo om kihak bahagi di sokoviai it ongobansa. Andaman tokou dati i barakat sid di Ibrahim om i Yakub. I harati, ino lumongon dit okon asavat banal, tu ogumu-po ot ongoburul sid Palistina dot asavat-poko ino linumongon sid Yerusalim. Topot kakali dot ino Yerusalim o mad puun ko embulazon di hoturan vagu. Tu kondiri do Kinoringan mamangkakat om momihot di burul dino sampai mamantug di burul om ompulongon dino.

Na kodung iadino, amu-no osusa-po dot habaran om kirikon it ongobansa rumikot om tumoronong sid Yerusalim, ioti-no kondiri o tumoronong sid Minamangun, i mangahatul vagu di songriniba antad sid pusat dino. Ino panahon om gama mimbaris sid Yerusalim, i karajaan do Kinoringan o tomodon, ino-no it aso kerad om aso rontob. Iadko it ongoulun dot Israel di sinumamung do Kinoringan sid burul Torsina o gam dit ongobansa tumoronong sid Kinoringan. Tu sid burul do Sion nitahu-no i keloo om kosilato om it kovonuso di mongonsug dit ulun ponong sid koruhang dau. Sid Sion mimbulai i tudukan, ka (2,3d) Na ino pongoretan do tudukan miabali di retan do Taurat om pinonuhuan, ino-no i hopod o pinonuhuan om i vaza manarang om manafsir dit ongopinonuhuan dino.

Banal-no, i Yesus minomoros sid tohudi dot i hiza di karajaan do Kinoringan amu-no osusa-po do mogihim do tempat ko piosomungan do Kinoringan, tu ipat-ipat it ulun kokondiri tumoguvang sid Kinoringan sampai kopiboros do Kinoringan ong minta dua iosido, topot kakali varo pongitungan om kiroon dit ongoulun do Yahudi dot ino Yerusalim om inot ompulongon do Sion, i pagamanan di panambayanan dot osusi, kotoguvang-no banal sid Kinoringan, tu sino-no ot apatut do sumamba om mongohormat do Kinoringan, ka.

Ong sid Ongoisrael om Yahuda, iadino i pongitungan dioti; ioti o kogulu tumoronong sid Kinoringan om kogulu abarakatan (Zabur 22,28; 1. Raja 8,41-43; Yesaya 45,22-25.) Iri-ogi it ongobansa vokon nga engutan-no mamung sid hoturan do Kinoringan, ka. Ino hiza diri i Kinoringan popiandus dit ongobansa di kakali mirurumpak om mioduw. Iri-ogi tumanus-no i hoturan do mirumpak om tumim-puun it ongobansa do posiangn om mokisinang sid koruhanga. I pakakas do rumpak laid diri, jodizon-no om silihon-no dioti do pakakas mamanan, iadko i bajil om lomina, silihon-no do radu om i dila do bilok, nga silihon-no do linggaman.

Varo netung laid dot it ongobansa suvai kemot do kovosihan, ong ahabaran-no ioti sampai varo rumikot sid dioti dino, topot tigogi, ioti kondiri o rumikot om tumoronong om miumpug sid Sion om Yerusalim, ka di nabi Yesaya. Noboros-no kavi ino, iri-ogi tumoguvang i nabi dit ongoulun sid Yerusalim di noumpug-no sid panambayanan, supaya ioti mozo om sumuhut om ajadi do titiu om panganavau do pomogunan (iadko i boros di Yesus sid Mat. 5,13) Ong siti: I piumpugan o jumadi do kanavau sid

tinoguvangon do Kinoringan om mamakai di kanavaho di Tuhan ponong sid kosurutan do piumpugan, ka.

Ong i tokou Kristian humarati dot minsanko nosorou di nabi Yesaya, nga kakali amu-po alanta kavi ong sid di Yesaya diri, tu kakali agazo o guna di burul do Sion. Topot minomoroso-no i Yesus dot okonko sid burul ko sionngo-nopo o vazaan tumoguvang sid Kinoringan, inoi nga sid saralom do Sundu om ginavo dot ulun ot atag o vaza sumamba om tumoguvang sid Kinoringan (Yahya 4, 18-24) Kagi, ino boros di Yesaya diri mongohukum om manala di tokou Kristian tu i tokou nga kakali varo hoturan sid ongobansa di retanko nokosuhut-no di Yesus, nga kakali mamakai om sumusui di kavazao om kobuatano dit ongobansa kodori diri di mioduw om mirurumpak om ogumu-po o gama monodia om mangalaku do pakakas do rumpak, tu ino dino mad ponsohorian dit alaku banal om agazo o kohuntungan. Mad kakali amu-po korikot dot it ongobansa kumaa sid Yerusalim sampai kakali osodu tokou antad sid ralan kumaa sid karajaan do Kinoringan i minimbulai sid di Yesus om sid Yerusalimi.

2,6-22 om 5,15-16: It adau di Tuhan

Ong sukul sumuhut sampai mangasip i bansa do Kinoringan, tantu kosunu sid dioti ombo i nakabahanda-no sid 2,2-5. Topot ong arampus om oguvail i bansa dino, anangan ioti i hukum dit adau di Tuhan. Andaman tokou dati i boros di Amos F. 5,18-20, retanko dit ongoulun ko it adau di Tuhan o porikot do kosinangan,ka. Topot ka di Amos, it adau di Tuhan kotuvangan, okonko kanavaho, kosusaan, okonko kosinangan, ka.

Na inot ongoboros dino hiza do poginakanan o minomoros i Yesaya sid panambayangan sid Yerusalim. Oumpug-no it ongoulun mongining. I vaza di Yesaya momoros, iadko minta dua om kumiboro-boros do Kinoringan om varo-po mad ceramah ko khotbah dau momoros om mamajal dit ongoulun di noumpug sino. Ong itungon tokou do sera i hiza di Yesaya dino, aso katarangan do songira banal. Na sabap tu varo boros dau dot "nophonu-no i pomogunan do perak om amas" ka (ayat 7), a-milo-milo nga hiza di Yerobeam koduvo om i raja Usia sid Yahuda, kakali lumundu om ahatul it ekonomi sid duvo i karajaan dino. Sabap ensanan it ongoulun hinumarap sid business om i gama midadagang, nolingan-no dioti i Kinoringan om it atag o gama sumamba om sumambayang sid Kinoringan. Nengkod-no ioti kumavid di kosipan di naramit sid belantara. I netung dioti, sabap sid pomogunan dino ogumu o hasil om kohuntungan, ino dino, nga antad sid kuasa di pomogunan sino, ino-no i pinokokinoringan i retanko Baal, i kuasa di mangaranzat om manahak do kolunduo om it hasil sid ongotagad om ongotakabun dot anggul om zaitun om gandum-po, ka di netung dioti diri. Indosonko i kolunduo dino antad sid Baal, i mongimbulai do hasil om kouvaan om i ranzat vagu, dupot, pangazam om riniba. Dot ong otopot, inot ongorogon dino i retanko kuasa do pomogunan, bai pinokokinoringan di ginama di palad dot ulun (Zabur 96,5) iadko i sinapi-sapi diri di ginama di Harun sid belantara.(Kolobusan 32)

Na sid tinoguvangon dit piumpugan sid Yerusalim minta dua i Yesaya om manarang di karaatan di bansa dau. I bansa do Yahuda nokedu-no sid janji do Kinoringan sampai nakalabus-no antad sid nopili do Kinoringan. Iti-no o sabap do nakada-no ioti sid tinoguvangon do Kinoringan. Tu suvaiko it ulun dit iseso o ginavo humarap om sumokot sid kenginan do Kinoringan, om atag-ogi. Topot ioti dino mamakai di keloo do rogon om i gama momonorou om sid hojimat om i vaza humarap dit ongotokopizo, om mangasip di gama mongintutun.

Sabap ino, boros di Yesaya, sid gama dau minta dua aso-no gama mokisian ko mongontok-po dioti minta dua, gam mongonsug-no i nabi di Kinoringan mongohukum om manala sampai monuli di karaatan di bansa dau dino.

Mad mivozo di kolunduo om i gama tumatak sid tinoguvangon do Kinoringan. It ulun dit osinang-no mad olingan-no i Kinoringan. Ino iadino dino, mad pangalaman-no sid PCS, tu hiza dot garatan sumilam, tinumatap-no it ongoulun Kristian. Dot kodung osinang-no vagu, amu-no tantu agazo o ginavo sumambayang om monukung-po do gorija.

I hiza diri, hinumarap it ongoulun sid ongobarang di ginama dioti kondiri, patong om tiningulun om sapi-sapi, ko ikus om i vokon-po. Topot ong bianco, varo hal-hal dit mad sambaon dot ulun, tu agazo o ginavo sid barang dino sampai baik ino-po barang om hal dino o toudon om engat om harapan.

It ulun di mogidu antad sid tinoguvangon do Kinoringan, minsanko nanu-no iosido do wakil do Kinoringan sid tanga do vinangun (Kinotimpunan 1,28 om Zabur 8,6), sabap gima kenginan do riniba dot obebas iosido, nga kakali ajadi iosido dot uripon di dau do gagama, ino-no i pinokokinoringan iadko it ongorogon kodori, ko hal vokon di momogos om monguripon om momorinta dit ulun, di mad rogon vagu, i mokisisiin, ko mokihuhuntung, ko mokigagaral om mokingaran ko i nunu-nopo i gama mongumpug di kosukupu labaan mantadko miuma, iadko it ulun do paparazon. Na i Yesaya, nokodim do Kinoringan do ponuhu iosido, a-milo-milo nga mongontok do Kinoringan paratu do hukum do Kinoringan om palanta di sokoviai i karaatan di sid tanga di bansa dot Yahuda. Gam i Yesaya mongonsug-po do Kinoringan mongohukum di bansa dau. Ong varo dara gama dot ongoulun di moniag di nabi mumbongut do iadino, retanko "kakali i Kinoringan mangapad di bansa dau,ka, " tantu lobi-po i Yesaya posondot di rodus om hungot do Kinoringan sid bansa dau di nokotolikud om nolingan i sokoviai i kovosihan do Kinoringan. Iti-no o sabap dot i Yesaya monuhu dioti do sumusut sid ongolata do pampang om sid ongoluvang do tana, dot ino gama monuhu dino, bai gauk dau, sabap elaan-no di Yesaya dot aso tanganan sumusut, ong kosondot i hukum do Kinoringan (Zabur 139) Siombo-nopo it ulun, kakali sid tinoguvangon do Kinoringan. Aso tinangan di riniba sumusut antad sid vuos di Minamangun dau. I palad do Kinoringan om i longon dau kotivol sid surga om sid naraka.

2,12-17 om 5,15-16 It Adu di Tuhan. Sid a-ko piro ot ayat diti manarang i nabi Yesaya di korungazan di nunu-nopo o harapan do riniba. Mad borizu korikot i hungot om hukum do Kinoringan di mongohuzas om mongorongoi di nunu-nopo i ginama do riniba. It ongojati sid Libanon om it ongoindai di banalko apapag om atahan, nga ahaba-no kavi om ogugul-po i pomogunan. Minsanko it ongoburul, nga humuzas-no om it ongokuta om ongopomogunan om bandar, nga katana-no kavi. It ongokapal di mongoi om mangatod do kolunduo do pomogunan, nga tumogob-no. Iti kavi diti, nga tanda dot aso tanganan manangkis ko mangalai di hukum do Kinoringan. 18-21 Sid tanga di hukum dino koimbulai-no banal i kogunaan dit ongopinokokinoringan om ongoharapan dot ulun, tantu aso guna, aso harapan, asot ontok di nunu-nopo. Iti-no o sabap di hiza dot it ulun mogidu, tu tumiim mongiduan di hukum dino, pilazon dau it ongosinapi-sapi om tiningulun di retanko rogon om pinokokinoringan. Sabap ong ohukuman it ulun, ababak-no ko orungoi-no kavi i harapan dau.

22 Insanpo dino i nabi, ko it ulun di minongumpug dit ongoboros di nabi Yesaya do mad mongonsi di bahanda dino, ino-no mongonsug iosido di piumpugan dot amu olingan dot siongo antad i koposizan om kopudan dau, ino-no antad sid pinuhobo do Kinoringan, aso harapan om aso kopudan om koposizan vokon, ka. Baiko iso-no o harapan do riniba.

5,1-7: I longoi di kabun dot anggul.

I nabi Yesaya moniim om mamakai di tasantanid-tanid o vaza poromot sid razat do Yahuda di boros om kovosihan do Kinoringan. Hiza do poginakanan sid ongodundung. Tu kodung opongo-no mongomot om mongotu di kouvaan dot anggul om zaitun, varo-no kamatan dioti di iadino o vaza mongohormat, sid saralom do songminggu, amu mintoron it ulun sid ongovalai, inoi nga mingodop sid ongodundung sid ongokabun dot anggul, tu sino varo gama rumamai sid pogina-kanan dino. Ino poginakanan dino mongohondom di hiza di sid belantara it ongoulun dot Israel do bai dundung ot intoronon dioti, om iri-ogi mongohormat di kamatan, tu varo kouvaan antad sid tana do Kana. Manjadi a-milo-milo, ong hiza di poginakanan dino banalko aramai it ongoulun, karasa ioti dit anggul di kakali rumidi sampai banalko osiou, okonko oholian-no. Topot tigogi, sid tanga dit umpug do karamazan dioti dino, poingkakat di nabi, sampai momoros okonko rontob iadko i koubasan dau di baiko mongolombus di sana do Kinoringan, naku. Tu i gama dau sid tanga dioti, mad ogimporou, do mad longoi di minisavo ko miginavo o buatan. Kiroon dot ulun, kaluto ong minsanko i nabi nga nokenum-no sampai avuk-no. Mindolongoi-no iosido iadko longoi do minagat. I wakil di manansavo mangahatul di sokoviai i gama mihabal sid ongkob om varis dit ondu. Iosido, ong sid ulun Yahuda o bantaran mangahatul di mogontong om i gama tuminong. Sabap ino, kodung tumimpun i Yesaya mindolongoi, banalko mongining it ongoulun di longoi dau. Tiining ioti do nunu o panangan di longoi dau dino. Kagi, oubas-no laid ioti dot sid ongolongoi di iadino, vokon-no ong retanko i kabun dot anggul o ponuribanan di sovoon. Mongining ioti do nunu o pasandatan di longoi dau dino.

Dot tumimpuuni, baiko i kabun o boroson. Monuturan do kuran o gama dau do monodia di kosukupu di kabun dau dot anggur kavi o gama monodia om mamakal sampai mongumpai di gama mananom om manaud di kabun dino. I nunu-nopo it atag, ginama-no kavi dau, mongumpug dit ongovatu, manangkul sampai olomi i tana, mananom-po dot anggul dit pilion, inansal-no, supaya amu aladtakan dot ongokarabau om varo-po rorizn do valai, tu pongizanan di pakakas om pomuhavan di kabun sampai varo-po pamagaan di niudsul sid pampang. Narangkap-no kavi dara. Baiko iso-po o gamaon di sanganu, ino-no mongotu-po dit uva, dot kotu-kotuo it uva dino dot opoit om onsom, okonko avantang ko omis, ka di tuturan di longoi dino.

Ong i kakali minindolongoi i nabi di iadino, kakali it ongoulun do baiko i sovoon ot itungon om kiroon sampai mad tiirak-no ioti, tu notipu-no i rinumait di banalko avantang o gama dit ondu guminavo, varo-no ong mad momozo-bozo di rinumait. Varo-no ong pokulau om pokolovong di mirait, tu amu elo iosido momili dot ondu dit atarang om kibahazan. Do kakali ioti songitung-itung do iadino, tigogi, nituvad-no di momongo i nabi i longoi dau do mad kondiri-no manansavo o monuturan om manarang sampai mongingut dit ulun di noumpug sino, supaya ioti-no o sasi dau om mongohukum-no iosido di sovoon dau dit banalko amu atag o vaza guminavo. Gam mongingut-no iosido dioti sid Yerusalim om i bansa dot Yahuda do jumadi do hakim. (5) Atalahas-no kagi dot okonko i sanganu do kabun o kisala sid hal dino, inoi nga i kabun o kisala. Na minotos-no dati it ongoulun sino dino, tu varo kogolivong dioti dino. Ong i mula-mula, indoson dioti ong tanid o gama di Yesaya ong bianco, dot tigogi, mad varo-no vagu hal di manarang iosido dit amu kopionong sid pesta kamatan om sid karamazan dioti dino. Amu-no minumbongut dioti. Iti-no o sabap dot i nabi nga nituvad-no vagu i boros kananganko i tuturan di kabun dino, ino-no, Amu-no banal monguva dot avantang it anggul dino, pengkaa dino o gama dau sid kabun dino, edu-no it ansal dit ongoanggul. Pingrobutan-no. Isai-nopo it engin, kadapat-no sumuvang om mangaladtak di tana dino. Ong engin managad dit anggul, tu kolohon, ombo-ko it ulun, tu ino't anggul dino amu-no toudon. Aso mangatag ko mongoluvus dit ongoraan om roun. Iri-ogi i rungkopi om rugi nga sumuni om sumurut sampai humubang i kabun dino do bai govuton-po om izonon-po do ongodupot, ka. Gam, sampai siti mad kotigog it ulun, minsanko i bolobou, nga amu-no posondoton-po, darun-po-ka sid kabun dino. Mongitung-no ioti dot isai o kadapat mangahatul dit ongomituvong dot amu-no dumarun, ong okonko Kinoringan. Na sid gama mioboros di iadino, minsomok i Yesaya sid ongoulun di kakali aramai sid poginakanan do kamatan sid hukum do Kinoringan. Posondot banal i Yesaya dot isai-no banal o binoros dau. I kabun diti, ino-no i bansa dot Israel om i bansa do Yahuda, tu ioti-no i kabun di sinamadan do Kinoringan, ka.

Amu osusa tokou manarang di sokoviai i gama sid kabun dino. Bai iti-no ot onsi di longoi dino, i bansa dot Israel iadko sovoon di banalko oguvail om akahag om akanggau. Na banalko orongod i gama di Yesaya pogili ombo it inudan do Kinoringan, ino-no katatapo om kabanaran, topot i timpa dot Israel om Yahuda, baiko karaatan om korumaato, minud iosido dot avantang o gama, nga bai kogulou dit ongoulun di momogos om pogoson. Na nigili-no di Yesaya i boros do Kinoringan sid dioti dino sampai alanta-no kavi i kovosihan om kenginan do Kinoringan. Noboros-po i iadino, nompus-no i longoi dau. It ongoulun di noumpug sino osusa monodiri om humarati di gama di nabi mindolongoi om mamabut. Aso boros di nabi dot osuhul ong muli-no vagu ioti sid Kinoringan, ko boros vokon. Ioti-no kondiri ot osusa mongitung dit ombo it apatut o gama tumimpa om tumorima di hukum dino.

Banalko avantang o gama di nabi poromut sid bansa dau di samod do Kinoringan om i kobangahan di bansa dau. Kagi, it ongoulun di nokening di longoi dino, amu monimban do ginavo, gam kumodou banal sampai moguhang-po do Kinoringan. Topot ino longoi dino kakali manarang di kogosoo di samod om tunda do Kinoringan sid bansa dau, minud i Kinoringan, supaya i bansa dau tumimpa om kumavid di kovosihan om barakat do Kinoringan. (Mat. 5,20; Rom 12,1; Gal. 5,13; 2. Kor. 5,10; Fil, 4,8) Ong amu sumuhut i bansa di pinili do Kinoringan sid kenginan do Kinoringan, anangan-o ioti di hukum. Na i Yesus minamakai di longoi dino iadko suriban di sid Markus 12,1-9.

I hopod om duvo it ongonabi sid Kitab Laid

It ongonabi, ulun ioti di momoros om mamahanda sid tanga dot umpug, okonko ulun di monurat. I boros kotumpos sid tolingo dot ongoulun o tomodon dioti, supaya it ongoulun dit orikatan di boros dino, otobok i ginavo dau, sampai ohorotizan dot i boros dino okonko kenginan di nabi kondiri momoros, inoi nga boros om bahanda antad sid Kinoringan do hiza-no ka dino ko rumikot-ogi. Atalahas-no sid ongoulun dot i nabi okonko mapak-papak moroboros o tomodon, inoi nga suhu di Sundu do Kinoringan sampai iadko iosido do Kinoringan. Kodung nakalabpu-no sid kabang di nabi i hukuman om kovosihan do Kinoringan, tantu kembulai-no i kovosihan om hukuman dino. Sabap ino, ino boros om tudukan om bahanda dit ongonabi kopitombil sid hiza dioti diri sampai pelo di tokou do kuran-nopo i hiza diri om i kavazao do pomogunan om ongoulun, sampai kuran di palad do Kinoringan lumintanga sid hiza diri do monimban di hoturan do pomogunan om i piumpugan dit ongoulun di mangasip sid Kinoringan.

I boros do nabi di nokosurat-no sid buuk sampai najadi-no do buuk, varo panangan dot otopot di tasantanid-tanid o kogunaan. Suvai kaharati tokou di tomodon di buuk dino, ong toguvangon tokou it toriso-iso o buuk dino (Imatai sid Yesaya 8,1 om 16; Yeremia 36). Ong otopot, okudik ot elaan tokou ong antad-no sid ongonabi kondiri. Tu kasarakai-no do baiko ko antad sid ongokoruhang ko ponulung di nabi o kinadapatan tokou mamasa om mongining om mongintutun sampai mongilelo dit ongotudukan om bahanda dit ongonabi. Ikid buuk do nabi, varo-po usuran di kinembulazan om vaza di kakali apakai i buuk diri do sampai bianco. Iti-no o sabap dot suvai okohorotizan, ong toguvangon it ipat-ipat i buuk do nabi dino.

Sabap i kodori diri aso-pot elaan dot ongoulun di vaza mangagama dot ongobuuk iadko iti bianco, tu varo 100 sampai labaan saribu nalad. Sid ongolinundunan di kodori diri, okonko nensanan i Kitab. Ikid bahagi di Kitab Laid, baiko toriso-iso o linundunan. Varot iso o linundunan di retanko "i hopod om duvo it ongonabi", ka. I kinoumpugan dit ongoboros di sampai hopod om duvo o nabi, suvai sid tohudi-no banal om najadi-ogi. Ong kinotimpunani, tasambahagi-hagi o buuk dot ongopopodok o kinosurato do nokembulai om napakai sid ongopiumpugan. Alaid-po diri, varo-not ongoulun do pinopiamung dit ongobuuk dit ongonabi di nisurat sid ongolundunan dino do tinonggunun-no sid iso o linundunan. Na i linundunan dino miabal-no kanaru dit iso lundunan di buuk di nabi Yesaya, Yeremia om Yehezkiel (ong i lundunan di Yesaya, 7.14 Meter o konoruvo, ino-no i nahajangan di nisuvang sid dapu om nisusut-no sid luvang do burul sid osomok sid Rahat Nakada, dot ino linundunan dino kopihiza di Tuhan Yesus o kinosuratan). Sabap, tu it ongobahanda di hopod om duvo o nabi o noumpug sid linundunan dino, i retanko i bahagi di Kitab Laid dino dot, Iti-no i buuk di hopod om duvo i nabi, ka.

Amu elaan tokou i sabap di kinopioomungan dit ongoboros dit ongonabi dino tanid mantadko i kiroon tokou dot lobipo oruhai mamakai dit ongoboros dioti dino, ong oumug sid iso o linundunan. Amu elaan tokou dot kodung varo mongumpug, nga nensan-insan-no ka sokovia i it ongoboros dit ongonabi ko nokopitotohudi-hudi popiaamung it a-ko piro i boros do nabi do suvaiko alaid om najadi-ogi do buuk dino iadko ino bianco. I kiro dit ongoulun dit ongoelo mongintutun dit ongosurat kodori dino, okonko impiro-piro do varot ulun do pinopiaamung om pinembulai di linundunan dit ongoboros do nabi dot alaid-no, om nokopiamung-no i sokovia i hopod om duvo i nabi dino. I kiroon dioti di iadino antad di vaza popisuhut dit ongonabi dino.

Ong sid solinan sid Boros Yunani i retanko Septuaginta (buuk dit turu nopod solinan), varo pitonidan di vaza popiamung. Ong sid Kitab dot Yunani, ino-no, Hosea, Amos, Mikha, Yoel, Obaya, Yunus. Ino vaza popiamung sinumuhut di konoruvo dit toriso-iso o surat sampai i tangon di Yunus, nga sid kompusan-no di buuk diri. I hiza di nahatul-no i solinan dino, amu-po otontuan i vaza popiamung om popisuhut dit ongonabi. Ong sid Kitab Ibrani, varo hoturan di minongitung dot ombo i nabi do nokogulu mantadko i vokon. Iti-no o sabap dot i nabi Yunus sid gulu di Mikha om it ongonabi di suvai nokembulai ong nokouli-no antad sid Babil di narakop, ino-no i Hagai, Zakaria om Maleaki, do sid kinompusan-no di buuk dino. Ong varo iso hal di nokembulai om nabahanda sid duvo o nabi, ino-no ot ohorotizan dit ongoulun di minongumpug, i duvo o nabi kopivozo, iadko i Yoel om i Amos. Sabap i boros sid Yoel 4,16.. varo-no sid Amos 1,2 ko it ongobutu di mad hukuman do Kinoringan sid Yoel 1, nga varo-no sid Amos 1,1.. ko i gama moniag di harapan sid Adau di Tuhan, nga varo-no sid Yoel 3 om Amos 5,18. Pengkaa dino, i Obaya o minoniag di harapan sid Adau di Tuhan. Iti-no o sabap dot i Obaya

sinumusuhut di nabi Amos sid Buuk dit hopod om duvo i nabi. Varo-po dati pongitungan dot osuhul ong it ongosurat dit anaru poguluvon. Minsanko i kogumuai dit ongonabi, ino-no hopod om duvo, nga varo harati om varo tomodon. Sabap ong mamasa dit usuran di bansa dot Israel, varo-pot ongonabi vokon di minamahanda di bansa dot Israel om Yahuda, nga a-no nakatandon i boros dioti sid Kitab tanid mantadko i nokosiat i tuturan om tinomod dioti sid usuran i di Samuel om Raja.

Na i vaza posurat di boros do nabi sid Kitab, suvai najadi-no i nunu-nopo i nakabahanda di nabi diri. Suvai nokosunu-no i hukuman do Kinoringan, darun, ka, ko butu ko rumpak om sangod, iri-ogi om minongohondom it ongoulun di boros di nabi diri sampai minongitung dot atag do kosurat, supaya amu olingan om ajadi do bahanda-no vagu bahagi di hiza om it ongoulun di sid tohudi. Iadko i Amos, kurozon do monurat dot i boros dau dino do duvo toun guluko i noguzu-no i pomogunan, ong amu-po noguzu i pomogunan. Suvai notoliban-no it oguzu o pomogunan om kadapat-ogi pentahan di sera i kinembulazan di boros di Amos. Sabap it ulun kodori diri amu-po minamakai do toun om kalendar. Topot ong varo hal dot agazo sid pomogunan, ino-no ot onuvon do pangahandaman do sera o kinojodizan. (Ong it ulun sid Pilipin amu oruhai olingan i kinolumapakan di gunung berapi Pinatubo di Disember 1991, tu rinibuvan ot ulun napatai di tinizas do burul diri. Minsanko sid Sabah, minurak ot ongokazu antad sid lisovu di Pinatubo.) Ino-no i kiroon, it ongosurat om boros dit ongonabi di minamahanda hiza dot amu-po narakop i bansa dot Israel om Yahuda, na inumpug-no om napakai-no i hiza di sid uririponon-no, tu it ongoulun minongo-hondom do kuran i boros dit ongonabi di minoniag om minamahanda, it a-sinuhut dit ongoulun i boros do Kinoringan dit antad sid kabang dit ongonabi. Kagi it ongoboros dit ongonabi di minanantu do kakali varo-po kovosihan om kopongumbosihan do Kinoringan di bansa dau, supaya amu atanus ioti, ino boros dino minongonsug dit ongoulun di nongorakop sid Babil do humarap di koulisan sid Yahuda om i kengkakatan vagu di bansa dau.

I kinapangaan di kinopongumpugan di 12 it ongonabi notontuan-no sid Buuk di Yesus Sirak, ino-no buuk dit a-nakamung sid Kitab Laid, tu sid Sirak 49,10 varo boros dot i hopod om duvo it ongonabi sumusuhut di nabi Yesaya, Yeremia om Yehezkiel sid Kitab Laid. Ino-no o harati, i kinapangaan di kinopongumpugan di hopod om duvo i nabi ontok di TGM 200.

Ong iadino, ino Buuk di 12 it ongonabi mad noumpug i vaza dit ongonabi mamahanda sid saralom do lima natus toun momoros sid bansa dot Israel om Yahudi do poromot sid dioti di boros om pajal om kentalangan do Kinoringan. Kagi ioti dino o sasi di pomomos om pokosog dit ongoulun di hiza dioti diri om sasi do kuran i hiza diri, ino-no i bansa dot Israel nakatanga sid ongobansa vokon do natarik-no sid ongokaranggalan o tomodon. Na ino boros diri di ponong sid hiza om razat, kakali kiguna sid di tokou sampai biano, tu sid boros diri di minongolombus di kenginan do Kinoringan kaharati tokou-no do kuran i Kinoringan minangahatul dit ongoulun kodori sampai kakali agazo o ginavo dau mangatag ombo it amu atag om mongumbasih di nunu-nopo ot osusa om it orukung-no. Kiguna i boros dit ongonabi diri bahagi di tokou, supaya varo kemumuzan tokou sid kenginan om kovosihan do Kinoringan.

I NABI HOSEA

1. I hiza di nabi Hosea. I Hosea nabi do varo surat antad sid Israel Utara. Iosido dino nokohiza di raja Yerobeam II (787-746 TGM), ino-no it agazo o karajaan, om i nabi Amos it antad sid Tekoa, ino kampong sid karajaan do Yahuda ko Israel Selatan. I Hosea nakasasi-no di kinapatazan di raja Yehu om i dau do turunan (1,4) om i kinapamatazan di Zakaria, it anak di Yerobeam (746) om i kodurhakaan sid Israel sid saralom dit a-ko piro toun. Varot a-ko piro o raja mulong mamatai om narahaan i sompomogunan. Ino hiza diri hiza di karajaan dot Asur, i raja dau i Tiglatpileser III (745-727) di pinosurut di volit dau ponong sid Selatan sampai minonusa om minomorinta dot Israel. I raja Menahem sid Israel Utara (746-737 TGM) nagaratan di toun 738 do sumako iosido sid Assur. Ino kinohogutan sid Assur mimbulai sid Hosea 5,13; 7,11; 8,9; 10,5; 12,2. Pengkaa dino mongohondom i Hosea do kuran it ongobansa do Sur, i Aram om Israel tinumiim mikunsi sumaap di karajaan dot Assur sampai minongorumpak-po ioti di karajaan do Yahuda (734 TGM) sid rumpak di retanko i rumpak do Sur-Efraim (Hosea 5,8-6,6). Ino hiza diri minongodim i raja do Yahuda Ahas di raja dot Assur sampai nosopulan-no i Yerusalim antad sid kuasa do Aram om Israel (734). Iri-ogi norumpakan-no sampai

notori-no om nohuzas-no i kuta do Damshek, ino-no it ibu Kota do Sur (732). Pengkaa dino nempadakan-no i karajaan dot Israel Utara, tu nohinaan i daerah do Galil om i sid tupak do Yarden. Bai i koburulan-po do Samaria om i Ibu Kota Samaria o nobi. Topot nokosuvang-no ioti sid kuasa dot Assur sampai sumakoi-no sid Assur. I raja sid kopupusan di karajaan dot Israel Utara, ino-no i Hosea, pinempatai di Tiglatpilesar III do sumamba sid raja dot Assur. Napatai-no i Tiglatpilesar, varo-not onsug di karajaan do Masir do pokodou di raja Hosea sampai nengkod-no iosido do monukoi sukoi sid Assur. Topot i gumanti di Tiglatpilesar, ino-no i Salmanaser V (727-722) minonori-no vagu di bansa dot Israel sampai minanangkap om minamatai di Hosea (724 TGM). Bai i ibu Kota-po do Samaria nokogoos do tolu toun tumahan dit ongo-sojal dot Assur. Suvai i gumanti di Salmanaser, ino-no i Sargon (722-705) o minonoruvang di Samaria sampai minongohuzas di kuta dino (721 TGM).Iti nahahajangan di bansa dot Israel diti nososizan-no kavi di nabi Hosea. Topot sid sokoviai i ongoboros dino, songlinsou o boros nga aso kananganko ino kinorungazan di bandar om kuta do Samaria. Iti-no o sabap, dot asot elaan tokou dot i hiza diri kakali i Hosea ko kuran. Bai iti-no ot elaan tokou, i nabi Hosea nabi di minamahanda sid saralom dot ongoduvo nopod om limo tinounan (750-725).

2. Isai-ka i nabi Hosea?

Bai i ngaran dit Ama di Hosea ot otontuan-no om i kobuatano di savo om i tolu it anganak dau notuturan-no sid f. 1 om 3. Ong hal vokon, aso nokotuturanan. Asarok i Kitab do bai manarang di gama do nabi, okonko i kobuatano di mad pribadi. I Kinoringan mamakai di Hosea om i savo om it anganak dau do pakakas do nabi iosido do Kinoringan. Ombo-nopo kobuatano dioti di kiharati sid bahanda om pajal di nabi, ino-no o nokembulai. Aso vokon. Sabap ino baiko sid boros di nabi o kentutun tokou di kavazao di Hosea. Varo mangalu-kalu dot i Hosea dino, anak dot imam ko ulun di nakamung sid rombongan do nabi. Topot amu atantu ino. Isuhut di vaza dau mamakai dit ongo-pongoretan, ulun iosido di nokosikul. Miabal di nabi Yeremia banalko omomos om avanus i Hosea sampai kiginavo dit elo momurimon dit ongokosusaan om kapagasan dot ulun. I nahahajangan dau di kisavo iosido o minonuduk dau di kogo-zoo di samod do Kinoringan om i karaato di kasalaan dot ulun. Ino pangalaman dau dino minamakai iosido sid tudukan om i gama dau pabahanda di boros do Kinoringan poromot sid razat dot Israel.

I kongkod di Habal dau dino, ino-no i kogo-zoo di samod do Kinoringan dit aso rontob (2,21; 3,1; 9,15; 11,1; 14,5) Ino samod do Kinoringan diri minongoi di bansa dot Israel antad sid Masir (11) do iadko vaza do molohing mongoi dit anak dau. Ino samod dino amu pinigandang. Sabap ino ohukuman dot araat do monuli di karaatan, topot kakali mongonsug om polombus di vaza manamod iadko i kavazao di minisavo (F.2) Iti-no o sabap do mokitimpa i Kinoringan dit ongoulun om i bansa dau do monuli di samod do Kinoringan, dot ino samod suvai antad sid korolomo do ginavo (4,1 om 6,6).

Sabap i nabi Hosea nakaharati-no di kogo-zoo i samod do Kinoringan sid bansa dau, notolunungan-no dau i kavazao di bansa dot Israel di nakahagut sid politik dit ongobansa vokon. Manarang i Hosea do kuran i bansa dot Israel di nakagavul-no sid ugama di pasok sid Kana, ino-no i vaza sumamba sid Baal om i vaza dit ugama mokipapasi, retanko i Baal iadko banggala di ohizau om elo paranzat dit ulun do musurupu. Ino vaza dot Israel mokipapasi do iadino, nisuntu di Hosea sid kaagazan om koluzungan sid sundal. Nemot-no dau dot i karajaan dot Israel nakalandu-no, tu amu nahatul i hoturan sid bansa kondiri om mad noboludan-po di hoturan dit ongobansa vokon. Iti kavi-avi diti, kasalaan-no di bansa dot Israel di nokembulai-no laid sid angaki, ka (F. 12) Iti-no o sabap, do bai iso-po o vazaan gumuli sid Kinoringan, ino-no, miguli sid belantara om mongimbulit-no vagu di ralan sumuhut di hoturan om kenginan do Kinoringan. Tu i hiza di sid belantara, kakali nokosuhut i bansa do Kinoringan, ka. Iri-ogi om sopulan di Kinoringan i bansa di nokoguli om nokopokiada-no di kasalaan om karaatan dau. Sabap i kovosihan do Kinoringan kakali manahak di samod dau dit aso katalib, antad sid kosusian do Kinoringan ponong sid kosibako do riniba.

3. I Buuk di nabi Hosea.

Na i gama di nabi Hosea mamahanda sid umpug dot ulun, asarok do bai onibak o pamarasan di mad bahul om suriban om sundait. Topot amu osodiri dot i sokoviai i nokosuvang sid Buuk Hosea, nga

noboros-no sid ongoulun ko varo-po do rontob nokosurat. A-ko piro ot ongoboros do mad moboro-boros do Kinoringan om i nabi. Inot ongoboros dino bai nokoromut dati sid opodok ot umpug dot ulun. Na varo duvo bahagi i buuk dino, ino-no F. 1-3, ino-no i nahahajangan di nabi sid ongekob dau di notuturanan, isuhut dot usuran do nabi. Iri-ogi i F. 4-14, ino-no i pongumpugan dit ongopamarasan dit amu osodiri om amu enumpakan. Bai f. 3 antad sid palad di nabi, tu mongusul iosido dot i boros dau dot, ioku, ka. I F. 1 monuturan di kinosinaan om pinungaranan it anganak di Hosea, retanko, ialo ko iosido, ka (1,3-9) do varo-no laid panarangan ong i kinasasavaan dau. Om it ongopamarasan sid F. 2, nga inumpug dot ulun kananganko i vaza do Kinoringan mongohukum om mongumbasih.

Sid bahagi koduvo varot ongoboros do mamajal om mongindorosi, gima nokedu-no i bansa dot Israel antad sid Kinoringan om minamung-no sid ugama di pasok do Kana. Pengkaa dino varo pajal om indorosi di karaatan di raja om i vaza dau momolitik. Ong sid Buuk Hosea amu oubas do pentahan-po laid dot, Iti-no o boros do Kinoringan, ka, ko Iadino o boros di Tuhan, ka. Iti-no o sabap dot amu oruhai monodiri om manantu do siombo pinonimpuunan om pinamangaan dit iso o pinamarasan. Varo a-ko piro ot ongosurat dit aso tinganan mongintutun sampai a-kadapat mangaharati. Iti-no o sabap do tasantanid-tanid o vaza dit ongoelo manarang om mangalu-kalu di harati dino. Kagi, sabap oduruk-no om atanus-no i karajaan dot Israel, amu-no atantu i vaza dot ongoulun mongontupat di surat dino, tu okonko i bansa do Yahuda o tomodon om panangan ko rikoton. Minsanko iadino, kakali ino buuk dino kososizan kananganko i kogo zoo di samod do Kinoringan dit amu engkod mongodim om mongonsug om pemumui di bansa dau.

Fasal 1: I vaza di Hosea manansavo om it anganak dau

I F. 1-3 nga nosompuru-no manarang i kobuatano dit ongekob di Hosea do posuntuan di tugas om bahanda di nabi. I pangalaman di nabi noumpug-no sino dot it tuturan dino, okonko iso-no o tuturan om okonko insan-insan tuturano. Bai sid tohudi-no varo-ogit ulun di popiamung dit ongotuturan bahagi dino, tu iseso o panangan om tajuk. Iadko noboros sid savat, i F. 1 tuturan dit usul di nabi dit antad sid kabang dot ulun vokon, iri-ogi f. 2 it ongobahanda di nabi om iri-ogi F. 3 kondiri di Hosea mongusul di pangalaman dau.

I ayat keso mad tajuk di Buuk Hosea di manarang di kolohingo di Hosea om i hiza om koledo di nabi iosido. Minangarait i bai iso o raja dot Israel Utara, ino-no i Yerobeam. Topot antad sid karajaan do Yahuda (Israel Selatan) nangarait-no i sokoviaia it ongoraja, ino-no i Usia, Yotam, Ahas om Hiskia. Kagi it ongoraja do Yahuda nokogulu noretan. Manjadi suvai ulun do Yahudi om kadapat-ogi mangarait dit ongongaran dit ongoraja do Yahuda (imatai sid Yesaya 1,1) antawa ulun do Yahudi o minomongo mongumpug di buuk dino. I raja Yerobeam kopihiza di raja Usia. Kaluto ong a-narait it ongoraja di sinumuhut di Yerobeam, tu ioti kavi ulun di minonolod di karajaan sampai minipapatai-patai ioti dino.

Iti-no it imuhunan i nitahak di Tuhan:, ino boros dino sumuhut di koubasan dit ongonabi vokon, tu manarang om manantu dot ombo i noboros, antad kavi sid Kinoringan. Elaan-no dit ulun i minonurat dot ino boros di nabi okonko bai boros di dang riniba, inoi nga bahanda om hukum do Kinoringan. Sabap ino, oguna-no i Buuk di Nabi do boros do Kinoringan ko Kitab.

Ayat 2: varo-no vagu tajuk bahagi di F. 1: *It insan-ogi pomoros.* sid di Hosea. Aso boros sino do sera om kuran i Kinoringan minongodim di Hosea do pajadi dau do nabi. Turus varo suhu do manansavo. Ino-no o suhu, it ongongaran dit anganak dioti jumadi do bahanda sid bansa dot Israel. Manjadi i tuturan dino dit okonko boros sid umpug dot ulun manarang di kopisavaan om kinousuvan om pomungaranan dit anganak dau.

Onibak i gama mongusul dino pangalaman di Hosea. Ombo i kiharati kananganko i boros do Kinoringan, ino-no ot tinuturan. Ombo it amu osusa om aso harati, inalazan-no. Okonko i kavazao di Hosea o tinomod di tuturan dino, inoi nga i panangan do Kinoringan mamakai di Hosea do suntuan di habal. Kinoringan minonuhu di Hosea do manansavo do sundal om maganak dot it anganak dioti kolu dit idi dioti.

Na asarok sid ongonabi ong varo gama posuntu do hal, ino hal dino kobuatano di hiza di rumikot. Topot siti, ino kobuatano dit ongekob di Hosea posuntu di kobuatano di bansa dot Israel di hiza di nakatalib om sampai i hiza diri, ino-no i kolonduan di gumavul sid ugama di Baal. Vokon-no o panarangan dot ulun

di momoros dot ino tuturan dino bai tangon. Amu otopotko nokopisavo di Hosea, ka. Topot sid tuturan atarang i panarangan, ino-no, i nengkod it anak koduvo sumusu,ka (8), ko i ngaran dit ondu (3) om i buru, ka (3,2). Notuturan-no kavi i kogumuo di buru, hiza di minihukum.

I hiza diri, asarok varot ongondou dot inanu, jumadi do sundal sid panambayangan di Baal, retanko, it ongokusai di rumompit dit ondu dino manganu do barakat di Baal sampai maganak om abarakatan ioti sid kabun om tagad dau. Na i horogo do mamakai di sundal, dang panambayangan om bobolizan. Vokon-no inot ongondou dino ong bai ginaratan, okonko antad sid kenginan dau kondiri do gumama sid panambayangan do Baal. I molohing dot ondu nakajanji laid sid Baal do mokipasi dot isamba it anak dau sid Baal.

Manjadi antad sid ayat 3 sampai 9 aso boros vagu do sumundal it ondu dino om aso boros dot it anganak nga sumusui dit idi dau. Ino gama posuntu di kobuatano di bansa dot Israel ponong sid Kinoringan mimbulai sid ongekob di Hosea. Okonko rontob manarang i Hosea di kineduan di bansa dot Israel sid tinoguvangon do Kinoringan, inoi nga it ongekob di Hosea mad suntuan dino kineduan dino. Pengkaa dino it ongongaran dit anganak.

Sid nabi Yesaya kiharati it ongongaran dit anganak dau (Yesaya 7,3 om 8,3). Asot ongongaran do iadino sid razat dot Israel. Iti-no o sabap do mongining om mongoduat sampai monginsosok banal it ongoulun do nokokuro, tu iadino o gama momungaran dit anganak dau.

Ingaran di kotuaan, Yizreel, ino-no i ngaran di bandar sid tupak do Yarden, Sid bandar dino nohukuman di Isebel i Nabot (1. Raja 21) om iri-ogi osulian-po i raja Ahab om i Isebel di sompi napatai sino di Yehu (1. Raja 21,21 om 2. Raja 9). Ino ngaran popuhondom di vaza di Yehu mamatai om mongodurhaka sid karajaan dot Israel. I Yehu diri antad sid suhu di nabi Elisa i minongohukum dit araat o raja. Topot i Hosea manarang dot minsanko i Yehu, tu pakakas do Kinoringan di minongohukum di karaatan di raja, nga kakali anangan do hukum, tu nakalandu iosido om nokopongimbulai do karaatan vokon. ino-no i vaza di Yehu mamatai di raja Ahab diri, oholian-no, tu tinumalib dit atag o gama ponong sid riniba. Na sinod konopuan do Yizreel ogumu it ongorumpak nokembulai om nokompus-no. Ong sid di Hosea, ino ngaran di bandar dino tanda di kasalaan om karanggalan di bansa dot Israel. I hukuman diri om i hukuman di rumikot, sino-nod Yizreel o tempat di kosunuan dino.

Iri-ogi i ngaran koduvo, It amu asamadan. Ino ngaran dino manarang dot minsanko ahatul i gama do Kinoringan manamod di bansa dau, kakali minogidu ioti. Iti-no o sabap oputut-no i karaving do samod om kovosihan do Kinoringan, ka. Ong i ngaran di kotuaan manarang di sala dit bansa dot Israel, i ngaran di koduvo manantu dot i gama do Kinoringan ponong sid bansa dau, varo rontob om varo kengkadan. Inot ayat 6b apagon, tu varo natagak i pongoretan "amu" ko "aso-no", ino-no, amu-no alaid om aso-no samod-ku sid bansa dot Israel. Sid ayat dino, amu atarang i surat antad di kodori.

Ino ayat koturu, ayat do kogolivong. Nunu o harati dino janji sid bansa do Yahuda ong okonko ulun do Yahuda o minongumpug dit ongoayat om tuturan dino di pamung sid ayat dino, tu ka di pongitungan dau, Ino lulupu do Kinoringan bai sid Israel ot panangan, okonko sid bansa do Yahudi, ka. I minonurat do iadino, andaman dati dau i kinapangan di rumpak di toun 701 TGM sid Yerusalim di norungoi-no i tentera dot Assur.

Iri-ogi it anak kotolu, kusai-no vagu hiza di nengkod-no sumusu it ondu. Na i ngaran dot, Okonko bansa-ku, mad pahali banal di hukuman do Kinoringan di mimbulai sid ngaran dit anak di Hosea. Noputut-no i janji om taruk sid pialatan do Kinoringan om i bansa dau (iadko i Yeremia 31,33) Iku dino okonko bansa-ku om ioku diti okonko Kinoringan dikou, ka di harati dino. Sid ngaran dino nokosondot banal i hukuman do Kinoringan. Iti-no i bahanda di Hosea i hiza di nokotimpun iosido do nabi ponong sid bansa dot Israel. Sid boros dino aso kopurimanan do varo-po kovosihan om harapan. Natandas-no do hukum om kobinasaan o habal di Hosea dino.

F.2: I Kinoringan mongolokud di ginavo dot Israel dit a-koturut, om monodia iosido di ralan do kosopulan.

Iti fasal ko-2 diti mad a-kopisuput di fasal keso om okonko iseso o panangan, inoi nga mad pongumpugan dit a-ko piro ot ongotudukan om boros di nabi. Banal-no inot ongobahanda di nabi

polombus di panarangan di hukum di nitarang-no sid fasal 1 om pemot do kakali varo ralan ponong sid katagan, isuhut di tuturan sid fasal 3. Sabap ino iti fasal mad bantaran antad di fasal 1 moput di fasal 3.

Varo apat bahagi, ino-no, 2-13, 14-17, 18-20, 21-25. Varo boros di manarang do varo hal vagu (2 om 14: boros di Tuhan, ka, om 18 om 21: Hiza dino,ka). Okonko i Hosea o pinopiamung dit ongoboros dino, sampai i kembulazan dit ongobahanda dino sinumusui di pangalaman sid fasal 3.

2-25 Itit ongobahanda diti manarang dit a-ko piro i liang ponong sid kosopulan di bansa dot Israel. 2-13 kakali manarang do luluhung i hukuman do Kinoringan. 14-17 manarang do kuran i Kinoringan moniim do pemumui vagu di bansa dot Israel. 18-25 manarang-po di janji om taruk vagu om mamahanda-po di kosopulan di bansa dot Israel. 2-13 Iti anganak, ka, nga it ongorurungan di bansa dot Israel ot boroson sino. I boros dino monodiri dit anganak om it idi, ko i rurungan om it ensanan it Israel. Kinoringan mongonsug dit ongoulun dot Israel do mihukum di bansa dau. Antad sid Kinoringan nokembulai i kopioduhan sid tanga di bansa dot Israel kananganko i gama sumuhut sid Kinoringan om tumatap sid dau, ko mogidu sid kabanaran do Kinoringan. Ino pioduhan om pigogogutan sid tanga do bansa mad vaza di hukuman do Kinoringan. Na i Hosea manarang di janji do Kinoringan sid bansa dau sid gama misavo. Ino janji dino di mad minisavo miada-no, tu i bansa dot Israel minogidu sid tinoguvangon om hoturan do Kinoringan. Topot kakali i Kinoringan amu mangakun, gam mongimuhun dot it anganak mongogorot do mingkod-no sumundal it idi. Varo harapan antad sid Kinoringan do varo katagan. Ong aso, mongindorosi i Kinoringan do hukuman, iadko i sundal dit nohukuman do labason om ikogos sid origi sid tanga do kampong, supaya ensanan it kampong kemot di komoluan di sundal dino (varo iadino sid Yehezkiel 16,37 om Nahum 3,5) dot ong otopot, opurimanan dioti dot amu-no dumarun sampai i pomogunan dioti jumadi-no do belantara. Sabap ioti nakahagut sid ugama dit pasok do Kana, i retanko Baal, i mongimbulai di kouvaan om karanzatan, ohukuman-no ioti do pomogunan dioti dit asot oula om it tana, tu banalko okorop. 4-5 mangarait dit anganak dit ondu dino. Ino dino, tanda do tanid o pinamarasan di mulai, di bai nokopiamung sino. I mangahatul di bansa minamalid dit anganak dot Israel, retanko, i Baal o manahak do koposizan om kosukupu di nunu-nopo. Suvai hinumubang-no i pomogunan do bai rugi-po om rungkopi, om ohorotizan-ogi di bansa do nakalandu om nokedu-no ioti antad sid Kinoringan. Iri-ogi miguli mongitung ioti di vaza di kinotimpuunan om i janji laid diri. Iaditi o vaza do Kinoringan biano monuduk di bansa dau. Rontob-nopo, ino tudukan om ira dino, amu oruhai oromitan. Tu oholian kogorot di bansa dot Israel sid Baal, tu retan dioti Israel dot i Baal o mamasi di pomogunan om bansa (8-13). Ong otopot mad nolingan di bansa dot Israel i gama do Kinoringan sid dioti dit antad sid Masir sampai nokorikot ioti sid pomogunan do Kana. Sid belantara varo kosukupu dioti om iri-ogi sid pomogunan do Kana, nga Kinoringan-no o minamarakat dioti. Topot kakali retan dioti, ko ino kosukupu dino, antad kavi sid Baal sampai minangahatul ioti dit ongopoginakanan bahagi di Baal. Sid bahanda dino mimbulai-no i kogo zoo di hongkob do Kinoringan, gima iniduanan-no iosido di bansa dau. Songkuro-nopo o kosinangan antad sid Kinoringan, nga nolingan-no kavi dioti. Noholian-no banal kahahagut om kototombil di bansa dot Israel sid ugama di bai kouvaan om karanzatan sampai a-no kotutun di kopudan dau antad sid kovosihan do Kinoringan. Nunu-nopo it antad sid Kinoringan, retan dioti ko antad kavi sid Baal. Ong it ugama di Baal pengkaa dino, it ulun manahak sid Baal. Iri-ogi monuli i Baal do kosukupu, tu it ulun di mangaradu om mananom om sumamba sid Baal mongusaha antawa mangaraha di barakat di Baal. Kagi, i hal do mutanom mad amu-po ouba-ubas banal it bansa dot Israel. Kaluto ong it oula it tanom dioti amu kerad dit ongooula di dang pasok do Kana. Dot ong otopot, ensanan i koposizan di bansa dot Israel sampai i koposizan om hasil do pomogunan, nga antad kavi sid Kinoringan om i samod dau. Sabap i Kinoringan o minangagazad di bansa dau kumaa sid Kana om pinosuvang dioti sid pomogunan dino om pinasanganu dioti dit ongokuta om ongovalai om i kolunduo di pomogunan dino. Sino najadi-ogi i bansa dot Israel do bansa di kingaran om karajaan dit ahatul o kobatano.

Na sid saralom dit a-ko piro tinouan, nolingan-no dioti it inantadon di barang om kosukupu om balanja om koposizan om kosurupuvan dioti sampai minaliu-no sid ugama di Baal. I harati, i kolunduo om i barang dioti jinumadi do pinokokinoringan om harapan dioti, isunsui di ugama di Baal di kakali pioopud dit ongoulun sid pomogunan do Kana di pasok sino. Indoson dioti, ong nokopung-no i Kinoringan sid belantara. Kodung nakavaliu sid Kana, nogontian-no i harapan dioti. Nolingan-no dioti

monorima kaseh sid Kinoringan, gima i sokovia i katatapo dau do monginsukup dioti. Nengkod-no ioti masi sid saralom di kovosihan do Kinoringan. Varo-po minongitung do kakali sid Kinoringan i ginavo it antad sid belantara o suhuton, rontob-nopo ino Kinoringan dino om i pinokokinoringan i Baal sid Kana mad miabali. Kagi ong sid karajaan Utara, hiza di pengkakat i Yerobeam di panambayanan sid Samaria, i tanda dioti do harapan, ino-no i sinapi-sapi ko banggala do sapi. Mad miniizo i Kinoringan om i Baal, tu noboros-no laid dot i Kinoringan o manahak di pomogunan om it ongokouvaan: paha om susu om kosupakan. I kiniro dioti, ong sukul sumamba it ongoulun sid kuasa dino di mongimbulai di karanzatan om kouvaan sampai pasamba do dupot, vokon-no ong riniba, om sumusui-po di hoturan laid sid Kana do miolunung di bobolizan ko i sundal sid panambayanan, tantu kamaju it ongekob om i kabun dot ulun.

Iti-no o sabap dot anangan-no ioti di hukuman do Kinoringan. Hiza do mongomot-no dara ioti, varo rumikot di mangarampas dit omoton. Iri-ogi mimbulai, dot isai o kasanganu di hasil dino. Amu anaru i panarangan di nabi do nunu banal i kosusaan di rumikot.

2,8-13 It ongoulun suvai nakaharati dit inantadon di kosupakan om koposizon, ong i hiza-no di natanus-no i pomogunan om aso kopudan dioti. Suvai nohukuman-no om kaharati-ogi dot antad kavi sid kovosihan do Kinoringan o koposizan dioti dino. Tu ong aso-not ula, asot pongonuvan dioti dot isamba sid Baal. Sid kolonduan nohukuman-no ioti do Kinoringan. Tu ong asot hasil sid ongotana, sino-no o kohorotizan do siongo antad i koposizon dot ulun, ka di Kinoringan. Manjadi iadko i sundal, ong atangkap, labasan sid tuhanan, tu pemot sid ongoulun di komoluan dau, tanda dot ogilat it ondu dino. Pengkaa dino i Kinoringan mangahatul dot okudik nga aso kouvaan (aso darun, ong hiza di Elia di tolu toun, ko ongobutu hiza di Amos) (10). Iri-ogi aso pongonuvan dot barang dit isamba sid Baal om aso pongonuvan do pangaramai om momodrusuk om magavuk hiza dit ongopoginakanan sid panambayanan di Baal (11). Bai ongodupot-po o mizon sid pomogunan sampai ozongou-no i pomogunan, tu aso-not ulun, manuk-po i sangpakok, tu nongorakop-no. Sabap i bansa dot Israel amu kaharati dit inantadon di koposizan om koposizon dau, ino-no, baiko i YAHWE o minanapul om pinalabus dioti antad sid Masir om minangagazad dioti sid tanga do belantara om pinentoron dioti sid pomogunan do Kana sampai minongopud dioti sino (13). Piniamung dioti ombo i pisaap banal, Kinoringan (YAHWE) om Baal, retanko isesai ino. Sid gama mongoguna ombo it atahakan dino mimbulai-no do kuran i gama dot ulun humarati dit ombo ot natahakan. Ong sid Ugama di Baal, it ulun kondiri monuul di Baal, hiza di pasamba iosido do hasil antad sid kabun (om riniba) do mokitahak-no vagu o tomodon, supaya abarakatan om atahakan do surupu it ulun di pasamba di barang dino. I harati, it hasil vagu ko i kogumuai dit anganak di sid ongekob dot ulun dino antad sid Baal. Kondiri dit ulun ot elo dumagang di koposizon dau, ino-no i kiroon dit ulun di sinumamba sid Baal.

Ong tumorima di koposizan om koposizon do iadko patahak sid di YAHWE, kaharati-no it ulun di kokuasaan di Kinoringan om i vaza dau manamod om monginsukup di riniba sampai i vaza do kuran i Kinoringan minsomok sid riniba. Kasalaan-nopo, a-kaharati i bansa dot Israel dot i sokovia i sid dioti dino, antad kavi sid Kinoringan, minsanko it amas om perak, i kolunduo, i nakadapat di bansa dot Israel hiza di raja Daud. Ino dino tanda kavi di kovosihan om janji do Kinoringan sid bansa dau, supaya mopud i bansa dau sid piniizaan do Kinoringan. Topot i bansa dot Israel pinosiliu dit ongobarang, amas om perak do pinokokinoringan dau sampai inolingan i Kinoringan om i kovosihan dau sampai miningkod monorima kaseh sid Kinoringan. Iti-no o sabap dot anangan ioti di hukuman do Kinoringan (13).

Suvai ontok do mongotu-no dara om otutunan-ogi dot okonko ioti mongomot om mongotu. Tanid o bansa manganu i dioti do tinanom. Iri-ogi mimbulai dot isai i minanahak. Ong siti, amu manarang i Hosea do nunu banal o kosusaan ot noboros. Baiko iso-no o tomodon dau mamahanda, poromot sid ongoulun dot i Kinoringan pentalang sid bansa dau di vaza dau mogkovosihan om mongohukum. Obebas i Kinoringan manahak om obebas dot posuri di koposizon dot ulun. Ong aso gapas om kapuk mopud, minsanko sulung, nga amu kadapat it ongoulun mangagama sampai aso kosulungan dioti, bai kinis-po om lumabas-no it ulun (10).

14-15 Topot ino sokovia i hukuman di Tuhan, okonko i kobinasaan di bansa dot Israel o tomodon, inoi nga vaza do Kinoringan mogihim om pemumui vagu dioti. Ong varo hukuman, sid vaza dino kakal-po

varo kosianan om koponindalan om koponopulan. Ino-no rontob, mad osusa do mangagazad vagu dioti sid belantara (buvatan). Sori kondiri di Kinoringan (oviton-ku, ka) o monginsasamod (omis om olunok o boros, iadko i boros dit anak vagu sid sovoon dau do banalko ohigak om avanus o pamarasan do manarik di ginavo dot ondu). Banalko avantang ino boros di Hosea mongindazou di gama do Kinoringan sid bansa dau, i koginavaan do Kinoringan sid bansa dau, tazonko muli ioti sampai tumorima di kovosihan om samod do Kinoringan. Iti-no baiko vaza di nabi Hosea do momoros do iadino. Aso nabi vokon di miabal do mongimbulai di kopurimanan do Kinoringan ponong sid bansa dau.

Ino-no i kosopulan dioti, Tumimpuun-no vagu i Kinoringan. Sid tanga do belantara kadapat vagu ioti do kabun dot anggul (15). Katalib di nunu-nopo i kiroon do riniba mongimbulai i Kinoringan do kabun om kouvaan (Zabur 126 om Yesaya 41,18). Iri-ogi mimbulai dot isai kadapat manahak om mongopud. Gam ino konopuan do kinosusaan, ino-no i napu dot Akor, jumadi do rongobon do harapan. Sid Yosua 7,24 varo katarangan dot ino konopuan dino orosizan dot ongoulun. Varo duvo o vaza mangaharati, it iso, rumosi it ulun dino napu, tu apansung miampaping om opiit sampai oruhai arampasan (Lukas 10). Vokon-no ong, sinod konopuan dino it oruhai i vazaan om ralan kumaa sid Yerusalim. Kuran-kuran, ong Kinoringan tumimpuun-no vagu do mad mongurug vagu di bansa dau, iri-ogi kasamung i bansa di Kinoringan, iadko i hiza di kinolobusan sid Masir om iadko it anak do kasamung vagu di molohing dau dit ineduanan dau, gima banalko tilangad. Okonko bai i Hosea mangaharati di hiza di sid belantara do hiza dot obinsuhut i bansa dot Israel, tu i hiza diri kondiri di Kinoringan minangahatul di kosopulan om rikoton dioti. Pengkaa dino i nabi Amos (5,25). I hiza di banalko aso barang om aso kosukupu dit ulun om bansa dau, sino dino mongimbulai i Kinoringan do kosopulan om harapan sampai pemot di samod dau om i katatapo ponong sid bansa dau. Iti-no o sabap, (16) do tumolikud i bansa dau di ralan do karaatan om tumoguvang om tumoronong sid YAHWE, om i Kinoringan pengkod di sokoviai it ongokosusaan (dupot dot orongit di nokezon sid Kana (18), rumpak om it aso hasil dit ongokouvaan). Kinoringan mongimbulai di hiza do kopioondusan ontok di hiza di rumikot.

Iti-no it iso o vaza do Kinoringan tumimpuun vagu. Ino kopioondusan dino tumongkop do pomogunan om riniba, okonko bai i bansa dot Israel ot boroson sino. Om iri-ogi,

19-20 gam i bansa dot Israel iadko sovoon do Kinoringan om savo di nakasavo sid Kinoringan pempatai ko penlaid om i Israel tumimpa di samod do Kinoringan sampai mangakun do tumatap sid tinoguvangan do Kinoringan. I kosopulan di bansa dot Israel norindingan di kopioondusan di sokoviai it ongobansa om vinangun.

Ino boros di Hosea di iadino, tumalib di sokoviai i pongitugan dot ulun, om dioti bansa dot Israel. Indoson dioti, ong i Kinoringan bai sid belantara kikuasa iosido ko sid Masir. Iti-no o sabap do minogihim ioti do tanda di kuasa sid pomogunan sid Kana sampai minalid, om minamung-po sid ongougama vokon di retanko, suvai humarap sid ongokuasa di dau om dau do pomogunan om kiguna-ogi. Amu nakaramit-no ioti dot i Kinoringan, YAHWE o monguasa di sokoviai, tu minongurug dit avan om i tana iosido, sid Masir, sid belantara, sid Kana, sid Sabah, Kinoringan iosido om harapan dot ulun dit isai-nopo.

Ong i bansa dot Israel, kodung nokotiim do monongkokuro di kobuatano dau om minogihim-no do vaza di kopudan dau sid pomogunan dit okonko pasok ioti, amu andaman it inantadon dioti. Sino dino o kinatatakan dioti antad sid ralan do kopolosizan. Tinumanggai ioti dit ongougama om it ongobansa vokon, indoson ong sori-no o kemot dot arantang o ralan do kopolosizan, ong sukul sumusui ioti dit ongobansa om ugama vokon. Topot iti kavi vaza dioti tumolikud sid Kinoringan om tumolikud di ralan do kabanaran om kopolosizan om katatapo. Okonko i Minongurug ot hinarapan dioti, inoi nga it inurug, it antad sid palad o ginama, inanu dioti do harapan. Iti-no o sabap dot osusa-no i Kinoringan do tumimpuun-no vagu.

21-23 Na i kogunaan di janji vagu do Kinoringan sid bansa dot Israel, sid a-ko piro it ayat natarangan-no. Noboros-no laid sid ayat ko-19 dot intolu i Kinoringan mongohodtol dot, Ikau-no o savo-ku, ikau-no dino o sianan om ikau-no dino o samadan-ku-nopo sampai osinang-ko-no dino, om, Ontongon-ku-no ikau, tu monuluk di janji-ku, ka. Ong kodung i bansa dot Israel tumoguvang vagu sid Kinoringan sampai tumorima di janji dino, tantu ino janji vagu opud sampai penlaid. I gulu diri o gama nakada-no, sampai pinemumui-no i Kinoringan di bansa dau sid ralan do kabanaran. Iti-no o sabap, aso boros do pouli di

sundal sid savo dau laid, inoi nga mad manansavo-no vagu do mad sumuni it Israel. Ino pongoretan dino, ong manansavo-no do sumuni, amu apakai ino pongoretan dino, ong bai manaud-po do bituanon ko it ondu di kisavo-no laid ko ondu dit ogilat. Ino piniizaan vagu dino di mad nasavo-no do Kinoringan om i bansa dau, ino-no o kopihatan di katatapan. I harati, aso-no kiroon vagu do mogidu-po ko tumanid-po ko tumohiang-po om tumagak, inoi nga atatap-no om opihot-no ino piniizaan dino, tu i samod o mamalud om popiobpuput di Kinoringan om i bansa dau. Ino samod do Kinoringan mimbulai sid sokoviai i kotulungan dau, ino-no darun di mongimbulai di gandum om anggur om umau Zaitun. Ong i ngaran laid, hiza do nolupu-no i bansa dot Israel, gima i kinaraatan dau, retanko, Okon-noko samadan-po do Kinoringan om okon-noko bansa-po do Kinoringan, ino ngaran dino, nosimbanan-no vagu dot, Sinamadan do Kinoringan om bansa do Kinoringan. I bansa dot Israel sumasi dot, banalko, Ikau-no dino o Kinoringan dahai, ka dioti, tu nokotutun-no sampai nakaharati-no banal ioti dot okonko it ongobaal ko it ongopinokokinoringan dit ongobansa o mongopud dioti, inoi nga iso-no o mongopud om mongumbasi di bansa dot Israel, ino-no i Kinoringan YAHWE. Ong kodung nokopionong-no vagu ino piniizaan dino, minsanko i hoturan di vinangun di norungoi-no, nga natagan-no vagu sampai kosondot-no i darun hiza di manampangi om mimbulai-no it ongokosuni di boginisan sampai mukoposizon-no it ongoulun. Minsanko i vinangun om i kobuatano di vinangun jumadi do pakakas di samod do Kinoringan sampai mongonsug do mongoguna do Kinoringan. Natanus-no i lulupu sampai nopud-no vagu i ngaran laid di kotuaan, ino-no it Iesreel, i harati, I Kinoringan o mananom om mongopud dit ongototonomon, ka. Sinod boros di nabi Hosea nakasasi-no dot i Kinoringan mangagazad di bansa dau, minsanko nohukuman-no om nasala-no, supaya i kovosihan do Kinoringan atagan om emvoguvan di bansa di kisala dot jumadi-no do bansa do dang Kinoringan.

Fasal 3, 1-5: I nabi om i savo dau dit amu mangasip

Na iti fasal diti, nga tuturan-no vagu i kavazao di nabi Hosea, i manarang dot i Kinoringan o minonuhu di Hosea. Iadko kondiri di Hosea o monuturan. Ong iadino i laporan di surat di nabi Hosea, atalahas-no dot ino habal dino banalko ohodtol om kiharati. Kondiri di Hosea minanarang di kobuatano dit onkob dau.

Minsanko sid Kitab Momogun noboros-no dot: panansavo-no vagu dot iso o sundal, sabap, tu it ongohurup sid Buuk Hosea, nga apaganan kabasa-basaan, ino-no i harati banal sino, Osuhul ong rumikot-ko-no vagu do mongoi di savo-nu laid di nokezon sid vokon, ka, Iri-ogi monuturan-no i Hosea do gam minomuru-no vagu iosido di minanansavo dit ondu dino dot okonko okudik o buru, mad 150 ringgit Perak om tolu karong o davo. Ino buru do iadino kakali omura mantadko manansavo do sumuni. Ong ondu vokon ot boroson sino, tantu okonko varo nokosurat dot, it ondu dino, ka di panarangan di kogumuai it ulun di mangaharati di boros dino.

Kondiri di Hosea posuntu sid onkob dau di kogoosoo om kolonuto di katatapo do Kinoringan sid bansa dau om i kogoosoo do kopintaran di bansa dot Israel, iadko nokentahan-no laid sid Fasal 1. Minsanko minogidu-no i savo dau sampai minokiagai dit ongokusai vokon, kakali i Hosea mongoi di savo dau. Ino-no o vaza do Kinoringan sid bansa dau di banalko opintal om obintagak sid tinoguvangon do Kinoringan.

Nokouli-po it ondu, amu-no rinumpit i nabi sid savo dau om amu-no koho iosido dot it ondu dino mogihim do kusai vokon, supaya mengkod it ondu do tazon-ko mokisavo om mokirompit sampai mokidudun do kusai. Kondiri di nabi manahan di kondiri dau, supaya i savo dau humarati di katagan sid gama manahan di karalazan om kaagazan om rumamit di kogunaan di katatapo sid savo dau. Suvaiko i samod kogoos do tumahan di kondiri om manahan di vokon om tumatap i samod sampai kemot do kosungguvon.

Sid gama di iadino humarati i nabi Hosea di vaza do Kinoringan monuduk om mangagazad di bansa dau. Sid ayat 4-5 manarang i nabi di kosondoto di suntuan dino, ino-no i kavazao di bansa dot Israel. Iadko i Hosea amu-no rumompit sid savo dot alaid-laid om amu-no koho do molunung it ondu sid kusai vokon pengavi di janji dau sid ondu dino, pengkaa dino amu ohoturanan i bansa dot Israel do raja ko ulion vokon om amu mopud i hoturan do vinangun om i hoturan dot ugama. Raja nga aso-no mangahatul sampai aso-not ongoimam di mangahatul di gama sumambayang dot a-kosongkuro koledo.

Suvai nokensodu-no i bansa dot Israel antad sid karalazan om ongopensubaan om iri-ogi sumondot sid ginavo dioti i kogunaan di hukuman do Kinoringan, ino-no, okonko kobinasaan o rikoton, inoi nga sokovia i gama do Kinoringan, iso-no o tomodon, pemumui om pakansang-no vagu di bansa dau. Kagi, humarati i Hosea do bana-banalko varo koulian vagu di bansa dot Israel sid Kinoringan, tu i samod do Kinoringan, monori-no di sokovia i kakanggahan om kopintaran di bansa dot ulun Israel. Ong i nabi Amos, baiko ngaran-no o boros do kaluto ong varo-po kengkakatan vagu di valai di raja Daud (9,7). Bai ngaran-no nogovitan di Amos di hiza di sid tohudi banal. Topot ong i Hosea di bai a-ko piro toun omulok mantadko i Amos diri, mad atarang o kohorotizan dau di vazaan do Kinoringan manapul di bansa dau, tu sid suntuan di vaza manansavo om it ongekob dau ot kinohorotizan di Hosea. Sabap it ongekob di Hosea o nasansara om nosusa, lobipo kosondot sid nabi Hosea om it ongoulun di minongining di bahanda di nabi i gamaon do Kinoringan manapul om pemumui di bansa di tinaud dau.

Fasal 5,8-6,6 Mirumpak i bansa do Yahuda om Israel

Basaon-po laid it umpatod di fasal dino sid Kitab Momogun. Banal-no, inot a-ko piro ayat di Hosea suvai elaan ong engat dot kembulai sino i situasi, hiza di rumpak do Sur-Efraim TGM 735-734, ino-no, kodung i Tiglatpilesar III, (TGM 745-727) nakaraja-no sid Karajaan dot Assur, sumunsui iosido di tradisi dit ongoraja laid sino do mongorumpak om manansanganu dit ongobansa vokon di sid watas dau. I toun 738 i karajaan do Sur om Aram (i raja Rezin) om Israel (i raja dau i Menahem) sinumamba sid di Tiglatpilesar sampai monukoi sid karajaan dot Assur. Notoliban-po i sontoun, hiza dot i Tiglatpilesar minongorumpak do Madia om it ongopomogunan ponong sid Timor, kenginan dioti Sur om it a-ko piro it ongodaerah vokon do lumabus sid hoturan dot Assur sampai miniupakat-no ioti mikunsi sumaap di raja dot Assur. Ong i ginumanti di raja Menahem sid Samaria, ino-no it anak dau Pekakia, pinatai-no di mononsiou dau, gima minuupakat i raja dot Israel di sangod laid dau, ino-no i raja dot Aram, do sumaap dot Assur o tomodon.

Na i kiroon dioti ongoraja, inot upakat di sumaap dot Assur dino suvai opud, ong ensanan it ongobansa om daerah ponong sid selatan do mikukunsi om mitatabang do kumodou di hoturan dot Assur dino.

Iti-no o sabap do rinumikot i raja do Damshek, i ngaran dau Rezin om i raja Pekak antad sid Samaria, ino raja dot Israel kumaa sid Yerusalim (TGM 734), tu mongogorot di raja Ahas om i karajaan do Yahuda do mamung sid piniizaan dioti sumaap dot Assur (2. Raja 16,5 om Yesaya 7,2),

Topot i raja dot Yahuda osusaan di vaza dioti mongogorot dino. Iti-no o sabap, dot iso-po ot elaan dau do katagan, minokisapul i Ahas di raja dot Assur, ino-no i Tiglatpilesar. Ong i nabi Yesaya moniag dara di raja, nga aso tinganan (Yesaya 7,2) Nokorikot-po i habal di Ahas sid raja dot Assur, minamakai i raja Tiglatpilesar di kasampatan dino do manansanganu di pomogunan do Samaria, supaya obebas-no vagu i karajaan do Yahuda, sampai tinori-no di Tiglatpilesar i raja do Damshek (732). Ino hiza dino nohinaan-no i karajaan dot Israel, ino-no i daerah sid tupak do Yarden om i sid Galilea dot alaid-po, baiko i-po kuta do Samaria om it a-ko piro i kampung mintutuk o dang raja do Samaria, Ino kobuatano di iadino, mimbulai sid a-ko piro ot ayat dino.

Mad longoi inot ongoayat dino di varot onom o bahagi ko ayat i longoi: Ino-no,

Kondiri di Kinoringan mongingut mongorumpak, gima nokensomok-no i sangod antad sid Selatan. I sangod nokensomok-no sid ongokampong do Gibe, Rama, Betel (Bet Aven) om i daerah di Benyamin. It ongosojal di karajaan do Yahuda nokensomok-no sampai minongindorosi-no di kuta do Samaria. Sabap kodung minongorumpak i Tiglatpilesar dioti sid Israel Utara, minoniim-no i raja do Yahuda do manansanganu vagu ombo i dau do pomogunan di nosolod di raja dot Israel. Gam i raja dot Yahuda hinumambil-po sid tana di karajaan Utara, ino-no i tana dot Israel.

Ino kinotorian di karajaan dot Israel nohorotizan-no di nabi dot antad sid hukuman om hungot do Kinoringan, gima i raja dot Israel nokopiupakat di raja dot Aram. Gam i raja dot Yahuda mad pakakas di hukuman do Kinoringan. I panangan di hukuman dino, i karaatan laid dot opiduvo-no i karajaan dot Israel, hiza di nabahagi-no di Yerobeam I. Ino lulupu laid di sid Yerobeam diri, nokosunu-no biano. I bansa di minangaladtak do pomogunan dit obpinai dau, anangan di hukuman do Kinoringan, gam nohinaan-no i dau do tana om ongoulun. Rontob-nopo, minsanko inanu i raja do Yahuda do pakakas di hukum do Kinoringan, kakali kitanggung jawab iosido sid atag o gama. Ong nakaranggal-no it Israel, tu

nakahambil sid tana do Yahudi, kakali amu atag dot i raja do Yahudi mononsuli di gama di iadino sampai humambil-po sid tana dot Israel Utara. Iti-no o sabap do humungot i Kinoringan sid Ongomangagazad do Yahuda (10). Kondiri di Kinoringan mangajaga dit ongovolit di notontuan-no laid hiza di kinosuvangan di hopod om duvo i rurungan sid Kana. I bansa di monolod do tana om humambil sid bansa di mad obpinai dau, anangan di kotigiran do Kinoringan, dot aso bida, Israel Utara ko Israel Selatan ko Yahuda.

Sid ongolongi dino momurimon tokou do kuran i nabi Hosea, minsanko mangaratu iosido di hukuman do Kinoringan do mad kabang iosido do Kinoringan, kakali oruol o ginavo dau bahagi di bansa dau om i sokoviai i kobuatano sid pialatan di bansa dot Israel om Yahuda. Kopihiza manarang i Hosea do mad kondiri di Kinoringan mangagama om mongorongoi, ong kodung it ongoraja om it ongosojal mirumpak do misosolon-solon dit ongotana om ongobandar om ongokampong sampai it ongoulun sid ongovalai dino. Mad mogkorudu iosido di kosusaan dino, dot iosido nabi sid Israel. Humongkob iosido, tu amu kasip om amu humarap i bansa om i raja dau sid Kinoringan, inoi nga humarap om sumondui sid ongokuasa di raja vokon. (12) Sompi a-nonong i harapan dioti sid bansa vokon, sid Aram (ong Israel) ko sid Assur, ong i Yahuda. I nabi Hosea minoniag di raja dot Israel do mokitulung di raja vokon, om i Yesaya (Yesaya 7) minoniag di raja do Yahuda di dau do gama mokitulung di raja dot Assur. Ino-no i kongkod do kosusaan, i karajaan dot Israel nokotongkizad antad sid hoturan sid Yerusalim (Yerobeam/Rehabeam) dot ino kinotongkizadan dino okonko bai nokotongkizad sid bansa, inoi nga nokotongkizad-no antad sid Kinoringan. Iti-no o sabap dot i sokoviai o korunggalan di pomogunan diri, okonko bai i gama dit ongoraja di misosolod om mirurumpak sampai manganu do tana om mangarakop dot ulun, inoi nga sid sokoviai i gama di iadino, kondiri di palad do Kinoringan mongohukum om mamambang di bansa dau di mad dupot dit amu obinsuhut. I gama do Kinoringan miabal di mondou di nakapanabpo dit imporizan dau dot aso-no tinganan manapul (14).

Amu elaan tokou do nakasasi i Hosea di kinorungazan om kinohuzasan di kuta do Damshek di ginama di sojal di Tiglatpilesar diri ko kuran. Kuran-kuran, ong sid bahanda di Nabi, okonko i Tiglatpilesar o minangagama, inoi nga kondiri di Kinoringan, ka.

Ino hiza diri retanko it ongoulun dot Israel, aso tinganan sumaap dit ongopinokokinoringan dot Assur, tu banalko ahakang ioti monunda om monginghakang di raja dot Assur, ka. Iti-no, tu sumuri-no i Kinoringan. Kopurimon ioti do banalko neduan-no ioti do Kinoringan dot iso nga aso-no monulung. Suvaiko iadino om andaman-ogi dioti dot isai ot otopot o minionunda om minangagazad om minongumbasih dioti. Suvai sid tanga do kasansaraan om andaman-ogi sampai tumopuli-no ioti mogihim om mongodim do Kinoringan (15) dot ino-no o gama dioti minta dua (6,1-3)

6,1-6 I Hosea monodia di pomintaan dua di sumamba sid Kinoringan om mokiada di kasalaan. Sid pomintaan dua dino kaharati tokou-no di pongitungan dit ongoulun diri. Kaharati-ogi ioti dot aso kopsizatan vokon tanid mantadko sid Kinoringan. Sid palad do Kinoringan i kosusaan om i kosopulan, i hukuman om i kovosihan. Harapan di nabi dot i gama dau mamahanda dino kiontok sampai i bansa dot Israel nga miguli-no vagu sid Kinoringan. (Ontok di fasal diti, varot a-ko piro o hurup dit amu atarang nokosurat sampai varot a-ko piro o cadangan dot ombo o nokosurat. Kakali aso-no tinganan do tontuon i boros sino. Tu minsanko sid pomintaan dua mimbulai dot oupus ioti sampai mokiada di karaatan sampai okonko impiro-piro ioti tumoguvang sid Kinoringan. Induvaan ko intoluvan, ino boros dioti dino pembulai do varo kiroon dioti do kodung mokiada ioti om mindamo, a-milo-milo nga varo timpa do Kinoringan om varo kaadaan di karaatan dioti. Topot i kaadaan do kasalaan dot ulun okonko automatik. I Kinoringan okonko iadko it enjin. Kodung manatak dit a-ko piro o tatakon, tumimpa-no om sumuhut-no, tu it enjin isuhut di gama monuhu. Sabap ino, i timpa do Kinoringan amu miabal di harapan sid pomintaan dua dioti (1-3 om 4-6)

Kuran-ka o gama-ku sid dikou? ka di Kinoringan. Mad nening-no di Kinoringan i vazaan dioti minta dua om mindamo. Rontob-nopo, mad oholian ahago misimban-simban i kobuatano om harapan om kosipan dioti, iadko i kavut di sasarap. Hiza do sumilau it adau, kikavut sid napu dot tigogi, natanus-no. Pengkaa dino i harapan dioti, ka di Kinoringan. Ino kokosogo dioti baiko oduruk om i harapan dioti bai songkudap-no. Mad elin ioti sid soribau om sid kobuatano, topot i ginavo dioti kakali osodu antad sid Kinoringan. Bai i kasansaraan dioti o pinensibak di ginavo dioti sampai i gama dioti mokitulung, gama

nosompitan ioti. Iadko it ulun di nakasaralom sid gasop, minsanko bai harami-po ot emot dau, kovidon-no dau, tu indoson ong kadapat iosido kumavid sampai kotindal.

Iti-no o sabap i boros do kompusan dit ayat konom di longoi di nabi posondot banal di kinapangan do Kinoringan: Ong baiko ngaran o mokiada om tisimban o ginavo om kavazao dioti, amu-po miuma do tumorima di kaadaan do karaatan om kinotongkizadan dioti sid Kinoringan. Iti-no o sabap, nanangan-po om nokopurimon-no laid ioti dit ensanan i hukuman do Kinoringan di mad mananus dioti, isuhut dit ongobahanda laid dit ongonabi vokon (5). Suvai atarang o gama muli sid Kinoringan om tumorima di samod do Kinoringan sampai monuli manamod om varo-ogi katagan. Topot ino samod di tumorima i Kinoringan antad sid bansa dau, okonko mangagaras do dupot om pangazam (parsembaan do sorobon om tunuvon), inoi nga i katatapo om kabanaran om samod di bansa dau (Mikha 6,8, Amos 5).

11,1-11 I samod do Kinoringan sid bansa dau di susumaap.

Sid sokoviai it ongotudukan om ongobahanda dit ongonabi om i panarangan dino sid ensanan i Kitab Laid, itit a-ko piro ayat manarang di samod do Kinoringan do tumalib di sokoviai it ongopanarangan vokon. Baiko i Hosea o nakaramit banal di korolomo om kogofoo di Samod do Kinoringan di monori di kobungahan om korumaato di bansa dau. Bai I Hosea o nokelo do iadino do manarang di vaza manamod di nokembulai sid gama om tunda do Kinoringan ponong sid bansa dau. Varo kiroon dot ulun, sabap kondiri di Hosea nokotiim sid dau dot ongekob om ponong sid dau do savo di banalko ogilat, nga kakali amu abasan iosido monian om manamod (Fasal 3), iri-ogi nokosodia-no iosido momurimon om humarati sampai rumamit di samod do Kinoringan. Sid ongekob dau kondiri varo-no pangalaman do songkuro kapagon ino gama manamod dino, ong i koruhang, savo ko isai, banalko amu osodia do tumorima ko mongoguna di samod dino.

Varo apat bahagi sid tudukan dino:

1-4 i gama do Kinoringan sid bansa dau iadko it ama di mangagazad om mongopud dit anak dau di banalko arampus om amu obinsuhut.

5-7 i hukuman bahagi dioti di banalko amu sumuhut ioti dino

8-9 kuran di samod do Kinoringan monori di hukuman dau, tu aso tinganan pada di sinamadan dau.

10-11 Suvai nohukuman-no om koguli-ogi vagu ioti tumoguvang sid Kinoringan sampai manganu di kosopulan om jumadi vagu do karajaan do Kinoringan.

I longoi mongimbulit di vaza do Kinoringan manamod di bansa dau di hiza sid Masir ioti di baiko uripon di raja Faraun. Sid Masir nokotimpuun-no i panamod do Kinoringan ponong sid dioti. I hiza diri i bansa dot Israel iadko ragang-po, tu tumimpuun-ogi jumadi do bansa. Sabap i hiza dot nouripon ioti diri, okonko bansa ioti it nahatul-no, inoi nga mad bahanan dot ongouripon dit a-kotutun do hoturan tanid mantadko i hoturan di lalapos di mandul di Faraun. Aso boros di Hosea kananganko it ongotuturan di Ibrahim om Ishak om Yakub. Sid Masir-no o kotimpuunan dit usul di Hosea. Na i vaza di Kinoringan mangagazad om posukod di bansa dot israel iadko i gama dot ama monuduk om mongira dit anak dau, supaya atag o vaza sumukod. Ino-no o rontob, ong it Israel mad oholian koguvail, amu minongining di hoturan om ira dit ama. Okonko bai amu nokosurut i kosipan om harapan sid Kinoringan, gam makin monuduk om mongira, makin nokensodu i bansa dot Israel antad sid hoturan om harapan sid Kinoringan.

Okonko piro-piro ot ongonabi minongodim om minongonsug di bansa dot Israel muli sid Kinoringan. Topot varo kobungahan om koguvelo dit aso tinganan do tumalib-po, minogidu ioti sampai tinumolikud sid Kinoringan sampai sinumamba om sinumingkudou sid ongorogon di Baal. Songkuro-nopo o gama do Kinoringan manamod sid gama monuduk, monguru, mongibit iadko i ragang-po it anak, dunguan-po, louban-po, nga kakali aso kanangan om aso kasandatan di samod do Kinoringan sid ginavo dioti. I Hosea minamakai di sokoviai it ongogama dot idi manamod om mongumbasih dit anak dau do ragang-po, do posuntuan di samod do Kinoringan sid bansa dau o tomodon. Topot nunu-nopo, mad aso guna om amu otorima dioti. Amu pigandang di bansa ino gama do Kinoringan. Nabasan i Kinoringan mongira om kumavid om manamod om mogkovosihan sampai mangapad dioti, kenginan dau do kouli vagu ioti. Topot aso guna. Oholian o karampus om oholian kumioduw sampai okodou om amu oronok ioti. Mad humongkob-no i Kinoringan om osusa-no o ginavo di nemot di kobuatano di iadino. Kuran ong it anak

di sinamadan do molohing amu momurimon di samod dit ama om idi dau, gam akanggau iosido om osizau iadko kaladai om dupot dit aso bahazan?

5-6 Sabap i nunu-nopo i vaza do Kinoringan minsomok sid Israel om tumudu di ginavo dioti, kaluto ong amu-po oholian kumodou i ginavo, navi-no it ongovaza tumoronong sid kobuatano di iadino, tanid mantadko sid hukuman. Ong banalko amu osodia do tumorima do samod, bai i babambang-po o kadapat monuduk di kogoos do samod sid anak dino. Tu ong okonko antad sid kenginan om samod, tantu i molohing pada dit anak sampai momoros om mongitung dot okon-noko anak-po dau it anak di iadino. Sabap ino, ino bansa di nokedu-no sid Kinoringan sampai minoniag do monimban di kobuatano dau dino, a-milo-milo ohukuman sampai nengkod-no i kobebasan om i kopudan dau. It ongokuasa i retan dioti ko, iti-no it ongoharapan tokou, ka, ino dino jinumadi do hakim om mangarakop om monguripon, ino-no it Assur om Masir. Nohuzas-no it ongobandar om narakop-no i tirizan di bansa, inot ongoulun di minangahatul sampai minamalid di bansa, tazonko amu tumorima ko sumuhut di kenginan do Kinoringan. Iadino nokensomok i bansa dot Israel sid kobinasaan dau.

7-9 Kakali monori (kumodos) i Kinoringan di hungot om rodus dau, tu mongopud di samod dau. Alaid-nopo ohuzan ioti om opupusan-no sid tanga do karaatan om kasalaan. Ohorotizan-no dioti dot napalid-no ioti. Topot kakali dot aso kogoos dioti tumolikud antad sid ralan dot araat sampai tumoguvang-no sid Kinoringan. Songkuro-nopo o cadangan dioti, nga mapag-apag-noko mapag-apag, topot aso kosunuan, tu amu kogoos ioti magavi mingkakat om muli sid Kinoringan (7). Na sino atalahas-no dot it ulun di iadkeno katatagak ong baiko dau kondiri do kenginan om kakansangan, amu kadapat muli sid Kinoringan. Iti-no o kagama dot miguli-guli-nopo ioti sumamba sid Baal, minsan engin-no dara ioti mokitulung do Kinoringan ong boros.

Iti-no o sabap, dot i Hosea monuturan do kuran di Kinoringan midadahava sid ginavo kondiri do iadko ulun dit opiduvo o ginavo dot ombo it atag o gama, humungot ko manamod, pemozooni it ulun ko kakali mongoguna. Tinomod di Hosea do monuturan do iadino, ino-no o kenginan dau, pembulai di kogoos om korolomo om kolonuto di samod do Kinoringan di monori di hungot om rodus do Kinoringan, gima oholian i karaatan di bansa dau. Minsanko sid saralom di hukuman do Kinoringan kakali varo samod om tunda do Kinoringan, tu monori sampai monindal om manapul di bansa dau. Inot ongobandar Adama om Zeboim iadko Sodom om Gomora, ongobandar di nohukuman do Kinoringan sampai natanus-no (Kinotimpunaan 14,2+8 om Ulangan 29,22) I harati, Amu engin i Kinoringan di kapatazan dit ulun di kisala, inoi nga i kopolisan om i koulisan sid kenginan do Kinoringan. Minsanko kakali i Kinoringan mongitung di hukuman (8-9) kakali-no mongumpai iosido di kosopulan om i kovosihan dau. Tumuvargino i ginavo do Kinoringan, supaya amu kerad dit ulun di lumaba-no i hungot om rodus om kotigiran, inoi nga sid saralom-poma do hukuman mimbulai-no i kovosihan om samod dau. Iti-no i pitonidan do Kinoringan om i riniba: Ioku diti osusi, i mangagazad dikau, amu-no humungot-oku vagu sid dikau, ka. Ong manarang i Hosea dot osusi i Kinoringan, vokon-no i pongoretan dau manarang. Ong i Yesaya, banalko tanid i Kinoringan, tu aso tinganan minsomok sid Kinoringan (Yesaya 6,1-7). Topot ong sid Hosea, ino-no o panangan, omomos i Kinoringan om avanus sampai kisamod di katalib di nunu-nopo i samod di dang riniba.

10-11 I koulisan di bansa dot Israel.

Ino vaza do Kinoringan pentahan di kosomoko dau ponong sid bansa di nokedu-no om tumoguvang-no di hiza di rumikot-ogi (9). Iti-no o sabap dot i Hosea kadapat-po mamahanda om pointalang di nunu-nopo i kosunu sid tohudi. Sabap inot ongobahanda di Hosea dino, varo panangan. Iosido kadapat pendongou di rikoton dit ongoulun dot Israel. Ong i bansa dot Israel kondiri, a-kemot do ralan om vaza muli sid Kinoringan, songkuro-nopo i pongitungan do iadino (2,5). Topot antad sid kopurimanan di samod do Kinoringan mimbulai-no i koulisan sid Kinoringan om i kosimbanan di ginavo dot ulun. Sabap i Yahwe mingogongou iadko mondou mongodim di bansa dau (Amos 1,2 om Yeremia 25,30). Mad norongou-no laid di Hosea ino bahanda di nabi Amos diri. Iri-ogi i bansa dot Israel di nakazad-no sid apat sunduk dot avan muli-no dot okikip-ogi tumangkus sampai tumoronong sid Kinoringan om mozonno di kenginan do Kinoringan. Ino-no it ulun (anganak 11,1) dit oholian kahago mogidu sid Kinoringan sampai mad ombolog di tumulud muli, humago-no muli iadko i hiza di sid belantara dot i kavut do Kinoringan o minangagazad ioti sampai ioti minozo-no di kavut dino. It ongoombolog, iadko i kandawai

om it ongokolumpisau, ong kodung mirangkat sid pomogunan vokon, hiza di sumimban i musim sid pomogunan ponong sid utara, tasangbahanan-bahanan tumulud-tulud sid pomogunan vokon. Elaan dit ongoombolog i rikoton, minsanko i rikoton dino, nga varo saribu labaan Kilometer o kosoduo, minsanko tumupak do rahat, nga elaan i rikoton. Iadko it ongokandawai di rumikot sid Sabah antad sid pomogunan do Kina hiza di vulan sebelas. Sid tohudi, iadino o koulian dit ongoulun dot Israel sid inantadon dioti sid pomogunan dot Israel om Kana.

Ino-no it onsi di bahanda di nabi Hosea, kalaid-po kadapat-no i Kinoringan mongonsug di bansa dau, supaya sumuhut ioti om tumorima di samod do Kinoringan sampai mokiada-no di kobungahan om karanggalan dioti. Iti-no o sabap dot i Hosea momihot di bahanda dau dino do mongimbulit iosido dot, Ioku-no diti o Yahwe i minomoros dino, ka di Tuhan.

I nabi Amos. Ino-no i nabi di gulu banal do varo buuk dau sid Kitab Laid. Iosido dino warga negara Yahuda, nga kitugas iosido sid Israel Utara. I tugas di Amos dit antad sid Kinoringan, kadapat tokou onsizeon, ong sukul basaon-no it a-ko piro it ayat sid Buuk di Amos:

Amos 1,1 I ponsohorian di Amos ino-no
1 I pomogunan dau ino-no	a
I raja sid Israel ino-no	b
It ongokosusaan sid Israel diri di pajalon di Amos:	c
Amos 2,7-8	d
Amos 4,1 +5,11-	e
Amos 8,4-6	f
Kuran-ka i gama dot ulun tumorima di bahanda di Amos? Imatai-no sid F. 7,10-17 do nunu i kahajangan di Amos	g

I Yerobeam II nga raja randavi dit ongoraja vokon sid Usrael Utara. 41 toun koledo raja iosido di sid saralom di hoturan dau, varo komojuan sid ekonomi om kobudayaan om sid ugama. Nokopiandus iosido di raja do Sur (Damshek) om papanggol di karajaan dot Israel. Ino-no rontob, ino komojuan do ekonomi okonko enizo posinang di razat, gam i lumundu sinumurut lumundu om i mosikim sinumosikim banal. I gama mangaladtak dit okugui om mangakan di mosikim sinumurut-no om pengkaa dino i kaagazan om i vaza pemozoon di kosipan.

>> Basao-no i USURAN DI BANSAN DOT ISRAEL

F. 6a....

Na i Amos minangarait om minamalang di sokoviai i kosusaan om kopongolidakan di sid pomogunan dot Israel Utara diri, ino-no, aladtakan it ongomosikim, otipuan om opudali-no i kabanaran do Kinoringan, inopilan it ongohakim sampai asaap i Kinoringan. Na i Amos amu mongitung di bai toriso-iso o karanggalan, inoi nga manarang dot i gama di iadino mangaranggal di janji do Kinoringan. Minsanko nopili-no do Kinoringan i bansa dot Israel, ohukuman-no ong varo karanggalan (3,2). Kagi mamajal i Amos di harapan dioti, retanko, Ong kodung kijanji sid Kinoringan, amu ananganan do kosusaan, tu Kinoringan o mangapad om monunda sampai mongorinding, ka. Topot boros di Amos, minsanko i vaza dioti sumambayang om pasamba sid tinoguvangon do Kinoringan, nga aso guna, tu okonko i Kinoringan o tomodon om panangan, inoi nga tomod mokindazou di kondiri.

I nabi Amos mamahanda di hukum do Kinoringan (7,1-9; 8,11-14; 9,1-10). Ong otopot, bai 30 toun antadko i habal di Amos diri, norungoi-no i bandar Samaria om nokosunu-no i sokoviai i bahanda di Amos (9,8).

Na i tudukan di Amos okonko bai hukum om kosusaan, gam sid sokoviai i boros dau, varo kopurimanan do kuran i Amos minongogorot popemumui di bansa dot Israel pouli sid Kinoringan. I boros do Kinoringan inimbulit-no di Amos, ino-no, *Ihimo-oku-no dikou, supaya apasi-kou, ka* (5,4). Topot mad a-onining i bansa dot Israel. Na i Amos amu engkod moniim minta dua mongontok dioti dot induvo nokotiim iosido pangalai di hukum do Kinoringan. Rontob-nopo, oholian i karaatan om

karangalan dioti. Iti-no o sabap monukung i Kinoringan dot *okudik nga aso-no timbangon-ku vagu*, ka.(7,8).

Kakali i Amos pembulai do harapan, ino-no, Kinoringan pengkakat vagu di pogun di Daud (9,11-14). I harati, i Amos mongintalang om monorou laid di korikatan di Yesus, i Minananggung, i porikot di karajaan do Kinoringan. Tu i Yesus, nga antad sid turunan di raja Daud (Matius 1).

>> Iti diti bai panarangan di ngaran-po. Lobipo atag do basaon-nu i sokoviai i sizam fasal di Amos om pakazon-po i tafsiran di nakamung sid kursus diti. Sid panarangan di Kitab Momogun (nalad 421) varo nokosurat di limo o bahagi di habal di Amos dino dit amu mozo di hoturan do fasal om ayat. It ulun di minongumpug om minonurat di sokoviai it ongoboros di Amos sid buuk AMOS diti, amu minonodiri dit ongohal, gam sompuruvan dau ombo it elaan om and-andaman dau, ko ombo i nakadapat iosido antad sid ulun vokon di nokotiim mongohondom di bahanda om kososorou di Amos, ong kodung nokosunu-no kavi i nibahanda laid di Amos.

Amu alaid dati i gama di Amos do nabi iosido. Tu kodung nokoimbongut iosido sid natad di panambayanan, (7,10-17) nosunsub-no iosido om nogusa-no di sojal di raja.

>> Itungon-po do kuran i tudukan om bahanda di Amos, ong hiza tokou biano! Varo-ka hal di mongindaraat i Amos di koluu di hiza om razat tokou biano? Antava huran dara i tudukan di Amos ong kakal iosido dara sid tanga tokou sid PCS om sitid Sabah?

>> Nunu-ka it ongokosusaan sid Sabah, ong kiroon tokou do siombo varo kokurangan do kabanaran? sid ongkob tokou? sid kampong? sid piumpugan om i vaza tokou sumambayang? sid daerah? sid Sangsabah? ko Songmalaysia?....

TAFSIRAN DI NABI AMOS

Umpatod: Ong engin mongintutuan do nunu o harati ong nabi, osuhul-no ong mamasa di nabi Amos. Ino-no rontob, ino boros di Amos mad aso habal di misingkavaro. It Imam sid Betel nakaharati laid diri dot ino gama di Amos mad mongonsug do monondurhaka om monuntuvad di hoturan do pomogunan. Iti-no sabap minongoruput i Imam Amazia di Amos sid raja, retanko i Amos pokodou dit ongoulun om mangasau di hoturan di raja om panambayanan, ka. Sabap i Amos minangaraat di gama dioti sumambayang dot i Amos, bai ulun do kapong di mukabun, ka di Amazia.

I tomodon di Amos, monuduk dit ongoulun do humarap vagu sid kInoringan dot iseso o ginavo. Iti-no o sabap do mongonsug iosido dot, "Ihimo-oku-no, supaya apasi-kou-no, ka di Kinoringan, ka di Amos.

1. I nabi Amos om i tudukan dau. I nabi sid Kitab di nokogulu-ko dit ongonabi vokon naakatandon sid Kitab it a-ko piro o tudukan dau dino, ino-no i Amos. Varo it a-ko piro o nabi guluko i Amos, rontob-nopo, ong sid Kitab Laid dino, bai it usul dioti ot itahu om varo a-ko piro ot ayat di manarang di tinomod dioti diri. Suvai i Amos om varo-ogi surat di mongimbulai di tudukan om i kobuatano dau. Amu anaru it usul di Amos. It ulun di pinatandon sid surat di tudukan di Amos o nakasasi sampai mangalapor sid F. 7,10-17, ombo i nemot om norongou dau sid Betel, mato kondiri dau o nokemot om nakasasi.

I Betel diri, 20 km kosoduo antad sid Yerusalim ponong sid Utara, nga nokosuvang sid kuasa di raja dot Israel Utara. I raja dino, i Yerobeam koduvo, TGM 783-743, nga sid Samaria it istana dau. Ino raja dino minangahatul di pomogunan dot Israel sampai kamaju banal. Nakagazo-no i pomogunan, hiza di Yerobeam, tu minongorumpak iosido dit ongobansa vokon sampai pinamung dit ongodaerah om ongobandar dioti sid dau do kuasa, ponong sid Utara om ponong sid Timur. Ahatul-no i gama midagang dit ongobansa vokon om nokolundu-no i razat. Rontob-nopo, siombo varo kanavahan, varo koluhungan. Ombo it ulun dit a-kamaju, nga nokosikim-no banal. Sabap sid gama midagang iadko it ongobansa vokon nokembulai sid Israel i vaza momunga dot utang om okiopud banal sid bai midagang, okonko gumama-po kondiri. Ombo i minananom dit ongokouvaan om totonomon, bai okudik ot ongoi dau dot it ulun di polombus di barang dau, nga agazo-no o kohuntungan. Kuran-ka, ong iadino o pomogunan, varo-naku ogulou?

Banal-no, i Imam Amazia minonuhu di kinambo dau pendongou di raja sid Samaria dot i Amos mongunang di daerah om hoturan di raja. Mad amu osusa-po do manarang dot isai i Amos, oronuw-no i Amos sid pomogunan dot Israel, tu i rupan dino bai mangarait, I Amos, iadino o gama dau,ka. Gam ino-no i boros di Amazia, I hoturan di Amos dino amu kavasa opudon sitid tokou, ka, mad amu agasan i pomogunan do mogning di boros om tudukan di Amos. Kagi, retanko di Amos dot i raja otinganu do sapadang om i razat dot Israel, nga ouripanon do sangod, ka.

Ino-no rontob, amu ipangahabal i Amazia sid di raja dit onsi di tudukan om bahanda dau, ino-no i Amos ponuhu do Kinoringan di poromut di boros om hukum do Kinoringan sampai pavalang di karaatan dit ongoulun dot Israel. Sampai aso boros di Amazia do kondiri di Kinoringan pentahan sid ulun di hukum dau dit a-milo-milo kosunu. Ino-no rontob o rupan di Amazia, Ino Amos dino mongunang di hoturan do pomogunan, ka.

Nelaan di Amazia dot amu nonong i gama dau mongoruput do bai it Amos o rinuput dau. Kakal-po i ponuhu dau sid tanga ralan kumaa sid istana di raja sid Samaria, kokiraai, sangadau mamanan om korikot-ogi, tu 50 km kosoduo sid Samaria, sampai ong banalko i raja monuhu dot sojal do manangkap di Amos, nga susuvab-ogi kadapat ioti rumikot sid Betel, mumbongut i Amazia sid di Amos do tomod manapul di Amos. Tinumoronong-no iosido sid di Amos dot olingob o gama sampai minongonsug di Amos mogidu, i boros dau: Pogidu siti, tu panambayanan om pomogunan di raja iti siti, ka. Gam manacadang i Amazia supaya i Amos monorou om nabi iosido sid Yerusalim, tu, ka di Amazia, ozi dati it ongoulun sori, ong ino boros di pakaraat di bansa dot Israel.

Kuran inot onsug di Amazia? mongoruput laid iosido di Amos om iri-ogi mad oupus ko oruol i ginavo dau, nga monuhu iosido di Amos mogidu, supaya amu atangkap iosido dit ongojaga di raja? Kakali kiniro di Amazia dot i Amos, nga banalnoko nabi iadko it ongonabi vokon. Tu i hiza diri, mad varo a-ko piro o nabi di mad karismatik retanko ioti kisundu om ioti mongimbulai di boros do Kinoringan. Dot i kogumuai dioti dino, bai misingnabi do tomod mansahari. Amu engin i Amazia dot atangkap i Amos om ohukuman-po. Boros dau, Ong engin-ko mokibalanja do nabi, osuhul-no ong sid Yerusalim, okonko sitid Samaria. Ong sori-no mumbongut-ko, gam ogojian-po dot ulun, ka di Amazia.

Na i timpa di Amos tanid. Ioku diti, ka dau, okonko nabi om amu-oku osusa-po do mokigaji ko mansahari. Ulu-oku do kikabun om varo ponsohorian-ku. Amu mangakun i Amos do nabi iosido iadko it ongoulun di misingnabi dot i gama dioti monorou bai tomod mokibalanja. Miuma i balanja-ku antad sid kabun-ku om i pangazam-ku. Ino tudukan-ku, okonko i dohon do kenginan om pongitungan ko ginavo-ku. 7,15: Kinodim-oku-no di Tuhan di manaud-naud-oku di bahananku do sapi. Boros di Tuhan: Pamanau-no mangahabal dit ongoulun dot Israel, ka di Tuhan. Ong kodung monuhu i Kinoringan, aso tenganan-po dot amu sumuhut, ka di Amos.

Na i vaza do Kinoringan mongodim om monguasa di Amos, kondiri di Amos manarang sid limo o kinasarahan dino (7,1-8; 8,1-2; 9,1-4). Onibak i gama di Amos monuturan, nga avalang banal i tudukan dau. I Amos okonko ulun dit otuboros. Suvaiko okuasaan iosido om mumbongut-ogi. Pengkaa dino it ongotuturan dino: **Pinipi-oku-no di Tuhan Kinoringan:** ino-no it inipi-ku. Buta mangavi dit butul, inot kakanan dit ongopangazam, hiza dot amu dumolid vagu i sakot. Ong iadino, rumuzou om lumikop i pomogunan, pangaazam om ulun di masi antad sid pangazam. Humongkob-nopo i Amos sampai mokisian di Kinoringan, sampai pinentoron di Kinoringan i hukum di iadino.

dot a-nokosongkuro, varo-no vagu kososorou dot apui di mangahandap do sompomogunan, himbaan, putanaon, om it ongovaig. Na mokisan-novagu i Amos, tu agazo o ginavo di Amos ponong sid bansa dau. Mad amu mangakun i Amos di hukum do Kinoringan om moniim mongorinding di bansa dau.(Ong i imam Amazia minomoros dot i Amos mangasau di bansa dot Israel)

om varo-no vagu kososorou, ino-no: asot handab ko hal di mangavi do pomogunan, ino-no, bai ponukung om ponulid di momorisa dot otulid om apapag i kuta: Kondiri di Kinoringan mongodim di Amos dot, O amos, nunu-no-ka it emot-nu? Kondiri di Kinoringan tumoguvang di Amos dot i Amos iseso sinod kabun dau. Onibak i timpa di Amos, Ponukung, ka dau. Iri-ogi manarang i Tuhan dot, Okudi, nga aso timbangon-ku (ong amu otulid ko amu apapag i kuta,) ka.

Iri-ogi i kaapat kinasarahan dit ono-no i kosondoto: Mavi-no i sukud di bansa-ku dot Israel, ka sampai sid kolimo o kinasarahan dino, Mominasa-oku dioti Ongoisrael, ka.

Suvai iadino o pangalaman di Amos dot aso tenganan sumaap ko dumahava-po, kogoos iosido pendongou dit ongoulun dot Israel dino kovosihan om hukum do Kinoringan. Ong varo momoros ioti dot, Amu otopot ino boros-nu dino, tu i Kinoringan monunda om manaud om manapul di bansa dau, iadko i hiza di sid Masir om sid belantara, ka, timpaon di Amos, Banal-neno, I Kinoringan manapul dikou iadko i manaud di sukul kadapat-po do songuhol o tulang di domba, ko songihing o tolingo-po, antad sid kabang do mondou, bai it okudik-po o nobi ot osopulan dau. (Ong i manaud do domba ong varo norungoi i sangkazu do domba ko kambing, tu mondou ko dupot dot orongit o minongorungoi, kakali osusa i manaud do manga-ganti di dupot dino, ong aso tanda sid palad dau dot iosido minagavi-no moniim manapul di pangazam dino. Iti-no sabap, song sukul songuhol o tulang ko songihing o tolingo, om kakun i sanganu dot okonko sala dau, ong orungoi i dupot.

Ino vaza di Amos mumbongut, atalahas-no dot uun do kampong iosido. Amu mamakai iosido dit ongopongoretan dit orongod. Valangon banal dau it ongohal. It ongolumundu di moub-loub sid ongotikam ko varo duvo, tolu o valai, ko it ongondou di momodrusuk- retanko di Amos, Sapi di dang Basan (ti it ongosapi do Basan, bansa do sapi di banalko olomu) Pakaraat i Amos di kobuatano dit ongosavo di montiri di songinakanan-nopo dot aso kovian antad sid gama mangavi di balanja dit mosikim i razat. Pengkaa dino i vaza dit ongoimam monuduk di kosipan, raatan di Amos dot, Siti-kou-no, rumikot sid Betel, om mangaraat-ogi, Sori-kou-no sid Gilgal, amung-kou-no sid karaatan do manahak do persembaan do sasarap... 4,4. Ino gama dikou sumambayang bai misingkavaro do Kinoringan, tu i gama vokon, banalko osodu antad sid kenginan do Kinoringan. Bai ngaran-no o gama dikou ponong sid Kinoringan. Banal-no, it ongoulion dikou, mogulu ioti arakop om iovit sid pomogunan vokon, ka di Amos.

Tinomod di Amos, Pemumui vagu dit ongoulun. Iti-no o sabap do mamakai iosido dit ongosuriban om suntuan di manarang di kobolikungo di bansa dot Israel.

Kuda-naku tumangkus sid soribau do rahat? ko

Elo-kou-naku mangaradu do kovotuvan? (6,12)

om it uva do kabanaran silihon dikou do pokizak om ompodus!

Iti-no i Amos, inot ulun antad sid kampong Tekoa, it osomok sid Yerusalim . Atalahas-no dot i gama di Amos pahabal sid ulun dot Israel, okonko tomod moro-boros, inoi nga aso tengana dua dot amu mamananau om mumbongut. Isai-nopo a-kadapat do monombol om potos di kabang di Amos.

2. I Habal vagu di Amos

Sampai i hiza di Amos, inusul-no it ongo pangalaman di bansa dot Israel murun-turun dit ongo generasi, ino-no i kinososizan dit agazo o kotulungan di Tuhan, inot ongotuturan dit ongoaki di bansa dot Israel om iri-ogi i kinolobusan dit ongoulun Israel ko Ibrani antad sid Masir om i kinarangkatan sid pomogunan do Kana om kuran ivaza do Kinoringan poromot di kenginan om hoturan dau sid dioti dino di kakal-po sid belantara ioti. Varo-no tafsiran di pinonuhuan do Kinoringan, varo-no longoi om ongoamarasan dit aralom o harati om varo a-ko piro ot tuturan di nabi, iadko i >Natan, hiza di raja Daud, ko i Elia om Elisa hiza di raja Ahab. Topot sampai i hiza di Amos, a-insan varo pongumpugan dit ongo bahanda do nabi sid buuk. Kagi, bai hiza di Amos om oubas-ogi it ongoulun mamakai do kulit do sapi bahagi ponuraton. Suvai i Amos om varo-ogi rekod di tudukan dau.

It ulun di minonuturan do kuran i imam Amazia minoniim do monunsub di Amos sid Betel, ino-no it horotizan dau.: I Amos mamahanda di korungazan di karajaan dot Israel om i karakapan sid pomogunan vokon. Suvai nokosunu kavi i boros di Amos diri om andaman-ogi sampai pinahu sid surat i bahanda di Amos, dotamu olingan dau dot i tinomod di Amos, okonko tomod mongohukum, inoi nga mongonsug dit ulun dot Israel muli sid Kinoringan. Kagi kondiri di Amos nokotiim sid tinoguvangon do Kinoringan do mokisian om mongorinding di bansa dot Israel. Hiza di tumimpun-ogi i Kinoringan mongodim om monuhu di Amos, magavi i Amos moniim do mokisian bahagi di bansa dot Israel (andaman ino limo inipi om kinasasarahan dau).

3. I vaza mongonsi di tudukan di Amos

It ulun di minangumpug om minanandon sid surat di sokoviai it ongoboros om bahanda om tudukan di Amos, amu elaan tokou dot isai om kuran i vaza dau mongumpug om popiamung di sokoviai it ongoboros dino. A-milo-milo, guluko i gama dau monurat, it ongoulun bai mihohondom-hondom dit ongoboros di Amos diri. Kagi i kogumuai i boros di Amos, oruhai ohondom, tu mad longoi di kilago ko varot ongosuntuan dit amu obingolangan. Iri-ogi it Monurat mongumpug om minonurat do kuran nakadapat iosido dit ongoboros dino. Ong i toku, ong engin tokou dot oruhai humarati di kogumuai di boros di Amos, varo mad limo o hal di

kembulai sino. Dot inot limo o hal dino amu sumuhut di fasal om ayat, inoi nga nosisit ino dino sid ongohal vokon. Iti-no o sabap moniim tokou do monodiri, isuhut di tajuk di boros om bahanda di Amos do pengkaa dino:

A. I kavazao di nabi Amos: 1,1-2; 7,10-17; 3,3-8; 7,1-9; 8,1-3; 9,1-6.

B. I Amos mangahabal di hukum do Kinoringan sid ongobansa: 1,3-2,16; 3,1-2; 9,7.

C. I Ammos mamajal di gama dot ulun lumundu di momogos om mangaladtak dit mosikim: 3,9-15; 4,1-3; 5,7-17; 6,1-14; 8,4-8.

D. I Amos mamajal di gama sumambayang: 4,4-13; 5,4-6; 5,21-27.

E. I Amos mamajal di gama dit ongoulun humarap sid Kinoringan om i karajaan do surga: 3,12; 5,1-3 om 18-20; 8,9-14; 9,8-15.

Ino Amos dino di minatai do 2700 toun gulu di tokou, kakali monuduk di tokou. I guvas dau napasa, topot i boros dau antad sid Kinoringan kakali mongohukum dot ulun, mamajal dit hal dit amu atag om moniim iosido potorongot om mangagazad om mongohatul dit ulun sumuhut vagu di kenginan do Kinoringan.

I Amos minamahanda di janji di Tuhan Yesus om i tokou di nakasip tokou sid di Yesus, kelo mamasa vagu dino boros di janji laid. Na sid saralom di boros di Amos opurimon tokou do kuran i gama di Amos manamod di bansa dau, sampai kuran i gama di Amos humungot sampai sumana, sabap gima i karaatan dot ulun. Ino kasanaan di Amos popuhondom di tkou dot, Ipat-ipat it ulun di mogidu sid tinoguvangon do samod do Kinoringan, konong di kasanaan om hukum do Kinoringan. i tokou nga anangan ino boros dau dino, ong amu atag i kobuatano tokou ponong sid koruhang om i vaza tokou sumambayang ko mongohormat do Kinoringan do bai ngaran mongohormat, gima ogumu ot ongokusas vokon moniim momorinta di tokou ko i kenginan tokou kondiri manarik di tokou sid hal dit amu kopionong di hoturan om kabanaran om kenginan do Kinoringan.

Sid Amos misingilo tokou dot i Kinoringan okonko bai asamod, inoi nga osusi sampai a-koho i Kinoringan dit gama dit aso tantu-tantu. I palad di Tuhan okonko baiko manangkama, inoi nga mongira om mongohukum. Iti-no sabap atag do mamasa tokou om mongining tokou di boros di Amos dino.

A. I nabi Amos om i kobuatano dau:

1,1-2: Isai-ka i Amos? Ulun do pasok Tekoa iosido. I kampong Tekoa 10 km antad sid Yerusalim ponong sid Selatan. Kampong sid ongoburul di pomogunan do Yahuda, pomogunan ino sid pialatan do konopuan dit avantang-vantang om i belantara. Okudik o darun om okudik o kokutadan. Baiko nunuk opud sino. Kisapi i Amos di piaraon dau sid butul, om it ongouva do nunuk utuon dau om pokorobon bahagi di dau dot akanon om jualon-po. I uva do nunuk miabal do koliabas, dot ong okorob, banalko omis om atahan ot akanon iovit sid panahon sid tangq do belantara.

Sera-kai i Amos najadi do nabi? Ino-no hiza di raja Yerobeam II, TGM 783-743. Iosido raja sid Israel Utara, om i raja sid Israel Selatan ko Yahuda, ino-no i Usia di mad kopihiza banal di Yerobeam. Sid saralom dino hoturan dioti dino, kembulai i Amos. Varo-po panarangan vokon, ino-no, duvo toun guluko i koguguzuan do pomogunan dot Israel. Manjadi hiza di minonurat i koruhang di Amos di sokoviai it ongoboros dino, kakali andaman dit ongulun dino kinoguguzuan do pomogunan, tu varot ongovalai di norungoi, varo-no ulun di nohoturangan do valai ko varo kuta di nihuzas-no i rinding do vatu. Iadino kodori i gama dot ulun manantu do hiza dot usul do pomogunan om bansa om karajaan. Duvo-po toun, om oguzu-ogi i pomogunan ot ontok di kinapangahabaran di amos. Suvaiko najadi-no i

boros di Amos om surat-an-ogi, tu mamanal di boros di Amos om mongo--lombus di boros dau sid muaki sampai sid di tokou. Iadino nakatandon i boros di Amos sid Kitab dot Ibrani om sid Kitab tokou. I tinomod dino, supaya it anganak om it ongotohudi misingilo sumuhut di boros do Kinoringan.

Varo boros sid Ulangan 13 dot, Ino-no i nabi antad sid Kinoringan, Amu momudut iosido, inoi nga i nunu-nopo i kapangahabaran dau, nga kosunu kavi. Sid kosunuan di habal imbanaran i nabi.

On i ngaran banal di Amos, ino-no o harati: I Kinoringan mongorinding di valai. I ngaran dino pavalang di kosipan di molohing di Amos sid Kinoringan.

1,2: Kogangau-ma iadko korud o mongohukum sid burul do Sion - sid valai do panambayanan. Sid Sion okiroon diri dot intoronon do Kinoringan (1.Raja 8) Antad sino mimbulai i gama do Kinoringan mongohukum di bansa dau, iadko mundohong o mondou om iadko korud. Ong mundohon o mondou, kendorosi it ulun sid kampong om sompomogunan. Okonko bai it ongopangazam ot ihimon di mondou, minsanko riniba, nga imporizon dau. Pengkaa dino, ong varo korud dot ologod, tikorosi it ulun do osorob o valai. Ino kinematan om kineningan di Amos ot hinorotizan dau i hungot do Kinoringan om i vaza dau mongodim di Amos. Notigog iosido sampai iduan-no dau it ongosapi om valai om savo om kampong dau, tu langkasai mangahabal sid ongoulun dot Israel, ombo i nakaharati iosido.

Antad sid intoronon dot osusi mimbulai i hukum do Kinoringan, mad barat dit alasu di polondihu dit ongobutul. Okonko baiko riniba ot onong di hukum dino, inoi nga sokoviai i vinangun rumundun i hiza di hukum do Kinoringan. Lumondihu i timpak do Karmel, ino tagad di banalko avantang. Sabap sid Karmel asarok dumarun (2. Raja 17 hiza di Elia). Ong mumbongut i Amos, okonko aralom o vaza dau manarang, inoi nga ombo it dau do pangalaman di suvab-suvab sid kampong dau, ino-no pakazan dau sid gama manarang om poromot di boros do Kinoringan. Asarok varo korud om gonit sid belantara, varo barat dot banalko alasu di monorob di sokoviai i mizau sid belantara, om asarok kening i Amos di dolou di mondou mintohong pendorosi di pangazam om it ulun.

3,3-8: I nabi ponuhu do Kinoringan, nga amu milo iosido do moku sid Kinoringan. I Amos manarang do nokokuro iosido nakapanau najadi do nabi. A-kavasa do mangamu di suhu do Kinoringan. I nabi iosido, varo sabap, iadko it ongohal vokon di suvaiko jumadi tu varo sabap, ino-no:

ulun suvai mivozo-vozo, ong varo janji laid.

monokuk i mondou om kikana iosido, Amu monoku om amu-po kemot do kana

suvai rumato it ombolog ong varo sopuk

suvai atangkap it dupot ong varo sulungan

suvaiko varo rumpak om varo suling di mangahabal di kosusaan do rumpak

suvai i Tuhan monuhu om ajadi-ogi do nabi.

Aso vazaan di Amos mangamu di suhu do Kinoringan. (1.Kor. 9,17)

Fasal 7,10-17: Okonko baiko mokibalanja o gama di Amos monorou.

Mongusul i koruhang di Amos do kuran i Amos minonorou sid Betel, sid panambayanan dit ulun dot Israel. Hiza do poginakanan om pesta ogumu it ongoulun sid Betel. Sinod umpug mongimbulai i Amos di bahanda do Kinoringan. Nening-po di Imam do kipangkat, nipahabal-no dau i raja do kuran i gama di Amos. I Amazia rinumonok di raja, tu i raja minamalanja di imam sino. I imam bai uripon di raja. Asot elaan dau do kuran sumuhut-po laid sid hoturan do Kinoringan om iri-ogi sid raja i kitanggung jawab antad sid Kinoringan.

Sid kobuatano di Amazia kaharati tokou do kuran o tokou ulun Kristian sid tanga do razat osusa monodiri dot ombo o suhuton tokou. Tu vokon-no ong asaap i hoturan do porinta i hoturan do Kinoringan.

I Amazia mongindoronok dara di Amos do tomod posunsub, nga amu ong i Amos, gam araat i boros di Amos ponong sid raja om i Amazia dino. Ong ikau rumonok di raja, i Kinoringan o pendorosi dikau. Oponso-no i valai-nu om i savo-nu nga jumadi do sundal di sangod. Amu otos i nabi, ong bai raja ko imam mongindorosi, tu iosido nabi, di nopili do Kinoringan, supaya kabang iosido do Kinoringan.

Sokoviai boros om habal dau, antad kavi sid Kinoringan. Amu monginud i nabi dot otibang it ulun mongining, tu mongolombus iosido di boros do Kinoringan om mongimbulai di kasanaan om hungot do Kinoringan.

7,1-9 om 8,1-3 sampai 9,1-6 Monginipi i Amos

Hiza di mad kopitoguvang i Amos do Kinoringan, inimitan-no dau do iadko inipi ko kososorou i butul di navi-no do butu. I harati di kinematan dau, kovian dit ulun mukabun om i manaud do pangazam. Tu ong butu mongorongoi do pomogunan, tantu aso koposizon dot ulun. Tu i pangazam om i kabun nga balanja dit ulun sid kampung. Ong aso susu antad sid sapi om onsi ko vulu do domba om aso kouvaan antad sid putanaon, tantu aso kopudan dit ongoulun do mosikim.

Ong onong i pomogunan do iadino, guluko it ongoulun sid bandar osusa it ulun sid ongokampung, ino-no it ulun do mosikim. Iti-no o sabap do kodung kaharati i Amos di iadino, mokisian iosido do Kinoringan. I Amos mongontok mindamo bahagi dit ulun dot Israel. Rumosi iosido do mavi i bansa do Kinoringan. Aso boros di Amos dumahava di karaatan om kasalaan. Baiko humarap iosido di kosianan do Kinoringan. Manjadi hiza dit amu-po nakapanau i Amos do tomod poromut sid ongoulun dot Israel di kenginan om hukum do Kinoringan, mongontok laid iosido di bansa dau, iadko momialatan om kabang dit ulun do mosikim, tu oupus iosido om kioruol di ginavo dau sampai orubatan-no dau i sokoviai i gama do Kinoringan mamasi om manapul om mangagazad sampai monunda di bansa dau do tomod mongumbasi dioti.

Iri-ogi nemot dau i apui di nisuhu di Tuhan. Ino apui dino mangavi di sokoviai i koposizan dot ulun, miabal dit ongobutu, nga lobipo ahatul, tu minsanko i vaig om ensanan i pomogunan, nga ahandabi. I harati, nokensomok banal i hukum do Kinoringan sid riniba, sid ongoulun, okonko bai sid ongopangazam. Mokisian vagu i Amos, tu i pongitungan dau, Amu kavasa dot i Kinoringan maananus di bansa di sinamadan dau, ino bansa dit antad sid di Ibrahim om i Yakub. Mongohondom i Amos di kovosihan laid di Kinoringan sid dioti, supaya osianan di Tuhan. Iri-ogi pantas i Kinoringan di hukum dino sampai amu kosunu ino dino.

Dot tigogi, varo-no vagu do mad inipi. Kondiri di Tuhan mimbulai do iadko tukang mamaitong ko muvalai. Sid palad dau i ponulid do tomod monukung do kuran i rinding do kuta, otulid om iseso asavat, supaya amu tiahaba om atahan i rindidng do vatu dino. Kodung atalahas dot amu otulid i rinding, mad tihaba, mumbongut i tukang dot, Huzason-ku ino, ka. Ino-no o horotizan di Amos, Amu pemozoon-po i Kinoringan di gama dit ulun dot Israel om i kasalaan om karaatan dioti, gamko mongohukum iosido dot okudik nga amu timbangon-po. I karaatan dioti, sumambayang dot okonko atag o gama. Mamakai ioti di vaza sumambayang do posurut di dau do tomodon om kenginan, mokiormat di kondiri om mokindazou di dau do kavantango om kosumbungo. Iti-no sabap dot i hukum ponong sid karaatan dino, ino-no i korungazan di panambayanan. I sala om i panala miabali om meradi. Mokisian-no dara vagu i Amos, nga tiniag-no iosido do Kinoringan.

Kavi-avi it ongoinipi om kasasarahan di Amos, iseso o harati, hukum do Kinoringan ponong sid bansa dau. Oemot-po di Amos, oduat-no iosido di Tuhan. Iri-ogi i Amos monodiri om tumimpa sampai i Kinoringan manalahas-po di tomodon om panangan: Mansak it uva. Mansak i bansa-ku, ka. Ong mansak it uva, banalko avantang o buatan. Topot ong notoliban-no, koduruk om masa i punti ko budui om it uva vokon. Minsanko parai, ong kodung mansak, suvai omoton koduruk om kanu-ogi, supaya amu orubat rumato sid tana. Na i kobuatano di bansa do Israel hiza di Yerobeam diri, banalko ohigak om aramai, osinang, tu ontok do kosinangan. Otori-no it ongosangod, ahatul i gama midagang do barang antad sid ongobansa vokon, kiringgit sid ongobandar antad sid kolokuan dit ongohasil dit ongokabun om pangazam. Rontob-nopo, i kosusaan do pomogunan, nga osusut sid ongovalai do mosikim. Ioti kiutang dot aso tenganan mangapus, aladtakan ioti dit ulun lumundu sid bandar. Nakasanda it ongotana dioti om it ulun, mad uripon-po dit ongolumundu. Sabap ino pongoretan dot, Mansak, harati, Oholian. Osomok di harati dot, Nansak (ulun ot oboros di mad mulau). Mansak = mad mavi i bansa, ka. Boros di Amos, Oduruk ong ino kosinangan om kohigakan sumiliu do mogihad, amu otinangan-po mongolobong, tu ogumu-no o matai. Amu asampat mongolobong, oromizas it ongobuntung sid pomogunan om asapai-po sid govuton. Ino iadino, ong sid ulun dot Israel hal dit amu-po opitiim om banalko araatan dioti. Sabap i buntung dit amu olobong monginsasakau di pomogunan,, kagi it minatai dit amu alabangan, nga ulun dit ahajangan di kosusaan dit aso katalib, tu minsanko i hiza di minatai iosido, nga asot intoronon dau, ka di pongitungan dioti diri.

Ong Kinoringan mongolumbatos dot, Mansak-no i bansa-ku, ka, atalahas dot i bansa dau dino kakali sid palad dau do iadko sasa om tanda di kokuasaan do Kinoringan. Kinoringan o nokelo do mongumbasih di bansa dau om iosido nokeo do mananus ko pada di bansa dau. Amu amalu i Kinoringan do mangagama di iadino.

Sid kovian dit ongoinipi, nga i valai do panambayangan om i pinadaha sid panambayangan dino ot emot om ososorou dau. Ino pinadaha dino, retanko pintoronon di kopioondusan do Kinoringan.(1. Raja 8) Sid pahada dino, a-kavasa do manabpo dot ulun, minsanko kisala iosido, ong kodung nakakavid it ulun di tinampaku di padaha dino. I harati, it ulun di kumavid di padaha dino, nokosuvang iosido sid kuasa om hoturan do Kinoringan. Bai i Kinoringan-po o kavasa mongohukum dit ulun dino, ka. Ong varo't ulun di minamatai dot ulun dot okonko tinomod, bai kahajangan ko kabambaran dau, iosido i kinumavid di tinampaku di padaha sino dino.

dot tigogi, suhuon-no di Kinoringan do bambangon ino padaha, supaya otipu-no i tinampaku. Ino-no o harati, Minsanko sid intoronon do kopioonduan do Kinoringan aso kobinsianan-po, gam sino mimbulai i hukum do Kinoringan. Aso kopiondusan vagu, aso kaadaan do kasalaan om karaatan, aso keduana. Ong i Kinoringan mongohukum, tantu tumalib i hukum dau di sokoviai i hukum do riniba. Sabap ong sid riniba, varo po tempat dot a-kavasa mongohukum. Topot sid Kinoringan, ong kodung iadino, atanus-no inot tempat dino sampai ensanan sid kobinasaan o rikoton. Mominasa, okonko mamasi o gama do Kinoringan, ong biano, ka. Ong i Kinoringan mongohukum di dau do piumpugan om bansa, tantu aso sunsudon-po ko sondihon. Mongohuzas iosido di sokoviai i harapan dot ulun di mogihim sid ugama om panambayangan do kosopulan. Kagi aso keduana antad sid toguvangon om kuasa do Kinoringan, sabap ensanan it riniba nga sid palad do Kinoringan. Iosido o minongurug om iosido ot elo mominasa kavi. I kovosihan do Kinoringan nokosiliu do kasanaan...ka di Amos.

Minsanko iadino i vaza di Amos mangahabal, moniim iosido do mongonsug dit ongoulun muli sid Kinoringan om tumorontog vagu sid atag o gama mongoguna om mongohormat do Kinoringan. Sabap suvai it ulun mamanal di gama do Kinoringan manala dit ulun sampai mangakun di karaatan dau sampai mokisian om mokiada di karaatan dau, om varo-ogi katagan om kemumuzan. Songkuro-nopo kalaid i Amos minangahabal, amu mengkod iosido do mongonsug om mongingut di iadino.

B: ISRAEL OM IT ONGOBANSA VOKON HINUKUM DO KINORINGAN 1,3-2,16.

I hiza di kinapanahan di Amos kumaa sid Betel, mangahabal di boros do Kinoringan sid ongoulun sino dino, ontok di poginakanan dot agazo. Iningutan-no it ongoraja dit ongobansa vokon, iadko it Ongomomogun kodori diri minongingut dit ongoosukod dit ongoakampung vokon sid dau do poginakanan, pamapakan ko moginum, supaya aramai i gama sumambayang sid rogon. Pengkaa dino, ong it ongoraja vokon mongingut di raja dot Israel, iosido-no o minamanau mamung sid poginakanan dioti dino. Tu varo kiroon dit ulun diri, Kodung tanid o pomogunan, tanid o kuasa antava kinoringan. On i Kinoringan dit ulun Israel bai ngaran di kuasa sid dioti, iadko i Dagon nga ngaran di kuasa do Pilsti. Nunu-nopo sambansa, varo kuasa du, ka dioti. Olingan-no dioti dot i Kinoringan monguasa di sokoviai, tu iosido o minongurug dit avan om i tana, sampai aso kuasa vokon tanidko i Kinoringan.

Manjadi sinod poginakanan di raja dot Israel o rikoton di Amos. Noumpug-no it ongoulun antad sid ongobansa vokon di sid mintutuk dot Israel. Sid tanga dioti mingkakat i Amos mangahabal di hukum do Kinoringan ponong sid nuu-nopo i gama dot ulun dit amu atag sid pialatan do razat dau. Ino duatan laid di Kinoringan sid di Kain, kakali pakazon do Kinoringan sid gama monodiri dot ombo it atag om amu: Banal-no ipat-ipat it ulun itanggung jawab bahagi dit obpinai dau. Pendongou i Amos dit ongoulun sino, ulun dot Israel om i vokon dot i Kinoringan kikuasa di sokoviai it ongobansa, okonko bai mongousa di bansa dot Israel, om mongohukum di sokoviai i karaatan do riniba. Ong varo karaatan, kening di Kinoringan it ogulou om ihad dit ulun dot osusa sampai monunda iosido dioti. Ong varo karaatan, onongon ioti do hukum do Kinoringan, ka di Amos.

Na ino gama di Amos poromot sid ongobansa di hukum do Kinoringan, mamakai iosido do vaza mangarait dit ongothal, iadko sid Buuk dot Amsal: Varo duvo, tolu o hal, ino-no it oholian, ko iti-no it kiguna banal.

Bahagi di turu o bansa, iseso tumimpun iosido moroboros, iseso o salaon, iseso o boroson do mongohukum. Pentahan-po laid i Amos dot i boros dau dino, okonko dau do boros, inoi nga boros do Kinoringan. Okonko dau do pongitungan, okonko dau do kenginan ko dau do tomodon, agaratan iosido mumbongut. Iosido bai kabang do Kinoringan om kabang di hukum do Kinoringan. Baiko momoros, tu poboros di Kinoringan. Kinoringan kondiri o momoros: dot pentahan dot aso timbangon om pavalang di sala dot ulun, iri-ogi i kosondoto di hukum do Kinoringan.

Mad mamakai i Amos do lago dit iseso o boros, bai i ngaran om i sala ogontian-no.

I tinomod sid gama dau mamakai di vaza dino: Ozi i Amos dot amu olingan it ulun dino boros dino. Ong asarok tokou kening dot ir-no ko iri o boros, oruhai ohondom, iadko longoi, bahul, tangon, kapamarasan dit onogogulu-gulu. Iadko it limo ot inipi dau dit oruhai mongohondom. Manjadi isai-nopo i nokening di boros di Amos sinod Betel dino, aso tenganan dot amu ohondom-po dot alaid.

Na amu enizo anaru i panarangan di sala om hukum sid ipat-ipat i bansa. Amu mangarait i Amos di sala keso om koduvo ko kotolu, bai it kapat o mamalang iosido, tu ino sala dino ot oholian, tumalib dit rontob do kotimbangan.

1,3-5 Damshek, i pomogunan di nakalabus antad sid hoturan dot Israel hiza dit anak di Sulaiman Rehabeam. Na i Damshek alaid-nopo mirurumpak do bandar Gilead do tomod monimban dara di pivolitan. Sid rumpak dino, it Ongodamshek mamakai di surud do basi, ong mongogusa ioti dit ongoulun do Gilead dot momunso dioti o tomodon. Ino surud dino di kitinarak do kuda, pakakas do momogos om mamatai do sangod. Ino pakakas dino okonko bai kapakai ponong sid ongokusai di mirumpak, inoi nga ponong-po sid ongondou om anganak. Iti gama dioti dino, oholian, tu aso hoturan ko koubasan do iadino sid nunu-nopo sambansa, ka.

Sabap ino, Kinoringan o mongohukum di karaatan di iadino.

1,6-8 Pilisti: Limo-no o bandar do Pilisti, ino-no Gaza, Asdod, Askalon, Ekron om Gad, ino bansa ponong sid rahat Tanga. Ontok di raja Saul diri, asarok ioti minirumpak dit Ongoisrael, tu engin ioti do pavaliu di volit ponong sid Timur.

Na i Daud minonori dioti sampai engkod-no i kasanaan i hiza diri. Topot otoliban i karajaan di Sulaiman, hinumambil-no vagu ioti sid ongokamong dot Israel om minonguripon dit ongouun sampai minongojuval dit ongouripon sid ongobansa vokon. Ino sala dino amu timbangon do Kinoringan, ka di Amos. Sabap i Kinoringan mongining dit kapagasan dit ulun dit inuripanan. Amu atag do riniba monguripon do riniba do mamakai dot ulun iadko pangazam. Isai-nopo i mangagama di iadino, ohukuman-no sampai opunso iosido, ka.

Kodung minomoros i Amos di iadino, opongo-po ponong sid iso o bansa, ogumu it ongoulun di noumpug sino, minamapap om minongimvantang di boros di Amos, tu katama iosido pavalang dit ongokaraatan dit ongobansa vokon. Bai it ulun dit antad sid Pilisti, nga osusa om rinaatan-no ino boros di Amos. Topot, sabap ioti bai otigas sino dino, asot elaan dioti mumbongut ko sumaap om potos di Amos.

Dot tigogi, mumbongut-no vagu i Amos ponong sid bansa vokon. Tiining banal it ulun dot, Isai-ka ong bianco? ka dioti sampai minotos-no ioti, supaya kening di boros vagu di Amos.

1,9-10 Turus: I bandar do Turus miniupakat di karajaan dot Israel. Iti-no o sabap dot i sala dioti sid ongoulun dot Israel, amu mongohondom ioti dot nokopijanji di bansa dot Israel. Amu atalahas do nunu banal ino vaza dioti dot amu mongoguna di kopiopinezan sid Israel. Mad minonolod ioti do kampong dot Israel om ponosuvang sid kuasa do bansa vokon, ino-no sid Edom.

1,11-12 Edom: I pomogunan dot Edom, nga kodung kadapat monguasa dit a-ko piro o kampong dot Israel, arat o hoturan sori, tu monibas dit isai-nopo it amu sumuhut di dioti do hoturan, minsanko ioti ong otopot, antad di hiza di Daud mad miobpinai dit Ongoisrael. Na i hukum do Kinoringan isuhut di dioti dot araat o gama.

1,13-15 Amon: I karaatan di bansa dot Amon, ino-no karaatan dit a-kopirongou sid pialatan do riniba, ino-no momunso di bansa vokon sid gama monobuk dit ongoondu di kitizan, supaya matai it anak dit amu-po kalandai. Sumana i Kinoringan di karaatan dit iadino.

2,1-3 Moab: Ong i sala dit Ongomoab, okonko sid ulun di mizau ot araat o gama, inoi nga it ongobuntung di nolobong-no, ukaton dioti om sorobon-po, mongunang dit ongopangalabangan. Ino dino, nga amu timbangon-po di Kinoringan. ka.

2,4-5 Yahuda: Varo kiroon dit ulun di mokintutun di Kitab, dot ino boros dino nokotohudi nakamung sinod ongoboros di Amos ponong sid ongobansa. Tau-ma ino. Ino-no ot atalahas, i Amos minangarait di sokovia i it ongobansa di mntutuk dot Israel om iri-ogi tumopik-po sid Israel kondiri. Sabap ino, sabap i Yahuda banalko osomok sid Israel, amu alazan ino pomogunan do Yahuda dino.

Banal-no, varo pitonidan ong i Amos mangarait dit ongosala om karaatan dot Yahuda. Opodok o sala, agazo o hukum, tu nelaan-no laid dioti do kuran i gama do Kinoringan mongontupat om monunda di bansa dau. Ino-no i sala dioti, amu mangasip ioti om amu kumavid di hoturan om kenginan do Kinoringan. Isai-nopo it osomok sid Kinoringan, okonko bai anangan iosido di samod do Kinoringan, inoi nga anangan-po iosido di rodus om hungot do Kinoringan, gima a-nokosuhut.

2,6-16: Israel: I kakal-po i Amos mumbongut ponong sid ongobansa vokon om i bansa do Yahuda, osinang it ulun do Israel om mongonsug-po di Amos do magavi mongohukum om mangaraat di kobuatano dit ongobansa vokon. Kakali aso-po kiroon dioti dot amu-po opongo ino boros di Amos. Aso pongitungan dioti dot i tomodon di Amos momoros-po laid ponong sid ongobansa vokon, bai vaza dau do mongogiang dit ongotolingo dit ongoulun dot Israel di noumpug sinod Betel.

Ong ulun dit elo manangon, kodung nopongo-no dau it iso tangon dit avantangan dit ongoulun, onining it ulun sampai tiining vagu do tangon ko tuturan ko suriban. Iadino it ulun dot Israel i hiza diri, osodiano banal do mongining vagu di boros di Amos, dot tigogi, Israel ot oborosan di Amos. Insan-po vagu tumimpun i Amos dot, Boros do Kinoringan, Amu-ku-no timbangon vagu i Israel.. tu tolu, apat -no sala dau... Dot ong sino, mangarait i Amos dot apat bansa o karaatan. Ong sid ongohukum vokon, bai it oholian, ino-no i kapat sala rinait di Amos. Topot ong sid Israel, mangarait kavi i karaatan, ino-no

mangapil, tu manala dot ulun dot abanal

monguripon dit ongoulun di mosikim do bai horogo do sampasang do tompa

mangaladtak dit ulun dit aso hak (i vaza mongorongoi do ngaran dot ulun)

m o n g u a s a d i m o s i k i m , p a s a n d a d i s u l u n g d a u ,

mongorugi sid gama mongohorogo di barang do mosikim om i vaza-po mamakai dit ongosundal.

Navalang-po i karaatan, Kinoringan mongimbulit di gama dau mangagazad om manaud om mongorinding di bansa do Israel, supaya oebas om osinang ioti, om kuran i vaza do Kinoringan popuhondom dioti di dau do kenginan om kovosihan,

6-8: ong mosikim, minsanko abanal it ulun, ohukuman iosido, tu it ulun lumundu mangapil di hakim. Topot i Kinoringan monunda di kabanaran dau sid bansa dot Israel. Minanahak iosido sid dioti do hoturan, supaya abanal i kobuatano dot ulun. A-kavasa monimban di kabanaran do Kinoringan. Ino kabanaran dino amu mimban-simban, isuhut di kenginan dit ulun di dikuasa. Manjadi ong asalaan it ulun dit abanal, okonko bai inot ulun dino ohukuman, inoi nga Kinoringan ot anangan, tu iosido mongorinding dit ulun dit abanal. Koubasan diri, ong varo hal sid pialtan do duvo it ulun, it ulun dot orugi ko aladtakan ko nunu-nopo o hal, nga poruput sid ongosukod di miumpug sid navaon do kuta. Iri-ogi it ulun di mongoruput manarang di ruput dau. Iri-ogi it ullun do lumundu di minonipu dit ulun do mosikim, elaan dau mangapil dit ongosukod, sampai it ongosukod tumabang dit ulun do lumundu. Iri-ogi okonko i kisala ot asalahan, inoi nga i mosikim retanko kisala sampai iamung-po i korugizan dau, tu osusa iosido do manahak do dawak ko barang vokon, retanko iosido minongorongoi di ngaran di lumundu dino.

Sid Israel varo hoturan antad sid di Musa dot a-kavasa do monguripon dot ulun di bansa kondiri. Na it ongokikuasa minogihim do vaza vokon di mad monguripon, bai amu minamakai di ngaran dino. Retanko kiutang it ulun sampai osusa iosido do gumama sid kilang ko kadai ko kabun dot ulun lumundu dot tomod mangapus. Sid gama di iadino, it lumundu minongolumbatos di gaji om i horogo dot utang dot mungkus-tungkus mad amu mavi it utang, tu sera-sera, varo't barang do ipovit dit ulun di gumaji sid dau dot inobarang dino, amahal hinaragaan sampai aso kopupusan dit utang dino. Sid gama di iadino, banalko orugi-no it ulun dot mosikim sampai aso vaza dau lumabus sid hoturan om kinuripanan dau dino.

Pengkaa dino i gama pasanda do barang dot ulun, minsanko it ongosulung dot ulun, onuvon dioti. Sabap asarok it ulun mokisanda do tomod mogihim do kosukupu do persembaan, sinod panambayanan o poumpugan dit ongokumut di nisanda, inanu dioti ongolumundu, dot ipangalapik di rinantai do panambayanan, supaya osinang modop-odop ioti sid panambayanan. I anggur dit ongomosikim, nga onuvon dioti, retanko ipangapus dot utang, om minum sid panambayanan sampai avuk ioti dot poginakanan do piumpugan o tomodon. Kagi varo-po hal vokon di nakaraliu sid ugama dit Israel sid Betel om sid Gilgal, inanu sid ongougama dit ongobansa vokon. Sid panambayanan varo-po ongkob do sundal, retanko sundal dit osusi, tu i gaji di sundal inanu-no do persembaan om balanja dit imam om i panambayanan. Na boros di Amos, okonko bai ino o karaatan dikou do varo kolonduvan dikou di iadino, it ama om it anak dau sompi-mamakai di sundal dino, sampai oholian orungoi i ngaran om kosusian do Kinoringan.

Noboros-no ino sokovia i karaatan dino, iri-ogi mangarait i Amos di gama do Kinoringan mamasi om manapul om mangagazad om monunda dioti. Aso bansa vokon nakadapat do kotulungan di iadino antad sid palad do Kinoringan. Iti-no sabap,

13-16 anangan ioti di hukum do Kinoringan. I Kinoringan mangajanji di korungazan om kobinasaan dioti dino:

I Amos mamakai dit a-ko piro o suriban do tomod manarang di gama do Kinoringan mongohukum dot Israel: Kurita dit oponu banal do parai sampai sisiri mutut it ongoruda, mungarak i kurita do titipu. It ulun di randavi tumangkus, nga aso tenganan mogidu, tu ingkosupan iosido. It ulun dit ahakang banal, kumugui. It mononsiou, nga tumalou, ong kemot di kahajangan dau. Nunu-nopo o sojal dit elo rumumpak sid dau do vaza rumumpak, nga aso tenganan tumahan-po. It ongoperkakas do rumpak, lomina, bilok, pana, topi do basi, aso guna kavi, tu alabasan it ulun mogidu dot aso sulung-sulung, tu moniim do mogidu. Ong alabas it ulun, tanda dot aso bahazan om amalu iosido dot oholian.

Na ino boros di Amos dino ponong sid bansa dot Israel, nening-no kavi it noumpug sid Betel. Varo dati ogulou dioti do moniag di Amos mumbongut. Varo-no ong it ongoulun do bansa vokon do mongirak, tu okonko bai ioti ot asalaan. Varo-no ong dumahava dino boros di Amos, retanko, aso kosusaan, tu i Kinoringan nga monunda di bansa dau, iadko i gulu diri. I Kinoringan o minomili di tokou. Kuran-ka dot iosido mangada di tokou ong bianco. Ino-no it ambat di Amos:

3,1-2: Banal-no ino, i Kinoringan minomili di tokou, tu ka di Kinoringan, ikou-no ot otutunan-ku do bansa-ku sid tanga dit ongobansa vokon, ka di Kinoringan. Topot ong bianco, boroson do Kinoringan dot, Ikou-no ot hukumon-ku sid tanga dit ongobansa vokon, ka. Amu opud i harapan dioti Ongoisrael retanko kodung nopili do Kinoringan, penlaid opili-no. Tu i Kinoringan momili om i Kinoringan pada do bansa, isuhut di kobuatano di bansa dino.

9,7: Iso-po o boros di Amos monimpa dit ongoulun dit amu minangasip di boros di Amos. Boros dioti, Aso keradon di Kinoringan i tokou om it ongobansa vokon.

Boros di Amos, Sid Kinoringan i bansa dot Israel iadko it ongobansa vokon, iadko it ongoulun dot etom (Kus), i nokentoron sid isan do belantara- ulun di okihi dioti ongoisrael, mad dupot kiniro dit Israel it ongoulun dot etom.) Ong i Amos, Aso bida ioti om ikou sid tinoguvangon do Kinoringan. Sabap i Kinoringan manahak di kovosihan sid sokovia i it ongobansa, om posinang kavi it ongoulun, it ongoisrael om it Ongopilisti. Kinoringan mangahatul di sokovia i it ongobansa. tu Kinoringan iosido di sokovia i it ongobansa.

Ino boros di Amos dino, atandas-no do hukum ponong sid Israel, topot ong ponong sid ongobansa vokon, mad habal do kovosihan, tu mimbulai i barakat, i najanji-no laid sid di Ibrahim, ino-no, ikau dino onuvon-ku do barakat bahagi di sokovia i it ongobansa, ka di Kinoringan sid Kinotimpuunan 12. Iti-no o kembulai sid a-ko piro it ongoayat diti:

1. I Kinoringan, Tuhan di sokovia i it ongobansa. Okonko baiko iso o bansa apasi antad sid kovosihan di Tuhan.

2. I volit sid pialatan dot Israel om it ongobansa vokon ohusasi, sampai kavi it ongobansa sid tinoguvangon do Kinoringan.

3. Antad sid Israel mimbulai i hukum bahagi di sokovia i karaatan do riniba, dot amu timbangon di Kinoringan i karaatan do tomodon oimbulai sid pialatan dot ulun.

C. I AMOS MAMAJAL DI GAMA DIT ONGOULUN DO LUMUNDU MOMOGOS DIT ONGOULUN DO MOSIKIM:

3,9-11: Sid gama di Amos porumut sid ongoulun di noumpug sid Betel diri, mamakai iosido dot a-ko piro o vaza mongimbulai di hukum do Kinoringan. Ong sid ayat dino, i Amos misinghukum iosido do mongingut dit ongobansa vokon, iadko Asdod om Masir, supaya ioti sumasi di pihukuman. Minsanko i karajaan dot Israel banalko opodok sid pialatan di ongogagazo o pomogunan dot Asdod om Masir, katama i Amos do onuvon ioti do sasi sid gama dau manala om mongohukum. I Amos iadko i peguam di mongorinding dit ulun dit orugi-no di lumundu. Tomod dau mongodim dioti, Sabap boros dau, Aso karaatan di iadino nokembulai sid tanga dit ongobansa. Kenginan di Amos, it ongobansa sumasi di gama dit ongoulun lumundu sid Israel mongorugi om mangaladtak dit ulun dit osibak o ngaran. Sabap iadino o gama dioti sid ulun do mosikim, osulian-no ioti dot it ongobarang dioti, arampasani.

3,13-15: Kodung nosodia it ongosasi sid pihukuman, kodimon-po di Amos it ongoulun do Samaria do mongohukum dioti. Minsanko mad oruputan ioti di Amos, gima i karaatan dioti, mongodim i Amos dioti supaya ioti sumasi kondiri di karaatan dino. Ioti ulun dit oholian osinang, tu olopikan it ongovalai dioti dot ongoikam dit amahal, ulun ioti di varo duvo om tolu o valai, i sid Israel om-po sid Damshek, tu hiza dot alasu sid Israel, varo valai do potungongizan sid koburuan ponong sid Damshek. Araatan di Amos i gama dioti mongimvavantang dit ongovalai antad sid kohuntangan dit ulun mosikim. Minsanko i panambayanan sid Betel, nga nokemot do kolundu antad sid gama mongorugi dit ongoulun. Iti-no sabap, i hukum do Kinoringan tumimpuun sid panambayanan om it ongovalai dioti, sampai ohuzas-no kavi. Na it ulun di minonurat dino boros di Amos dino, nakasasi-no sid tohudi dino korungazan, hiza di toun GM 722. Iri-ogi minanandon sid surat ino boros di Amos.

4,1-3: Sid tanga do razat Samaria varo't ongondou di linumomu om linumundu sid gama midagang. Iri-ogi momodrusuk ioti monginakan, makan, minum om mangaladtak dit ongomosikim. I retanko olomu, i Amos peradon dioti dit ongosapi di bansa Basan it banalko olomu o buatan. Mad arampus ino boros di Amos, amu osuau i boros dau, tu ulun do kampong iosido. Minsanko sid ongokusai do Momogun vokon-no ong varo vaza do momoros di hal do savo, retanko, i karud-ku, om i iadino. Na i Amos, iadinoi. Kagi sabap inot ongondou dino banalko oholian o gama mangaladtak om mangakan dit ongomosikim do pokurang i horogo dit ongodalai om parai ko anggur dioti om pasavaton-po i horgo di barang sid kadai dau, banalko aso guna it ulun do mosikim om aso kuasa, inuripanan tantu sid kuasa dit ongomidagang. Sabap ino, i hukum bahagi dioti miabal, tu iadko i gama mongotok do sada do mamakai do sarapang monusa dioti. Amu mogihim i Amos di boros dot orongod om oulud.

5,7-17: Iri-ogi posusaon di Amis it ulun di monipu di kabanaran, gumanti di kabanaran dot opoit, om mangaladtak di hukum dot atantu. Boros di Amos, Ong iadino, tantu amu konong sampai amu opud i bansa dot Israel. Aso kopudan do iadino. I hal do mongohukum sid Israel mangahatul di kopioondusan, ong sukul ahatul, kinumavid di Taurat sampai minogihim om minonginsosok dit ombo it otopot om amu. Topot ino gama dino nosimbanan-no dioti, sampai it apil om i mokiapil ot ulion di pihukuman. It ongolumundu minamangkat dit ongoulun di kenginan dau, iri-ogi ioti tumabang monimban di kabanaran do karaatan. Boros di Amos, Kavanit iti, opoit ong iti, ka. Na amu timbangon di Kinoringan ino korungazan dit ongoulun mosikim, gam iosido mangapad dioti om monuli di karaatan di nokonong sid dioti dino. I Kinoringan okonko bai mangahatul di darun om i sompomogunan, i sodop om it adau, inoi nga kakali mongontok om mangapad iosido dit ipat-ipat it ulun dit osusa. Ong otombol-no i kabang dit ongosasi dot amu pasasi ioti di karaatan, kondiri di Kinoringan tumanga om mangapad dit ulun dit orugizan.

Na i nabi, minsanko i habal dino atandas do hukum om manala, kakali mogihim i Amos di koulisan dit ulun sid Kinoringan. Kakali varo kotibangan muli om monimban di ginavo om gama, supaya apasi-kou-no. Kakali sianan-ogi dati di Tuhan i nobi di rurungan di Yusup. Baiko i nobi ot harapan di Amos.

6,1-14: I Amos mangahatul do mad pihukuman. Kodimon dau it ongobansa vokon do sasi kaananganko i kobuatano dot Israel. Minsanko sid ongobansa dit aso hoturan antad sid Kinoringan, nga amu oubas i kobuatano di iadino: I kosumbungo, ino-no, i kiroon dit Ongoisrael dot ioti asavat mantadko it ongobansa vokon om timbangon kavi di Kinoringan i karaatan dioti dino. Iadko it anak di banalko sinamadan dit ama ko it idi, banalko oruhai rumampus ko monimbaru do karaatan di suhulon di

molohing, tu i Oioi o ginama. Sabap i Oioi, nunu-nopo o kenginan dau, nga kadapat mangagama dot amu apajal iosido ko ohovudan om otiagani. I kosumbungo dioti dino, ioti-no it oioi do Kinoringan. Banal-no i hiza di Yerobeam II, i karajaan dot Israel o minonori dit ongobansa di mintutuk dot Israel sampai kiroon dioti dot ino hiza di iadino, nga sampai penlaid. Sabap ino, minagavi ioti mokihuhuntung sid gama midagang om mongumpug di kolunduo sid ongovalai dioti di nosukup kavi, minsanko it odopon, nga novotikan om kitimpaku di gading o ginama. I Amos mangarait di sokoviai i karaatan dioti, humiza dot opogos it ulun mosikim mansahari, supaya kemot do kopusan, ioti nga rumamai om magavuk sid ongovalai dioti om momusik-po om mongorompit om megol dot oholian i karamazan dioti dino. Banalko agazo i pitonidan dit kavazao dit ulun sid kampong i sid bandar (iadko Kota Kinabalu om kampong siti ponong). Na aso kiroon dioti sid bandar kananganko i kosusaan om korugizan sid kampong. Iti no o sabap, ikou sid bandar mogulu ouripanon om arakop sid sodu. Sabap i Kinoringan mangapad dit okugui (Kolobusan 22,21-27) om mangahaba dit ongovalai dit avantang. Ovion di Tuhan i bansa dot Israel, sampai bai hopod pihotuson-po o nobi. Iri-ogi kosiliu i longoi do mongorompit do lagu mogkorudu ong sukul varo-po ulun di mogkorudu. Sabap sokoviai i jumadi sid Israel, nga a-insan nokotiim i riniba, iadko i gama mangaradu di kovotuvan ko mintangkus sid soribau do rahat, sumako do kuda, ino-no i kabanaran nosiliu-no do pokizak om ompodus, om varo-po omungan, tu amu engkod i kosumbungo di retanko, notori-no dioti i sokoviai it ongobansa. Ambat di Tuhan, Antad sid Utara mimbulai do korosizan dikou di monunsub dikou, ka.

Ino-no it onsi di gama mamajal di kolunduo om kosumbungo dot Israel.

1. Ong mangahabal i Amos, okonko, tu mosikim iosido. Rontob-nopo, sabap ulun do kampong iosido, elaan dau i kavazao om kosusao dit ulun mosikim. Okonko i dau do kosusaan ot oimbulai sid bahanda dau, inoi nga nabi iosido do Kinoringan dit ozi ko amu poromot sid ongoulun di boros om hukum do Kinoringan. I Amos baiko kabang do Kinoringan.

2. Amu otomon i Amos hiza do mangahabal om mamahanda iosido di bansa dot Israel. Gamko osusa i ginavo dau momurimon di hukum do Kinoringan. Oruol-no i ginavo dau om kakali moniim iosido mogihim do katagan. Iti-no sabap amu engkod iosido mongonsug dioti muli sid Kinoringan om tumongkizad-po sid karaatan sampai kumavid vagu dit hoturan dot avantang, it antad sid Kinoringan.

3. Bai sid ulun do mosikim varo-po kosopulan om kedu an antad sid hukum dino.

D: I AMOS MAMAJAL DI GAMA DIOTI SUMAMBAYANG

4,4-5: I Amos moniagdi gama dioti sumambayang sid Betel om sid Gilgal. Gilgal om Betel sampai Dan om Berseba ot apat panambayangan sid karajaan dot Israel di nikengkakat hiza di Yerobeam I (TGM 930), supaya it ongoulun dot Israel amu mamanau-no vagu kumaa sid Yerusalim do tomod sumambayang om mongohormat do Kinoringan. (2. Raja 12-13) I Gilgal, tolu Km ponong sid utara antad sid Yeriko, ontok di kinotupakan dit ulun dot Israel sid Yarden, hiza di kinosuvangan sid pomogunan do Kana (Yosua 4-5). Tikid toun sumamba it ulun sid panambayangan dino, manahak do persembaan, persepulohan om i nisumpa. I Amos mamakai di kodim di Imam sid razat di mongumpug sid Gilgal om sid Betel, iadko iosido nga imami, dot i gama dau do iadino, bai varo-no ong mangagauk, varo-no ong mongindaraat. Sabap minsanko retanko: siti-kou-no sumambayang om manahak-po do persembaan, ka, kakali nakagavul sid panambayangan i kogumuai do karaatan: pangkat do siin sid ongomosikim, supaya ioti kadapat manahak do persembaan, nga ipasanda-po it ongosulungan om i nunu-nopo o harta dioti, dot ino barang dino suvai iuli sid sanganu, ong it ulun di kiutang mangapus dit impiro-piro kogumuo do horgo di siin di inangkat. Manjadi hiza di mamanau-ogi kumaa sid Betel om Gilgal, nosodia-no laid i gama mokihuhuntung sid kosikimo dit ongoulun do mosikim dit agazo o ginavo pasamba sid Kinoringan, ombo i kadapat ioti. Pengkaa dino i Amos mongimbulit di boros om tudukan di pandita ko imam di retanko, Iti-no o kenginan do Kinoringan, ka, tu, ka di Amos, ong otopot, it habal dikou om i tudukan dikou, bai kenginan dikou kondiri. Okonko i kenginan do Kinoringan o tomodon dikou sumambayang ko manambayang, inoi nga i dikou do kenginan ot mimbulai sid sokoviai i gama dioti sid ongopanambayangan. Aso boros siti dot ensanan a-konong ino gama sumambayang, tu okonko sid Yerusalim ino. I pandita minongogorot do varo persembaan, tu ino persembaan dino, nga dau do balanja om dau do koposizon; topot retan-no dau dot ino persembaan dino o mokiada di karaatan om kasalaan

dot ulun, iadko mangapus sid Kinoringan, ombo it a-nokonong sid kobuatano om gama diri. Na i Amos mangagauk dot araat o gama mangagauk: Avantang mokiada-kou do sala, supaya otoliban i sala gulu, timboruon-po i sala vagu, tu ino-no o kenginan dikou. ka.

4,6-13: Iri-ogi i Amos poromut sid umpug do limo o ayat do di Kinoringan di mongusul di gama ponong sid bansa dau. Ino limo ayat di longoi dino popuhondom dit ongoulun dot Israel do songkuro agazo o gama do Kinoringan mangagazad om mongorinding om mongopud om mamasi sampai manapul dioti. Ogumu o gama nokotiim i Kinoringan do posuhut vagu di bansa dau. Vitol dot agazo, koruzahan do pomogunan, gizok om butu di minangavi di totonomon om butul, rumpak om sojal di sangod do minonoruvang sid Israel om koguguzuvan do pomogunan di posorob om patana dit ongovalai. Iti kavi diti, mad asot ontok sid dikou, tu okodou i ginavo dikou. Sabap ino, sid ayatkonom, kondiri i Kinoringan magandaha minsamung di bansa dau. Rontob-nopo, okonko magandaha do mongumbasih, inoi nga tomod mongorungoi om mangavi di bansa dau. Sabap ino, atago-no dikou sumamung di Tuhan, ka di Amos om mongohodtol-po iosido dot isai i Kinoringan di momoros di iadino, tu mad kakali amu kasip ko rumonok ioti, retanko aso kosusaan antad sid Kinoringan, tu i Kinoringan o mongorinding om mangapad om monunda di dau do bansa. Amu mangada i Kinoringan dit anak dau di sinamadan, ka. Ino Kinoringan dino, ino-no i Minamangun, i Minongurug di sokovia, i mangahatul dit adau om darun om rahat om burul om sompomogunan, sid palad kavi dau. Ong amu muli i bansa do Kinoringan sid Kinoringan, songkuro-nopo o gama do Kinoringan mongingut om mongonsug dioti muli, iri-ogi i Kinoringan rumikot magandaha om posondot di kenginan dau, i ponong sid kavantango om i ponong sid korumaato. Sabap ino Kinoringan dino monguasa di sokovia, ka di longoi dino.

5,4-6 om 14-15: Mongohondom i Amos dit ongoulun di niumpuga sid Betel dot ombo i panangan sid panambayangan. Okonko i panambayangan o kiguna,, songkuro noronuw i ngaran di panambayangan dino (andaman i boros di Yesus sid Yahya 4, kananganko i Yerusalim), inoi nga i vaza mogihim om tumoronong sid tinoguvangon do Kinoringan. Tu iti-no rontob o kiguna. Intolu mongohodtol i Amos dot, Ihimo-okou-no dikou, supaya apasi-kou-no. (4, 6, 14) Mad mongolupu i Amos di duvo i panambayangan di sid Betel om Gilgal, tu i Betel (valai do Kinoringan o harati = jumadi do valai di rogon di mangavi di balanja: Ombuvitol om i Gilgal, nga =kigagal. Iadino o gama di Amos pakaraat di panambayangan dioti, dot ino duvo i panambayangan om i-po sid Berseba om sid Dan, nga hinatul-no di raja dot Israel, supaya it ongoulun dot Israel amu mamanao vagu sid panambayangan sid Yerusalim. Moniag i Amos mamanao sid ongopanambayangan dino, tu ino kavi dino, okonko intoronon do Kinoringan. Ong ino pongoretan >mogihim< nga asarok-no napakai ontok di gama tumoronong sid Kinoringan, mindamo sid Kinoringan ko mongoduat om mogkovosihan do Kinoringan. Kobaan dot it imam monuhu om mongonsug dit ongoulun do >mogihim di Tuhan, nga i Amos mamakai dino vaza maanancadang dit atag o gama: Ihimon-no dikou i Tuhan, ka. Ong ioti dumahava dara di Amos dot ino-no o boros: sid saralom dit a-ko piro nopod om hatu tinounan, nga nokotoronong it ongoulun dot Israel sid Kinoringan sinod Betel, om Gilgal om Dan om Beseba, nokokuro, ong biano, nga aso sino i Kinoringan? Ino-no i timpa: porisao-no dikou ombo i tomodon dikou sid Betel om sid Gilgal. Toduvo-duvo i panambayangan dino jumadi do pogun om intoronon do rogon. I kosusaan dit amu-po kembulai, nga varot ondig-ondig dau nokorikot, ino-no biano-no laid aso sino i Kinoringan. Sabap ino, i sokovia i gama dikou mongohormat om mongindazou do Kinoringan siti, borosuma, aso guna, a-korikot sid tinoguvangon do Kinoringan, ka di Amos. Nunu-ka i sabap dot i Kinoringan nokedu-no sino dino: ino-no, sid ongoulun dot Israel amu kopionong i gama sumamba sid Kinoringan, i hal do rohani om i hal do jasmani. I hoturan do Kinoringan, bai tinoud dioti ong sid rinuvang do panambayangan om ontok dit adau do sapat om i hiza di sumambayang, dot opongo-po om kouli sid valai, i hoturan do sandad riniba om i hoturan do mokisisiin om mokilulundu om mangaladtak do koruhang ot nokopud-no vagu. Topot, ka di Amos, amu-kou kadapat do potorongku di Kinoringan sid panabamyangan dau ko mamalud sid bai inot apat tapat. I Kinoringan monguasa di sokovia om tanggung jawab di sokovia i vinangun, om iosido, bai iosido o ovud do koposizan, aso vokon. Okonko it ulun mamasi di kondiri. Suvaiko i kovosihan di Tuhan mangahatul di sokovia i gama om pongitungan om umba dot ulun om atag-ogi. Minsanko iadino, kakali i Amos mongogorot dioti muli om monimban di ginavo om pongitungan om gama, supaya "apasi-kou-no" om mintoron vagu i Kinoringan sid tanga dioti dino (14). Kakali varo

harapon di Amos do varo vazaan mongiva dino hukum do Kinoringan. Baiko iso-po o ralan om iso-po o vazaan mangatag, ino-no: Ihimo-no dikou i Tuhan, ka.

5,21-27 Insan-po pomoros i Amos di kenginando Kinoringan kananganko i gama sumambayang. Okonko persembaan, okonko kogangau dot ongosundatang om nunu-nopo o kiuni, ko i gama mindolongoi om mingkuaya, inoi nga, ino-no i kenginan do Kinoringan, Kikabanaran iadko murulun i vaig dit aso kengkadan sid vosoi ko i kogumuai o vaig antad sid ovud dit amu obingasak.

I Amos tumimpa di gama sid Betel. Nemot-no kavi dau i kobuatano dioti sumambayang om mongohormat do Kinoringan. Kiroon tokou, i Amos tumanga di gama dioti sumambayang, iadko varot ulun di mingkakat hiza dot i pandita mengkhotbah ko i manambayang mangagazad minta dua. Tigogi, sino-no i Amos mumbongut om mamajal dit ongoulun. Hiza do mongumpug do persembaan, retanko aso guna ino iadino. Gam iadko kondiri di Kinoringan mumbongut: Asana-oku! Asakahan-oku! I hiza diri minonunu ioti do dupot, onsi om tulang dot i harati persembaan di rumikot sid Kinoringan, ong kodung i lizun numaik sid ponong avan, retanko i Kinoringan moningud dit avau dit persembaan dino, ka. Amuno! ka di Kinoringan. Amu tumorima i Kinoringan dino gama dikou manambayang om sumambayang. Mangamu i Kinoringan di sokovia i gama dioti miuumpug, mindolongoi, monguni dot ongounizon, ongokuaya, i gama minta dua om mengkhotbah. Ong di dioti do kiroon, ong ogumu it ongokuaya ko ongounizon, avantangan ong Kinoringan, ino gama milawan it ongokuaya ko it ulun di miondi om mangarazou do Kinoringan. Topot ong i Kinoringan: Kada-no iadino! baiko iso o kiguna: Ino-no o kenginan-ku...! aso vokon. Ong sid Kinoringan, bai iso o kiguna, ino-no, Kabanaran om katapatan. I vaza dit ulun mogihim di kabanaran sid sokovia, isuhut di pinonuhuan om it atag o gama dot ulun sumuhut om mongimbulai di kabanaran dino sid gama dau suvab-suvab. I Amos mamakai do suntuan bahagi di kabanaran om kuran ino kabanaran jumadi sid tanga di bansa dot Israel, iadko murulun i vaig do vosoi. Okonko bai palu, di bai torinsan-insan kivaig. Iri-ogi asak-no vagu. Ong vosoi, otiru-no banal i vaig dot amu obingasak, ko it ovud. Hiza do pangi om hiza do manangadau, iri-no ko iro kivaig sid ovud. Iadko i vaig pomizau di riniba sampai, ong okurang-no o vaig, banalko osusa it ongoulun, pengkaa dino, i kabanaran ot mongopud om mongumbasih dit avantang o hoturan sid pialatan dot ulun di dang Kinoringan.

5,25-26: Minsanko nakabasa tokou sid Buuk Imamat do varo hoturan antad sid di Musa kananganko i gama sumambayang om pasamba do persembaan do dupot, ong i boros om panarangan di Amos, mad tanid o harati. Suvai nokorikot ioti sid pomogunan do Kana om tumimpun-ogi i gama manahak do persembaan do dupot om ogumu o hal manambayang. Kuran-ka, hiza di nokosuvang ioti sid Kana om minanansanganu di pomogunan dino, nga minanansanganu-po di vaza dit ongoulun sino sumambayang om manahak do persembaan do dupot? Tu it ongotampat dit ongopanambayangan dit ongoulun do Kana, nga sino-no sid Betel om Dan, om Gilgal om Berseba? I Yesaya, iadino o pajal dau (Yesaya 1,10-17) om i nabi Mikha, iadino o gama mamahanda (6,8)

27: Iti-no o sabap dot i Kinoringan monunsub dioti sid pomogunan ponong sid Utara, sid sampaping do Damshek. Amu mangarait i Amos di pomogunan dot Asur, tu i hiza di Amos, amu-po ahakang i hoturan dot Asur dino. Bai i ponong sid Utara o binoros dau. Sori-no kadapat momurimon di kuasa dit ongotiningulun om gambar di pinokokinoringan dioti dino.

I hiza di tumimpun-ogi i Muhammad mangahabal di kenginan do Kinoringan sid Makka, banalko osomok i Muhammad sid tudukan di Amos sampai minananala iosido di kobuatano dit razat sid Makka. Rontob-nopo, asot ening tokou sid tudukan di Muhammad dot ino Kinoringan dino, kakali agazo o ginavo om gama potorongot vagu di bansa dau, mad riniba i Kinoringan do varo kohungatan om varo hiza dot oupus iosido om monimbang vagu dit ulun, suppayaya muli ioti sid dau.

E: I AMOS MAMAJAL DI GAMA HUMARAP SID KINORINGAN OM I HIZA DO PENLAID

3,12: Varo-no vagu ulun di dumahava di bahanda di Amos, retanko i Kinoringan amu engkod monulung om manapul di tokou antad sid kuasa do sangod, ka. Ponimpa-nopo i Amos, Banal-no-beno, I Kinoringan manapul om monindal di bansa dau, iadko i manaud do domba di manapul dit pangazam di

narampasan om norungoi dit dupot dot orongit, minsanko baiko i songuhol-po do tulang, ko bai sangihing ot tolingo-po o kasapuli. Tu navi-no i domba ko kambing dino. I manaud do domba di bai gumaji sid sanganu di pangazam, a-milo milo pemot sid sanganu do domba ino uhol do tulang ko ino songihing o tolingo, tanda do narampasan do mondou ko orimau, tu ino tanda dino sasi dot okonko iosido o minangakan di domba ko i domba bai natagak, inoi nga narampas dit orongit. Ong aso tanda do iadino, i manaud osusa do mangaganti di horogo do pangazam di norungoi-no. Boros di Amos, tumimpa sid ulun dino, Banal-no, i Kinoringan iadko i manaud do domba, magavi-no iosido manaud om mangajaga, minsanko avi-no i bansa dau do sangod, ong sukul kadapat, ino-po songihing o tolingo ko songuhol o tulang ot sopulon dau, ino-no i nobi dot Israel. ino-no rontob, nunu-ka o guna dinot nobi, ong bahagi di pangazam di narampasan. Ogulian-no vagu i pangazam, nga amu, sampai ino nobi dino, minsanko kakana, nga amu miuma. (Kolobusan 22,12: i manaud paganti di domba ong amu emot dau ino tanda dino). Gam i Amos mangagauk di mamakai iosido di boros dot, "monindal i Kinoringan di bansa dau". Tu ong baiko tolingo ko songuhol o tulang kadapat antad sid kabang do dupot, okonko monindal o harati. Antava, ong andaman tokou i boros laid di Amos dot i monukuk i mondou mad miabal di gama do Kinoringan mongodim om monuhu: kaluto ong bianco, i Kinoringan mad mondou om okon-nokopo manaud di domba, ino-no i bansa dau??

5,1-3: Ontok di boros di Amos sid Betel, banalko avantang i kobuatano di karajaan di raja Yerobeam. Aso kosusaan, aso sangod, lumundu i kogumuai dit ongoulun dot Israel, miabal asavat om osinang i Israel dit ongobansa vokon. Do tigogi, i Amos mindolongoi do mogkorudu. Sid tanga di koposizan olongoi di Amos i longoi do kapatazan. Olumpatiu ino gama di Amos o kiroon dit ongoulun di nokening di gama di Amos dino. Sid tanga do kosinangan mindolongoi i Amos do kosusaan. Popuhondom iosido dit ulun dotino kosinanan dioti baiko barat, sangadau-po om atanus-no. Baiko buatan dit okonko atantu. Ino-no it otopot, ka di Amos, kapatazan, okonko kosinangan, aso kengkakatan, aso kogulianan. I Amos mangarait dit Ongoisrael do retanko "sumuni", a-po otinganan, aso-po kogunaan, tu kakali baiko sumuni, dot tigogi, nokoliad-no sid tana, sampai matai. Ino-no i kavazao dit atantu. Amu-po oguna i Israel om matai-ogi, tu a-otinganan. I tana di kosinangan jumadi do tana do pangalabangan.

It ongoulun dot Israel hinumarap i hiza di Amos do mimbulai i karajaan do Kinoringan sid tanga dioti dino. Na boros di Amos, ino harapan dikou borosuma, asot onsi di harapan di iadino, tuamu elaan dikou i kavazao dit atantu. Minsanko kakali kobuatano dot mizau om osinang, ong sid tinoguvangon do Kinoringan, napatai-no dot aso kogulianan. Iti-no sabap nokopindolongoi-no i Kinoringan di longoi mogkorudu.

5,18-20: Varo-no vagu ulun di dumahava di Amos, retanko it Adau di Tuhan mongimbulai di kosinangan do pomogunan tokou, tu i Kinoringan pada di sokoviai it ongobansa vokon om pengkakat di tokou, ka. Ponimpa-nopo i Amos, Kada-no kiro dikou i iadino, tu, It adau di Tuhan okonko kosinangan, inoi nga otuvangan-kou. **Adau di Tuhan**, o harati, adau do penlaid, ontok di Kinoringan om kosungguvo do pomogunan om bansa dot Israel, i karajaan di Daud om i sumusuhut di Daud dino. Hinumarap it ulun diri dot i hiza di rumikot, i Kinoringan monori di sokoviai i t ongobansa om pengkakat di dau do hoturan sid tanga dit ongoulun dot Israel. Timpa di Amos, Araat i pongitungan dikou. Otuvong, orondom inot adau dino, tu adau do hukum di mavi di bansa dot Israel, sampai ino hukum dino antad sid Kinoringan, aso keduam dot ulun.

8,11-12: Ino hiza di rumikot-ogi, tanid-no o kavazao. Tu i hiza dino tiining dara dit ongoulun i boros do Kinoringan, mad tuliohon om vitilon do boros om kovosihan do Kinoringan dara, rontob-nopo, aso tenganan mogihim om mongining, tu a-kemot om amu kemumui sid boros do Kinoringan. Iadko i gama dioti mamananau sid Betel om Berseba om Gilgal o gama dioti mogihim di toguvangon do Kinoringan dot aso panangan, o gama dioti mogihim do vaza minsomok sid Kinoringan, nga atabanan i vazaan rumikot sid Kinoringan. Sabap it ongoulun dit nokotolikud sid Kinoringan, sera ong korikot dara i ginavo do miguli vagu, a-kemot do vaza vagu do tumoguvang do Kinoringan. Ogumu o gama do Kinoringan poromot sid dioti di boros om kovosihan dau, di minonuhu dit ongonabi, nga sinunsub dioti it ongonabi om pinavuk dit ongonabi ko mininiag dit nabi mumbongut. Iri-ogi, mogihim dara ioti do nabi om boros do Kinoringan, nga aso nabi vagu om aso habal antad sid Kinoringan. Sid karanggalan dioti ot

ohukuman-no. Imatai sid Zabur 74,9 om 1. Samuel 3,1: i hiza diri amahal i boros do Kinoringan, tu amu minongining it ongoulun, ka. Ong amu mongining it ongoulun di boros di nabi, iri-ogi i Kinoringan pentoron di boros dau sampai aso-no.

It ontok do kakali varo nabi, ino-no it ontok do kakali varo kovosihan do Kinoringan sid bansa dau, tu kakali i Kinoringan mogihim di katagan di bansa dau. Ong kodung aso nabi, nokontok-no i hukum Fasal 4,12 om 5,17. Ong kakali kinabi, kakali varo harapan dot okonko mavi tumanus! Iti-no i harati di "dati" sid f. 4,12

9,11-15: Mad kobuatano sid a-ko piro it ongoayat dino dot bai kotonusan-po ot elaan di Amos mangahabal om poromot, dot tigogi, kakali varo-po harapan, harapan ponong sid ongoulun di mosikim. I hukum dino baiko ponong sid ongo-kipangkat. Ino-no i habal di kiharapan: Varo-po ontok do muvalai vagu i Kinoringan di valai di Daud. I kinompuso di boros di Amos okonko kobinasaan, inoi nga mongimbulai vagu iosido do kovosihan bahagi di bansa dot Israel, ino-no it ongoulun dit osibak o ginavo om it atatap sid Kinoringan. Ioti dino retanko "nobi" do Israel . Ong sid 5,6 bai minongonsug i Amos dot, Ihimo-okou-no dikou, ka, om sid 5,24 minamalang iosido di kenginan do Kinoringan, kaluto ong varo katagan. Sid a-ko piro it ongoayat diti, atarang o gama di Amos mamahanda om mongintalang di hiza di rumikot: Tolu-no o kapamarasan di Tuhan ot oumpug siti. ino-no:

a) i gama mangatag di karajaan di Daud, iadko noboros-no laid sid 2.Sam.7, 12. ino karajaan dino agazo-no vagu sampai nokosuvang i kogumuai it ongobansa vokon sid hoturan di karajaan dino.

b) i pomogunan di kakali bai kiuva antad sid kapagasan gumama, sumiliu do tana sosogulian sampai it ongoulun di mananom, kakan di dau do kouvaan. Amu opogos vagu ioti dit ongoulun di mangaladtak om mangakan dioti dino. It ulun di mukabun dot anggur, iosido kondiri kenun dit anggur dau, okonko it ulun di monguripon dit ulun mukabun ko i manansanganu om minanakau di tana dau. Kagi, asapou i kouvaan dot aso kovian om kokurangan, ka.

c) Kinoringan kondiri monimban di kahajangan di bansa dau sid kosurupuvan sampai mangatag dit ongokuta di nohuzas-no om it ongovalai di nakatana sampai it ongotana om kabun di nokogovuton-no, nga iosido o rumilik om mangaradu sampai mananom di kouvaan om i vokon.

Sid bahanda om kentalangan sid kovian di Kitab Amos horotizan tokou dot i sokovia i gama di Amos poromot sid Israel di boros do Kinoringan, iso-no o panangan, ino-no, mongimbulai di kovosihan om samod do Kinoringan ponong sid bansa dau dit oholian tumolikud om tumohiang antad sid hoturan dau. Manjadi isai-nopo i pemozoon di kovosihan do Kinoringan, anangan i kohungatan om hukum do Kinoringan, ino-no i Kinoringan tumolikud dit ulun om bansa dino, supaya kaharati ioti do kuran i kopudan di sid tanga do kotuvangan, tu nokensodu antad sid kovosihan do Kinoringan.

KURAN-KA INO TUDUKAN DI AMOS BAHAGI DI TOKOU PCS?

I Yakub, obpinai di Yesus minamakai dino boros di Amos (9,11) hiza di miting sid Yerusalim (Usuran Rasul 15). I vazaan dau manarang diri, i tokou ulun Kristian songriniba nga noboros-no laid di Amos diri. I Israel diri anangan i hukum do Kinoringan, gima i karaatan dau om i gama tumolikud do Kinoringan. Topot sid di Yesus Kristus, otoliban i hukum om hungot do Kinoringan, nga kakali i sangkap di Yesus mad tanda di hukum do Kinoringan bahagi di sokovia i gama do riniba pakaso do Kinoringan. Iri-ogi i Yesus posuntu sid di tokou gorija dit atag o gama sumuhut om mongimbulai di kenginan om kovosihan om samod do Kinoringan. Iningutan tokou om inonsug do mogihim di Tuhan om mongining di boros dau. I riniba om ipat-ipat it ulun kemot sid tudukan di Amos, do varo duvo o vaza masi sid tinoguvangon do Kinoringan, ino-no i ponong sid kapatazan om hukum om i ponong sid kopoulosan. Kagi, sabap kisukud tokou do varo kovian om varo timbagos di mutud, varo rontob di gama tokou sumuhut om mamantau sid ralan dit otulid om i kirikoton. Tolu-no o hal mimbulai sid tudukan di Amos:

1. Kuran-ka kopionong it ongokosusaan sid tanga do riniba om i tinomod do Kinoringan mongurug om mongumbasih di riniba om vinangun? Ino kosusaan sid tanga do riniba om vinangun okonko bai nasip ko kahajangan di nunu-nopo, inoi nga gama om ginama dot ulun. Riniba mongorongoi om monusa do sandad riniba. Riniba mangakan om mangaladtak do riniba. Momogun momogos do Momogun om mongorugi do koruhang, kusai mangaladtak dot ondu om ondu mongindaraat do kusai. Nunu-nopo o

kosusaan om karaatan, antad kavi sid palad do riniba. Varo-no ong pialatan dot duvo ot ulun, varo-no ong ponong sid kondiri, varo-no dot i generasi gulu monusa di generasi sid tohudi, varo-no do suku bansa mangaraat di suku bansa vokon, varo-no ong lumundu mongorugi di mosikim, it akansang dit okugui om orukungi. Topot ino kosusaan kavi dino, riniba ko riniba o mongimbulai om mangagama, okonko antad sid Kinoringan. Sabap ino, atag dot it ulun Kristian momurimon di vaza do Kinoringan manala di sokoviai i gama di sumaap di kabanaran do Kinoringan.

2. Iri-ogi i Amos mongonsug om mongingut di tokou, supaya mongining tokou di boros do Kinoringan (3,1; 4,1; 5,1) Suvaiko i sokoviai i gama om pongitungan om gama mongumba di koposizan, nga antad kavi di kovosihan di boros do Kinoringan di mangahatul dit avantang o gama, ponong sid Kinoringan, ponong sid koruhang om sid saralom di tanggung jawab tokou di kobuatano om kavazao kondiri om i dang onkob tokou, om varo-ogi kopudan om katagan. Ogumu it ongodolou om pamarasan vokon moniim do poponu dit ongotolingo tokou do tomod manarik om mamalid om manansanganu di tokou, nga baik iso o dolou om iso o boros ot kiguna, ino-no i Habal do Kovosihan, dot ino habal dino okonko bai boros, inoi nga i Yesus Kristus kondiri. Iosido o Tuhan tokou, manansanganu di tokou, mangahatul di tokou suvab-suvab, om ozi iosido dot aso kuasa vokon o monguasa om monguripon di tokou mongovit sid ralan ponong sid kobinasaan.

3. Ikid tokou ulun, nga varo sukud om varo rontob. Isot ulun nga aso't elaan do songkuro alaid apasi iosido om sera mutud i timbagos dau. Bai iti ot elaan tokou, varo kovian. Manjadi ino rontob dino monuduk di tokou, supaya i tokou mangagama om mongitung om mokihatul di didino-no, supaya i sokoviai i gama om tanggung jawab nga kopionong di kenginan do Kinoringan. I tokou soumul-umul sid tinoguvangon do Kinoringan, hiza di modop tokou ko oposik om gumama tokou. Siombo-nopo, nga sid tinoguvangon tokou do Kinoringan. Aso gama tokou di pakaso do Kinoringan ko mongimbuhal om moguhang do Kinoringan, mongindaraat om mongusiba do Kinoringan, tu wakil om suntuan tokou do Kinoringan. Amu atagdo kiroon, Suvaiko sumuhut-oku di hoturan om kenginan do Kinoringan, hiza do lumohing-oku. Ong biano, amu-oku-po otibang. Mogihim-oku-po laid di kolunduo om kosinango di dato. Sid tohudi om muli-oku-ogi sid Tuhan, ka. Isai-ka elo do mongizap di sukud dau om mongumba do iadino. Pengkaa dino, i tokou PCS avantang ong mongitung do kuran o gama tokou ongopiumpungan om som-PCS do posurut di kenginan do Kinoringan, okonko bai hiza di toun 2000, inoi nga biano om suvab, di kakali tokou sid ralan kumaa sid hoturan om karajaan do Kinoringan.

(Iti pinanarangan di Amos nituduk-ku-no om nisurat-ku-no laid sid kursus ponulung Juni 1959)

I nabi Mikha

1. I Hiza di nabi Mikha

Ishut di tajuk sid Fasal 1,1 i Mikha dino nokohiza di raja Yotam sid Yahuda (747-742) om Ahas (742-725) sampai i raja Hiskia (725-697) do nabi iosido iadko i nabi Yesaya (imatai sid Yesaya 1,1). Ong sid ongohabal om bahanda di Mikha, iso o boros nga aso dot nokotimpun iosido mamahanda sid ongoulun do Yahudi. Suvai sid ayat 1,2 om mimbulai-ogi dot i hiza di kinorungazan di bandar do Samaria (TGM 721) nabi iosido sampai i Yeremia 26,18 manantu di gama do nabi i Mokha ontok diri.

I hiza di kitugas do nabi i Mikha dino hiza dot nogorunang banal it ongopomogunan sid Asia Barat dot minsanko it ongoulun sid Yahuda, nga nokorundun di kogorunangan dino. I kuasa dot agazo diri, ino-no i karajaan dot Assur di minomorinta om minongorodsit di pomogunan do Sur om Palistina. Ontok di rumpak do Efraim-Sur (735-34 TGM) noindoronok-po i karajaan do Yahuda (imatai sid Hosea 5,8f) di rumpak dino. Iri-ogi tinanus-no i karajaan dot Israel Utara do minsanko i kuta do Samaria di tolu toun kalaid tumahan di tentara dot Assur, nga nohuzas-no (721 TGM). Ino kavi dino manarang di kosusaan om kosompito di karajaan do Yahuda di hiza diri. Ong i raja Ahas di rinumosi iosido di kuasa dot Assur, gam sinumako sid karajaan dino sampai minokitulung dot Assur, supaya amu oporinta iosido do Sur om Israel Utara. Iri-po ginumanti dau, i raja Hiskia minongitung-no do mogidu ko lumabus antad sid upakat dot Assur.

Na i toun 720 it a-ko piro i daerah do Palistina miniupakat-no do sumaap di raja dot Assur. Topot i Hiskia amu minamung sid upakat dino. Iti-no o sabap do pongorumpak-no i raja Sargon di pomogunan do Palistina, amu-no nokorundun i Yahuda sid rumpak dino. Alaid-po diri, minongining-no sampai

sinumuhut-no i raja Hiskia dit onsug di karajaan do Masir, retan dot, ong sukul mitatabang om miupakat, adapat pahaba i hoturan om kuasa dot Assur, gam minongodurhaka-no ioti di TGM 713. Rontob-nopo, kodung sinumurung i tentara dot Assur ponong sid selatan, notori-no i kuta dot Asdod om iri-ogi i kuta do Gat. Ong okonko hinumago i Hiskia sumamba om sumako sid karajaan dot Assur, minsanko i Yudea sampai Yerusalim nga korundun-po. Minatai-po i raja Sargon, minongodurhaka-no vagu dit on gobansa di raja vagu sid Assur, ino-no i Sanherib. Gam i Hiskia ot ulion dioti sumaap di Sanherib, tu i kiroon dau, ong i raja vagu, ogumu o kosusaan dau do pozom dit on godaerah di karajaan dau, banalko amu kotibang momorinta dit on gopomogunan om daerah ponong sid Selatan. Na i Sanherib dino tinori-po laid it on gosangod dau sid karajaan dau di ponong sid Timur, iri-ogi toguvangai-no dau mongorumpak i pomogunan do Sur om Palistina. Pinogulu-no monori iosido di kuta do Sidon om Askalon, om iri-ogi kuta dot Ekron sampai tinori dau i tentera do Masir i minomohundungan dit on gopomogunan sino sumaap dot Assur. Antad dino, nokensomok-no iosido sid volit di karajaan do Yahuda dot oruhai o gama dau manansanganu om mangarampas do sampai 46 o kuta do Yahuda. Varo surat di manarang dot nasanganu di Sanherib it 46 o kuta sampai binahagi-no it on godaerah dino sid tolu o raja do Pilisti. Ong i Hiskia, sinumamba-no vagu sid raja Sanherib sampai avagat-no o hukum di Sanherib kananganko mangaratu do sukoi dit osusa mamarai sid raja dot Assur. Nembulit-no vagu dot i raja do Yahuda nakasako-no sid hoturan dot Assur. Bai i kuta-po om bandar do Yerusalim ot amu norungoi om amu notori.

Ino sokovia i kobuatano di iadino o minonusa di razat om it ensanan i hoturan sid bansa do Yahuda, okonko rontob it on gotana om on godaerah, ino-no i hal do politik, inoi nga banalko kinumugui-no i kosipan om harapan di bansa do Yahuda. Sabap nengkod-no i hiza dot i bansa do Yahuda, bansa di kihak om kingaran. Alaid-po diri, baiko i bandar-po om kuta Yerusalim ot amu otori. Tanid mantadko ino, nabahagi-no i kiroon om pongitungan dot on goulun. Varo ong hinumarap sid Assur, vokon-no ong sid Masir. Minioduw-no ioti om minamung-no i kosusaan di bansa do Yahuda dit amu kopongolumbatos di rikoton dau. Kinumugui-no i kosipan dot i Kinoringan o kadapat manapul om monunda dioti sampai nengkod-no i harapan do kuran-kuran orindingan ioti do Kinoringan. Antad di kogolivangan di bansa do Yahuda, o sabap di gama di nabi mongimbulai dit on gokarangalan om kasalaan om kobungahan sampai mongindorosi di bansa do varo hukum do Kinoringan, ong amu tumolikud it on goulun dit ralan dot araat om i kobuatano dit aso tantu-tantu sampai muli-no sid Kinoringan om sid vaza masi sid tinoguvangan om kenginan di Yahwe.

2. I nabi Mikha.

Minsanko i bahanda om tudukan di nabi Mikha amu miabal di tudukan om bahanda di nabi Yesaya, kananganko i hal do politik om i hoturan di razat, elaan tokou antad sid tuturan di Yeremia 26 dot kiguna i tudukan dau dino. Sabap i kogumuai di razat minongining om tinumorima di boros di Mikha. Gam sid hatu toun katalib, kakali pinohondom dit on goulun i gama om bahanda di Mikha.

Baiko iti ot elaan tokou, it inantadon dau, ino-no i kampong Moreset ponong sid Selatan-Barat do Yerusalim. Ino daerah dino nibahagi-no di Sanherib sid raja do Pilisti hiza di TGM 701. Kaluto ong i hiza di nakavaliu-no i kampong dau sid kuasa do Pilisti, nga kakali i nabi sid kampong dino. (1,9) Iri-ogi rinumungkap-no iosido sid Yerusalim. Sabap it a-ko piro o tudukan dau, mad sid Yerusalim ot pinahabaran.

I Mikha dino, mad ulun do mutanom om manaud do pangazam iadko i Amos. Iti-no o sabap do banalko avadsak o boros dau di mamajal di kolunduo om korusuko om kosumbungo om korumaato dit on goulun sid bandar. Ino boros om pajal dino mimbulai do kondiri di Mikha kipangalaman kananganko ino kobuatano dit on goulun sid bandar dot agazo.

Bai sid f. 3,1 om 8 momoros i Mikha kondiri. Na aso boros dau dot isai iosido om kumuro iosido dino. Oubas dati iosido di nabi Yesaya, tu i tudukan dau merad di Yesaya (imatai 1,10-16 om Yesaya 10,27 ko Mikha 2,1-5 om Yesaya 5,8...ko Mikha 5,9-14 om Yesaya 2,6...). Amu nakagavul i Mikha do rombongan do nabi. Sabap i hiza diri varot on gorombongan do nabi di minongintalang, ong ogojian-no ioti (3,8). I dau do bahanda om tudukan banalko tanid mantadko i vaza dit on gorombongan do mamahanda om mongintalang dot monguji om mongolumbok di kenginan dot ulun. Ino-no i boros dau:

Ioku diti, nengkansangan-oku di Tuhan. Nemponuan-oku di Sundu dau om kabanaran sampai katama-oku mamalang di kasalaan di Yakub om i karanggalan dit Ongoisrael, ka dau (3,8) Sid boros dino kembulai i tugas om i hak dau do manarang om mongimbulai dit ongokaraatan di kakal-po nokosusut. Okonko bai mamaraling ko bai mamading dit ongokraatan om karanggalan. Onsizon banal dau ombo it amu otopot om avantang dot amu rumosi iosido dit isai-nopo ko otero iosido dot ongoulun. Katama iosido tumoguvang dit ongokuasa do pomogunan om it ongolumundu (2,1..). Mamajal iosido di gama do mokimamaha om i kopongopilan dit ongonabi om ongoimam dit amu mongohondom di tugas om tanggung jawab dau (3,5) sampai sumaap iosido di vaza tumolikud sid Kinoringan om tumopik sid ongopinokokinoringan dit ongoulun do labus (5,9..) Monukung iosido dit ongoulun do mosikim om it aso ngaran. Ino gama di Mikha do iadino, okonko sabap dot iosido nga ulun do kampong, inoi nga nakaharati iosido di kenginan om kabanaran do Kinoringan, dot ino kabanaran dino o minanganu di nabi do kabang om ponuhu. Mad atarom i mato di nabi di minongintutun di kobuatano di bansa di humarap sid aso tantu-tantu, retan dot ong kodung mintoron i Yahwe sid Yerusalim, aso-not ikorosi di nunu-nopo, tu i Yahwe o i mongorinding om mongogrumpak do sangod, ka dioti (3,11). I vaza do sumondi sid tunda om kuasa do Yahwe di iadino o kasabap dot aso kiroon-po dioti do kodung nokopijanji-no do Kinoringan, okon bai i Kinoringan o monuluk di janji dau, inoi nga ioti-po kondiri, varo`t atag o gama monuluk di janji om taan sid Kinoringan sid saralom di kumavid di kabanaran om sumuhut di kenginan do Kinoringan. Iti-no o sabap dot i Mikha mongohodtol dot ombo o kenginan do Kinoringan dit atag o gama dit ongoulun di kenginan dau (6,8), ino-no:

Posurut-kou do kabanaran om i gama misasamod
om soumul-umul-kou sid tinoguvangon di Kinoringan dot osibak o ginavo, ka.

3. I Buuk di nabi Mikha.

Iadko i kogumuai dit ongonabi vokon, inot ongoboros di nabi Mikha niporongou laid dau sid razat om piumpugan. I hiza diri amu-po oubas it ongoulun humarap di boros di baiko surat. I hiza diri nokotitimpun dit ongoulun sid Palistina mamakai do kulit do sapi dot onuvon do ponuratan. I hiza diri ensanan it ongoulun oubas momoros om patandon sid ginavo di boros dit orongou. Gam sid vaza popuhondom dit ongotudukan sid ongolongoi om Zabur, tu oruhai mongimbulit om monuturan vagu dot ombo i norongou dit a-po ko piro`t adau ko minggu, gamko tinounan katalib, kakali iadko nakatandon i boros dino sid kasset. Mad songlinsou o boros nga aso`t atagak.

Amu atalahas dot i Mikha kondiri o minonurat dit ongoboros dau dino ko minongimuhun dit ulun vokon, supaya it ulun vokon dino o mongumpug om monurat di boros di Mikha. I buuk di Mikha di sid Kitab Laid, suvai nokembulai ong hiza sid tohudi-no banal. Sabap varo`t a-ko piro ot ongotudukan om ongobahanda om kentalangan dit okonko i Mikha o minomoros. Kagi amu atalahas sid buuk dino do nunu banal o hoturan di gama popiamung dit ongotudukan om bahanda dino. Iti-no i vaza di buuk bianco, dot i Kitab Momogun bai sampai sid Fasal 6,8.

Ong onsizon i buuk di Mikha, pengkaa dino:

- 1,1 I tajuk di buuk di nabi Mikha
- 1,2-4 Panarangan do rumikot i hukuman
- 1,5-7 Mamajal om mongindorosi dit Israel Utara, gima nokedu ioti sid Kinoringan Ino boros dino guluko i korungazan di bandar Samaria
- 1,8-16 Humongkob i nabi, tu orungoi i daerah Yahuda (701)
- 2,1-11 Posusa i nabi dit ongoulun lumundu di mokimamaha om mongorodsit
- 3,1-4 Sumaap iosido dit ongohakim di mokiapil
- 3,5-8 Sumaap i nabi dit ongomisingnabi
- 3,9-12 posusa dit ongoimam om it ongonabi sampai pentahan di korungazan di panambayangan om i kuta do Sion.
- 4,1-5 Pendongou i nabi di korikoton di karajaan do kopioondusan sid Sion miabal di Yesaya 2,2-4.

- 4,6-14 Pentahan i nabi di koulian vagu antad sid kinarakapan om i karajaan do Yahwe sid Yerusalim. (ino boros dino okonko antad sid Mikha, tu aso-pot elaan dau kananganko it arakop sid Babil.
- 5,1-5 Pentahan i nabi di kosinaan di raja vagu sid Baitlahim
- 6,1-8 I Mikha mongusul do kuran di Kinoringan mongoruput di bansa dau iadko sid pihukuman sampai manarang ombo it atag dara o gama dioti Israel.

Na a-nakamung sid Kitab Momogun ino-no

6,9-16 i nabi mongindorosi di gama mokimamaha om i gama monipu sid Yerusalim

7,1-7 humongkob i nabi, gima nakaraat-no banal i bahazan di bansa.

7,8-20 varo-po mad liturgia di nabi kananganko i korungazan do Yerusalim om i vaza mongingkakat vagu di kuta dino, merad dit bahanda di Yesaya 56-66.

Mad sid tohudi it ulun di mongumpug dit ongoboros di Mikha o minangamung dinot ongoboros dino, supaya hiza do mamakai i buuk Mikha sid piumpugan, okonko sid hukuman om kohungatan o kinompuso, inoi nga varo-po boros do harapan om imuhun di hiza di rumikot-ogi.

Na it ong surat di buuk di Mikha, vokon-no ong banalko apagon mongintutun dit ongohurup, tu mad natanus-no. Ong i Mikha sid Septuaginta kakali atarang. Iti-no o sa-bap do suvaiko nopongo i Septuaginta ong abad 3GM om rinumungoi it a-ko piro bahagi di buuk dino.

1,1 I tajuk dit ensanan i Buuk di Mikha merad i di Hosea 1,1 om Zefania 1,1. I harati, it ulun di popiumpug dit a-ko piro it ongobuuk di nabi minionuratdi tajuk dino, supaya osodiri dot ombo i buuk om sera o kinembulazan dit ongobahanda di nabi dino. Ong ulun di kohiza dit ongoraja amu monurat do iadino. Kagi, songlinsou o boros nga aso di manarang dot i Mikha o minionurat di buuk dino ko minionuhu monurat.

Iti-no ot olumbatos sid tajuk dino, ino boros dino, Boros do Yahwe. It inantadon di Mikha, ino-no kampong Moreset. I panangan di boros dino, ino-no i kuta do Samaria om Yerusalim, hiza di tolu o raja diri.

I harati di ngaran di Mikha, onibak, Mikhayahu, ino-no, Isai-ka i Yahwe? Okonko piro-piro ot ulun sid Kitab di iadino o ngaran. (Yeremia 26,18) I hiza diri asarok do varo ngaran di iadino o tomodon sumasi di kogo zoo di Yahwe dit iso-no om aso korompok. Minsanko i ngaran dit ama dau, nga a-noboros, baiko i ngaran di kampong dau. Ong amu narait i ngaran dit ama dau, manalahas dot i Mikha dino antad sid ulun di banalko aso ngaran, baiko ulun do kampong. Sid tohudi iso nga asot andaman di rurungan dau do notutul.

Ong varo boros dot inot buuk di nabi Mikha dino, Boros di Yahwe, ka, nga nakagavul-no do retani, Boros di Mikha, ka (3,1), ino vaza mangarait di buuk dino do boros do Yahwe okonko harati dot i Mikha bai kabang ko mikrofon do Kinoringan do polombus nimuhun. Ong i Kitab amu mongitung ko mongiro do iadino, okonko iadko i Silam di mangaharati dot i Muhammad baiko kabang do Kinoringan sampai kodung mumbongut-no i Muhammad, boros-no do Kinoringan o nokembulai om sumondot-no sid ongoulun. Ino-no o harati, ong i nabi mongimpa di kobuatano di razat sampai monoguvang iosido dit ongokalamahan sino, sampai ino boros om bahanda dau, jumadi do boros do Kinoringan. Ino-no o harati, i nabi, ong kodung mumbongut, tukitugas iosido antad sid Kinoringan, Kinoringan o mamanal om momihot di boros di nabi. It ulun di minongumpug dinot ongoboros di Mikha o minomungaranan di buuk dino do, Boros di Yahwe, supaya it ongoulun sid tohudi di mongining ko mamasa, kaharati dot ino boros dino okonko bai moro-boros dot aso tantu-tantu ko aso guna, inoi nga ongoboros di mongimbulai di katapatan do Kinoringan dit aso tinganan guvelon om piduoon.

Aso boros sino di manarang do kuran di nabi do nakadapat di boros do Kinoringan. Mad minionorou iosido dot a-ko piro o pangalaman. I Kitab Laid ensanan dot amu mongohodtol do kuran i boros do Kinoringan di nokorikot sid a-ko piro it ongonabi, minsanko varo om varo do iadko nepi om nosorou ko norongou iadko korud om nemot iadko gonit ko barat dot ololomoi. Okonko i vaza di korikatan di boros do Kinoringan o kiguna, inoi nga ino-no o sabap, varo boros do Kinoringan do monguasa di nabi dot aso tinganan dot amu sumuhut iosido (Amos 3,3-8)

1,2-7 I hukuman di kuta Samaria.

Itit a-ko piro ot ayat dino, boros do gulu banal di Mikha. Isuhut di boros sid 1,6, it amu-po norungoi i kuta do Samaria (721). Manjadi mamahanda-no iosido sampai monigagang di karajaan dot Israel Utara. Insan-no o boros dau ponong sid dioti. Mongonsug i nabi di sokoviai it ongobansa sid suvang do sompomogunan do mongining om sumasi di hukuman. Sid hukuman dino, kondiri di Kinoringan o mongoruput om mongohukum sampai manala. I nabi monuturan do kuran di Kinoringan sumondot sid tanga do riniba sampai mudou it ongoburul iadko rilin di kosubo sid apui. Koubasan dit ongonabi do mongonsug mongining (Amos 3,1.13;4,1;5,1; Yesaya 1,2)

Ensan i riniba ot okodim do sumasi di iadino (dot ong otopot, it ongoulun di niumpug hiza di momoros i nabi, a-ko piro hopod ko hatas ot ulun), ino-no o harati, Ong rumikot i Kinoringan, ensanan i riniba momurimon di gama dau ponong sid kosinangan om ponong sid korumaato. Aso kiroon di Mikha dot i Yahwe baiko Kinoringan di bansa do Yahuda om Israel, inoi nga i Yahwe monguasa di sokoviai, i minongurug dit avan om i tana. Atarang i kososizan di Mikha sid Yahwe. I Kinoringan o kumavid di sompomogunan om elo iosido do poguzu om pahaba sampai mananus di pomogunan.

Kondiri di Kinoringan rumikot om sumasi sid pihukuman. Asarok sid Kitab Laid ong Kinoringan mamung sid hukuman, sompi sasi om mongoruput sampai mongohukum om manala iosido, ino-no: mongovit di bansa dau sid pihukuman. Sid pihukuman pasasi iosido di karaatan om kasalaan om karanggalan. Iri-ogi mongohukum iosido om mongolumbatos di hukum sampai manala. Antad di kinapangan di panambayanan sid Yerusalim varo pongitungan dit ongoulun di miuumpug, dot sid gama dioti sumambayang om minta dua, kondiri di Kinoringan sumondot om rumikot sampai mintoron sid onkob di banalko osusi sid panambayanan. Monikid toun mongohormat ioti di kasandatan di Yahwe. Ino korikatan om kasandatan dino ot inanu di nabi do panarangan di korikatan do Kinoringan kopongohukuman, okon-noko kamarakatan-po di bansa dau. Iti-no o sabap dot antad sid panambayanan dot osusi mimbulai-no i Kinoringan om sumandad di bansa dau. Ino Kinoringan dino okonko kuasa di notorungku sid kema ko panambayanan, ko iadko it ongotiningulun om sinapi-sapi di Baal, kengkakat sid pinadaha dot amu minggura ko gumuzu, inoi nga ong korikot i Kinoringan, mimbulai i kuasa do do sampai mudou it ongoburul om mad vosoi dot apui di monorob kavi sampai lumata it ongonapu. Iti-no kavi i tanda di kuasa do Kinoringan om i katapatan di hukum dau.

Nunu-ka i karaatan do Samaria? Mamalid ioti, mongovit dot ulun sid karaatan, om i Yerusalim, nga iadinoi. Amu-no engat dioti i katatapo sid janji om o pinitaan sid Kinoringan. Okonko atatap, otitipu o kobuatano dioti iadko it ulun di mangakun do patod di koruhang, sid tanga-po do ralan povuu muli-no. I Mikha mongohondom di janji om taan do Kinoringan om i bansa dau do iadko upakat do mivozo di Kinoringan om i bansa dau. Iti-no o sabap do varo duaton dot, Isai-ka o mamalid? I Mikha mongoduat dot isai, okonko, nunu-ka o mamalid? Sabap i mamalid dino, ulun om ulion di bansa di nakaharati om nakakun sid janji om upakat sid Kinoringan. It ongoulun di mamalid elaan i karaatan om karanggalan, nga kakali mangaranggal om mangagazad sid karaatan. Iti-no it agazo o sala om karaatan.

Ong mangarait i Mikha di duvo it ongoibu kuta do Samaria om Yerusalim, mongonsi iosido dot i karatan mimbulai sid pusat, okonko sid koribing om sid govuton ko kampong. Iadko bianco, ong varot ongohabal, varo retanko Washington, Bejing, ko Moskow ko Kuala Lumpur om Kota Kinabalu, tu sid ongoibu kota dino o aratu dit ongokovosihan om hoturan ponong sid kavantango om ponong sid korumaato. Sid ibu kota kinapamanan it ongokuasa om tanggung jawab, it ongomangahatul om it ongomongorugi dit ongodaerah.

Noretan-po i kasalaan, rotuan di nabi do hukum i kuta do Samaria. Sid Yesaya 28,1

I Samaria o pinokomakota (antub-antub) di mamagavuk i tirisan sino. I kuta retan do kagavuldo kavul do kavut o kasavato. Na ino kuta dino obubukan-no, tu katana-no i kuta dino dot omusok om osohubuk sampai muntabul-no sid konopuan (i kinogomon do Samaria sid ompulongon iadko Yeriko).

Suvai sid ayat 7 om mimbulai-ogi i karaatan om karanggalan di bandar Samaria, ino-no, nogontian-no i gama sumambayang sid Kinoringan, isuhut di hoturan di Yerobeam diri, dit a-nonong-no laid (tu i Yerobeam pinengkakat do duvo o panambayanan, ino-no sid Betel om Dan, supaya it ongoulun di karajaan dot Israel Utara amu-no kumaa sid Yerusalim, dot sid ongopanambayanan dino varo duvo sinapi-sapi, retanko iti-no i suntuan di Yahwe, i minangagazad dit ulun Israel antad sid Masir porikot sid

Kanaan). Gam ogumu ot ongopinokokinoringan om gambal di Baal om Ashera, i duvo i pinokokinoringan di retanko mongimbulai di karanzatan om hasil do tana om kouvaan, tu mad kusai om ondu i pinokokinoringan dino sampai i suntuan dino, nga toli om turoi. I harapan dioti sid Samaria, ino tiningulun om ongotanda vokon, do vokon-no ong atandas dot amas. Varo-no ong rontob rinogupan dot amas, kohuntungan om kolunduan dit ongopanambayangan sino dino. Sid vaza dioti manambayang om sumambayang nakagavul-po i kadato dit ongoulun di pasok sid Kanaan, ino-no, ong i sumuni, suvai orompit di savo dau, ong apakai-np laid di bobolizan sid panambayangan di Baal ko Ashera, ko it ongokusai, ong mindamo do barakat bahagi di kabun om pangazam dau, mamarai-po sid sundal sid panambayangan, dot i horogo di sundal dino, dang panambayangan om kosukupan do pagama om dumagang dit ongotiningulun. Ogumu it ongovaza di pasok do Kanaan diri di retanko mindamo ko mongusaha di kopudan do ranzat om kabun om pomogunan ko pangazam. Na iadko i nabi Hosea diri, i nokogulu humarati dino karanggalan di bansa dot Israel, inompus-no di Mikha do palanta i karaatan dino sampai binahandaan-no ioti di hukuman do Kinoringan.

Ino hal diri, ong i razat dot Israel amu tantu kaharati di pitonidan di duvo ot ugama dino, i kosipan sid Yahwe om i pinokokinoringan di Baal om Ashera. Indoson dit ongoulun di nokorongkap sid Kanaan ong suvai sumambayang sid ongopinokokinoringan sid pomogunan di norikot dioti om khasil-ogi. Sabap ong it ulun do pasok minananom, varot oula di banalko ahatul. Topot ong it ulun Israel, inot ulun di noubas sid belantara - ong it ongoulun di nokentoron-po sid Masir, napatai-no laid sid belantara - amu-no kaharati mutanom ko i nunu-nopo o gama manaud do pangazam. A-no kaharati do kuran o vaza dot atag do mangasok ko monizas do gandum ko mananom do balatung. Sabap i sokovia i gama mutanom, suvai kopionong di musim om tana. (ong sid Sabah, amu oubas it ulun do mananom do balatung hiza do ponong sid tumonob i vulan, retan ong iadino, gizokon i balatung, ko ong mananom do runti, suvai tonob. Tu ong silau, a-muonsi, ka). Iti-no o sabap minongimpa it ongoulun dot Israel do kuran o gama dit ongoulun do pasok mananom om momiara dit ongokabun om pangazam. Indoson dioti, ong suvaiko sumusui di gama dioti sumambayang om mongoguna dit ongopinokokinoringan dioti, ino-no i Baal om Ashera om mopud-ogi i kabun om tagad. Kagi, it ongoulun do pomogunan laid, iadko i Yerobeam diri om it ongogumanti dau, tomodon dioti mamalid it ongoulun, tazonko amu kakaa i raza dot Israel sid Yerusalim mamung sori sumambayang. Vokon-no ong it ongoraja dot Israel minongonsug do popigavul dit ongougama dino (1. Raja 21,28...) Na it ongonabi iadko i Hosea om i Mikha pinentalang di kinopolidan dino sampai minanarang dot banalko olumbatos o gama pogili di kongkod di gama mangasip sid Yahwe, isuhut di pinonuhuan keso dot, Kadan-no sumamba sid Tuhan do tanidko ioku, sabap ioku-no (Yahwe) i Tuhan Kinoringan-nu, ka.

Na ino-no i hukuman, okonko rontob i kuta ot ohuzas om it ongovalai o katana, inoi nga inot ongotiningulun om sinapi-sapi ko i nunu-nopo o tanda dit ongorogon om pinokokinoringan dino bahagi di kapangaranzatan dot ulun om koulaan dit ongokabun om pangazam, ambambang om orungoi sampai atanus, om i norogupan dot amas (it ongonobi dot amas) osorob om anu di sangod. Baiko i horogo-po dot amas ot kiguna, okonko i gambal ko tiningulun. Iri-ogi kembulai-no dot inot ongotiningulun dino di mongontok di pinokokinoringan di Baal om Ashera, aso guna om aso kuasa. Tu palad do riniba o minangagama dino om palad do riniba o mongorongoi vagu, isuhut di kenginan dot ulun. Iadko i kososizan di Zabur 95 dot, I Pinokokinoringan dit ongobansa baiko gambal om kobuatano dit aso guna. Ong sid korungazan-no om kotonusan-no dino, alanta-no do banalko aso guna dioti dino. Na sid kompusan di boros di Tuhan (7f) Iri-no ko iri o kogunaan dioti, tu pangagaji dit sundal o posondot, ino-no kolunduan dot ulun sid araat o gama, pengkaa dino tumanus vagu i kolunduan dino. I karanggalan om kasalaan maganak do karaatan, ko iadko i boros di Paulus sid Rom 6,23 I kapatazan, ino-no i suul di karaatan om kasalaan. It ulun di monimbaru do karaatan rumungoi sid karaatan dau. Sabap i kasalaan mananom di korungazan om kobinasaan.

I hukuman di Yahwe okonko hungot do Kinoringan do bai humungot o tomodon, inoi nga kosondot sid karaatan dit ongoulun di minionimbaru do sala. "suul dit ongosundal", napakai-no laid sid Hosea 9,1 di minamajal di kobuatano dit ongoulun diri di momongizut sid panambayangan dit ongosundal, retan do iadino o vaza dioti mindamo do barakat di Baal om i Ashera, tu it ongokusai lobipo kogoos om nokelo do potizan di savo dau. Ong i horogo do mamakai do sundal sid panambayangan, iuli sid bobolizan ko

imam bahagi di balanja do panambayangan om it ongotiningulun sino. Sabap ong ogumu ot ongopongumpakai di panambyangan orogupan dot amas ko perak ko natandas o perak om amas, tanda diri do banalko ahatul i harapan sid Baal ko Ashera sino. Ino nga nohukum-no sampai momoros i Mikha dot inot amas dino, ong tinakau om rinampas dit ongosojal do sangod, apakai-no vagu dit ongosojal do mamarai dit ongosundal sid dau do pomogunan om rikoton. Antawa, inot ongotiningulun dit antad sid horogo dit ongosundal om i vaza dioti sumamba sid ongoBaal, ohuzas-no sampai orungoi-no.

1,8-9 (16) I longoi do humongkob i nabi.

Hiza di norumpak di Sanherib i karajaan do Yahuda sampai it 46 it ongokuta do Yahuda, nga nanu-no sampai nitahak-no sid kuasa dit ongoraja do Pilisti, sampai i Sanherib, nga nokorikot sid natad di kuta do Yerusalim (701), humongkob om mogkorudu-no i nabi Mikha di kosusaan dino. I harati, sid pialatan dit ayat 7 om valu varo labaan do duvo nopod tinounan. I hukuman sid Samaria, nokosunu-no laid om i sid Yahuda, nga nokotimpun-no. Iti-no o sabap dot i nabi kondiri mongupus om mogkorudu dot okonko rontob boros dau, inoi nga momuasa iosido om mononsulung dit ongosulung dot mongupus sampai amu monontompa, tanda do mokisian iosido do Kinoringan. I gama dau mogkorudu piradon dau dit uni do karagasu om i kurakok dot ombolog unta. Ong karagasu mongusig do tanga sodop do rumosi di vulan dot ovokou, ko it anganak di bugang di momizak, tu rumosi do koniu, ka di korudu di nabi. I sangod nokorikot-no sid lalavangon do Yerusalim, bai a-po nokosuvang sino. Dot iti-no o kovongovongo tokou. Ong sid ayat ka-8 kakali bai, Boros di Mikha, ka, topot ong sid ko-9, ka di Tuhan, ka. Kagi sid boros di Mikha, ong kotimpun-an, banal-banalko boros dau kondiri. Topot sid kovian, retan dot i Yerusalim ot intoronon di bansa-ku, dot i harati-ku, ka, dang Kinoringan, okonko rontob bansa di Mikha dati. Mad sid gama di Mikha mogkorudu om humongkob, nakamung-po i gama do Kinoringan humongkob, minsanko i kosusaan dino, nga antad sid palad dau, vaza dau do pengilo di bansa di karanggalan dau, supaya kemumui vagu ioti. Ino-no i kenginan di nabi, mongohodtol banal dot aso tinganan do mogidu ko tumolikud sid Kinoringan. It ulun di mogidu sid Kinoringan, a-milo-milo nga otoguvangan sid Tuhan sid pihukuman. Isai-nopo it amu tumorima di kovosihan om samod om tunda di Tuhan, a-milo-milo, nga anangan di hukuman om babambang di Tuhan dot aso tinganan mantas ko miva ko manangkis.

2,1-5 I nabi pentahan sid ulun do lumundu di lulupu do Kinoringan di mokilalaba.

Iadko i Yesus di pokosusa dit ongoulun do lumundu sid Lukas 6 dot, Sinusa dikou, ka o gama di Mikha pokosusa dioti t ongolumundu sid Yerusalim. ayat 1-2 mongimbulai di vaza dioti mokilalaba. Osvaban om asadapan aso pongitungan om gamaon dioti vokon tanid mantadko monipu om mokilalaba om mongorugi sampai monolod di barang om tana do koruhang. Inot ongoulun di manansanganu di kogumuai do tana, mad mangakup do tana, tu songkuro-nopo o varo, kakali amu-po miuma sampai mongitung do kuran kadapat do pamung-po vagu, supaya kosurut it ongovolit om ensanan it ongoulun baiko moniwa-po di tana dau, supaya iosido dino amu-no osusa mongumo ko mananom, inoi nga bai mongumpug-po di siwa antad sid hasil dit ongomoniwa. Vokon-no ong labaan do entanga i hasil o siwa. Kagi, kikuasa ioti do mongorodsit dit ongoulun dit opodok-no o tana. Iso nga aso kasaap dioti. Iadko i raja Ahab diri di minonolod di tana di Nabot. Retan dot i Nabot minongusiba do Kinoringan, dot ong otopot i raja ot araat. Iso-po o katagan sid ongotana diri, varo-no laid hoturan antad sid di Yosua dot it ongotana ipotungkus di turunan om rurungan dot a-kadapat pasanda ko ijuval antava itobus i tana sid pomogunan do Kanaan di nitahak do Kinoringan. Sabap ino, isai-nopo i monimban di hoturan dino, okonko rontob rumanggal di hoturan do pomogunan, inoi nga i hoturan dit antad sid Kinoringan. Sabap kenginan do Kinoringan, ipat-ipat it ulun kitana om kikoposizon antad sid dau do tana. Topot ong ioti, ong kodung nokemot dot avantang o tana ko avantang o valai, okuasa-no roloi sampai takahon om rampason-no dot aso-no pononggo-nonggo, tazonko anu dau i tana ko valai dino. Aso panarangan di Mikha do kuran i vaza dioti monipu om mangarampas. Miuma-no i panarangan dau do kuran dit ulun dit obebas dara, tu kivalai om kitana, tigogi, ouripon om arampasan dot aso-no hak dau mongohukum di minangarampas om minongorodsit. Tu i kuasa dioti opilan i hakim, supaya mamanal i hakim dit araat om manala dit ulun dit abanal. Na, boros di nabi, ino karaatan ponong sid koruhang om ulun di bansa dau tantu sala om karanggalan ponong sid Kinoringan. Tu antad sid Kinoringan i tana om tinungkusan di bansa dot Israel om Yahuda. I nabi mongontok om monukung dit ulun do mosikim om it ulun dit aso

ngaran om hak. Sid gama di Mikha do iadino, okonko rontob i hoturan di razat ot engin iosido mangatag, inoi nga i vaza di bansa do Yahuda ponong sid Kinoringan. Sabap i vaza ponong sid ulun vokon mongimbulai di vaza dot ulun ponong sid Kinoringan. Ong atag i gama ponong sid ulun vokon, tantu atag o gama pomong sid Kinoringan.

3 Monigagang i Mikha di mongolombus iosido sid ongoulun di boros di Tuhan: Antad sid lulupu dit ayat 1-2 mimbulai it tumigagang ioti. Iadko it ongoulun lumundu minongitung di karaatan ponong sid ulun vokon o gama do Kinoringan mongitung om mongumba di hukuman dau bahagi dioti dino. Manjadi ino kuasa di Kinoringan a-milo manangkis ioti. Ong it ulun mosikim diri a-kadapat manangkis di karaatan dit ongoulun do lumundu. Topot ong biano, ioti ongolumundu a-kadapat manangkis ko mogidu sid hukuman di Tuhan. Ong it ayat 3 kakali napajak manarang dot a-milo-milo ohukuman ioti dino. Topot sid ayat 4 varo boros do nunu i hukuman dino. Ong ioti, tu minangarampas dit ongotana, obokulianan ioti dot arampasan do Kinoringan sampai aso tana dioti om agauk-po ioti dit ongobansa vokon. It ongobansa vokon monusui di korudu dioti Yahuda, tu mangagauk om mangagasab. Ino boros dot, Ino hiza dino, manalahas do varo hukuman rumikot. Banal-no, okonko baiko it ongolumundu o nanangan di hukuman dino, i-pot ulun mosikim, nga nanangan-no, ino-no it ulun di kisala om it aso sala. Sabap i sangod amu monodiri dot disai do tana om disai do valai. bohogizon dau i sokovia i sid ongobansa.

ayat 5 mongohondom do varo hoturan laid, ino-no i hoturan do limo nopod toun dot ensanan it ongotana di nisanda ko nijuval, poulion-no vagu sid rurungan om turunan, sabap kenginan do Kinoringan do sokovia i it ongoulun, varo tungkusan do tana om bahagi sid kopoloson do pomogunan. Rontob-nopo, minsanko varo hoturan do iadino, nengkadano dioti sumuhut i hoturan dino. Iti-no o sabap dot oholian-no i kolunduo dit a-ko piro it ongoulun om ogumu-no banal it ongoulun di bai sumarung-po sid ongoulun do lumundu, moniwa di tana dioti. Iti-no o sabap dot i nabi mamahanda do varo hiza rumikot dot oulit-no vagu i hoturan laid diri. Rontob-nopo, suvai ouli-no vagu it ongotana dino sid bansa do Yahuda ong i hiza di notoliban i kinarakapan, om abahagi-ogi vagu. Topot ong it ongoulun di lumundu diri, natanus-no sampai a-no kadapat vagu do bahagi. Bai it ongoulun do mosikim o kakali-po sampai monungkus di tana isuhut di hoturan laid di Yosua (Ezra om Nehemia).

2,6-11 It ongoulun sumaap di nabi.

Nopongo-no i bahanda di sid ayat 1-5, toguvangon-no di nabi it ongoulun di sumaap di gama di nabi mamahanda. Kodung nakapamahanda i nabi di boros do Kinoringan sid ongorazat diri, varo-no`t ongoulun di tinumoronong sid Mikha sampai minomoros do iadko i sid ayat 6-7. Amu engin ioti tumorima di hukum om lulupu di Mikha. I dioti do ohorotizan, ugama banalko tanid. Mad aso kiroon dioti dot amu nokonong i gama dioti sumambayang sid Kinoringan ko sumuhut di hoturan om kenginan do Kinoringan. Iti-no o sabap tiiman dioti monombol di kabang di nabi. Tu ong i Mikha mongimbulai di karaatan dioti di mongorodsit dit ongoulun mosikim, kaluto ong it ongomosikim ong alaid-no mongodurhaka-no om sumaap dit ongolumundu.

Na i Mikha monuturan do kuran di gama dioti dumahava om sumaap di nabi. retan di Mikha ko osuradit o gama dioti momoros sumaap di nabi. Mad mihi-tihi i kabang dioti dot osuradit moro-boros kumodou di nabi. Ino pongoretan dino vokon-no ong apakai, ong varo nabi di monorou do mad rurundukan om vuvulazon. Na sid gama dioti do iadino, retan dioti ko nabi dit otugalak om odovurit. I tinomod dioti, pakaraat di nabi, ozi ioti pahaba om potos di nabi mamahanda vagu om mongimbulai di dioti do kobuatano di mangarampas om manakau om mangakup. Vokon-no ong iadino o gama dit ongoulun do sumaap di nabi ko i ponuhu do Kinoringan. Minsanko i Yesus diri, retan dit it ongosulun di sinumaap dot i Yesus okuasaan di Baalsebul, ino-no i vozon do rogon, tazonko orungoi i habal om bahanda dit ulun. Sid Hosea 9,7 om 2. Raja 9,11 varo i iadino. Topot i Mikha pouli sid dioti di gama dioti maanala om mangagauk di nabi. Ino gama dikou do pakaraat dohon muli sid dikou, okonko ioku ot anangan. Iku ot odovurit om osuradit. Na it ulun di sinumaap di Mikha dino, ino-no`t it ongoulun dati i narait sid 2,1-5. Kagi kenginan dioti dot okonko bai i Mikha o motos om mingkod mamahanda, inoi nga ensanan it ongonabi iadko i Yesaya om i vokon (Yesaya 28,9; 30,10...ko Yeremia 23,27..). I Amos nga iadino nosunsub om notoro dit Imam sid Betel (Amos 7,10).

Ino-no o kiroon dioti, Aso sumondot do hukuman do iadino, amu amalu i Yahuda, i bansa do Kinoringan. Gam moniim ioti momudali do nabi, retan dot i nabi ulun dit amu mangasip sid Kinoringan om i kolonuto om kodoromozo om kabanaro do Kinoringan. Misingtatap ioti sid gama manala om mongusiba di nabi, retan dot, Amu mongolupu i Knoringan di bansa dau, gam mamarakat-nopo di bansa do Kinoringan, ka, ko retanko amu-po nengkod, inoi nga soumul-umul mopud i barakat di nitahak laid sid di Ibrahim (kinotimpunan 12,1-3) Kakali momuruvak ioti dot ioti ot abanal om i Mikha o kisala, gima opiduvo o ginavo dau sid katatapo om samod om janji do Kinoringan, ka.

Iaditi it ongoulun di misingkosog om misingtatap om misingelin. Moniim ioti do mangasau om mongorongoi di ngaran dit ulun dot otopot. I Paulus, varo pangalaman do iadino sid Galatia. Kagi sid Galatia, nolumbok dit ongoulun sampai sinumuhut di vudut dit ongoulun di mongunang, retanko i Paulus okonko otopotko rasul om aso hak dau mangahabal di Habal do Kovosihan.

Na amu nendorosi i Mikha. Iosido dino mongohondom di janji do Kinoringan. Rontob-nopo, ino janji do Kinoringan sid bansa dau ponong sid kavantango om ponong sid korumaato. Ong aranggal i janji dino, it ulun di mangaranggal anangan di hukuman. Moniag i Mikha dioti do mamakai ioti di bahanda om janji do Kinoringan bahagi di kopioondusan om kabanaran. Sabap nengkod-no ioti do bansa do Kinoringan, tu nakalabus-no ioti sid hoturan do Kinoringan. Ino kobuatano dino manalahas dot ioti dino sangod do Kinoringa, okonko ulun-po di nakamung sid janji do Kinoringan(8). Okonko mongusiba i nabi di ngaran do Kinoringan, inoi nga ioti o mongusiba om mongolupu di ngaran do Kinoringan sid gama mongorodsit om mangaladtak dit ongoulun mosikim di dang Kinoringan. Ino-no o harati, i pongoretan dot Bansa do Kinoringan amu miabal di bansa do Yahuda ko Israel. Suvaiko it ongoulun di kumavid di janji do Kinoringan om i kabanaran dau om otopot-ogi ko ulun di bansa do Kinoringan. Pengkaa dino ong i nakamung-no sid bansa do Yahuda dino okonko hojimat di monunda om manapul dot ulun sid tanga do kosusaan ko pensodu do karaatan. Suvai antad ensanan o ginavo it ulun sumuhut, guvas om ginavo, om miuma-ogi sumuhut om tumatap sid tinoguvangon do Kinoringan. Okonko i bai ngaran do bansa do Kinoringan. Kodung varo`t iso o kobuatano dot ulun dit amu kopionong di kenginan do Kinoringan, ensanan it ulun nokedu-no om natagak antad sid kovosihan do Kinoringan. Amu kadapat do bai sambahagi sumuhut di kenginan do Kinoringan. Iadko ensanan dot Kinoringan o minongogiang di ginavo om kovosihan om samod dau ponong sid bansa do Yahuda o kenginan dau dot it ongoulun di nokosuvang sid janji dino monuli di samod om kabanaran om kosipan sampai jumadi do sasi om wakil do Kinoringan sid tanga do razat om pomogunan.

Linumbatos banal di Mikha i karaatan dioti, ino-no o tanda dot ioti dino sangod do Kinoringan. Ioti kondiri baiko minionuhu dit ongosolompok vagu om it ongoulun do mosikim do mozo sid rumpak, tu sumaap do sangod it antad sid pomogunan vokon. Ioti ot osusa mangajaga di volit dot opogos ioti pempatai. Ombo it a-korundun sid rumpak, ong kouli iosido, apagasan iosido dioti. sabap ong aso balanja dau om aso koposizon, tu sid rumpak gima dot amu-no kotibang-po mananom, osusa-no it ulun dino do pasanda di kurilib dau do manganu dot a-ko piro kakanan antad sid ongoulun do lumundu, minsanko iosido-no minangajaga di pomogunan, supaya amu osoruvang di sangod. Pongohuntungan-po dit ongoulun do lumundu it ongoulun di iadino kopogos sid rumpak. Navi-po i balanja dit inangkat sid dioti, isanda-no i valai dit ulun dino om sunsubon-no i savo om anganak dau, tu mangavi banal dit ongoharata om tinungkusan, ong varo-po. Retan dot dioti, it ongondou monginsasakau dit valai, tu varo sakit dau ko i kiadat iosido. Ino gama kavi di iadino mongisuba do Kinoringan. Sabap sid Kinoringan aso gama momingig ko momili di vuros dot ulun. Minsanko iso-no ot ulun do mosikim om osibak dot usibaon om kohizon, nga Kinoringan-no ot usibaon om kihizon dau. Sabap ipat-ipat it ulun koluu di kobuatano do Kinoringan om wakil iosido do Kinoringan. Manjadi ong otoguan it ulun, otoguan-no i hormat do Kinoringan.

Sid ayat 10 -11 insan-po do mumbongut it ongoulun di sumaap di Mikha sampai engin ioti monunsub di Mikha. Ponimpa-nopo vagu i Nabi, iosido dino okonko iadko i boros dit ongonabi di mokigaji do mamahanda do kosurupuvan o tomodon. It ongonabi do iadino o harapan dit ongolumundu, ovukon-po laid it ongonabi om ponorohon-ogi do kuran i hiza di rumikot-ogi. Sabap it avuk it ulun dino, bai sid tarak-po om kinomol ot andaman dit ongonabi di iadino kananganko i hiza di rumikot. Ino-no i koulaan dit ongokabun dot anggur di manapou it anggul om gandum, supaya kadapat ioti rumusuk om magavuk.

Banalko avadsak i boros di Mikha, tu engat dau do kuran di Kinoringan monukat di bansa dau, isuhut di kenginan dau om i katapatan dau. Sid kovian dino atalaahas dot aso tinganan monombol i kabang di nabi di manarang om poromot di kenginan om hukuman do Kinoringan.

2,12-13 It a-ko piro ayat dino amu-po nakamung sid Kitab Momogun, sabap okonko boros di Mikha iti. It ongoulun di minongumpug dit ongoboros om bahanda di Mikha di diri, hiza di sid karapan dioti sid Babil, nakaamung-po inot ongoayat di monuturan dot okonko ino boros di Mikha diri o kinompusan di gama do Kinoringan kumiboros om mamahanda di bansa dau, inoi nga varo boros vagu do pendongou dioti di kovosihan om kotulungan do Kinoringan, iadko i bahagi koduvo om kotolu di Yesaya (Fasal 40-55 om 56-66). Ong kamung it a-ko piro o ayat dino, okonko harati dot amu otopot ino bahanda di mongohukum i Kinoringan, inoi nga manantu om mangalapis-po dino hukuman dino. Rontob-nopo, manarang dot kakali i Kinoringan mogihim di kopudan om kosinangan di bansa dau, okonko i kapatazan om kotonusan di bansa do Yahuda. Iti-no o sabap dot ino bahanda dino konong sid di Yesus Kristus i minongimbulai di hoturan om vangun vagu.

3,1-4 I Mikha sumaap dit ongoulion di bansa do Yahuda.

Tigogi i nabi mumbongut kondiri sampai monuturan dot, Minomoros-oku, ka, ko Boros di Mikha. Iri-ogi it ongoayat iadko i Mikha o minomoros di mamajal om moguhang dit ongoulion. Tumoguvang i nabi dit ongoulion dit ongorurungan om turunan, inot ongoulun di kinumavid di hukum, kokiraai it ongoulun do makama. Sabap norungoi-no i karajaan dot Utara, retan ioti dot Israel om Yakub, ino-no i ngaran koduvo dot Israel, tu ioti nga bansa om rurungan di Yahuda. Mad nakasanganu ioti di garal di bansa dot Israel, retan do ioti-no nokotungkus di kuasa om hoturan antad sid di Yakub om Musa sampai Yosua om i raja Daud. It ongomangahatul om mongohukum (it ongohakim) insasakan di nabi dot, Okon-ka ko nelaan-no dikou i kabanaran? dot ong otopot, ioti minangaratu dot ombo it otopot om ombo ot amu do sid gama dioti dino minonipu ioti om minokiapil ioti, isuhut dot isai kadapat dumagang di kabanaran. Ong mongoduat iosido do bana-banalko nokelo ioti di kabanaran, okonko bai it ongohurup di kabanran o boroson dau, inoi nga it onsi om kongkod di kabanaran di mongopud di bansa dot Israel. Sabap i hiza dot i Kinoringan minangalabus dit ongoulun di retan dot Habiru ko Ibrani antad sid Israel, ulun ioti dit amu engat do kabanaran. Sabap sid Masir diri, iso-no o hoturan om kovosihan di raja Firaun, ino-no, i lalapos dit ongomandul di momogos dit ongoulun dit uripon dit ongoulun do Masir. Nakalabus-po, kondiri di Kinoringan o minanahak do hoturan do kabanaran, dot ino kabanaran dino monunda om mongontupat, supaya it okugui it ulun, ko i bituanon om usan-usan ko ombuvoi, nga amu-no aladtakan om amu-no orodsit. Enizo it ongoulun sid tinoguvangon do Kinoringan om sid tinoguvangon dot ulun. Okonko i ngaran ko i kolunduo dot ulun o mamanal ko manala dot ulun, inoi nga ombo it otopot om ombo-nopo it araat. Kodung araat, amu-no osodiri dot isai o minangagama om minonimbaru. Kodung avantang, amu-no monodiri do ngaran ko garal dot ulun. Tu i Kinoringan amu mimot di vuros dot ulun. Okonko it obunggazo om ahakang it ongoobpinai di Daud o pinili do Kinoringan, inoi nga it anak-po i Daud, do monori di Goliat. Ino-no it ompulalangoi dit ongoulun do Pilisti. Ino kabanaran dino o tanda dot it ongoulunsumuhut di kenginan do Kinoringan ko amu. Ong i Amos minomoros, Ozi ioti di karaatan om sumana ioti di kavantango (Amos 5,14). Okonko mamajal i nabi di vaza di nabi mongohukum dot a-nokonong i hukum dau, gima amu-po kaharati banal iosido ko aralom i kiis dino. Inoi nga mamajal iosido dit ongohakim om ongoulion, tu sid gama dioti mangahatul om mongohukum minogihim ioti di dau om dau do kohuntungan om kolunduan. Sabap isai-nopo i kikuasa, mamakai di kuasa dau do bahagi di dau do kosinangan om dau do kosurutan. Iadko it ongoosukod sid ongobinatang kodori. Kodung uzuw do mangasok, poguluvon-po i tagad dit osukod om iri-ogi i dang obpinai dau. Sid tohudi-no banal ong i dang ulun mosikim sid kampong. Ong sid tagad dit osukod, nokebo kavi om nokovoza kavi, topot pong it a-ko piro it ongotagad, malan-no it ongoulun, amu mibo, tu varo-no ong sumakit ko sangkut vokon o boroson, tu amu titabang sid tagad dit ulun mosikim. Ombo i tagad sid tohui-no, oko-noko saha-po. Manjadi amu-no opud. Ong i dang osukod om i varis dau nopud. Kagi i tagad dit osukod sid homburong o tana, ong i dang mosikim, sid kovotuvan. Na i nabi popuhondom dioti dit atag o gama di mongimbulai iosido di karaatan dioti.

3,5-8 I nabi tumoguvang dit ongonabi dit momudut om mamalid.

Vokon-no i nabi o momoros do iadko rundukan, vokon-no ong mamakai do borosoni banal. Inot ayat 5 nga boros banal monuturan. Sabap ino i vaza dau momoros, atalahas-no do tumoguvang i nabi di hal vagu, ino-no tumoguvang iosido dit ongonabi di misingnabi. Ikou, ka di Mikha.

Varo-no laid ongoulun sid bansa dot Israel di minorou om minongintutun om minongintalang di hiza di rumikot, bahagi dot toriso-isot ulun ko bahagi ensanan i kobuatano do pomogunan om bansa, retanko ulun ioti di borontuvilan, ko ulun dit norolongan di kuasa om Sundu do Kinoringan. Vokon-no it ulun dino, ong i tinumpuuni, banalko iosido dino ulun dit inanu do Kinoringan do ponuhu. Dot alaid-nopo, kalandu-no it ulun sid gama dau pentahan om mongintalang. Sabap nakaharati it ulun, ong pentahan iosido do karaatan om kosusaan, amu mongining om amu tumorima it ongoulun di kovosihan om habal do kosusaan dino sampai okudik, nga a-kadapat iosido do balanja. Topot, ong varo gama dau pentahan di surupu dot ulun, banalko tahakan dit ongoulun sampai ogumu it ongozon dau sid bahanda dino. Sabap ino, asarok i habal dit ulun dino isuhut di kogozoo do gaja ko suul ponong sid kosurupuan ko kopunavatan dot ulun. Ogumu o vaza dioti mongintutun sid gama popilai do vatu ko kazu, ko mangagaras do manuk om mongintutun-po dit atoi ko it ongotinai do manuk om dupot vokon.

Manjadi i Mikha mamajal di gama di iadino, tu onuvon do ponsohorian i gama pentahan sid ongoulun, tu ombo i kenginan dot ulun, retan dot ino-no i kenginan om bahanda do Kinoringan.

Aso boros di Mikha dot okonko otopot-ko orikatan ioti di suhu do Kinoringan. Baiko i gama dioti mokibalanja ot araatan iosido. Iti-no o sabap do momungaran iosido dit ulun di iadino do nabi di mamalid om momudut, tu minamakai ioti di tugas do nabi sid gama mansahari. Ong i nabi dit otopotko nabi di Tuhan amu mongitung di kenginan dot ongoulun, avantangan ko araatan ioti di habal om bahanda om nentalang dau. Sabap i tugas dau, ino-no, poromut sid ongoulun di kenginan do Kinoringan om i bahanda do Kinoringan. Topot ong ioti minonimban di katapatan do Kinoringan sid gama monorou, isuhut di harapan om kovosihan dot ongoulun.

Sabap ino, ohukuman om osulian ioti, isuhut dit akal dioti: Amu kadapat vagu ioti di bahanda do Kinoringan. Nakada ioti sid kotuvangan. Ong nokelo-no laid ioti diri mangaharati di boros do Kinoringan, nga tigogi, aso-not elaan-po tumimpa, ong mokintutun it ongoulun, sampai i gama dioti paharati di boros do Kinoringan, nga baiko misinghovoron-po iadko bolou di manarang di kobuatano di mato dot adau. Amu tumorima i Kinoringan di gama dioti mindamo do kasarahan. Kondiri di Kinoringan pedu dioti sid tugas.

Iri-ogi manarang i Mikha do kuran it atag o kobuatano di nabi, dot onuvon dau i kondiri dau do suntuan sampai pasasi sid dioti dit atag o gama do nabi (8). Ioku diti, ka dau, nengkansangan di Tuhan om nemponuan di Sundu do Kinoringan, katama-oku mongimbulai sid ongoulun dit ombo-nopo it amu atag. Okonko mokisisinang i Mikha. Ensanan i koposizan om koposizon di nabi, omboko i Kinoringan, okonko i nabi ot ossa mongitung om mongumpai. Kodung nanu it ulun do ponuhu do Kinoringan, amu-no mongitung iosido di kosinangan om kenginan dau kondiri, i tizan dau ko it ongkob dau, valai, varis, savo, obpinai. Iso-po ot engat dau, ino-no posurut di suhu do Kinoringan. Isai-nopo i kitugas do iadino, ong kakali monoririt-po sid hal vokon, kaluto ong varo-po vokon o kosuruto o pongitungan dau, inot ulun dino amu kopionong di kenginan do Kinoringan, tu okonko ensanan i guvas, ginavo, kakansangan, utok om pongitungan sumuhut om manamod do Kinoringan.

Sid boros di Mikha di iadino atag do momorisa it ipat-ipat it ulun Kristian di kitugas sid gorija dot ombo o posuruton dau, i dang Kinoringan om tugas dau dit antad sid Kinoringan ko dang pribadi, antawa kakali kopigavul i dang pribadi om i dang Kinoringan. Ong isuhut di Mikha, ino iadino o harati, apalid it ulun, tu kakali opiduvo i ginavo om gamaon dau sampai sumuhut iosido do duvo o sanganu (Matius 6,25-34) Isai-nopo i kitugas antad sid Kinoringan, atag ong amu-no mongitung di dau do kohuntungan, ko ngaran om garal, tu nasanganu-no iosido do Kinoringan (Galatia 2,20 om 2. Korintus 5,17 om Rom 14,7-9) Ong kakali kopigavul i hal do pribadi ko i gama mokindazou sid gama mangahabal di Habal do Kovosihan, kalandu it ulun dino, tu okonko i hormat om kendazahan do Kinoringan ot ihimon dau, inoi nga i dau do ngaran om i dau do hormat. Ino kososizan di Mikha dot isai iosido om nunu i tugas dau koluu di kososizan di Yesaya, kanganko i Minananggung di rumikot-ogi (Yesaya 11,2-4)

3,9-12 I karaatan dit ongoulion sid Yerusalim.

Iti ayat ko 12, Pinopuhondom i nabi Yeremia sid Yeremia 26,18, kananganko i vaza di Mikha monigagang dit ongoulion. Iti-no i nakabahanda laid di nabi Mikha it antad sid Moreset, ka. Ino kososizan di Yeremia dino manantu di boros laid di Mikha. Iadino i Kitab pasasi om pabanal di Kitab. Niogulu-no di Mikha patarang i sokoviai i kobuatano sid Yerusalim. Ino-no i gama mangahatul di bandar, notipu-no i kabanaran do Kinoringan om nikilong-no i kotulido di ralan sumuhut do Kinoringan. Ogumu o kiroon sid ongougama om sid di tokou ongokristian dit toriso-iso o sala, iadko manakau ko i kumiagai it araatan i Kinoringan. kodung mangarait di pamarasan do sala ko dusa, kiroon dot ulun dot inot a-ko piro o kobuatano dot ulun di iadino amu kopinong sid Kinoringan. Iad-no dino laid it ongoulun do Parisi om i guluko ioti, inot ongoulion sid Yerusalim, retan dot i sala, ino-no mosikim it ulun ko orukung ko kimai om bolou ko kakung om i kuran-nopo. Tu iti kavi tanda dot amu nabarakatan do Kinoringan, ka. Topot ong lumundu it ulun, retan dot lumundu antad sid sinurupuvan do Kinoringan. Sampai biano ogumu it ongoulun Kristian do iadino o pongitungan, retan dot ioti, i kosikimo dit ongoulun sid Asia om Afrika ko Latin-Amerika, tu ulun ioti o kisala. Dot ong otopot, inot ongoulun dino kakali amu-po kaharati do kuran di Kinoringan minonuhu om minongonsug, antad-no di Ibrahim (Kinotimpuunan 18,19) sampai sid ongonabi Amos, Yesaya, Mikha om i vokon dot iso-no o kenginan do Kinoringan om iso-no o ponukat dit atag o gama dot ulun, ino-no i kabanaran, ino-no, supaya otimbang i sokoviai i kobuatano dot ulun om i koopudan dot ulun. Aso lumundu, aso mosikim, miuma kavi, aso`t okurang, aso rumusuk. Aso mangaladtak dot ulun om aso`t aladtakan. Ipat ipat it ulun, varo dau do garal om dau do hormat, ong orungoi ino, mongusiba-no do Kinoringan, i minongurug om soumul monunda om mongontupat di sokoviai it ongoulun. Okonko it isai-nopo i kikuasa o mangaratu dot ombo it abanal om ombo it araat, isuhut di dau do kovosihan om kenginan, inoi nga it abanal, nosodia-no laid do Kinoringan. Ong riniba amu kadapat momudali om monimban di kabanaran. Sid hal diti kagi, varo sala di gorija, hiza di kodori di minisosolon do kuasa momorinta, nga engkod do mamahanda om pohodtol di dau do kabanaran. Niada di gorija i tanggung jawab kananganko i kabanaran sid gama mogihim do kuasa sampai monguasa dit ongopomorinta. Iri-ogi sompi apalid ioti miduvo. It ongopomorinta sid Europa, retan dot ioti ot ulion antad sid kovosihan do Kinoringan. Topot kakali minongitung dot ioti kadapat monipu ko momorinta isuhut di dau do kenginan, okonko isuhut di kenginan do Kinoringan, retan dot kihak ioti kondiri dit amu nakasahau sid kenginan do Kinoringan. Pengkaa dino it ongogorija minongindamo di kotundaan di raja om ulion sampai sinumamba i gorija sid kovosihan di raja, gima antad sid raja om ulion o balanja do gorija om orindingan i gorija.

Sid di Mikha mimbulai dot iti-no laid o panakit di bansa dot Israel. Minsanko it ulion do pomogunan, raja, ko osukod do kampung, ko imam om nabi, nga nokosuvang sid kuasa do Kinoringan om esnanan nokosokot sid kabanaran do Kinoringan. Iso dioti nga aso do kihak do pogili di ponukat do kabanaran, sabap i kabanaran nitarang-no laid do Kinoringan hiza di Musa (Kolobusan 20-23), ino-no, ombo it orukung om aso hak sid razat, ino-no ot otunda om orinding do Kinoringan om i pinonuhuan dau. Sabap ino, isai-nopo o monipu om mangaladtak dit ongoulun dit aso ngaran om aso hak, ino-no o mangaladtak di kabanaran do Kinoringan sampai monipu om mangaladtak do Kioringan. Amu nokonong ong bohogizon i retan do jasmani om rohani, i dang Kinoringan om i dang riniba. Sid kavazao om bahazan dot ulun mimbulai do kuran it ulun do kotoguvang sid Kinoringan. Minsanko it ulun di nokohakim, okonko kikuasa do monimban do kabanaran, retan dot iosido kumavid di hukum, inoi nga isuhut di hoturan laid do Kinoringan mamalang iosido di kenginan do Kinoringan dot amu monodiri do lumundu ko mosikim, ondu ko kusai, raja ko uripon.

Insanpo dino, i Mikha, it ulun do kampung, mamajal di kobuatano sid Yerusalim, tu i hiza di raja Hiskia ogumu it ongovalai ot ongovavantang pininggamaan, dot it ongoulun di minuvalai do iadino, minanganu di kosukupu dit ongovalai antad sid gama mongorugi dit ongoulun sid kampung. It ongohorogo dit ongototonomon om todotukon di nakatod-no sid bandar, banalko osibak o horogo. It ulun di midagang, minamajak dit ongobarang dino om minongojuval dot asavat o horogo sid ulun di mosikim di bai gumaji. Iri-ogi varo-no kosukupu dioti do muvalai dot okonko bai valai dau kondiri, inoi nga valai dit iposiwa dot ulun sampai sid valai di iadino, varo-no vagu kohuntungan. Nopogos it ulun do mosikim om i sid kampung do sampai naraha-no om nasaadan dot opogos. Iti-no o sabap do momoros i Mikha dot

muvalai ioti do govulon do raha i gama muvalai. Ogumu o gama dit ongolumundu diri monipu di kabanaran sid vaza monolod di tana dot ulun mosikim ko bituanon, retan do monulung dioti kabasaran dot ong otopot mogihim do pavazaan manganu dit ongotana dioti. I nabi okonko memot di kavantango dit ongovalai sid Yerusalim, inoi nga nakaharati dot okonko umos, noi nga raha o pinengkakat om pinoturidong dit ongovalai dino.

Ong itungo tokou biano do kuran dit ibu Kota Sabah, ino nga banalko avantang it ongovalai om tanda do kolunduo do Sabah nokengkakat sid a-ko piro toun di katalib, sampai mongoduat do siongo antad ino kolunduo dino, dot it ongoulun sid ongokampong, iri-no ko iri, mad aso kosurutan, sino dino mimbulai do minsanko biano, asot agazo o pitonidan hiza di Mikha di sid Yerusalim diri om i tokou biano. Tu ong i kolunduo sid KK antad sid kazu om umau tana. Nokokuro, tu a-ko piro ot ongoulun do nokelang sid kolunduo do Sabah, dot i kogumuai di razat Sabah, iri-no ko iri mosikim. Pengkaa dino i rontob Sabah om ensanan i Songmalaysia ko it ongopomogunan di nakamaju om it ongopomogunan ponong sid Selatan om Timur.

Ioti sid Yerusalim diri, iso-pot ot engat dioti, ino-no, mokilalaba om mangakup do barang om tana. Nunu sangkaraja ko tugas dioti, hakim, imam, ulion, osukod do pomogunan, raja, montiri, enizo o gama dioti mangakup om monongkudau. Kagi minamakai-po ioti di dau do hak sid ugama om sid porinta do posurut di gama mokilalaba om monongkudau, retan dot ino gama dioti dino antad sid kovosihan om tunda do Kinoringan (11): Kakali sid tanga tokou i Kinoringan, ka.

Iti-no o sabap, dot i Mikha pentahan di hukuman do Kinoringan, ino-no, i kuta do Yerusalim om i Sion jumadi do tagad om ranahon dot roduson om ensanan it ompulogon do Yerusalim, nga jumadi do himbaan om govuton. Okonko noboludan om nokokogos sid panambayanan do Yerusalim i Kinoringan, do iadko i gama dioti manansanganu do Kinoringan om mad mamalud do Kinoringan, inoi nga oebas i Kinoringan do pengkakat om mongohuzas, mogkovosihan om mongohukum. Na ino boros di Mikha di iadino, hatas toun nakatalib, kakali mongohondom it ongoulun di boros dino, sampai i Yeremia di sinumasi di boros di Mikha, nga nosopulan-no iosido sid pihukuman, tu nembanaran iosido di boros di Mikha (Yeremia 26,18...)

4,1-5 I Karajaan do Kinoringan di dang kopioondusan.

Iadino avagat i bahanda di hukuman do Kinoringan bahagi Yerusalim. Topot tigogi varo boros om kentalang do pentahan di kosinangan di rumikot-ogi. Noboros-po dot it ompulogon do Yerusalim humimbaan, do tigogi, kiboros-no vagu dot ino ompulogon dino jumadi do tempat di karajaan do Kinoringan om ibu kota di karajaan dino. Gam inot ompulogon dino jumadi do tempat om rikoton di sokoviai it ongo bansa. Gam antad sinod burul om i panambayanan di sid timpak sino o mimbulai i boros om habal do Kovosihan sid sokoviai it ongo bansa om i songriniba.

Nokokuro, tu iadino kagazo do pitonidan di Fasal 3 om 4? Kuran-ma diti, tu iri-no ko iri o nabi Mikha o mamahanda do iadino kavagat di hukuman do Kinoringan om iri-ogi mad osuau om omomos om ololomoi-no o boros di Mikha, tu pentahan-no di kosinangan om kopioondusan om kovosihan do Kinoringan di rumikot-ogi? Ino-no, kakali otopotino hukuman do Kinoringan sid sokoviai i gama monipu om pakaraat di kabanaran do Kinoringan. songlinsou nga amu posuri i Kinoringan ko amu posunuon. Rontob-nopo, okonko ino o kompusan dit usuran di bansa dot Israel, ino bansa di dang Kinoringan. Iadko i noumba laid do Kinoringan kananganko i kogunaan do riniba, kakali mongumpai i Kinoringan di kosunuan di kenginan dau sid tanga do riniba. Ong norungoi-no kavi i kovosihan dot ongoulun, tu nakaraat-no banal, kakali ong i Kinoringan kadapat monimpuun vagu mangahatul om mongumbasi sampai mongimvagu di riniba om vinangun.

Amu elaan tokou do sera pamahanda i Mikha do iadino. Varo`t ulun minanarang dot ino boros dit a-ko piro ayat dino, okonko i Mikha o minongimbulai. Kagi, i boros sid Yesaya 2,1-4 meradi banal dot opodok o pitonidan. Topot, tu anaru-naru i sid Fasal 4, okonko i Mikha o minamakai di boros di Yesaya, antawa i Mikha minolos di boros dino sid nabi Yesaya, retan dioti, ino boros dino antad iso o nabi dit okonko elaan tokou i ngaran dau om it inantadon om rikoton dau. Tu i hiza dot it ongoulun sid Babil mongumpug di sokoviai it ongo boros om bahanda di Mikha sampai inovit-no i boros di nabi dino sid pomogunan do Yahuda, hiza di minuli ioti antad sid Babil, pinakai dioti i boros di Mikha dino sid gama

sumambayang do mongohondom di gazadan do Kinoringan. Ino hiza diri nokembulai-no sid dioti i harapan ponong sid karajaan do Kinoringan di rumikot-ogi, isuhut di bahanda di Yesaya om i nabi vokon. Sabap ino, ong kodung popuhondom ioti di boros di Mikha, niamung-po dioti i bahanda dit nabi dit a-narait i ngaran, i tomodon, mangarazou di gama do Kinoringan mongulit di bansa dot Yahudi om mongumba di karajaan dit muaki di raja Daud (2. Samuel 7,12-13).

I Ino boros: manjadi i hiza di sid tohui banal, manarang dot ino hal dino okonko hal dot oduruk,ko suvab-suvab dino. I nabi pentahan di hiza di sid sampaping di rontob do hiza biano, i retan tokou, hiza do penlaid, ino-no i kosunuan di kenginan do Kinoringan ko i kotulukan di kinourugan om kosopulan om kosusian. Kaharati i nabi do varo panangan om rikoton om kotulukan di kobuatano do riniba om vinangun om i hoturan do Kinoringan. Manjadi i nabi posuntu dino kotulukan, i retan do karajaan do Kinoringan di rumikot-ogi do iadko burul di banalko asavat, okonko rontob ompulongon. Topot kakali momoros dot inot ompulongon do Yerusalim jumadi do burul dot asavat banal. Ong asavat o burul sampai kikuta sid timpak do burul dino, a-milo-milo otimpan dot ongoulun di sid mintutuk. Retan di nabi, dot asavat banal i kuta do Yerusalim vagu, otimpan di sokovia i it ongobansa. Sabap ino burul dino nakatanga sid songpomogunan. Kakali kiroon di Mikha dot i pomogunan iadko pinggan do minsanko sid koribing kakali kotimpan di tanga, ong kodung asavat banal. Ong monorou i nabi do iadino, engat dau dot ino hiza di rumikot-ogi, pomogunan om vinangun vagu dit amu mirad di hiza diri.

Manjadi, ong kodung otimpan i burul dino, mimbaris-no it ongobansa rumikot om tumakad-no sid burul dino, tu sumamba sori, iadko it Ongosilam humaji sid Makka. Amu-no osusa do mongodim om mongingut dit ongobansa rumikot sid Yerusalim. Gamko ioti kondiri, antad kosimbanaan do ginavo magavi tumoronong do iadko murulun o vaig. Vokon-no ong tumakad, vokon-no ong mad murulun o posuntuan di nabi di kobuatano om gama dit ongobansa. Iso-po o kenginan dit ongobansa, humarati om sumuhut di ralan om vazaan om tudukan do Kinoringan. Na i tanda di karajaan dino, kopioondusan om kabanaran. Amu osusa dot varo pakakas do rumpak, gam ino pakakas dino simbanan om supuon do pakakas mutanom om mongomot ko mongorob. Amu osusa-no it ongosukod vagu misisingilo mirumpak dot miringkozou sid onogovuton om himbaan do tumoraining mamatai do sangod, gam kotibang kavi mongus-ongus om rumehat sid ongopodtungongisan om mangakan di kouvaan dot anggul om nunuk. Aso boros di nabi dot i hiza dino mongimbulai do Kabun dot Eden ko i tana sosogulian. Ong i dau do harapan iadko it ulun di mutanom do banalko osinang, ong kiuva it anggul om gandum om i nunuk. Aso kiroon dau isuhut dit tangon di kogumuai it ongobansa di retanko varo rumikot i hiza di Paradis, ko sid Momogun, ino tana sosogulian dot sid kazu kolizan dino monguva do sandangau om muroun do sandai sampai nansak-no laid it ongoombolog mulud-tulud sampai it ulun ong kodung kumabang, sumuvang-no it ombolog di nansak laid do bai mongunam-po it ulun mangakan, amu osusa do magazau-po ko mangagaras do dupot. Ong it ongobansa di tumoronong do iadino, kakali mad sumuhut di dau do harapan, isuhut di dioti do kohorotizan. I momoros i nabi do iadino, pogili iosido di pongitungan di kosipan dioti diri, ino-no, misanko kakali ioti sid tanga di hiza biano, ino hiza dino varo rikoton om varo kosurutan, iadko it ongobansa di kakali mangasip om sumamba sid dioti do harapan, nga osodia ioti do tumoronong om sumamba sid Tuhan Kinoringan, kodung korikot i kotulukan do hiza. Topot ong i bansa do Yahudi nakaharati dot isai banal o puun do harapan om isai ot atag do sambaon om hormaton, ino-no i Tuhan Kinoringan di sampai penlaid, iri-no ko iri (5).

4,14 om 5,1-5 I kosondoto di kuta Yerusalim om i kampong Baitlahim

It ayat 14 pembulai do nokosiat it a-ko piro ayat 4,1-5 sid gama di nabi mamahanda di hukuman ponong sid bansa do Yahudi. I Mikha monuturan do nolimputan i kuta do Yerusalim dit ongojojal dot Assur (701 TGM) om i raja Sanherib. Anangan i bandar om it ongoulun sid bandar di hukuman do Kinoringan. Tu ong sangod manangod om mananus di bandar dino, tantu suhu do Kinoringan. I tungkat di hakim, tanda di gama dau monukat do kabanaran om karaatan, bambangon di sangod, tu aso kabanaran. Kagauk o boros di nabi ponong sid ongomangahatul. Iso-po gamaon dot atag sid Yerusalim, baiko humongkob-po om mogkikip, om tumorima di babambang di sangod. Varo`t a-ko piro o pongoretan dit aso tinganan manalin potombus sid Momogun, retan dot ioti sid Yerusalim: mirumpak do mongogusa di sangod o ngaran dikou, dot otopot, ogusa-kou-no om olimputan-kou-no, ko i raja, hakim-no iosido, ohukuman-no

iosido. Okonko i raja mangaratu do hukum do mambang, i tungkat dau sid kisala, inoi nga iosido o salaon. Ong iadino i kovosihan ponong sid bandar om kuta Yerusalim, ino-no i bandar dit oholian kosumbang om mokindazou,, tumopik i nabi sid iso kampong dit opodok banal om it aso ngaran, ino-no Baitlahim, i kampong di kingaran, Valai do roti (kakanan). Okonko sid Ibu kuta o harapan di bansa dot Yahuda om i songpomogunan om riniba, inoi nga ino kampong dit a-ko piro ot onkob, Baitlahim o ngaran.

I Matius 2,5.. mongimbulit dit a-ko piro o boros antad sid Fasal 5 dino, kananganko i kinosinian di Yesus sid kampong Baitlahim. Ino boros om bahanda bahagi di kogunaan di Baitlahim, nga bahanda antad sid Yahwe. Ino ngaran koduvo, Efrata, nga ngaran di turunan om i tempat dioti sid kobuburulan di retanko Efrata. Amu oboros banal i kinalandazan, bai kinembulazan di raja vagu ot arait dot aso panarangan do kokuro-kurazan di kembulazan dino.

Ong Kinoringan manganu dot ulun do raja, okonko sid bandar ko sid turunan om tirizan dot asavat o monimpuun, inoi nga sid tutusan dit aso ngaran, inot ongoulun di mintoron sid sarazo ponong sid belantara, sid pomogunan dit aso ngaran om amu nokoronuw. I Kinoringan amu posuput di karajaan vagu sid karajaan laid diri do bai polombus-po di kobuatano laid diri, inoi nga tanid o vaza om tanid o hoturan.

Ino rurungan dot Efrata minsanko narait sid ongorurungan dit kiguna bahagi di tentera di karajaan do Yahuda, nga amu, tu mad okudik ioti. Sabap ino, ong bai inot a-ko piro ot onkob om varis dot Efrata, okonko harapan laid diri bahagi di gama mangajaga om monunda di karajaan do Yahuda. Topot sid tohudi, ong Kinoringan mangahatul, sino-no o pongonuvon do Kinoringan i Manaud di bansa dot Ongoisrael, ka. Iosido-no dino o pasok. Minsanko kikihizon ino kampong Baitlahim dino, ong sid tinoguvangon do Kinoringan, ino-no pomogunan dino o noguna om nopili-no bahagi di kosopulan om kosinangan di bansa dot Israel, gam nogunu-no di sokovia i it ongobansa (4) om antad-no sino o mimbulai i kopioondusan sompomogunan, ka.

ayat 2 mongimbulai-po di hiza di kakali i nabi o momoros om mamahanda. Bai mamading o gama di nabi mongusul do kakali ogumu o kosusaan sid pomogunan dioti, gima nokosoruvang i sangod do monusa dit ongoulun, ondu om kusai. Ino kosusaan dino lumombus do sampai pengusu it ondu di maganak di raja di rumikot. I harati, pentahan i nabi do sampai i hiza di karajaan vagu, ogoro-no i bansa dot Israel dit ongosangod. Ong itungon tokou, banal-noko ino, tu minsanko hiza dot i Mariam kitizan sampai minusu, nopogos iosido mamananau, tu sumuhut di hukum di Kaisar Augustus di minonuhu dot i sokovia i it ongoulun mamananau sid pomogunan dit angaki, tu mokisurat sid surat di zensus. Suvai korikot i Manaud dot Israel, i retanko Almaseh ko Minananggung om engkod-ogi it ongokosusaan antad sid ongosangod, ka. A-narait i Minananggung, topot i panarangan di tugas dau mongimbulai dot iosido ot noboros sino (3). Iadko i Yesaya (7,3.14..) pentahan do kouli vagu it a-ko piro it ulun antad sid kinuripanan om kinarakapan om iri-ogi varo`t anak do kosino di palabus di bansa dau antad sid kouripanan om pengkakat-no vagu di karajaan dot Israel, i Mikha pentahan do iadino do ngaran-no manarang di sokovia i harapan sid raja vagu dit antad sid Baitlahim. I hoturan di raja vagu peradon di Mikha di gama di manaud do bahanan do pangazam, isuhut dit ongopananrangan laid sid Kitab kananganko i gama di raja Daud om i vokon. Gam i Yesus kondiri, nga mamakai di tugas di iadino di maanarang iosido do nunu i kosusaan di bansa diri om kuran ot atag o gama mamung mangahatul di bansa di mad bahanan do domba dit aso manaud (matius 9,35-38) ko i boros dau sid Yahya 10,1-16.

Ino-no i tugas di raja vagu, iosido o mongontok di Tuhan Kinoringan, tu wakil iosido do Kinoringan (sid ngaran di Tuhan Kinoringan, ka). I hoturan dau posinang di bansa. Kingaran iosido sid tanga dit ongobansa vokon di mongoguna di hoturan dau. Antad sid hoturan dino mimbulai-no i kopioondusan di sokovia i it ongobansa. Iri-ogi jumadi i kuta Yerusalim do Ibu Kota do Kopioondusan, isuhut di harati di ngaran dau.

Na i nabi minongitung ko minongiro dot ino harapan dino okonko alaid-po, inoi nga kembulai om kosunu dot amu-no songkuro antad diri. Sid sokovia i it ongobahanda dit ongonabi di manarang om pentahan di hiza di rumikot om i raja di rumikot, ko i Minananggung, asot elaan dioti manalahas do sera om kuran, sontoun-po ko hopod-po toun ko hatu-po ko saribu. Iti-no ot elaan dioti, varo hiza di rumikot om varo Minananggung do kembulai di manaud om mangahatul vagu, isuhut di hoturan do Kinoringan. Iadko sid TV, ong turupungon i TV, kadapat tokou memot di hal di banalko osodu do iadko agazo.

Sabap i turupung di TV pensomok dit ulun ko valai ko kurita di banalko osodu. Ong mimot do iadino, aso tinganan manantu do siombo banal om songkuro kosoduo ko kosomoko. Na i gama dit ongonabi mamahanda di korikatan di Minananggung, iadino o kematan dioti. A-osodiri dioti di sera. Topot i tomodon di bahanda di iadino, supaya it ongoulun di mongining di bahanda do iadino, sid dau do hiza om sid dau do kobuatano humarap om kumavid do kosipan, supaya hiza dioti ahatul o gama mozo om sumuhut di hoturan do Kinoringan dot okonko opiduvo o ginavo ko asazou o pongitungan om kiroon. I bahanda bahagi di hiza di rumikot o patatap dit ongoulun hiza biano do masi ponong sid korikatan dino. Tu i harapan di karajaan vagu iadko it adau dit amu-po nokosilau. Topot sumindak-no i kosilahon, tanda dot amu-no songkuro om kosilau it adau. Iti-no o sabap, dot i piumpugan masi do iadko nokosilau-no it adau, minsan kakali otuvong dot amu-po otutunan i sokovia i kobuatano, gima kakali amu-po osonsob i sokovia.

6,1-8 I syarat di Tuhan.

Sid bahanda di Mikha di iadino varo`t opurimanan dot ohuzan i bansa dot Israel om Yahuda do mangasip om humarap sid Kinoringan (3). Kondiri di Kinoringan monginsosok di kogolivangan dioti kananganko i Kinoringan: nunu-ka o monusa dikou, ka. Amu elaan tokou dot ino kinosusaan dit antad sid raja dot Assur ot boroson do baiko i Yerusalim-po ot amu nakatana. Topot ogumu-no ot ongopomogunan om kuta, do nokosuvang-no sid hoturan dit ongobansa vokon. Hiza dot norungoi-no i karajaan do Israel Utara diri, varo gama di raja Hiskia do mangatag di gama sumambayang om varo harapan di bansa do Yahuda dot ino gama di Hiskia dino notorima-no do Kinoringan. Rontob-nopo, minsanko iadino o kavantang di gama di Hiskia sid a-ko piro o hal, tigogi, hinumarap-no vagu iosido sid ongokuasa do bansa vokon, hiza do varo`t upakat dit ongobansa dit osomok sid Yahuda do sumaap di raja dot Assur. Manjadi i kiroon di Hiskia, ong amu mamung iosido sid upakat dioti dino, tantu osusa iosido, tu baiko i karajaan-po do Yahuda ot amu kumunsi dit ongobansa vokon. Iti-no o sabap do kinumunsi-no iosido dioti sampai nokotombil iosido sid upakat om i karaatan dioti, hiza dot notori-no ioti di raja dot Assur. Topot ong i razat do Yahuda kakali minongitung. Sabap nakapangatag-no i Hiskia di gama sumambayang sid Kinoringan, di minongidu iosido dit ongopatong dit ongorogon sid panambayang, tantu i Kinoringan monulung om mangapad dioti, sampai a-otogu ioti di gama do sangod mongorumpak. Kakali amu-po kaharati ioti dot ino gama sumuhut di hoturan om kenginan do Kinoringan, suvai iseso o ginavo om kakansangan om pongitungan om miuma-ogi. Ong kakali varo-po harapan koduvo, ino harapan koduvo dino o mongimbulai dot i harapan sid Kinoringan ngaran-no humarap om i gama sumuhut do Kinoringan, ngaran-no kosuhut. Manjadi kodung iadino, iadko a-nokosuhut om amu hinumarap.

ayat 1: I nabi mongodim om mongingut do iadko varo pihukum om varo kiis sid tinoguvangon do hakim. I hakim om it ongosasi, ino-no it ongoburul om it ongoompulungan di mintutuk do Yerusalim. Ensanan i vinangun nokodim om nengutan sumasi di gama do Kinoringan manalasai, ombo it amu atag sid pialatan di Tuhan om i bansa dau. It ongoburul o monodiri om mangaratu di katapatan.

ayat 2: i nabi manarang sid putanaon om it ongoburul di gama do Kinoringan mongohukum di bansa dau. Sabap ino dino okonko hal do koubasan, dot amu mionong di Kinoringan om i bansa dau ko i kuasa di harapan do bansa.

ayat 3: monginsosok i Kinoringan dot nunu ot a-nokonong i dau do gama ponong sid bansa dau dot ouhang iosido di bansa dau. Na inovit-no i bansa sid pihukuman, tu amu tumorima i Kinoringan dot uhangon dioti. Antawa gam i Kinoringan o ruputon dioti om asalaon. Iti-no o sabap do monginsosok om mokitarang i Kinoringan do nunu i sala dau. Tigogi, niruput dara i Kinoringan, tu manala i bansa dau, dot tigogi, gam i Kinoringan o manala om mongoklaim di kopotutan di gama dioti sumuhut di janji laid.

ayat 4: Amu minud i Kinoringan do varo timpa dioti ko varo ko aso sabap dit uhang dioti, gam monuturan i Kinoringan di dau do gama om i dau do kovosihan om kotulungan ponong sid bansa dot Israel om Yahuda. Okonko okugui i Kinoringan, okonko amu monulung i Kinoringan, okonko mangalai om posimozo i Kinoringan di bansa dau, gam ahakang o gama do Kinoringan manapul om mangagazad om mongopud dioti. Antad sid kogofoo do samod o gama do Kinoringan manaud om monunda i Tuhan di bansa dau. Oretan it a-ko piro o laang antad sid Masir sid belantara, i gama di Musa om i Harun om i Miriam mangagazad dioti sampai it notoguvangan ioti di raja Moab om ogumu-po i vokon sid tanga do

ralan kumaa sid Kanaan. Iso-no o tomodon do Kinoringan diri, pavalang om poromut sid dioti di kabanaran do Kinoringan. Banalko mongohodtol i Kinoringan dino pamarasan do kabanaran, dot i nabi o minanarang.

Insanpo dino moniim i Kinoringan do monuduk di bansa dau di kogofoo di samod om kovosihan dau sid dioti, supaya kaharati ioti do banalko amu nokonong i kobuatano om kavazao dioti ponong sid Kinoringan dit amu mongoguna ioti di ginama do Kinoringan om kuran koidu dioti antad sid ralan do kabanaran om minonimbaru do karaatan sid gama humarap dit ongokuasa vokon dit ong otopot, okonko harapan om kuasa dot atag. Minsanko sid pihukuman, kakali i samod do Kinoringan do momoros om pembulai di vaza do Kinoringan magavi pemumui dara di bansa dau, supaya muli vagu ioti om tumolikud-no di ralan ponong sid kobinasaan.

6-8 Noboros-no i sokoviai i iadino, nga kakali dot amu mongindoronok ko monigagang i Kinoringan di bansa dau do iadko hakim iosido di bai manala-po ot elaan. Gam mangagazad i Kinoringan di bansa dau sid atag o gama sumambayang. Mad nokening-no i bansa di boros di nabi. Mad nakaharati-no ioti di gama do Kinoringan monginsosok dioti do nunu o sala dau. Mad nokosodia-no ioti tumoguvang vagu do Kinoringan om kumavid di harapan sid Kinoringan. Mad nakaharati-no ioti dot banalko amu nokonong i gama dioti mongusiba do Kinoringan om nolingan-no i ginama di Tuhan. Mad engin-no vagu ioti mongoguna di Tuhan. Iti-no o sabap do mogihim it ongoulun dit avantang o vaza tumoronong sid Kinoringan. Andaman dioti do kodung tumoguvang do Kinoringan sid panambyangan, suvai varo persambaan om tumoronong-ogi. Iti-no o sabap, dot i hiza dit mongohodom ioti dit ongokaraatan om kasalaan, mongitung ioti dot ombo ot atag dot monodia do parsambaan, dot i pokisian di Tuhan o tomodon. Tu iadino laid o gama, okonko rontob ponong sid Tuhan, inoi nga sid ongorogon om pinokokinoringan do Baal om Ashera. Do sid sokoviai it ongogama do pasamba dot ongodupot, okudik ko ogumu, vokon-no om sampai murulun i raha dit ongodupot do iadko vosoi, minsanko it anak do kotuaan nga isamba. Indoson ioti ong kadapat ponogit om pozom di hungot om kotigiran di kuasa dit sambaan.

Manjadi i hiza di kotoguvang vagu di Kinoringan, opiduvo-no vagu i ginavo dioti kananganko i kopotuto di parsambaan di mongontok ko monimbang di karaato om kasalaan dioti, kenginan ong mongogorot di kosianan om kovosihan do Kinoringan.

ayat 8: banalko tanid i timpa di Tuhan. Ong ioti, amu-no ezap-izap i vaza monongkokuro, tu mogihim do katagan di vaza pasamba di tunuvan om patabul di raha sid meja do Kinoringan. Topot ong i Tuhan, moniag di sokoviai it ongopongitungan om ongokiroon di iadino. Kagi, okonko bai sid bansa dot Yahuda o porikatan di Kinoringan i timpa dau, I riniba. Ensanan it ongoulun sompomogunan ot orikatan di kovosihan do Kinoringan kananganko i kopotuto dot ulun sumamba om pasamba sid Kinoringan.

Keso, inot syarat dit atag o gama tumoronong sid Kinoringan om mongoguna di Tuhan, nokentahan-no laid, ka, ino-no, it avantang (iadko i boros laid di Kinoringan hiza di kinourugan dot i nunu-nopo i ginama di boros dau, nga avantang ko banalko avantang, ka.) Bai iti-no o kenginan do Kinoringan, oulit vagu i hoturan di kinourugan. Ong otopot, atagal ong mongoduat-no om monginsosok ko monongkokuro vagu dot ombo it atag om amu. Noboros-no om natarang-no laid kavi sid sokoviai it ongoulun dit antad sid palad do Kinoringan. I pintahan di iadino, ino-no i Minongurug. I rikoton di boros dino, sokoviai it ongoulun dit inurug do Kinoringan. Sabap ino atalahas-no do kuran dit ulun nokototol om nakakaraving sid Kinoringan. Iti-no o sabap, dot ipat-ipat it ulun kotoguvang sid Kinoringan, supaya sid kobuatano dau mimbulai i kavantango dit antad sid Kinoringan. A-narait siti i hopod pinonuhuan ko i toriso-iso o hal di mad sala, dit atag suhuton ko alazan. It ensanan i kavazao dot ulun o boroson om panangan. I gama tumoronong om tumoguvang sid Kinoringan, i retan do sumambayang, okonko hal do longoi om minta dua ko manahak do persambaan, do kouli-po sid valai, gulion-no vagu i gama dit amu atag sid ulun vokon, tu sokoviai i kobuatano om kavazao om bahazan dot ulun mongoguna do Kinoringan ko mongusiba do Kinoringan. Ong atag ino, ino-no it atag o gama sumambayang om mongoguna do Kinoringan. Okonko i liturgia do lago ko zabur ko pomintaan dua dit opuhod om aso koompusan-no o mangatag dit ombo it amu atag sid pialatan dot ulun om Kinoringan, inoi nga it atag o gama suvab-suvab sid tanga do razat pasasi di kabanaran do Kinoringan, supaya isot ulun nga aso`t aladtakan ko okihi, ko oodsitan om orugi, gam mimbulai i samod om kovosihan do Kinoringan sid sokoviai it ongoulun. Suvai

avantang i kopiopudan dot ongoulun songriniba, ong i samod do Kinoringan mopud om masi sampai mangahatul di kopiobpinezan om piniizaan dot ongoulun.

Ino samod om kovosihan dino okonko hal dot agaran om kapagasan, inoi nga hal do mimbulai om sumokot sid ginavo dot ulun dit amu engat i vokon. Ino tolu o syarat o puun di kopudan di songriniba, lobipo ong i gorija om piniizaan dot ulun Kristian, ino-no,

i kabanaran amu momingig dit ongoulun, inoi nga engat dot isai-nopo it ulun om i dau do kosurutan om kosinangan, ulun dot asavat ko osibak, ondu ko kusai, anak ko osukod, arampus ko odomon, akahag ko avanus. Sid isai-nopo it ulun, suvai atag o gama-ku do mogkovosihan om abanal o gama.

I gama misasamod dit amu minud dot asamdan laid om manamod-ogi ko monodiri dot isai ot apatut dot asamadan iosido. Suvaiko it ulun humarati di kogofoo di samod do Kinoringan sid ipat-apat it ulun sampai sid dau, om kadapat-ogi polombus di samod dino sid ulun vokon. I samod okonko hal do mokitahak-po laid om manahak-ogi. Sabap it isai-nopo it ulun, noponuan-no laid di samod do Kinoringan, supaya i samod dino lumombus-po sid vokon. Banal-no, ong amu-po nakaharati ombo it atahakan, amu milo manahak.

soumul-umul sid tinoguvangon do Kinoringan dot osibak o ginavo. It ulun di kakali moniim do rumompok do Kinoringan, iadko i Adam dit ozi do kerad iosido do Kinoringan, sumuhut di cadangan di vulanut, ko i Kain i minongivogu dit obpinai dau, ko i gama di kinoruhangan di Yesus mioduw dot isai i rumbul satu dioti, minsanko nokopomoros-no i Yesus do siombo o rikoton dau sid Yerusalim om kuran it atag do mokiuripon, ong ozi do rumbul satu iosido sid rombongan dau, nga kakali amu-po osodia do masi om mopud sid tinoguvangon do Kinoringan, kakali iosido di dau do kogofoo om dau do hormat om bantug. Topot isot ulun nga aso`t apasi bahagi di kondiri dau (Rom 14,7-9).

I Mikha mongonsi dit atag o gama dot ulun, ino-no, Kabanaran, samod, kosibako do ginavo. Ong i Amos minongohodtol di kabanaran. I Hosea mongohodtol di samod do Kinoringan sid bansa dau om i Yesaya i kogofoo di kohormatan do Kinoringan. Ikid nabi, varo dau do nihodtol om dau do habal om bahanda kananganko it atag o gama sid tinoguvangon do Kinoringan.

POGIHIMAN

1. Umpatod	1
2. Panarangan dit ensanan i Kitab Laid	2
3. Tafsiran di Buuk Kinotimpunan	10
4. di Kolobusan - Ulangan	37
5. di Yosua	47
6. di Hakim	49
7. di Rut	51
8. di 1.-2. Samuel	51
9. di 1.-2. Raja	56
10. Tafsiran dit a-ko piro nabi	60
11. i nabi Yesaya 1-5	61
12. i nabi Hosea	71
13. i nabi Amos	83
14. i nabi Mikha	100
Pogihiman	118